

Joh. Fridericus Frid. 1731.

Joh. Fridericus Frid. 1731.



24.13

Bibliotheca Helvetica  
Ph: Bridel past: in montreux  
1872.

rarum volumen

H: 111-31-

Il y a des détails sur le conclave de Bâle  
l'élection et le couronnement du Pape

Folia  
p: 98-117

La première partie comprend la "Cosmographia"; la seconde partie qui comprend l' "Historia bohemica", a un titre particulier, une pagination spéciale et une adresse propre. Le titre porte : "Aeneae Sylvii Piccolominei, postea Pii II papae, Historia bohemica". L'index de cette seconde partie a été relié par erreur au milieu de l'index de la première partie.

B N P



ÆNEÆ SYLVII  
PICCOLOMINEI  
POSTEA  
PII. PAPÆ  
OPERA  
GEOGRAPHICA  
ET  
HISTORICA.



D 74<sup>1</sup>

HELMSTADII,  
Impensis JOH. MELCH. SUSTERMANNI,  
Bibliopolæ ibid. M DC IC.



GENEAE SYLVII

PICCOLOMINI

POSTEA

PILIPPAE

OPERA

GEORGAPHICA


ET

HISTORICA



Impensis JOH. MELCH. SUSTERMANNI  
HATTA





# COSMOGRAPHIA

SEU

Rerum ubiq; gestarum historia  
locorumq; descriptio.

PRÆFATIO.



*Vacunque Mortales agunt, siue  
privatim siue publicè, calumnie  
subjacent, nec divinis operibus  
maledica lingua parcit. tantum  
sibi humanus arrogat intellectus!  
Quid nos speremus historiam cum  
veterum aliquorum tum nostrorum temporum tra-  
dituri? An fugiet laborem nostrum malignus in-  
terpres? Minime quidem, nec tantum nobis arro-  
gamus. Unde hoc, inquit, otium Pontifici Maxi-  
mo? quod in scribendo tempus absumpsit, Christi-  
ana plebi detraxit: Cur non utilius sese exercuit?*

A 2

tem-



tempora nostra & res vulgo notas inculcat, quis fructus? quæ legendi voluptas? Nec vera prodit, nec prodita ita exornat, ut auditorem delectent. Verum qui scripta nostra fastidit, prius legat, deinde vituperet. Non ingentia solum facta, sed tenuia quoque novisse saepe ex usu fuit, nec tempora nostra non admiranda minoribus videbuntur. Quod si lectorem scribentis elegantia non tenebit, varietas rerum & novitas abire non sinet, nec liber tam ineptus, qui non afferat aliquid emolumenti, nec nos falsa pro veris astruemus, scientes nil tam contrarium esse historia quàm mendacium. Nugas in fabulis, in historia verum quærimus & serium. Nec nos plebem suo tempore fraudavimus, qui nec rem divinam negleximus, nec consistoria seu publica seu secreta pratermisimus, nec supplices audire contempsimus. Sed nostrum senium sua quiete privavimus, ut ea memoria mandaremus, quæ digna cognitu nostra pertulit ætas, cum brevi veterum recensione. Nocturni sunt hi labores, nam quæ somno debebantur, horarum maximam partem scribendo consumpsimus. Fatemur, melius suas vigilias expendisset alius, sed dandum fuit aliquid menti, quæ his lucubrationibus oblectata est. Nec nos latet Damasos, Gregorios, Leones, Bonifacios, Innocentios, & alios quam plureis ex nostris antecessoribus  
longè



longè utilius otio suo fuisse usos. Sed neq̃ hoc nostrum non frugi est. Historiam enim texuimus quàm nostri majores vitæ magistram appellaverunt. Nec abre, si quidem prudentia est quæ vitam ducit. Prudentiam verò, multarum & magnarum rerum cognitio parit, quàm nemo inter scriptores melius Historico tradit. Sed quid contendimus tanquam maledicis occursum clausurique ora? frustra nitimur, & in dextro & in sinistro latrant itinere canes, nullius vitæ sine reprehensione cucurrit. Communem sortem æquo animo ferre decet. Quodcunq̃ de nobis judicium fuerit, non inviti subibimus, quando in hac historia nec optimorum speramus laudem, neq̃ pessimorum timemus vituperium, neq̃ qui nobis detraxerit, id gloriæ assequetur, ut omnes ei consentiant & fortasse futura ætas id approbabit, quod nostra rejecerit. Scribendi ordo sic erit: Quæ propter nostrum ævum gesta sunt memoratu digna (quantum cognovimus) enarrare curabimus, prisca nonnulla præmittentes, quæ vel cognitionem majorem rerum, vel ornatum afferant. Digeremusq̃ singula per sua loca, & ab orientali plaga facientes initium, per medias provincias narratione deducta, ad occidentales nostrasq̃ oras remeabimus, de locorum gentiumq̃ natura & situ, quæ videbuntur necessaria, inferentes. Et



quoniam rerum quas scribimus, quasq; mortales  
agitant, campus est ipse terrarum orbis, quatenus  
colitur cum interjectis & circumfusus aquis, pauca  
de ipso in communi attingenda sunt, priusquam  
parteis ejus & locorum historiam  
aggrediamur.



De





## CAP. I.

DE MUNDO IN UNIVERSO FORMA  
EJUS ET PLAGIS TERRÆ.

Undi formam omnes ferè consentiunt rotundam esse, idemq; de terra sentiunt, quæ in medio rerum constituta, gravia quæq; ad se trahit, aqvis majori ex parte submersa. Sunt qui arbitrantur quatuor ejus plagas apparere, quas magnus interfecet oceanus duobus amplissimis fluminibus eas ambiens, quorum alterum Zodiaco subjiatur, alterum ab aurora dextra lævaq; per Polos defluens extra columnas Herculeas jungatur, atque in hunc modum totius terræ quatuor portiones, velut ingentes insulas emergere, quæ cælo subjectæ benigno mortalium habitationes admittant. Parmenides terram sicut & cælum in quinque zonas partitus est, quarum duas polis propinquiores nimio rigore frigoris, & terram quæ cursui solis objiceretur, excedenti æstu inhabitabiles existimavit. Reliquas hinc atq; inde inter torridam & gelidas felici temperamento culturam recipere: quem plures, cum Græci tum Latini, secuti sunt. Pleriq; unam tantummodo terræ partem emeruisse tradiderunt, inter septentrionem & æquinoctialem circulum, idq; divinam mentem hominum causa statuisse, digna sententia quam Christianus approbet. Hujus figuram alii sphericam, alii oblongam faciunt, his Claudius Ptolomæus consentit, & probabilior videtur opinio. Homerus terram omnem quam incolimus, ablui oceano prodidit,



didit. Neq; alienum est insulam eam esse. Nam quocunq; accedere ad extrema terræ mortalibus permissum est, mare invenitur, quod oceanum appellamus, & hunc nostræ habitabilis terminum quæqua versum existimant. Ptolomæus habitationem nostram à quatuor orbis partibus terra incognita claudit, quamvis plerisq; in locis oceano terminari affirmet.

## CAP. II.

*An mare circumnavigari queat,  
sententia.*

**C**ircumnavigari an hæc insula queat, dubitatum est. Strabo Gnosius australe pelagus propter intolerabilem æstum, boreale quoniam frigore concretum esset, minimè navigari posse putavit. Julius Solinus Jubæ testimonium adducit, qui universæ partis terræ meridianæ, quam plurimi propter solis ardorem perviam negaverunt (facta vel gentium vel insularum commemoratione, ad confirmandæ fidei argumentum) omne mare, quod ab India usque in Hispaniam retro Africam cingit, navigabile affirmavit, adjectis stationum locis, & spatiorum modo præscripto. Plinius Veronensis scribit, in Arabico sinu, res gerente Cæsare Augusti filio, signa navium ex Hispaniensibus naufragiis fuisse recognita, & Hannonem florente Carthaginis potentia circumvectum à Gadibus ad finem Arabiæ: eam navigationem scripto prodidisse: Cornelium quoq; Nepotem autorem facit, Eudoxium quendam sua ætate, cum Lathyrum regem fugeret, Arabico sinu egressum Gades usq; pervectum: commemorat Cælius Antipater à se visum, qui ex Hispania commercii gratia usq; in Æthiopiam navigavit. De septentrionali oceano major contentio est, quem tamen magna ex parte Divi Augusti auspiciis circa Germaniam navigatum constat usq; ad Cimbrorum promontorium: Caspia verò littora Macedonum armis Seleuco & Antiocho regnantibus ita explorata & pernavigata sunt, ut parvo brevius, quam totus hinc atq; illinc septentrio sit remigatus. Plinius Nepotis testimonio utitur: qui Metello Celeri Galliæ Proconsuli donatos à rege Svevorum Indos astruit: qui ex India commercii causa navigantes tempestatibus essent in Germaniam abrepti. Nos apud

Otho-



Othonem legimus, sub imperatoribus Teutonicis Indicam navim & negotiatores Indos in Hermanico littore fuisse deprehenſos, quos ventis agitados ingratis ab orientali plaga veniſſe conſtabat, quod accidere minime potuiſſet, ſi, ut plerisque viſum eſt, ſeptentrionale pelagus innavigabile concretumq; eſſet. A columnis Herculeis Mauritaniae atq; Hispaniae & Galliarum circuitus, totuſq; ſerme occidens hodie navigatur. Orientem nobis incognitum, cum religionu atq; imperiorum diverſitas, tum barbaries immenſa reddidit. Veteres tamen navigatum produnt, & oceano qui extremas amplectitur terras, à ſuis littoribus nomina indiderunt, Hispanicum, Gallicum, Germanicum, Scythicum, Caſpium, Sericum, Eoum, Indicum, Libycum, Atlanticum appellantes.

## CAP. III.

*De Marium & ſinuum diverſitate ſecundum  
varios autores.*

**S**trabo habitabilem noſtram circumfluam eſſe dicit, & ab exteriori mari multos in ſe ſinus admittere, è quibus aqvilonarem, modò Caſpium, modò Hircanum vocat, duos ab australi pelago effundi in viſcera terrae, Perſicum & Arabicum tradit, & illum adverſum maxime Caſpio. Quartum hos magnitudine ſuperare: qui mare noſtrum, quod interior appellamus, efficit. Omneis autem ab extremo mari anguſto aſtu influere. Straboni multi conſentiunt. Ptolomaeus plurimum adverſatur, qui omne illud mare quod Indicum appellatur cum ſuis ſinibus Arabico, Perſico, Gangetico & qui proprio vocabulo magni nomen habet, undiqve terra concludi arbitratus eſt. Hyrcanum quoque quod & Caſpium nominat, ab omni parte terra cinctum tanquam inſulae ſimilitudinem ex oppoſito ducat: noſtrum tantummodo pelagus ab exteriori per arctiſſimas fauces terram irrumperere, quod cum ſinibus ſibi adiunctis uſque in Euxinum & Maotim paludem exit. Herodotus etiam Caſpium mare ait per ſe eſſe: neque cum alio quoquam miſceri, longitudinis quindecim dierum curſu navis, quae remis agatur: latitudinis, ubi ampli-



us, octo. Baltici sinus nemo veterum meminit: Oceanum esse crediderunt ejus partem, qvi Germanicus appellatur, sed ambitur hic etiam continenti, nec magnis circa Daniam ostiis ab Oceano irrum-pens sinum amplissimum efficit, multasqve & ingenteis circumfluit insulas. Jordanus hujus maris mentionem facit, sed errat: quamvis Gothus cum priscis oceanum esse putet. Albertus Magnus ingentem hunc sinum esse cognovit: homo Germanicus, qvi nationis suæ limites non ignoravit.

## CAP. III.

*De longitudine & latitudine & climatibus  
terra.*

**T**Otius terræ sive ambitum sive diametrum qværerere, furor. Longitudinem habitabilis ab ortu in occasum, septuaginta millium stadiorum extendi proditum est. Latitudinem ab Austro in Boream triginta millibus minorem esse Straboni visum. Ptolomæus de latitudine consentiens longitudinem variam prodit, quam sub arcu æquinoctialis circuli nonaginta millium stadiorum esse contendit, totumqve ambitum noti orbis stadiis centum octoginta millibus constare censet. Latitudinem terræ, qvatenus habitatum existimarunt, majores nostri in septem climata diviserunt. Qvorum primum ab insula Meroë usqve Syenem per millia passuum quadringenta & quadraginta protenditur. A cujus fine secundum incipiens in Alexandria Aegypti finitur, quadringentis passuum millibus amplum. Tertium in Rhodo desinit, hujus latitudo trecentis & qvinquaginta millibus passuum extensa est. Quartum Rhodiense appellant, eiqve trecenta millia passuum latitudinis attribuunt. Quintum Romanum ducentorum & qvinquaginta qvinque millium. Sextum ad Borysthenem usqve amnem producunt, ducentis & duodecim millibus patens. Septimum ad Riphæos monteis per millia passuum centum & octoginta qvinque. Atqve ita omnium climatum latitudo supra vices centena centum quadraginta duo millia passuum complectitur,



plectitur, quemadmodum his visum, qui de terræ climatibus scriptarunt. Longitudo climatum ab ortu in occasum protrahitur, tantumque alterum ab altero superatur, quantum ab æquinoctiali circulo procul abest. Haud tamen his climatibus omnis habitabilis continetur. Siquidem longè ultra Meroen degere homines, & Ptolomæus, & multi alii prodiderunt, & ultra septimum clima, quod Riphæis montibus terminatur, magna pars Germaniæ sita est, & tota Noruegia, ipsaque Britanniæ insula atque Hiberniæ, in quibus maximi dies, haud minus quam duas deviginti horas assument: quos in septimo climate horis terminari quindecim tradiderunt.

## CAP. V.

*An sub æquinoctiali circulo ac torrida zona  
sint habitationes.*

**A**N verò sub æquinoctio habitatio sit, dubitatum est. Eratosthenes perbenignam ibi temperiem esse arbitratur. Idem sentit Polybius, qui solum illud sublime asserit: & imbris irrigatum. Posidonius sub æquinoctiali montana esse negavit. Quidam æquinoctialem circulum extra omnem terram, per oceanum ferri putaverunt. Sic enim Homero visum est, qui solis equos ex oceano bibere, & sidus ipsum inde nutrirî putavit: quem secutus est Macrobius. Nec magnus Albertus ab hac sententia procul fuit, qui tantum humoris sub torrida zona consumi existimavit, quantum sub polis assidue gigneretur: quibus in locis ab excellenti frigore aquas ex aere perpetuo generari asseruit. Ptolomæus adversus est, qui Taprobani insulæ partem sub æquinoctio collocat, & multas Aethiopum genteis. Nonnulli paradisum terrestrem sub ea cœli parte sitam crediderunt, quibus sacrarum reluctatur autoritas literarum, quæ Tigridem & Euphratem fama notissimos amneis ex Paradiso fluere commemorat, quos à septentrionali plaga in Persicum devolvi sinum non ignoramus. Minimè tamen propinquitas solis directique sideris radii habitationem impediunt, locorum opacitate opulante,



culante; & noctium humiditate, quæ diebus per omne tempus æquales existunt: esse tamen sub æquinoctio, & per omnem torridam zonam multas vastitates, & terras humore carenteis, ac prorsus humanæ naturæ incommodas nemo negauerit, quamvis circa lucos & amneis Aethiopum populi degant. Plinius refert Dalionem quendam & Aristocleonem, & Bionem, & Basilidem ultra Meroen longè subvectos. Simonidem verò, qui Aethiopiam descripsit, in Meroe quinquennio moratum, quam insulam per noningenta & septuaginta duo millia passuum, ultra Syenem Aegypti sitam esse affirmat, sicut Neronis exploratores renunciavere. Apud Syenem vero conversionem Solis æstivam ponunt, & ibi torridam incipere zonam, ab æquinoctiali tractu gradibus quatuor & viginti distantem, hoc est stadiis duodecim millibus, quæ passus efficiunt quindecies centena millia, ex quo fit, ut paulò ultra medium, inter æquinoctium & Syenem jacentem Meroen accipiamus. Ptolomæus ultra æquinoctium Agisymbain regionem habitatam ponit, & Lunæ montes, ex quibus Nili paludes oriuntur, & Antropophagos Aethiopus per gradus circiter sexdecim, atque in hunc modum, per decies centena millia passuum, cultura hominum trans æquinoctium invenitur, quod spacium non minus terræ quam duo climata complectitur.

## CAP. VI.

*Partitio nostra habitabilis in Asiam, Africam & Europam treis principales parteis, & ubi conjungantur.*

**C**onsensu omnium receptum est, totius habitabilis treis præcipuas existere portiones, quarum præ magnitudine, prima est Asia, secunda est Aphrica, tertia Europa. Asia conjungitur Aphricæ, (sicut Ptolomæo visum est) per dorsum Arabiæ, quod mare nostrum ab Arabico sinu disjungit. Nemo id negat, sed adjicit ille alio in loco conjungi per terram incognitam: quæ Indicum pala-



pelagus circumplectitur, in qua sententia penè solus est. Omneis enim quos offendimus de situ orbis scribenteis, mare Indicum ad austrum & orientem sine terminis ponunt, & partem oceani esse volunt, sicut ab his traditum est, qui ab Arabico sinu in Atlanticum mare, & ad columnas Herculis navigarunt. Europæ & Asiæ conjunctio fit per dorsum, quod inter paludem Maotim & Sarmaticum oceanum excurrit super Tanais fluvii fonteis. Aphrica nusquam per sese Europæ cohæret, hinc freto Herculeo, illinc Asia interiacente discreta. Fuerunt qui eam ab Asia disjungere voluerunt, id terræ intercidere meditati, quod inter rubrum & nostrum pelagus medium est, cujus latitudinem non amplius quam mille & quingentorum stadiorum esse dixerunt, primusque omnium Sescstris Aegypti rex id efficere cogitavit. Mox Darius Persarum, deinde Ptolomæus sequens, qui fossam eduxit, latitudine centum pedum, altitudine triginta: longitudine passuum triginta septem millium, & quingentorum. Ultra progredientem metus inundationis deterruit excelsiore tribus cubitis rubro mari comperto, quam terra Aegypti. Plinius omissam fossionem asserit, ne mare immissum aquam Nili corrumpere, quæ sola potus præbet Aegyptiis.

## CAP. VII.

*Qui Africa, Europa, Asia limites: & divisione  
Asia per Taurum montem.*

**N**ili amnem plerique limitem esse inter Asiam & Africam volunt. Melior per maria certiorque partitio est, ita ut peninsulam Africam accipiamus, undique mari cinctam præter Isthmum, qui à Pelusio in Arabicum sinum excurrit. Nec usquam septentrionalior est Alexandria: quæ triginta & uno gradibus ab æquinoctio distat, nisi fortasse promontorium aliquod aut in nostrum, aut in Atlanticum pelagus paulò amplius procumberet. Europa per Hispaniam, Italiam, & Peloponnesum australior est, parallelum qui per Rhodum ducitur attingens, in septentrionem per Germaniam & Nor-



vegiam maximè protensa. Quinto & sexto climate felix, ulterius non adeo benigna Asia ad septentrionem & ad meridiem extenditur. Australiora ejus latera Moroë sunt opposita, quamvis aurea Chersonesus in India ad æquinoctialem usque circulum protendatur, partes ejus magis Boreales ad Scythas pertinent, intra & ultra Imaum montem, quæ ad parallelum usque per Thulem proferuntur. Taurus mediam quodammodo scindit, qui ab occidente in orientem excurrrens, partem ad aquilonem, partem ad meridiem relinquit, Græci alteram interiorem vocant, alteram exteriorem. Latitudo montis plerisque in locis stadiorum tria millia continet. Longitudo quantum Asia, stadiorum circiter quinque & quadraginta millia, ab ora Rhodiensi usque ad Indiæ & Scythiæ extrema orientem versus: caput ejus inter Cariam Lyciamque confurgit: quibus in locis modo Cadim mons, modo Cragus appellatur, neque altitudine, neque latitudine memorabilis, multæ sunt ejus partes: & multa illi nomina vetustas indidit. Progressus intra continentem, quantum Lyciæ fines extenduntur: tum primum & attollitur ex promontorium Masicytum ad dexteram emittit quod in mare Pamphilicum usque procumbens Pamphiliam ipsam Lyciamque disjungit, mox ad septentrionem vergens, Celenorum efficit jugum, quod ad magnam Phrygiam Lycaoniamque respicit: transmissa verò hinc atque inde Pisidia Ciliciam attingit: & Antiochia à sinistris relicta in duo cornua dividitur, quorum dextrum Tauri nomen retinet, sinistrum Antitaurum vocant, qui septentrionem versus incedens, minorem Armeniam à majori determinat, relicto ad sinistram jugo versus Euxinum pontum, cui Scordisco est nomen, & orientalia Cappadociæ à minori Armenia sejungit. Ex Tauro verò cum ad extrema Ciliciæ pervenit, Amanus oritur, qui Syriam à dextris relinquens ad Euphratem usque versus orientem digreditur, nec interruptus (ut Straboni placuit) nomen amittit: sed multum in altum latumque crescens, multifidus efficitur. Pars Australior Taurus est, qui Armeniam à Mesopotamia determinat, pars septentrionalior in multos quasi ramos scinditur. Ptolomæus post scissionem Euphratis Amanum montem iterum appellat Taurum, inter Armeniam Mesopotamiamque protensum, donec rursus ab amne Tigridis interruptitur, ultra verò Niphatem nominat, cui Assyria in dextro latere subiacet,



jacet, & Adiabena regio, qvæ demissa ultra Capri amneis fonteis. Niphates, in duas scinditur parteis: Ea qvæ ad septentrionem vergit, Caspios monteis efficit: qvi ad Hyrcanum pelagus deferuntur. Qvæ verò ad meridiem inclinat, Choatra mons appellatur: qvi juxta Assyriam aliquamdiu progressus, in austrum rursus in duo cornua dividitur, qvæ Medorum provinciam includunt. Septentrionale nunc Zaggeus mons, nunc Orontes appellatur, Australi Parthoatras est vocabulum, qvo Media disjungitur à Perside. Coniunguntur iterum, hæc inter se cornua circa finem Mediæ ad orientem, & iterum disjunguntur, Ragianam Sigrianamqve terram includentia. Circa finem verò Sigrianæ denuo propemodum coherent, ita ut portam qvandam videantur efficere, qvæ in Parthiam iter aperiat. Nam & Parthia Tauro cingitur: cujus pars septentrionalis Coros vocatur. Inter Hyrcaniam Parthiamqve discurrens orientalis Masdoranus, qvi Parthos ab Aria separat, Australis Parthoatras sicut circa Persidem Mediæqve nominatur, hic Parthos à Carmania prohibet. Coros autem Hyrcaniam prætergressus promontorium non parvum à se dimittit, quod ad Hyrcanum mare procumbens Margianam ab Hyrcania separat. Ipse inter Margianam & Ariam dilapsus Sariphus appellatur, ex quo brachium aliud excurrit septentrionem & occidentem versus, Bactrianam à Margiana disjungens, quod ubi ad Hyrcanum prope pelagus pervenit, rursus ad orientem septentrionemqve decurrit: usque Jaxartem fluvium. Ipse verò postquam Bactrianam, Ariamqve transmisit, Paropamisus vocitatur, à quo regio qvæ ad Austrum vergit, Paropamisadum nominatur, ejus conclusa jugis. Ulterius jam Indiam ingressus Caucasus dicitur, quod nomen ab Alexandri militibus accepisse videtur. Ejus gloriæ causa & per adulationem, qvæ regum comes est, tanquam ille Caucasii juga & Promethei miracula transcendisset: hæc altissima videntur, & admodum lata Indiæ montana, qvæ ad Sacas pertingentia Comedorum nominantur: deinceps Imaus incipit, & usque ad fonteis Gangis extenditur, ex quo dorsum derivatur, quod in septentrionem vergens, in oceano procumbit & juxta Ptolomæi traditionem Scythas in duas partes dividit: multosqve ramos producit, qvi Boreales Asiæ parteis multifarium partiuntur. Is ubi per aliquantum spacium Gangem prætermittit,



fit, & ad exteriorem Indiam pervenit, Emodus nominatur, qui circa finem in duos ramos dividitur, usque in eorum excurrentes pelagus, alteri Ortoꝛocoras nomen est & Seras respicit: alteri Semantinus ad Sinas terrarum ultimos, medii inter utrumque Semantini degunt, & ipsi orientalium extremi, ac penè incogniti. Sic Taurus se habet totius Asiæ divisor, cui per Antitaurum Caspium montem Caucasia juga, & quæcunque per Asiam montana excellunt propemodum conjuncta sunt. Nec malè existimasse putaverim: si quis per juga Syriæ, quæ de Tauro derivantur, & dorsum Arabiæ quod inter mare nostrum Arabicumque decurrit, Trogloditarum monteis usque ad eos qui Lunæ vocantur, & deinde per juga incognita in Atlantem usque pervenire posse affirmaverit, rursusque Hispaniarum monteis Pyreneis contineri, & illos per montana Galliarum gelidas Alpeis attingere. Ex quibus hic Apenninus Italiam omnem intersecat, illinc per Istriam & Dalmatiam usque in Peloponesum & in Thraciam altissima juga decurrunt: & inter Rhenum ac Danubium dorsum assurgit, quod ex alpibus derivatum per Germaniam, Sarmatiamque dilapsum, supra fonteis Tanais ad Riphæos monteis attingit, & per illos Caucasum jungitur, exinde per Caspium Antitaurum, denique Taurus ipse comprehenditur. Ultra quem regnare magnum Antiochum Romani permisere, ex quo fit, ut totius continentis una montium series intelligatur, quamvis plerisque in locis tumor non satis appareat.

## CAP. VIII.

*Generalis distributio Asiæ in sex præcipuas partes.*

**A**siæ partes, alii plures, alii pauciores efficiunt, nostra descriptio sex tantummodo continebit. Treis citra Taurum, & totidem ultra. Prima intra Taurum & oceanum septentrionalem, ab oriente sole usque ad Hyrcanum pelagus extendetur, propinquo cultro similis, continebitque Scytharum plurimas gentes, quæ ultra Imaum montem, citraque habitant, cum quibus & Bactriani memorantur, & Gordiani & Sacæ, & Massagetæ ultimi ad auroꝛam Sceres, & qui sinum circumhabitant Atacenum. Secunda ab eodem Hyrcano



cano mari usque ad amnem Tanaim & paludem Mæotidem profertur, habens à septentrione terram incognitam in oceanum versa, à meridie pontum Euxinum: & qui ab eo in Hyrcanum pelagus excurrunt Moschios monteis. In hac Albani, Iberes & Colchi collocantur, atque alii quamplures populi, quos uno vocabulo Scythas appellant. In tertia parte Romanis invicta viribus Parthia claudetur, Medorumque terra, & utraque Armenia, & quicquid hodie minor Asia appellatur inter Euxinum & Hellespontum, & Cilicum pelagus Isthmo clauditur, qui ab Issico sinu in Phasidem vergit. In quarta designabitur India cum Sinarum populis ad orientem extremis, & insulam Taprobanae, quæ ad meridiem sita circulum æquinoctialem transcendit. Quinta ab Indo fluvio usque ad amnem Tigrim, intra Taurum & mare Indicum sinumque Persicum jacens, Paropamisadas, Aracosios, Arianos, Drangianos, Gedrosianos, Carmanos, Persas, Assyrios, & Susianos complectetur. Sexta eademque postrema ab ipso Tigride amne, usque ad Issicum sinum nostrumque pelagus extenditur, omnia complexa quæ à Tauro monte in Persicum & Arabicum sinum, atque in Ægypti septentrionalia vergunt. His in locis priores ad orientem Mesopotamii occurrent, Babylonii ac Chaldaei, quibus contermina est Arabia deserta, ad occidentem triplex Syria, collocabitur Palaestina, Comagena, ac Phœnicia cum Cilicia, & Pamphilia ac Lycia, & cum his Arabia Petrea. Ad meridiem felices Arabes invenientur inter sinum Persicum Arabicumque conclusi, arduis montibus à reliquis sui nominis gentibus divisi usque ad insulam prope Dioscuriadem in Indicum protensi pelagus.

## CAP. IX.

*De Seribus populis.*

**H**Æc nobis totius Asiæ certior commodiorque partitio visa, nunc parteis partium attingere oportet. Seres ut antè diximus ad orientem æstivum ultimi reperiuntur: quibus ad ortum terram incognitam Ptolomæus & alii Eoum oceanum posuerunt: ad meridiem Emodi montes & Otorocoras Indos ac Sinas excludunt. A septentrione Antropophagi jacent Scythæ, quibus huma-



na corpora cibi sunt : & ut Ptolemæo visum est ignota terra : ut aliis Scythicus oceanus : ab occidente Scytharum natio. Montes apud Seras excellentes Annibi, Auzaci, & Asmiræi, ex quibus Tagurus affurgit. Amnes nominat Ptolemæus Oertadem & Banthisum. Plinius Veronensis Psitaram, Cambrim, & cui nomen est Lanos. Inter urbeis metropolim Seram ponunt, Otorocoræ monti vicinam. Inter gentes maximam Essedonum esse dicunt : quæ Taguri juga montes, & adjacentes incolit campos. Julius Solinus sicut & alii complures mare Hyrcanum ad Scythium oceanum habere ostium dixit : ibique ab exordio ejusce plagæ versus orientem à dextris profundas jacere nives, mox longa deserta, post Antrophophagos gentem asperrimam & efferatam, quæ dimidiam ferme itineris partem impenetrabilem reddidit, usque ad jugum mari imminens, quod Tabin Barbari vocant. Ultra quod, post longinquas solitudines moræ tractu, quæ spectant æstivum orientem, & ultra inhumanos situs ad Seres demum perveniri : homines inter se mites & quietissimos, sed qui alios mortaleis refugiunt. Hos aquarum aspergine inundatis frondibus arborum vellera liquoris adminiculo depectere, lanuginis tenerum subtilitate humorem ad obsequium domare asserit : & hoc esse illud Sericum in usum publicum damnosæ vanitatis admissum. Ex quo potius est ostendere corpora quam vestire, quod primo sceminis, postea etiam viris luxuriæ persuasit ambitio. Mercatores fama est primum eorum fluvium pertransire, atque in ejus ripis nullo linguæ commercio negociari : sed oculis tantum rerum precia extimare, aurumque offerre : cum Seres sua tradant, nostra non emant. Strabo Apollonii Adramytteni utens testimonio scribit, Menandrum ac Demetrium qui ex gente græca post Alexandrum in Bactria regnaverunt, res orientaleis aggressos, longe ulterius quam Alexander processisse, & usque ad Seras & Faunos imperium protulisse.



## CAP. X.

*De gente Atocorum. Ciconibus populis seu alii vo-  
lunt Sementinis, & quæ de Macino provin-  
cia denarravit Nicolaus Venetus.*

**H**is Atacenus annectitur sinus, & gens Atocorum, quibus temperiei prærogativam miram dicunt aëris clementiam subministrare, & arcere afflatum noxium colles, qui salubri apricitate, secluso undique objectu pestilentes auras prohibent, atque ideo par illis & Hyperboreis vitæ genus esse crediderunt. Plinius tradit Homerum de his privatim volumina condidisse, sicut de Hyperboreis Hecataum. Inter hos & Indos nonnulli Ciconas locaverunt. Ptolemæus Semantinos posuisse videtur, qui Seras inter & Sinas orientiores existunt, ad quos nulli nostratum hodie perveniunt, immensa barbaries iter claudit, & imperantium multitudo, quam nemo probavit pacis amicus, & qui orbis situm nosse cupiat: ignota esset terrarum maxima pars, nisi Ro. principatus & Alexandri potentia orbem aperuisset. Nicolaus tamen quidam Venetus cognomento Comes, nostra ætate in hæc loca pervenit, si vera sunt quæ ab eo narrata feruntur: is ait mare Indicum ultra Gangem cum mense toto navigasset ad Ratham fluvium se pervenisse, eoque sex diebus navigato, civitatem invenisse, quæ nomine fluminis appellaretur. Exin per desertos habitaculis montes, quos Tauri partem fuisse crediderim, decem & septem diebus in campetria descendisse, quibus duabus hebdomadibus magno labore peragratis flumen offendisse Gange majus, quod ab incolis Dava diceretur: atque in eo mensis navigatione peracta civitatem nobilissimam appulisse, stadiorum centum viginti circuitu patentem, cui nomen Dua: hic lascivienteis fœminas, & supra modum libidini deditas esse affirmat. Viros autem uxore unica contentos esse. Provinciâ Macinum appellari, elephantis refertam, quorum decem millia rex ad bellum nutriet, ipse albo vehatur Elephantio: cui catena aurea gemmis distincta, colloque circumdata, ad pedes usque pendeat. Viros ac mulieres stilo ferreo variis coloribus figurisque corpo-



ra pingere, idola omneis colere, surgentes è lecto ad orientem se solem vertere, junctisque manibus orare, in oratione trini Dei opem petere. Serpentes aspos in cibum pro deliciis habere, rubeasque formicas pipere conditas parvulis gammaris similes. Animal hoc in loco nasci suillo capite, bovis cauda, unico in fronte cornu, eoque cubitali, colore & magnitudine elephantis, quibus cum bellum continue gerit: id cornu veneno medetur, atque idcirco in honore est. Qua regio ad Cathaum vergit, boves albos nigrosque gigni equina cauda, sed pilosiore ad pedes usque protensa: pilos caudæ subtilissimos, in modum plumæ volatilis, magno in precio esse, quos equites in cacumine lancearum suspendentes egregiæ nobilitatis insigne ducunt. Hæc de Macino Nicolaus tradidit: quam provinciam ad orientem versam inter Indiæ montes, & Cathajum collocans, haud dubie regionem Sericam denotasse videtur, quæ Scytharum gentibus & à septentrione, & ab occidente jungitur. Scythas autem orientales nostra ætas in Cathajo ponit, magno Cani subiectos: sic enim illi suum imperatorem appellant. Sed illud difficile est credere, quod de amne Dua commemorat, quem Gange majorem dixit, cui veteres cuncta cedere flumina tradiderunt. Nec illud dignum fide, decem millia elephantum belli causa regem alere, nec notum esse aut fama clarum: sed longinquitas redargui non facile potest.

## CAP. XI.

*De Sacis populis quos & Nomadas appellant.*

**P**ost Seras occidentem versus Sacæ sunt, & Massagetæ, & Taburei, & Svebi, & ultimi ad septentrionem Alanorū. Ptolemæus Massagetæ duplices esse dixit, alteros Hyrcano mari vicinos, & Margianæ regioni, alteros inter Sacas posuit. Sacarum gentem ab occasu Comedo monte & amne Jaxarte conclusit: à septentrione Scythia, quæ intra Imaum est & Ascantici montis iugo, ab oriente Seris, ad austrum montibus indicis. Sacæ Nomades sunt qui carentes urbibus nemora & speluncas habitant. Fama est Sacarum gentem usque in Hyrcaniam & Parthiam prædicari solitam, quamvis multa & deserta siccaque regio interiacet. Parthos amo-



re pacis tributa illis pependisse, id erat permittere, ut statis temporibus in agros excurrerent, & prædam agerent, cum præter conventiona facerent, bellum gerebatur, rursusque pax fiebat: fuitque Nomadum vita ita instituta, ut semper vicinos infestarent, rursusque reconciliarentur. Sacæ multas invasiones fecere, modo propinquas, modo longinquas: Bactrianam occuparunt, & optimam Armeniæ regionem, quæ postea Sacasina ab eis est appellata. Invaserunt & Cappadocas, qui ad Euxinum vergentes Pontici nominantur. Sed cum ex spoliis festa celebrarent, Persarum imperatores eos funditus delevere. Sunt qui tradant Cyrum Persarum regem ducto adversus eos exercitu prælio superatum, sed fugientem eo in loco castrametatum ubi impedimenta reliquerat, bonis omnibus & præsertim vino instructa, indeque postquam exercitus paulum quieverat, relictis vesperi tabernaculis progressum quantum sibi commodum visum fuit, confedis. Ingruenteis Sacas & castra viris deserta, ac rebus voluptuosis plena comperienteis, nimmodicè se implevisse: Cyrum conversum vinolentos, atque attonitos ad internecionem cecidisse, diemque illum patriæ deæ consecrasse, Sacarumque nominasse: quæ cum celebrantur positis die ac nocte bacchanalibus, viri simul ac mulieres eò usque potabant, donec stupore comprehenderentur, tamque simplex purissimaque divinitas scædissimis hominum moribus oblectaretur. Et Sacarum Massagetarumque genteis Athasios & Corasmos esse putant, ad quos Spithamænes ex Bactrianis ac Sogdianis confugit, unus ex Persis, qui Alexandro resistere conati sunt. Citius ad insequendum Spithamænem ab Alexandro missus, barbaros pugna superavit, illi per deserta tamdiu fugerunt, donec Alexandrum ipsum adversus se venire cognoverunt. Tunc autem placaturi hostem, Spithamæni caput amputaverunt, & Alexandro miserunt, nec amplius ab eo vexati sunt.

## CAP. XII.

*De Massagetis, ubi & de adolescente qui tempore Pii papæ Solem adorabat.*

**P**ost Sacas ad septentrionem Massagetae reperiuntur: & ipsi Nomades Scytharumque genus, qui virtutem suam maxime in bello adversus Cyrum ostenderunt. Horum alii monteis



habitant, alii campos, alii paludes, & quæ sunt in paludibus insulas. Margum amnem per hos labi dicunt, quem alii Araxen. vocant, eumque plureis in parteis dividunt: & uno tantum ostio Hyrcanum ingredi pelagus, reliquis in oceanum septentrionalem exonerari. Ptolemæus Margum fluvium duobus fontibus ex montibus Sariphiis descendere tradit, & per Massagetæ, qui Margianis vicini sunt, ac Derbita in Oxum deferri amnem, qui juxta Ribios Hyrcanum pelagus ingreditur. Massagetæ equum Soli maçant, eumque tantummodo Deum putant. Multos hic error antiquorum præcipitavit, inter quos fuit Dion Prusensis, Plinius Veronensis, Macrobius, & omnis fermè illa æras, quæ à Vespasiano Cæsare usque ad Traianum cucurrit, & Adrianum. Nuper quoque in arce quæ sub ipsa Adriani mole magnificentissimè structa est, Urbinas quidam adolescens repertus est hujus stultitiæ sequax alioqui non ignarus: qui cum arcem prodere conaretur, essetque deprehensus, votum Christo vovit ei se crediturum, relicturumque solis cultum, si libertatem, atque impunitatem assequeretur. Sed raptus ad supplicium, stultum se fuisse testatus est, qui ab eo salutem sperasset, qui seipsum salvare non potuisset, tanquam Christus Jesus & dominus noster crucem tulisset invitus, qui pro nostra vita, sua sponte moriens, mortem occidit. Stultus adolescens sub nostro pontificatu sui sceleris poenas dedit, laqueo suspensus, & in Tyberim projectus. Massagetis mos fuit singulis uxores singulas ducere, neque tamen alienis abstinabant, cum quibus suspensa è curru pharetra in propatulo coibant. Fœda gens & brutis simillima, apud quam genus mortis maximè optimum judicabatur, ut senio confecti in frustra caderentur, & cum carnibus ovillis promiscuè ederentur: eos qui morbo decederent, ut impios abjicientes: tanquam dignos, qui à feris devorarentur. Equites ac pedites inter eos optimi fuere, arcu, gladio, thorace ac securi ænea utentes: aut eas zonas, aurea equorum frena ac pectoralia habentes. Ferri parum apud eos fuit, argento carebant, ære & auro abundabant, insularum cultores, herbarum radices edebant, & agrestes fructus, ex quibus pocula exprimebant. Vestis erat arborum cortex, qui paludes inhabitabant, piscibus vescabantur, phocarum coria è mare prodeuntium induebant. Montani pomis sylvestribus alebantur, non ausi oves occidere, cum paucas haberent,



berent, eisq̃ve lactis & lanæ gratia parcerent. Campeſtres etſi regione late patentem occupabant, non tamen agros excolebant, ſed ex ovibus piſcibusq̃ve vivebant. Bellicoſi homines, q̃vamyis ſimplices & in contrahendo minimè verſuti,

## CAP. XIII.

*De Antropophagis, Eſſedonibus, Arimaſſis, & id genus immanium hominum.*

**H**is ad Orientem ac Septentrionem Antropophagi ſunt, quibus execrandi cibi humana viſcera eſſe creduntur, & circa hoſ triſtiſſima ſolitudo, & mare quod Tabin vocant, & Eſſedones, quos oſſa capitum ſuorum parentum auro cincta in poculorū tradere miniſterium aſſerunt, & Scythotauri qui pro hoſtiis cadunt advenas. Julius Solinus in hac parte terras eſſe locupletes, ſed inhabitabiles dicit. Nam cum auro & gemmis affluant, Gryphes tenere univerſa teſtatur, alites ſerociſſimos & ultra omnem rabiem ſavientes, quorum immanitate obſiſtente, rarus pateat ad divites venas acceſſus. Diſcerpere enim homines, tanquam genitos ad plectendam avaritiæ temeritatem. Arimaſſos cum his dimicare gentem monoculam, ſi credere par eſt, ut intercipient lapides. Smaragdis hic primam eſſe, quibus tertiam dederit Theophraſtus dignitatem, quibusq̃ve nihil videant oculi jucundius. Chriſtallum quoque optimam hinc auferri, cujus fruſtum Livia Auguſti ad pondus centum & quingvagenta librarum inter Capitolina donaria dicaverit. Sub Maſſagetis, Tapitenis, & Alanorſis occidentem verſus, uſq̃ve amnem Ras & Aſiaticos Sarmatas, Ptolemaeus quàm plurimas Scytharum gentes enumerat. Quibus ad meridiem Jaxartes fluvius & mare Caſpium occurrit, à ſeptentrione terra incognita jacet. Jaxartem apud Sacas oriri arbitratur, & in ſeptentrionem fluere: poſtea ad occidentem verti inter Scythas & Sogdianos, demumq̃ve ad meridiem inclinantem, Hyrcanum ingredi pelagus, multa & magna flumina una trahentem: quæ partim Sogdii, partim Noroxi, Aſpilii & Tapuri montes eſſundunt. Ras verò amnem Hyperboreos emittere mon-

teis



teis existimat, qui modo in orientem, modo occidentem versus, postremo ad meridiem tendens Hyrcanias auget aquas. Inter Jaxartem, & Ras duo ingentia ponit flumina, Rhimmum, qui & ex Rhimmicis oritur jugis, & Daixem Noroso monte cadentem.

## CAP. XIV.

*Qui populi inter Jaxartem fluvium & Hyrcanum mare incolunt, & de habitantibus sub polo Arcto, & Hyperboreis populis.*

**I**Nter hos monteis, & Jaxartem fluvium, Hyrcanumque mare, Orgasos, Erimmos, Asiotas, Nerosbes, Norossos & Caragas, Scytharum populos collocat: trans monteis autem septentrionem versus Galactophagos, Aspisios, Thabrenos, Samnitas, Pamar-dos, & alios quamplures, & Albanos juxta montes, qui admodum septentrionales sunt, ab Australi parte Saxonibus locum præbet, ex quibus fortasse orti sunt qui Germaniam incolunt, quamvis suam originem ex Macedonibus reperant: à Boreali parte Nessæis & Subocis sedes dedit, qui non minus ad septentrionem vergunt quam Thule. In cujus parallelo Scythas Alanos descripsit, & hyperboreos Sarmatas, quibus ad austrum monteis collocat Hyperboreos, & Asiaticos facit, quanquam plerique Europæos esse tradiderint, nonnulli hoc genus hominum ultra Aquilonem jacere putaverunt, gentemque beatissimam esse, quam alii mediam statuerunt inter utrumque solem. Antipodum occidentem, & nostrum renascentem. Julius Solinus aspernari rationem dixit, tam vasto mari duos orbeis interfluente, & in Europa circumscripsit, apud quos mundi cardines essent, & extimi siderum ambitus, nox, quæ una sex mensium, & una totidem dies, magnam his de cœlo elementiam concessam esse, auras spirare salubreis, nihil noxi flatus habere, domos esse nemora, victum arbores ministrare, discordiam nescire, ægritudine non inquietari, ad innocentiam omnibus æquale votum esse, mortem accersere, & voluntario interitu obeundi tarditatem castigare consvesse: olim primitias frugum per virgines Apollini Delio mittere, quibus perfidia hospitem violatis,



ris, Pontificio intra fineis suos recepto, missionem neglexisse. Fabulosa hæc: nam quis credat? virgines tam longo terrarum tractu, tantasque montium fluminumque ac marium difficultates singulis annis penetrare potuisse, aut gentem esse quæ trans æquilonem habitet nobis cognitam? Diodorus Hecataeo teste utens, oppositam Celtis juxta oceanum esse insulam dicit, haud multo Sicilia minorem pone arctos, habitarique ab iis qui Hyperborei appellantur, eo quod vento Boreæ sunt expositi, insulam valde fertilem, in qua fructus annui bis nascuntur. Latonam in ea natam fabulantur, & Apollinem ibi præ cæteris diis coli, esseque homines ejus insulæ veluti quosdam sacerdotes Apollinis, cujus laudes & hymnos quotidie in cantu celebrent. Lucum præterea ingentem, templumque Apollinis, forma rotunda, multis donis atque ornamentis cumulatam. Urbem enim sacram, cujus incolæ majori ex parte citharædi existant, continueque in templo sonent, & hymnos canant: habere hyperboreos propriam linguam, & Græcis, maxime Deliis atque Atheniensibus, societate ac benevolentia junctos à priscis temporibus cœpta. Græcos enim quosdam olim ad Hyperboreos transisse ferunt, & dona sumptuosa in templo apposuisse Græcis literis inscripta. Ex Hyperboreis vero Abarmos venisse in Græciam, amicitiamque cum Deliis antea contractam firmasse ajunt, & Lunam apud Hyperboreos videri parum à terra distantem, ac terrestres quosdam veluti cumulos habentem in se manifestos, deumque Apollinem, per annos undeviginti adiri insulam, in quibus astrorum revolutiones perficiantur: imperare civitati, temploque præesse Boreadas, Borei progeniem, quæ per genus recipit principatum, quæ omnia tanquam fabulosa referens Diodorus videtur contemnere.

## CAP. XV.

*De Arimphæis populis non ab similibus Hyperboreis,  
Catajo, & quæ de his locis enarrat  
Nicolaus Venetus.*

**H**yperboreis similes Arimphæos esse dicunt, Asiaticos Scythas, qui baccas edunt, comas viri & foeminae tondent, nullum lædunt, quietem amant, nec læduntur ab aliis, fugientes ad eos tuti sunt tanquam asylo

D

tegan-



tegantur, sacri omnes habentur. Sic forsitan olim fuit, nunc gentis hujusce nulla cognitio. Jaxartem fluvium nonnulli Tanaim esse crediderunt, qui Asiam ab Europa determinat, inter quos fuisse Polieletum Strabo commemorat, cujus errorem Alexandri comites secuti sunt, qui eum transiisso Tanai adversus Europæos Scythas beligerasse tradiderunt. Sed Dimas dux Seleuci & Antiochi satis idoneus verò author, hunc transvectus amnem, ac titulos omnium supergressus, alium esse quàm Tanaim deprehendit, ob gloriam sui nominis altaria ibi Apollini Didymeo ædificavit & hoc esse collimum inter Scythas & Persas ostendit, non quod Persia Scythas attingat, sed quod imperium Persarum per Bactrianos & Gordianos ad Jaxartem usque fluvium protendatur. Jaxartis nomen à Bactrianis inditum ferunt. Plinius à Scythis vocatum Scythim tradit: hic aræ conditæ feruntur ab Hercule ac Libero patre, Cyro quoque & Semiramide, & postremo ab Alexandro: quas processionis metas ad septentrionem ostenderunt. Qui nostra ætate orbis situm figurant, Cathajum his in locis designant, quæ ultra Jaxartem commemoravimus, multasque provincias & multa regna circumscribunt, quibus unus præsit imperator, qui apud eos Can appellatur. Nicolaus Venetus apud eum se fuisse affirmat, & Urbem invenisse, quæ duo de triginta millibus passuum pateret in quadrum Gambaleschiam nomine, in cujus medio arx munitissima & ornatissima haberetur, in qua rex habitaret, & ex qua muri arcuati ad quatuor urbis angulos protenderentur, per quos accessus regi esset, si quid in urbe tumultus excitaretur, ad arces quæ ipsius in angulis eminent, quarum quælibet passuum quatuor millia in ambitu continet, & omnis generis arma tormentaque bello apta concludit. Asserit insuper & alteram se urbem reperisse quindecim dierum itinere ab hac distantem, Neptai appellatam, nostro ævo aut paulo ante ab imperatoribus ejus gentis conditam, cujus ambitus triginta millibus passuum contineatur, eamque populosissimam esse omnium: In utraq; civitate domus, palatia, templa, cæteraque urbium ornamenta, Italicis similia esse affirmat: homines modestos atque urbanos, & multis divitiis affluenteis: quod si credimus magna profectò morum mutatio facta est, ab his quos antiqui prodiderunt, qui Scythas fermè omneis pastorales esse affirmaverunt, & propemodum intractabiles: nec horrida septen-

trio-



trionis ora eos admittit mores, quibus vel Græcia olim claruit, vel Italia nunc floret: aut certè Cathajum ipsum quod tantopere laudant, minus septentrionale est quàm pictura demonstrat. Nam quicquid ultra Jaxartem colitur, si Ptolemæo fides est, ultra septimum clima protenditur: & parallelum transcendit, qui per Borysthenem describitur: nisi respondeat aliquis magni Canis imperium & ultra & citra Jaxartem extendi, ac Gordianos, Bactrianos, & alias genteis, usque ad Indiæ atque Ariæ monteis comprehendere: quod facile persuaderi potest his, qui Scytharum res gestas aliquando legerunt: à quibus magnam Asiæ partem olim subactam fuisse constat nec imperia suos tenent perpetuo limites, sed pro fortunæ varietate nunc magna sunt nunc parva. Strabo in hac parte Scythiæ ad occidentem, quam Ptolemæus Ras fluvio terminavit, Hyrcani pelagi fauces collocavit: ab utraque parte cultas. De quibus postea differemus.

## CAP. XVI.

*De Sogdianis & Bactrianis.*

**I**Nter Jaxartem & Sariphos' Paropamissosque monteis Sogdiani & Bactriani jacent, Oxo discreti fluvio: Sogdiani ad Jaxartem magis accedunt: Bactriani ad Paropamissi juga, per quos fluvius Ochus dilapsus, in Oxum fertur. Bactrianis ad occidentem Margiani sunt, Sogdianis montes Oxii, quos interruptit Oxus, per Ribios & Derbitas, in Hyrcanum cadens pelagus. Margianis ad occidentem Hyrcania occurrit, quæ nomen pelago dedit olim, sicut Strabo asserit. Sogdiani & Bactriani, nec vita multum, nec moribus à Nomadibus differebant: quamvis Bactriani mitiores essent. Nec vera locutus Onesicritus existimatur, qui Bactrianos senio, aut morbo confectos, apponi canibus vivos scripsit: ad hoc ipsum de industria enutritis, quos patria lingua sepulchraleis vocabant: quam legem sustulerit Alexander, quem ferunt alii octo, alii undecim urbes in Bactriana & Sogdiana condidisse, nonnullis everfis: quarum Cariata fuit in Bactriana, ubi Callisthenes comprehensus est, & in vincula conjectus, qui divinos honores Alexandro negavit exhibendos



esse. In Sogdiana, Paracanda: & Cyra, ultimum Cyri opus ad Jaxartem flumen conditum, quod perfici imperii confinium erat: nec pepercit Alexander memoriæ Cyri, quamvis illum coleret, propter continuas oppidanorum rebelliones. In Bactriana petram Simimetrae altitudinis stadiorum quindecim cepit, cujus ambitus octuaginta continebatur: in superiore parte planam ac feracem, ut viros quingentos alere posset. In ea Alexander & hospitio sumptuosè acceptus est, & Roxanam Oxiartis filiam duxit uxorem. In Sogdiana secus Oxum Ariamaze petram occupavit, quæ duplo altior fuit Simimetra. Xerxes in his locis urbem condiderat, & Branchidas in ea collocaverat: propterea quod Dei pecunias ac thesauros qui apud Didyma erant, sibi tradidissent: & secum è patria sponte migrassent. Alexander eos sustulit, proditionem & sacrilegium exosus, quæ scelera nulla non ætas improbavit. Per Sogdianam amnis labitur: qui postquam multam regionem irrigavit, in desertam arenosam terram evadit, atque ibi absorbetur: quemadmodum in Ariana fluvius Arius, qui regioni nomen dedit. Macedones propter Alexandri gloriam hunc amnem nobilitarunt: qui apud Ochum flumen olei fontem invenientes, multa fabulati sunt: tanquam miraculum fuerit, nitrosam & aluminosam terram, sulphure ac bitumine intermistam, id liquoris fundere: hunc fluvium alii per Bactrianam labi dicunt (quos Ptolemæus secutus est) alii secus eam: Alii ab Oxo diversum usque ad ostia, atque australiorem: & ambos in Hircanum mare decurrere. Alii ab initio diversum, & deinde in unum coire. Oxus, sicut Ptolemæo videtur, in Caucaſo Indiæ intrare, prope Paropamissades fontem habet: & in septentrionem longo flexu directus, majori demum in occasum vergit, multa & magna flumina in mare Caspium secum ferens, inter quæ Ochus est, per quem navigasse Pompejum crediderim, sicut ante diximus, cum descendit in Oxum: nam & Ochi fontes in Paropamisso monte reperiuntur. Oxi alveum multis in locis, sex septemve stadiorum latitudinem habere tradiderunt. Alexander Bessum insequens, hunc amnem ponte ex utribus facto trajecit, misitque Ptolemæum Lagi, cum parte exercitus, qui Bessum à Barbaris derelictum in villa quadam intercepit, & nudum ac catena ligatum adduxit. Quem cum Alexander vidisset, interrogavit cur regem suum simul & propinquum & benefactorem Darium interfecisset,

ad



ad quem Bessus non solum sibi soli id agere visum fuisse respondit, sed omnibus qui circa Darium erant, ut invenirent sibi salutem ab Alexandro: quibus dictis publicè sustigatus est, & in Bactria remissus, ut ibi moreretur. Sogdianam à septentrionali parte Jaxartes claudit, amnis: inter quem & Oxum duos fluvios decurrere Ptolomæus scribit, Poletimetum & Jaxartem, qui ex montibus Oxii in Hyrcanum mare descendunt: Inter Oxii & Jaxartis ostia nonnulli octuaginta parasangas esse dixerunt, Persicum autem parasangam alii sexaginta stadiorum fecere: Alii tercentorum quadraginta: qualem amplitudinem vix omnem Scythiam crediderim continere. Eratosthenes his adversus est, qui (ut ait Strabo) ab Oxii fluminis ostio, apud Hyrcanos sito, usque ad Jaxartem fluvium, duo millia & quadraginta stadia intercurrere affirmat. Alexander de suo nomine ultra Oxum amnem duas urbes condidit: alteram versus septentrionem, alteram versus orientem, in Vandabanda regione, ab Hyrcania usque in Sogdianam ad orientem eunti solem, intra Taurum & Jaxarten fluvium, quæcunque gentes occurrunt: primo Persis, deinde Macedonibus, postremo Parthis subiectæ fuerunt, Romanorum signa raro apud eas visa sunt, quamvis maris navigationem per Oxum & Hyrcanum pelagus Varro commemoret: quæ ultra Jaxartem ad septentrionem recedunt intactæ remansisse videntur: In quas Alexander expeditionem aggressus, propter Bessum & Spithamænem, qui ad eos confugerant, Besso captivo ad eum deducto, & Spithamæne à Barbaris interempto, destitit ab inceptis: cujus in Bactrianam reversi horrendum scelus commemoratur, occisi inter bibendum Cliti amici veteris & collatanei fratris, non aliam ob causam, nisi quia Philippi laudes pertinacius tueretur: sed vini magis quam hominis fuisse crimen poenitentia docuit, mox secuta, quando agre retentus est, ne se occideret, occisor amici. Bactria sub imperio Macedonum, qui Persas delevere, usque ad secundum Seleucum Antiochi nepotem retenta est. Tunc verò Theodotus præfecturæ titulum mutavit in regnum, & se regem vocavit, reliquitq; successorem sui nominis, qui cum Arsace Parthorum rege contra Seleucum se conjunxit, regnumq; tutatus est, quod sub Eucratide ad magnam gloriam pervenit. Is enim cum obsidionem Demetrii regis Indorum pateretur, audacia inaudita cum trecentis militibus sexaginta hostium millia assiduæ eruptionibus vi-



cit, & quinto mense liberatus, magnam Indiæ partem in potestatem suam redegit. Unde cum se reciperet, à filio, quem regni socium fecerat, in itinere interfectus est: qui velut hostem non patrem interfecisset, per sanguinem ejus currum egit: & corpus abigi inscriptum jussit: & in Bactriam Sogdianorum Indorum & aliorum bellis fatigati, tandem velut exangues oppressi sunt.

## CAP. XVII.

*De Aria & Hyrcania, & mirifica harum regionum vite.*

**A**ria Bactrianæ contermina est ad meridiem, & monti subiecta, qui Bactrianam habet, & Hyrcania sex millibus fere stadiorum abest: ipsi autem Arianae ad Austrum Arachosia subjacet, usque ad Indum flumen: de quibus alio loco dicetur. Margiana Bactrianis ad occidentem adiacet, & campis desertis ambitur: fama est Antiochum, cui Soter cognomentum fuit, loci naturam admiratum, magnam terræ partem muro circumclusisse: cujus ambitus mille & quingentorum fuerit stadiorum, & urbem Antiochiam condidisse. Vites hic optimas inveniri, quarum truncum vix duo viri complecti queant, racemumque duorum ferè cubitorum. Ptolemæus Tapyros ultra Margianos ad orientem posuit: Strabo inter Derbitas & Hyrcanos habitare putavit, quibus mos fuerit, proprias uxores aliis viris nuptui concedere, cum duos tresve filios ex eis suscepissent, quemadmodum apud Romanos Cato indigenti Hortensio Martiam concessit. Hyrcaniam valde opulentam esse dicunt & magna ex parte planam, præclarissimis urbibus adornatam, quarum Talabrotam, & Samariam, & Chartam, & Tappen, paulo supra mare sitam extollunt. Opulentia signum adducunt, quod vitis vini metretam afferat: ficus, sexaginta modios: frumentum ex semine nascatur, quod cadit ex culmo, in arboribus mellificetur, perfluatque semel ex foliis, nec in his opus sit diligentia: illud admiratione dignum, quod ab Eudoxo, & ab aliis de Hyrcania scribitur, ripas quasdam cavernosas stare ante mare humili interjacente



cente littore, & superioribus rupibus flumina decurrere, tanta videlata, ut cum ad ripam pervenerint, aquam in mare jaculentur, subjectum litus aspergine intactum relinquentia, ut etiam exercitui unda tecto pervium sit: indigenas in eum locum epulandi & sacrificandi gratia sæpe descendere, & interdum in antris discumbentes, interdum sub ipso fluctu apicantes, alio atque alio modo oblectari, cum simul hinc mare pateat, hinc littus propter humorem herbidum floridumque conspiciatur: Nobilitatem hujus gentis hinc licet intelligere, quod vicino mari ab ea nomen est inditum. In Hyrcania res gerenti Alexandro, Thalestris regina Amazonum, quam alii Mintheam vocant, cum trecentis mulieribus occurrit, triginta quinque dierum inter confertissimas gentes itinere facto, liberos ex rege quaesitura, cujus conspectus adventusque omnibus admirationi fuit, propter insolitum scæminis habitum, ob hoc tredecim diebus prolis gratia cum rege datis, ut est visa uterum impleisse, discessit. Hoc mare quod Hyrcaniam abluit, Ptolomæus (ut ante diximus) lacum esse affirmat, undique terra conclusum: cujus septentrionalia Scythæ occupant, Australia Medi atque Hyrcani, qui & orientis partem attingunt, cum Margianis, Derbitis, ac Rhibiis: occidentalia Armenii, Albanique ambiunt, quorum pars septentrionem attingit. Polyeletus quoque ut affirmat Strabo lacum esse, & dulces aquas habere, & serpentes nutrire, hoc pelagus asseruit: in eo verò maxime erravit, quod unum esse cum Maotica palude existimavit: inde conjecturam faciens, quia Tanais in ipsum emittit, non animadvertens duos inveniri hujus nominis amnes, ut ante diximus. Quod si Maotidi jungeretur Hyrcanus sinus, nequaquam lacus esset, cum Maotis ab Euxino ponte marinas aquas accipiat: Pontus verò per Hellepontum, & mare nostrum ab Herculeo freto salis impleatur undis. Plinius Veronensis, Julius Solinus, Strabo Capadocus, Priscianus Casariensis, & alii complures, Hyrcanum pelagus oceani Borealis sinum esse tradiderunt, ex quo liceat usque in orientem & mare Indicum navigare: ajuntque ab oceano meridiem versus recedere, ab initio arctum, in progressu dilatatum: & præsertim in ultimo recessu, ubi à quinque millia ferme stadiorum latitudine patet: & ostii utramque ripam tenere Scythas, reliqua littora aut Scythas, aut similes Scythis: quales Hyrcani sunt, Albani, Clusi, Narisci, ac Mardi: Magnitudinem



dinem hujus maris Patrocles Pontico similem existimavit. Plinius au-  
 tore Claudio, refert id terræ spatium, quod inter Mæotim & Hyrcanum  
 jacet pelagus, centum quinquaginta millia passuum continere,  
 idque perfodere excogitasse Nicanorem Seleucum, quo in tempore à  
 Ptolomæo Cerauno sit interfectus. Verum alii trecenta septuagin-  
 ta quinque millia passuum id esse existimant. Cornelius Nepos du-  
 centa quinquaginta millia: quod alii centum & quinquaginta millibus  
 passuum, alii paulò amplius contineri dixerint, magno errore: neque  
 enim retro Mæotim ad Boream Hyrcanus offertur sinus, ut illis vi-  
 sum est: sed Pontico mari ad orientem occurrit, Isthmumque Colchi,  
 Iberi, & Albani inter duo maria obsident. Nec longum iter ab Euxi-  
 no Ponto per hunc Isthmum & Hyrcanum pelagus, ad Indiam tran-  
 seunti peragendum, Plinius existimavit: quem secutus Solinus Pom-  
 pejum magnum octo diebus ex India ad Bactros usque Alienum flumen  
 pervenisse affirmat: quo influit Oxum, per quem mare Caspium in-  
 gressus ad Cyri amnis ostia penetravit: qui Armeniæ & Iberiæ fines  
 interluit: à Cyro verò diebus non amplius quinque, terreno itinere,  
 subvectis navibus ad alveum Phasidis pertendisse: atque inde in  
 Pontum Sororia, Strabo dicit, qui multas Indiæ merces teste Aristobulo  
 in Hyrcanum mare per Ochum amnem devehi tradidit: deinde  
 in Albaniam, atque per Cyrum & sequentia loca in Euxinum & O-  
 chum in Oxum putat exonerari: quæ duo flumina Hyrcaniam irri-  
 gare censet: & Niseam partem esse Hyrcaniæ, per quam Ochus de-  
 currit: quem Aristobulus navigabilem esse retulit, & omnium flumi-  
 num maximum, quæ ipse in Asia viderit, præter Indica. Sed hoc iter  
 multo brevius eo est: quod per Ægyptum & Arabiam multasque alias  
 gentes ducit in Indiam: neutrum tamen hodie nostratibus est aper-  
 tum. Qui terræ formam nostra tempestate figurant, Ptolomæo con-  
 sentiunt, & lacus speciem Hyrcano concedunt. Solinus Xenophonem  
 Lampfacenum authorem facit, à littore Scytharum, & quo sinus  
 irrumpit Hyrcanus, Abaltiam insulam triduo navigari: cujus magni-  
 tudo immensa, & penè similis continenti existat: nec longe Oenas  
 separari, quas qui habitant, vivant ovis avium marinarum, & avenis  
 vulgo nascentibus, propter quas & alias constitutas, quarum indigenæ  
 humana usque ad vestigium forma in equinos desinant pedes. Ferun-  
 tur & alia pleraque, quæ tanquam fabulosa relinquimus. Apud Hyrcanum  
 pelagus, desinit Asiæ prima pars.



## CAP. XVIII.

*De secunda Asiæ parte & Sarmatis generatim.*

**S**ecunda incipit in occidentali littore, quæ usque ad paludem Mæotidem & amnem Tanaim extenditur, inter mare Ponticum jacens & oceanum septentrionalem. Ptolemæus hanc partem ab orienti Ras flumine clausit & Hyrcano mari, cui negavit in oceanum patere exitum, & omnes Sarmatas Asianos appellavit, qui hanc terram incolerent, præter Colchicos, Iberos, & Albanos, atque alios qui circa Caucasum Coraxemque montem ad meridiem siti sunt. Sarmatas autem in plurimas gentes, & multa nomina divisit. Ultimos ad septentrionem Hyperboreos posuit, & sub eis Basilicos, deinde Zachatas, Svardenos, Chænides & magis ad meridiem Perierbidorum numerosum genus, quorum sedes illic esse ostendit, ubi Ras fluvijs ad occidentem Solem, & Tanais ad orientem maximè vergunt, sibi que invicem propinquiores existunt. Sub his versus meridiem & ultra Hippicos montes, Siracenos collocavit, Jaxamatas, Plessios, & Melandanos, apud quos Mithridatis regionem fuisse arbitratur. Rursus ad orientem Ras flumini proximos, & ultra Ceraunios montes Sapothrenas posuit, & sub illis paululum australiores Scymmitas & Amazones, de quibus postea dicemus, quando imperium fama est eas quam maximum obtinuisse: Ceraunios montes partem esse Caucaii, versus septentrionem vergentem: quibus proximi sint ad orientalem plagam Valli, Serbi, Diduri, & Ullæ ac occidentalem Sacani & Tusci prope Sarmaticas pylas, ubi à Caucasii jugis Ceraunia videntur abrupta. Forsitan & hinc Tuscorum genus ortum, qui Hetruscos ex Italia pepulerunt. Tria flumina in Hyrcanum pelagus ex Caucasio monte cadere Ptolemæus ostendit: Udonem qui septentrionalior est, Alontem & Soanam, & inter ea Olondas & Isondas collocat, & citra Soanam Gerros. Intra Caucasium montem, & Vardanum amnem, Sanaræis & Agoritis sedes dedit. Ultra Vardanum versus Psatim, fluvijs & Boream, Conaplenos, Arinchios, Metibos, Zinchos, & Asturicanos memorat. Ulterius Tyrambas & Marubio flumini pro-

E

ximos



ximos Themeotas. Fluvios ex Asia in Mæotim magnos decurrere, præter Tanaim octo dinumerat. Inter quos Vardanus australior est, Marubius septentrionalior, cui proximus est Rhombites major, deinde Thespanius, postea Rhombites minor, de hinc Atticites & Vardano propinquior Psatis. Multa est inter veteres discordia, quam inde nasci arbitramur, quia nec montium, nec fluminum, nec gentium nomina perseverant: & provinciarum regnorumque termini multam varietatem accipiunt. A Strabonē, qui sub Tiberio Cæsare vixit usque ad Ptolomæum Alexandrinum, qui per tempora Antonini Pii situm orbis descripsit, haud equidem magnum tempus est, & tamen tanta nominum variatio intercescit, ut paucissimos Scytharum populos ex his nominari videamus apud unum, quos nominaverit alter. Sed ad rem redeamus. Strabo Cyrrhum amnem, & Araxē in Hyrcanum pelagus ab occidentali plaga immittere arbitratur, & Araxem per Armeniam, Cyrrhum per Iberiam & Albaniam decurrere, & ab ostio Cyrrhi per Albanos, Iberas, & Colchos, à mari in mare tria fere stadiorum millia esse, & isthmi rationem obtinere hujus partis quam describimus. Possidonius hanc isthmum mille & quingenta stadia continere putavit, quantum inter Pelusium est & mare rubrum, tantundemque spacii à Mæotide in oceanum esse censuit, indignus fide, quamvis Pompeio familiaris fuerit, & res ejus scripserit.

## CAP. XIX.

*De Albanis, & de bonitate soli sui, & simplicitate gentis, & prisca eorum superstitione.*

**A**lbani in hac descriptione primi occurrunt, quos pastores fuisse constat, & Nomadico generi proximos, non tamen vagos atque idcirco minus bellicosos. Inter Iberos & mare Caspium habitant, ab ortu Solis mari conjuncti, ab occasu Iberiæ finitimi, ex reliquis lateribus Boreale Caucasus montibus munitur, qui campis imminentes, & mari plurimum conjuncti Ceraunia vocantur, ut Strabo putavit, & complures alii: quamvis Ptolemaeus



maus (ut ante diximus) aliter sentiat, australe latus Armeniam contingit, quæ partim campestris est, partim montana, sicut & Cambysem, ad quam Armeni simul & Iberi & Albani conjunguntur, Cyrrhus per Albaniam fluit, & alia flumina, quæ quamvis eum augent fecundio remque terram exhibent, mare tamen confundunt propter limum, quem offerunt. Araxes prope emittit, asper ex Armenia cadens, sed quem limum propellit, alveum pervium faciens, eum Cyrrus repellit. Homines in Albania inertes fuisse feruntur, nam qui ibi militarunt, Cyclopicam eos degere vitam dixerunt, & terram omnis generis fructum etiam domesticum afferre, & stirpes omnes, & ea quæ semper virent, & quamvis ne minimam quidem culturam habeat, bona tamen omnia sine satione & inaratam gignere, multisque in locis semel satam, bis terque fructum reddere ac primo quod modios quinquagenos, idque minimè renovatam, aut ferro proscissam, vineas ineffossas manere, quinque annis putari, in bimatu novellas fructum ferre, adultas tantum reddere, ut pars maxima, in palmitibus relinqvatur, mira res, cum Ptolomæus Albaniam, in sexto climate ponat. Peccra cum mitia, tum agrestia, pulcherrimos edere fœtus ajunt, staturam hominum pulchram & magnam esse. Simplex mortalium genus, minimeque cauponarium, nummi usum magna ex parte ignoraverunt, neque numerum ultra centenarium novere. Commercia inter se mercibus facere, in cæteris quæ ad vitam pertinent inertes, exquisitorum ponderum ac mensurarum totiusque civilitatis & agriculturæ prorsus ignari, si quando ad bella prodierunt, expediti & armati, ut Armenii fuere. Exercitum majorem emittere consueverunt quam Iberes: nam pedum ad sexaginta millia, equitum ad viginti duo millia contra Pompejum magno suo damno armaverunt. Jaculatores sunt & sagittarii clypeos & thoracas habentes, & quemagmodum Iberi firmas galeas, hos Nomades ab exteris defenderunt, sicut Iberas & iisdem de causis. Aliter verò sæpe eos adoriebantur: nec sinebant agriculturam exercere. Deos Albani Solem & Lunam gentili dementia coluere. Lunæ templum Iberiæ proximum summa religione colebant, cujus sacerdos honore post regem secundus habebatur, & sacris servis, & sacræ regioni præerat, quæ multa fuit & hominibus plena. Servorum quidam afflati numine videbantur, & quodammodo di-



vinare: qui plurimum numine correptus fuit, diu per sylvas solus erravit: exin sacerdos comprehensum sacra catena devinxit, ac per annum sumptuosè aluit, postea ad sacrificium deæ cum aliis hostiis mandandum produxit, tumqve negotii quidam gnarus sacram hastam tenere, qua mos fuit hominem mactari, ex multitudine procedens illam in conservi afflati latus adegit, & cadente servo quædam divinationis signa captavere, atqve in commune pratulere, corporeqve in locum quendam delato, omnes super illud transiere. Sic enim stulta natio & à demonibus possessa, expiari, si quid peccati fuerat, arbitrabatur. Senectus honore præcipuo apud Albanos fuit, non parentum modo, sed etiam reliquorum, cum mortuis pecunias defodiebant, nec aliam defunctorum curam gerebant. Strabo sex & viginti linguas Albanorum fuisse tradit, & totidem aliquando reges, postea ad unius imperium cuncta rediisse, terram serpentina quædam latifera gignere, & scorpiones & araneas, quarum quædam ridendo mori cogunt, quædam flendo desiderio suorum, quemadmodum de Tarantulis in Calabria rumor est. Et Caspianam ad Albanos pertinere ajunt, ejusdem nominis cum gente Caspia, quæ postea obscurior facta est, & mare Caspium attingit. Ingressus ex Iberia in Albaniam per Cambisenum patuit, regionem asperam & siccam, quamvis flumine Alazanio pars ejus irrigetur: Albani & eorum canes excellentes venatores fuere, studio magis quam arte, originem eorum ex Jasone ductam existimant, qui cum Armenio Thessalo in Colchos navigavit, & usque ad mare Caspium, per Iberiam & Albaniam processit, & Armeniæ ac Iberiæ multum peragravit, sicut Jasonia, & alia compluria monumenta testantur. Trogus Pompejus Albanorum originem Italicam dicit, asserens Albanos Herculem ex Italia ab Albano monte, cum Gerione extincto armenta ejus per Italiam duceret, secutos fuisse, originis Italicæ memores, exercitum Cnei Pompeji bello Mithridatico fratres salutavisse. Albania sub imperio Persarum fuit, postea Macedonum, deinde Romanorum: sed Trajanus imperator his regem dedit, nunc non satis certum est cui pareant, quamvis sub regno magni Canis degere credantur. Ab his Albani orti sunt: quorum pars hodie in Peloponneso, pars in Macedonia sedet, juxta Dyrachium, quorum dux est Georgius Scanderbei, qui multa per nostram ætatem adversus Turcas pro Christi nomine prælia gessit, magnanimus & invictus



viētus copiarum ductor. In Gothorum exercitu fuere, cum illi Græcorum imperium affligerunt: deinde longæ militiæ affecti tædio, in Adriatico littore confederunt.

## CAP. XX.

*De Amazonibus & Gargarensibus, & ex quibus prolem suscipiebant.*

**T**Heophanes qui cum Pompejo militavit, & Albaniam procuravit, inter Albanos & Alazonios habitare Gelas & Lelegas dicit, & inter hos & Amazonas Mermadalim delabi fluvium. Metrodorus Scepsius & Iplicrates locorum non ignari ( ut Strabo refert ) Amazonas septentrionem versus Gargarensibus finitimas tradiderunt, sub radicibus montium Caucasiorum, qui Ceraunia vocantur, cum quibus & Ptolomæus sentit: quia eas ( ut diximus ) inter Ras fluvium & Ceraunia iuga collocavit, quamvis de Cerauniis paululum discordare videatur. De Amazonibus multi meminerunt, & apud Græcos, & apud Latinos, non Poëtæ solum, qui fabulosa tractant, verum etiam historici, quos à vero recedere turpissimum est. Trogius Pompejus, Justino teste, duos regios juvenes ex Scythia pullos per factionem optimatum, juventutem ingentem usque in Cappadociam & amnem Thermodoontem subiectosque Themiscyræ campos, secum traxisse affirmat, ibique per multos annos finitimos spoliare assuetos, postremo conspiratione populorum trucidatos: Sed uxores cum vidissent exilio suo additam orbitatem, arma sumplisse, finesque suos summoventes primo, mox etiam inferentes bella, defendisse: nubendi quoque vicinis animum omisisse, servitutem non matrimonium appellantes: & ne feliciores aliis aliæ viderentur, viros qui domi remanserunt interfecisse, ultionem casorum conjugum excidio finitimorum consecutas, deinde pace armis quæsitæ, ne genus interiret, cum circumstantibus populis concubitus inivisse, si qui mares nascerentur interficientes, foeminas non in otio aut lanificio, sed armis & equis & venationibus exercentes, inuistis infantium dexterioribus mammis, ne sagittarum jactus impedirentur, unde Amazones dictæ sunt. Duas his reginas fuisse Marthesiam & Lampedo-



nem, quæ vicibus bella gererent, & se Marte genitas prædicarent: à quibus magna pars Europæ subacta sit, & urbes condiderint. Sed cum partem exercitus domum dimisissent, reliquas quæ ad tuendum Asiæ imperium remanserant, concursu barbarorum cum regina Marthesia interfectas: In cuius locum filia ejus Orithya successerit, cui præter singularem belli scientiam, eximia in omne ævum virginitatis admiratio fuerit. Herculem, cui imperatum erat, ut arma reginæ Amazonum ad regem deferret, tanquam impossibile id esset, eo profectum longis novem navibus, comitante principum Græciæ juventute, inopinantes aggressum, voti compotem factum, duas tunc sorores regnum tenuisse Antiopem & Orithyiam, quæ foris bellum gerebat, cum Hercules ad littus Amazonum applicuit: Quæ domi manserant, repentino tumultu excitatas arma sumpsisse, sed facilem victoriam hostibus dedisse, cæsas captasque fuisse, & in his duas Antiopæ sorores, Menalippem & Hippolytem: Theseum captivam, Hippolytem uxorem duxisse, ex qua genuit Hippolytum, qui novercæ fraude periit: Herculem Menalippem captivam sorori reddidisse, & precium arma reginæ accepisse, atque ita functum imperio ad regem rediisse. Sed Orithyiam ubi comperit sorori bellum illatum, & raptorem fuisse Atheniensium principem, hortatam in ultionem comites, auxilium à Sagillo Scytharum rege petiisse, ex cujus genere orta esset, ab illo filium Panaxagorum auxilio missum, sed ante prælium, dissensione orta, ab auxiliis desertas, bello ab Atheniensibus victas fuisse: receptaculum tamen habuisse castra sociorum, quorum auxilio intactæ ab aliis gentibus, in regnum redierint. Post Orithyiam regno potitam fuisse Penthesileam, cujus Trojano bello magna virtutis documenta extiterint, quæ interfecta, & assumpto ejus exercitu, paucas quæ domi remanserant ægrè se adversus finitimos defendisse, usque ad Alexandri Magni tempora, cum Thalestris (ut ante diximus) ad eum in Hyrcaniam venit. Hæc Trogus de Amazonibus. Sed quid Diodorus de his scribat non incongrue referendum est. Sic enim duorum authorum, qui magni habentur, quanta sit vel concordia vel discordia, cognoscemus: Diodorus penes Thermodontem fluvium primo gentem Amazonum fuisse ostendit, quæ viris similes corporeis viribus, & bellicis artibus præstarent. Earum reginam, exercitu mulierum coacto, nonnullas vicinas gentes expugnasse,



pugnasse, filiamque genuisse, quam Martis filiam appellaverit: viros ad texturam, & muliebria exercitia deputasse, lege edita, ut solæ socminæ in re militari erudirentur, viris interdicta essent arma, maribus qui ex eis nascerentur, quo bello inutiles fierent, crura & brachia debilitasse: foeminis dextram inussisse mammam, à regina urbem præclaram in ostio Thermodoontis fuisse conditam, & Themiscyram appellatam: atque in ea insignem regiam magno splendore erectam, ab hac propinqvas gentes usque ad Tanaim fluvium domitas fuisse, cui in pugna cadenti filia successerit matre præstantior, quæ ultra Tanaim exercitu traducto, omnes ejus oræ gentes ad Thraciam usque devicerit, domumque reversa magnifica Deistempla construxerit, & ad alteram fluminis partem versis armis, Asiam usque Assyriam bello subegerit. Multis post seculis, vulgata Amazonum per omnem orbem virtute, Herculi Semeles ac Jovis filio, ab Euristheo mandatum fuisse, ut Hippolytæ Amazonis balteum ad se deferret: Herculem illato bello, acieque profligatis Amazonibus, victam Hippolytam cum balteo cepisse, quo prælio Amazonum regnum ceciderit. Siquidem barbaræ gentes contempto earum nomine, & injuriarum memores, adeò Amazones continuis bellis contriverunt, ut ipsarum nomen & genus extingueretur, quamvis paulò post Herculis expeditionem, Penthesilea Trojano bello ab Achille interfecta fuerit, quibus in rebus quantum à Trogo differat Diodorus, diligens lector facile metietur. Ephorus Amazones inter Mysiam Cariam ac Lydiam prope Cumam patriam suam, habuisse sedes arbitrat: forsitan aliquando ibi habitaverunt, ubi Ephesum, Smyrnam, Cumam & Magnesium condidere. Sed Aeolibus & Jonibus postea cessere, cum quibus ante Trojanum bellum Priamus in societate Jonum belligeravit, ut Homerus affirmat. Sunt qui Gargarenses cum Amazonibus è Themiscyra in ulteriorem Scythiam migrasse ferunt, postea ab illis discissos, cum Thracibus & Euboibus quibusdam errabundis adversus eas bellum gessisse. Quo composito his inter se conditionibus convenisse, ut in filiorum prole communicarent, viverent autem utrique separatim. Amazonum autem alias his intentas fuisse, quæ ad arationem insitionemque pertinebant, alias equorum venarionem, ac bellorum curam gessisse, arcu, securi, & pelta utentes, galeas & subligacula & alia operimenta è ferarum pellibus confecis-



consecisse, duos his anni menses fuisse sacros, quibus montem proximum conscendebant, qui eas à Gargarensibus disjungit, quo & illi more pervetusto convenientes sacrificabant, & prolis gratia, cum mulieribus coibant, idque obscurè & inter tenebras in quas-cunque inciderent. Quæ si foeminam peperissent, apud se retinebant, si mares Gargarensibus tollendos reddebant. Unde propter ignorantiam, valde se invicem diligebant, cum qualibet affinem sibi quamlibet existimaret. Strabo de Amazonibus non satis certam sententiam fert, & quod Thalestris regina prolis gratia cum Alexandro in Hyrcania permista fuerit, incertum dicit: & rerum scriptores inter se discordare, nec fide dignum esse Clitarchum, qui Thalestram scribit à Caspiis portis & Thermodoonte profectam, ad Alexandrum venisse, cum Caspiæ portæ supra sex millia stadiorum distent à Thermodoonte, nec verisimile censet, vel exercitum, vel civitatem, vel gentem unquam ex solis mulieribus constitisse, quæ sua custodierint, & aliena invaserint. Vicinisque subactis, usque in Joniam processerint, & exercitum trans Pontum in Atticam miserint, quod perinde sit, ac quis dicat viros tunc mulieres fuisse, & mulieres viros, suo autem tempore paucos fuisse, qui traderent, ubi Amazones essent & id quidem sine demonstratione. Nobis non impossibile videtur, quod prisce scriptores de Amazonibus tradiderunt, qui & in Bohemia tenuisse foeminas principatum legimus, & in Hungaria Mariam viriliter imperasse, quæ non reginam, sed regem se appellavit. In regno Neapolitano duas Joannas rerum potitas scimus, quarum altera nostra ætate, altera paulò ante, res magnas gessit. Sed puella Franciæ, de qua suo loco dicemus, non parum dubietatis affert, cujus ductu sæpe Anglorum copiæ nostro ævo profligatæ fuerunt. Sub Claudio imperatore secundo, qui de Gothis magnificentissimè triumphavit, decem mulieres ante currum ductæ fuerunt, quæ in bello captæ virilem habitum gestabant, & Amazonum genus esse putabantur: nunc de his nulla cognitio apud nos est, nec affirmare tam vetusta, neque negare, audemus: nec miramur antiquissimarum rerum scriptores inter se discordare, quando nec novissima uno modo referuntur. Ex his quæ prisce scribunt, illud constare videtur, Amazonas primo Themiscyram, & subiectos Thermodoonti campos, & imminentes montes incoluisse, postea inde  
pullas



pullas in Scythiam migravisse, unde illarum erat origo, atque id afferere Trogus videtur, qui Albanis vicinas Amazones dicit, & Thalestrim reginam inde ad Alexandrum venisse putat in Hyrcaniam. Mermedonas amnis, ut Straboni videtur, è montibus descendens, per Amazonum regionem, & Siracenam, & loca intermedia, quæ deserta sunt, in Maotim emittit: quod multum est Ptolomæo adversum, qui aquas per Amazonum agros fluentes in Ras fluvium, & Hyrcanum pelagus decurrere quodammodo indicare videtur, nisi montes aliqui ex Amazonibus in occidentem inclinent. Ex quibus Mermedonas ortus, longissimo cursu Maotim perquirat: nonnulli, qui nostro tempore orbem figuraverunt, Amazones insulam habitasse designant, quam fluvius efficit, quem Edil appellant: hunc esse Ras arbitramur, cujus supra meminimus.

## CAP. XXI.

*De Iberia, Iberis, victu, vestitu, & repub.  
corum, & quomodo, quove tempore Christi  
fidem susceperunt, quodque Georgiani  
nunc appellantur.*

**I**Beria post Albanos ad occidentem occurrit, cui ad Septentrionem Nomades adstant, & Caucasii montis accolæ: ad meridiem Armenia est, ad occidentem Colchis. Tota regio Caucasii montibus circumdatur: nam cubiti quidam fertiles ad meridiem procurrunt, qui universam Iberiam comprehendentes, sese ad Armeniam & Colchidem conjungunt: planitiem in medio relinquentes fluminibus irriguam, præsertim Cyriho, qui ortum ex Armenia trahens planitiem ipsam ingreditur, & Aragum amnem à Caucaso defluentem, atque alias aquas in se recipiens, per angustam fluminis regionem evadit in Albaniam, inter quam & Armeniam multus illatus, per uberes campos compluribus fluminibus auctus, è quibus Alazonius & alia tria navigabilia sunt, in mare Caspium erumpit. Quatuor aditus in Iberiam ducunt admodum difficiles, ex Colchide per medios Sarapanos itur, & angustias montis, per quas Phasis excurrit,



rit, centum ac viginti pontibus transmeandus: hic amnis propter flexiones asper ac violentus, ex Iberia in Colchidem fertur, convallium torrentibus multo imbri adauctis, & propter imminentes montes arctus, quam plurimis impletur fontibus. In campos autem delatus, alia & alia in se recipit flumina, è quibus est Glaucus & Hippius, quibus auctus ac navigabilis factus, exit in pontum, secus cum urbs jacuit ejusdem nominis, & lacus non procul. Aditus igitur ex Colchide in Iberiam hujusmodi est, petris, munitionibus, fluminibus & convallibus clausus: nec minus difficilis ex Nomadibus patet, septentrionem versus, trium dierum itinere, deinde angusta regio, circa flumen Aragam, dierum quatuor, cujus viæ finem murus inexpugnabilis munit. Ex Albania primo aggressus est per petram excisam, dehinc per stagnum quod amnis efficit, cadens ex Caucaso: Ex Armenia per angustias itur, quæ secus Cyrrhum sunt, atque Aragam, qui priusquam invicem concurrant, duas urbes natura munitas ambierunt: quæ saxis impositæ sedecim inter se stadiis aberant, propter Cyrum, Amozicam, propter Aragam Seumaram. Pompejus ex Armenia movens, hoc itinere usus est, & post eum Canidius. Iberiæ campos agricolæ habitant, homines ad pacem intenti: Armenico & Medico cultu montanam regionem pars eorum maxima ac bellicosa Scytharum more viventes, quorum cognati sunt, & contermini: agriculturam tamen exercent, & cum tumultus ingruerit, multa ex se atque Nomadibus hominum millia contrahunt, fuitque Iberia maxima ex parte urbibus & habitatoribus plena, & tecta fictilia habuit, & fabricatas ædificiorum structuras, & fora, & publica ornamenta, & ad sextum clima pertinet, sicut Albania. Quatuor olim genera hominum Iberas fuere. Primum, ex quo reges duo deligebantur, alter, qui propinquitate & ætate antecederet: alter, qui jura daret, & exercitum duceret. Secundum, sacerdotum, qui jura finitimorum curarent. Tertium militum & agricolarum. Quartum, vulgi, quod regibus serviebat, & omnia quæ ad vitam pertinent ministrabat: his omnia per familias erant communia, rem tamen tenebat, qui senior erat. Magnus Pompejus Iberiam Romano imperio subjecit, quæ sub Constantino Cæsare Helena filio verbi Dei fœdera, & fidem futuri regni suscepit. Mulier captiva tanti boni causam præstitit: quæ cum vitam pudicam duceret, & dies ac noctes in oratione consumeret, admirationi Barbaris fuit: quibus sciscitantibus,



bus, cur tantopere se affligeret, ita se suum Deum colere respondit, qui Christus esset. Nihil ex hoc amplius admirati Barbari, quam novitatem nominis, mulierculam in honore habuerunt. Mos gentis erat, parvulos, cum agrotarent, per vicinas domos à matribus circumferri, remedia exquirentibus. Mater quædam cum puerum aliquamdiu circumtulisset, nec salutare quicquam invenisset, captivam adiens ejus opem petiit, illa se humani nihil scire testata est, sed Deum quem coleret Christum desperatam ab hominibus salutem posse conferre, parvulumque cilicio suo super imponens, & orationem ad Deum fundens, sanum matri reddidit. Implevit urbem facti rumor, & ad reginam perlapsus est, quæ dolore quodam afflicta, ad captivam se ferri curavit: cum illa regiam domum ingredi recusasset, reddita est regina sanitati, atque admonita ut in Christum crederet, & eum coleret, qui salutem præbuisset, rogavit regina virum ut Christianus efficere-  
tur. quod quancquam ille promississet, segnis tamen erat, nec sæpius ab uxore commonitus baptizari curabat, non tam fidei hostis, quam dubius. Contigit eum in altissimas sylvas ire venatum, quo cum pervenisset, coorta subito tempestate, ita tenebræ cuncta operuere, ut nec ipse comites cerneret, nec cerneretur ab illis: ignarus quid ageret, promissionis conjugii factæ recordatus est, Christumque rogavit, ut si Deus esset, ex tantis eum periculis eriperet, nec mora dies reddita mundo est, & rex ad urbem incolumis perductus, qui reginæ quæ gesta erant miraculi loco exposuit, vocatur captiva, audit consilium ejus, illa rejicienda idola, & Christum colendum dicit, eique supplicandum, & basilicam faciendam, convocato populo rex Evangelium prædicat, & nondum sacris initiatus, fit suæ gentis apostolus, credunt viri per regem, sœminæ per reginam, constituitur templum magni operis, & elevato pertinaciter murorum ambitu, columnæ collocantur. Sed prima ac secunda erecta, tertia nullis machinis erigi potest, nullisque viribus, cum ad noctem usque laboratum esset, recedentibus omnibus, sola captiva apud templum in oratione perseverat, postera die, prima luce, redeunte populo, columna re-  
perta est, supra basin in aëre suspensa, quantum esset unius pedis spaci-  
um, magnificaverunt omnes Deum, veramque captivæ fidem recognoverunt, quibus mirantibus ac stupentibus, sensim supra basin suam, nullo contingente, deposita est, & summa cum liberatione,



descendit, mox reliquæ columnæ magna facilitate erectæ & collocatæ sunt, perfectum templum: & populi fide confirmata, svadente captiva, totius gentis legatio ad imperatorem Constantinum mittitur, res gesta exponitur, & sacerdotes petuntur, qui cœptum erga se munus impleant. Ferunt Constantinum non minus hoc nuncio letatum, quam si gentes Romano imperio incognitas & ignota regna vicisset, Iberiis jocundissimo vultu satisfecisse. Ruffinus in ecclesiastica historia hæc sibi Bacchurium ipsius gentis regem narrasse affirmat, virum fidelissimum, cum Hierosolymis secum humaniter degeret, veri periculum ad eum referendum est. Iberos hodie Georgianos appellant, quorum legatio ad nos venit, cum ex Mantua Romam rediissemus, colunt & hi hodie Christum, quamvis procul ab apostolica sede veritatis magistra, & Barbaris circumfusi gentibus, non omnem Evangelii puritatem servant.

## CAP. XXII.

*De Colchis, & quæ flumina Colchidem claudunt, de melle amaro, & de Tragelapho, & quantum Colchis olim claruit.*

**C**OLCHIS ( ut placere Ptolemæo videmus ) monte Coraxe à septentrione clausa est, quem Caucaſi partem esse ostendit, & Nomades excludere: ab oriente, Iberia: à meridie, Phasi flumine, & Armeniæ montibus: ab occidente, Euxino ponto: in quem Hippum flumen cadere arbitratur: & inter ejus ostium & amnem Phasim, duo flumina decurrere in pelagus Cariuſtum & Canneum, & post Hippum, ultra Dioſcuriadem, ſeptentrionem verſus, Coraxem fluvium in idem mare exonerari, qui ex monte ſui nominis oriatur. Strabo verò Hippum cadere in Phasim aſſerit, & Colchidem, magna ex parte ad mare protenſam, Phasim irrigare, ingentem fluvium qui ortus in Armenia Glauco & Hippo in ſe receptis, uſque ad Sarapanos navigetur, exinde pedestri itinere curribus vectos, quadriduo in Cytam proficiſci, ad Phasim urbem jacere ejusdem nominis Colchorum emporium, quod ex alia parte amni præcingit, ex alia lacu, ex alia mari, hinc biduo triduoque, Amisum Sinopem-



nopemque navigari, littora hæc & fluminis ostia amœnissima esse, regionem fructibus & omnibus quæ ad fabricandas naves pertinent, abundare. Mel tamen frequentius amarum esse, linum, cannabem, ceram & picem gignere: linificium vulgatum & multum, in peregrina exportari loca, propter quod cognationem inter Colchos & Ægyptios esse quidam voluerint. Plinius Veronensis, animal cervo simile, barba tantum & armorum villo distans, juxta Phasim amnem, & non alibi nasci affirmat, quod Tragelaphon vocatur: Secus Phasim Leucorhoæ sanum fuisse, quod Phrixus condiderit, atque illius oraculum ubi aries non mactatur, id olim dives habitum, deinde à Pharnace, & paulò post à Mithridate Pergameno direptum. nam læsa religione, etiam divina patiuntur, nec coli possunt, ut Euripides inquit. Vana garrulitas quæ religionem pauperibus aufert: Deus & inopum & divitum pater est, neque aliud ab homine quam voluntatem requirit. Quantam olim Colchis claritatem habuerit fabulæ declarant, Jasonis exercitum innuentes, qui ad Medos usque processit, ac prius etiam Phrixi expeditionem, postea cum reges succederent, & regionem haberent in provincias divisam, mediocriter agebant. Cum vero Mithridatis Eupatoris potentia vehementer esset adaucta, tota ei regio paruit, à quo semper aliquis ex amicis regionis præfectus & administrator mittebatur. Strabo refert Moaphernem matris suæ patrum Colchis administratorem fuisse: sed Mithridate sublato, regionem omnem quæ suberat, everfam, & multis distributam. Polemonem postremo Colchidem habuisse, atque eo mortuo conjugem ejus Pithodorim, quæ & Colchorum, & Trapezuntis, & Pharnatiæ, & ulteriorum barbarorum regnum tenuit. Strabo existimat montem Caucasum Pontico mari & Caspio imminere, Isthmumque munire interjacentem: Iberiam quoque & Albaniam ab eodem monte determinari, qui Sarmatas ad septentrionem dimittit. Ptolemæus quoque Caucasiam juga inter Iberios & Colchos procurrere arbitratur, & ab utrisque gentibus disjungere Sarmatas: Eratosthenes eundem esse Caucasum & Caspium existimavit, & ab eo quasi cubitos quosdam ad meridiem procurrere, qui complectentes Iberiam Armenis & Moscitæ montibus conjungantur. Secadissæ quoque & Pariadræ. Idemque sentire Ptolemæus videtur, & has esse Tauri partes, qui Australe Armeniæ latus efficit, & ab eo quodam modo



abruptas. Septentrionem versus usque ad Caucasum & maritimam Euxini oram procurrere.

## CAP. XXIII.

*De Dioscuriade, & apud eam lingvarum varietate, & aurati velleris ficta fabula, de victu & vestitu eorum, qui apud Dioscuriadem conveniunt.*

**Q**Uæ à Colchide Themiscyram tendit, Dioscuras & Sebastopolis à Ptolomæo vocata est. sicut Straboni placet, orientalisimum totius Euxini pelagi sinum obtinet, & extrema navigatio appellatur. Unde illud quod in proverbio dicitur, in Phasim ubi cursus carinis ultimus, sic intelligendum est, non quod Poëta qui Jambicum fecit de flumine dicat, nec de urbe ejusdem nominis, quæ ad flumen jacet, sed de tota Colchide. Nam de Phasi, usque ad intimum Dioscuriadis recessum sexcenta esse stadia putant, & Dioscuriadem initium isthmi tenere, qui duo inter maria eminent. Ptolomæus verò Jambicum intellexit ad verbum, & intimum Euxini sinum ad orientem in Phasis ostio terminavit, ibique isthmum incipere ostendit. Dioscuriadem verò septentrionalem Ponti ripam tenere, non procul ab amne Coraxe. Dixerunt aliqui qui res parum animadvertunt, septuaginta, & quibus minor veri cura fuit, trecentas gentes apud Dioscuriadem convenire solitas, omnes diversarum lingvarum, propterea quod sparsim & impermixte, ob asperitatem atque intractabilitatem habitent, quarum pleraque pars Sarmatæ sint. Universæ tamen Caucasæ, inter quas Phthirophagorum natio fuit, cui nomen à sordibus datum est, quibus proximos Soanes esse Strabo putavit, nihil fama meliores, quamvis robore præstarent, vicinisque gentibusque dominarentur, eosque Caucasi extrema obtinere, quæ imminet Dioscuriadi. Ptolomæus Soanam fluvium quendam memorat, qui ex Caucaso cadit in Hyrcanum pelagus. à quo Soanes dici potuerunt. Sed hi Albanorum extrema versus septentrionem colebant, ii quos Strabo nominat, Colchis immine-



minebant, qui ad ad Euxinum pertinent. Ferunt his regem fuisse, & trecentorum virorum collegium & quamvis inordinatam gentem, bellicosam tamen, ducenta hominum millia in exercitum cogere consueſſe. Torrentes apud eos aurum detulisse, quod perforatis tabulis, ac lanosis pellibus excipiebant, atque hinc aurati velleris confectam fabulam, & fortasse Iberes his contermini eodem nomine vocantur, quo occidentales, ab auro quod apud utrosque invenitur. Soanes veneno ad spicula mirifice utebantur, cujus tanta vis fuit, ut etiam odore admodum laderet. Reliquæ gentes quæ circa Caucasum jacuere, tenuem habuisse regionem feruntur. Mosticos montes partim Colchi habuere, partim Iberes atque Armeni. Polignium quod Phrixus in Iberia condidit, Ideessa postea dicta est, locus optime munitus. Altissimæ veri Caucasi partes ad Austrum versæ, quæ Albaniam, Iberiam & Colchos, & Heniochos respiciunt, ab his habitantur, quos apud Dioscuriadem convenisse relatum est, nam salis gratia frequentius conveniebant: horum alii montium tenuere cacumina: alii in collibus habitavere, serina carne & lacte viventes: montium vertices hyeme sunt inaccessibiles, æstate caligas bubulas in tympani modum latas calceati per glaciem ac nivem ascendunt, barbari, & cum oneribus super pelle dilapsi, descendunt ad montis ima.

## CAP. XXIV.

*De Syracoris & Troglodytis, & nominum mutatione, & de pellibus quæ ab iisdem manant.*

**D**Escendenti regio septentrionalior occurrit, mitior tamen quæ Syracorum jungitur campis. Insunt etiam Troglodytæ quidam, qui propter frigora habitant in cavernis, & pane abundant. Post eas Cheanitæ reperiuntur, & Polyphagi, & aliorum quorundam vici agriculturam patientes: deinceps Nomades inveniuntur, Paxani, & Nabiani, qui inter Mæotim Caspiumque habitant, mox Syracorum Aorsorumque nationes, quas superiorum Aorsorum exules



exules fuisse putant, magis ad septentrionem expositas. Abeatus Syracorum rex, dum Pharnaces Bosphorum haberet, equitum misit viginti millia. Spadines rex Aorforum totidem; Superiores Aorfi plura, cum plus terræ haberent, & maxima ex parte oræ Caspiæ imperarent, unde camelis iter agentes, Indicas & Babylonias merces, ab Armeniis Medisque accipiebant: atque propter opulentiam auro adornabantur. Strabo Aorfos Tanaim accoluisse tradit, Syraces Archedeum amnem, qui ex Caucaſo fluens, emittit in Maotim. Ptolomæus Aorforum in hac plaga nusquam meminit, Siracenorum mentionem facit, quos ultra Hippicum montem prope Ras fluvium jacere ostendit: sed mutatis temporibus gentes quoque situs, & nomina mutant. Tanais (ut antè diximus) Europæ atque Asiæ terminus est, ferturque à Septentrione Nilo contrarius, paulo tamen orientaliior originem ejus incertam aliqui putant. Ptolomæus ex montibus Riphæis prodire arbitratur, qui magis australes sunt quam Hyperborei. Nos hominem allocuti sumus Verona oriundum, qui per Poloniam & Lituaniam, ad fontes Tanais pervenisse se affirmavit, eosque transcendisse, & omnem illam Barbariæ oram borealem perſcrutatum. Is aiebat paludem esse non admodum magnam, ex qua Tanais nasceretur, qui duobus oſſis Maotim ingreditur, quæ ſtadiis intra ſe circiter ſeptuaginta diſtare ſeruntur. Theophanes Mityleneus ex Caucaſis montibus oriri Tanaim exiſtimavit, & in ſeptentrionem diu currere. Poſtea conveſum ad meridiem, in Maotim emittere. Ferunt Græcos, qui Bosphorum habitavere ad flumen Tanaim urbem condidiſſe, quam poſtea Polemo rex depopulatus eſt, cum minus obtemperaret. Commune in ea emporium erat Nomadum, Asiæ atque Europæ, & eorum qui è Bosphoro lacum navigabant, quorum alii mancipia, pelles, & ſi quid aliud eſt Nomadicum vehebant: alii veſtem, vinum, & cætera, quæ mitis vitæ ſunt propria, onerabant. Nunc his locis propinquum eſt Venetorum caſtellum, quod Tanaim vocant, unde & nobiliſſimæ pelles feruntur, & mancipia, quæ è Scythiis emunt, quos appellant Circiſſos.



## CAP. XXV.

*De Alopecia in Maotide insula, quæ mistorum hominum domicilium continet, quantave opprimantur glacie & frigore.*

**I**N Maotide insula memorant Alopeciam, quæ mistorum hominum domicilium fuit, stadiis centum à veteri emporio distans ab ostio Tanais, quod magis orientale est: ad sinistram terrestri itinere pergenti, post octingenta stadia magnus Rhombites occurrit, ubi piscatio multa, & conditura apta: pari deinde intervallo minor Rhombites se offert, non adeò piscibus abundans. Ptolemæus Rhombitem majorem & minorem duo flumina esse dixit. Strabo promontoria significare videtur, qui populos ab eis Rhombitarios nominari asserit, & majores insulas habere stationibus plenas, minores operarices esse, & omnes vocari Mæotas non minus quam Nomades bellicosos, & in gentes plurimas divisos, quorum qui Tanaim accolerent, agrestiores essent, qui Bosphoranis cohærerent, mitiorem vitam agerent. A minore Rhombito in Anticetam flumen & Tyramben, stadia esse sexcenta dixerunt: hinc in vicum Cimbricum, centum ac viginti, unde solvebant, qui lacum navigabant. Ex quo fit ut longitudo Mæotis per trecenta fere milliaria esse videatur à Bosphoro Cimmerico usque in ostium Tanais. Cimmericum urbs in Chersoneso orientali fuit, quæ fossa & aggere isthmum claudebat: Nam Cimmerici potentiam olim maximam in Bosphoro habuere, à quibus Cimmericus appellatus est. Hi à ponti dextra mediterraneam regionem habitantes, usque in Ioniam excurrerant: sed à Scythis ex his sedibus pulsi sunt, Scythæ à Græcis, qui Ponticaeum & alias in Bosphoro urbes habitavere, à Cimmerico usque in vicum Achilleum stadia viginti numerabantur. Templum hic Achillis fuit, juxta quod angustissimum ostii Mæotidis fretum, ad stadia viginti, vel paulo plura patet: hinc ad Satyri monumentum, stadia nonaginta esse dixerunt. Id fuit in promontorio quodam positum, hominis in Bosphoro clarissimi ac potentissimi, cui proximus fuit Vicus petraeus, à quo usque in Corocondamen, stadia excurrunt centum & triginta,



atque ibi finis est Bosphori, qui Cimmericus appellatur, cuius longitudo stadiorum est ducentorum ac viginti, in cuius initio in parte Asiæ Achilleum fuit, in parte Europæ Myrmecium, versus Mæotim: versus Euxinum in Asia Corocondama, in Europa vicus nomine Æra Panthicapensis agri, quæ duo loca septuaginta stadiis inter se distabant, huc usque glacies pertendit, cum riget hyems Mæotide adeo frigore concreta, ut pedibus permeetur. In his angustiis multi fuere portus & supra Corocondamen lacus Corocundametis appellatus, qui decem stadiis à vico mittebat. In mari pars Anticetæ fluminis abrupta lacum influens insulam efficiebat, quæ hoc lacu & Mæotide & flumine undique abluebatur & mari. Anticetam nonnulli Hypanin vocaverunt, quemadmodum & fluvium Borystheni proximum.

## CAP. XXVI.

*De Phanagoria, de gigantibus Venerem  
adorantibus, de Polemonis regis  
morte.*

**V**Ltra hunc lacum naviganti versus Orientem Phanagoria olim occurrit, civitas memoratu digna, & Cephæ ex Hermonassa, & Apaturum Veneris sanum. Phanagoria & Cephæ in insula fuerunt: quicunque olim Bosphori potentibus obediebant, Bosphorani appellabantur, & alii Asiani, alii Europæi: horum Metropolis Panticapeum fuit, Asianorum Phanarium, sic enim postea Phanagoria est appellata, earum rerum emporium quæ ex Mæotide, & ulteriore barbarorum regione importantur, earum verò quæ mari advehuntur Panticapeum. In Phanagoria templum fuisse insigne tradunt Veneris Apaturiæ, fabulam afferentes: quod cum gigantes Venerem adorirentur, illa Hercule invocato, tamdiu in lateribus quibusdam latitaverit, donec gigantes sigillatim dolo excipiens, occidendos exhibuerit Herculi. Nulla enim mulier tam sui corporis prodiga est, ut vim libenter admittat, & sæpe dolis potentia succumbit. Inter Phanagoriam & Gorgippiam quingentorum stadiorum spatium ponunt, quod Aspurgitani habitaverunt, & ipsi Mæotæ: quos



quos cum Polemo rex simulata amicitia adoriretur, nec id eos late-  
ret, sed contra instructi exirent, captus interemptusque est, pœnas-  
que cogitati sceleris dedit. Bosphoranorum duces ad Tanaim usque  
imperium protulere, præsertim Pharnaces Cassander ac Polemo re-  
gionem à freto usque Gorgippiam Sindicam appellavere.

## CAP. XXVII.

*De Zygis & Heniochis, de lemborum magnitu-  
dine, & eorum maritimis furtis, de Eno-  
chiorum regum pluralitate.*

**P**ost Gorgippiam Achæi, Zygi, & Heniochi, sequuntur,  
montana & importuosa colentes loca, quæ Caucasii partes sunt.  
His vita ex maritimis latrociniiis fuit, lembos exiles ac leves ha-  
bentes hominum vigintiquinque capaces. Fama est Phthiotas  
Achæos, ex Jasonis exercitu Achajam hanc habitasse, Laconas verò  
Heniochiam: quorum duces Reccas & Amphisastrus fuerint, Casto-  
ris & Pollucis aurigæ: ii mari dominabantur more piratarum, prædam  
Bosphoranis vendentes, & ab eis comeatum accipientes, lembos hu-  
meris impositos in sylvis, cum mare navigari non poterat, occultentes,  
tenue solum arantes: Vicini principes eorum injurias ulcisciebantur,  
sed Romanorum subditi propter negligentiam præfectorum sæpe in-  
ulti fuerunt. Heniochi quatuor reges habuere, cum Michridates  
Eupator à paterno regno fugiens, Bosphoranorum regionem permea-  
vit, quæ quidem ipsi pervia fuit. Zygorum verò terram, propter  
locorum difficultatem atque asperitatem accedere difficilis, agrè mari-  
tima ora profectus est: sæpe mare ingressus, quousque in Achæorum  
agrum pervenit, quibus adiutoribus iter ex Phaside consummavit, ad  
quatuor ferè millia stadiorum. Hanc Zygorum terram eam esse ar-  
bitramur, ex qua populi exierint, qui nostra ætate cum liberis & uxo-  
ribus Europam pervagantur, Zigari appellati: insignes fures, & inter  
nostros homines Nomadum more viventes. A Corocondame o-  
rientem versus recta navigatio est, ad stadia centum & octuaginta, ubi  
Sindicus portus, & civitas, cujus meminit Ptolemæus: de hinc ad



quadraginta stadia sunt ea, quæ Batha nominantur, vicus & portus: ubi Sinope austrum versus huic oræ plurimum videtur opponi. Ptolemæus hic amnem Psycam ingredi mare arbitratur, & hic Achæos esse. Strabo Artemidorum secutus Cercetarum oram esse tradit, octingentorum & quinquaginta serè stadiorum, quæ stationes & vicos habeat: de hinc Achæorum regionem stadiorum quingentorum, postea Heniochorum mille, de hinc Pitherintem trecentorum serè ac sexaginta, usque Dioscuriadem: tota quæ navigatio à Corocondame usque huc, stadia complectitur tria millia centum & quinquaginta. Qui Mithridatica conscripserunt (ut Strabo refert) prius Achæos posuere, deinde Zygos, mox Heniochos, post Cercetas, & Moschos, & Colchos, & Phthirophagos, qui ultra hos habitavere, Thoanas, & alias circa Caucasum parvas gentes, quæ australia Caucasi occupant loca: Euxini quæ Ponti septentrionale latus ultra Caucasum usque ad oceanum, innumerabiles jacent gentes, quas ab occidente Tanais claudit, ab oriente (ut Ptolemæo placet) Ras fluvius: ut Straboni, Plinio, & multis aliis, longissimus Caspii maris sinus, omnes qui hanc terram incolunt, Scytharum nomine continentur, quamvis Ptolemæus Sarmatas appellat: quos bisariam partitus est, & alios Asiaticos vocat, à Tanai usque ad flumen Ras: alios Europæos, qui Germaniam inter & Imaum montem collocat. ut à nobis ante relatum est. Scriptores alii Scytharum nomen multo majus efficiunt, quos à Germanico limite, usque ad ipsos Seras, & orientale pelagus occupare arbitrantur: & sicut habitabilis terræ australia Æthiopibus tradiderunt, pari modo septentrionalia Scythiis, quos cum Sarmatis confuderunt.

## CAP. XXIIIX.

*De Scythiis, eorum origine, de sedibus incertis, eorum victoria, & qualiter in hos triumpharint Romani.*

**D**iodorus Scytharum gentem apud Araxim flumen originem habuisse putat, parvamque ab initio nationem fuisse, & modicæ terræ cultricem, ac propter ignobilitatem à vicinis contemptam, nactam-



natamq; deinde regem quendam bellicosum, & militari virtute præcipuum, agros ampliâsse montanos quoadusque ad Caucasum, campestres verò usque ad Oceanum & Maotidem, flumenq; Tanaim. Fabulam quoque adducit: Natam aquod Scythas ex terra virginem, umbilicotenus hominis forma, reliqua viperæ, quæ puerum genuerit nomine Scytham, qui omnium ante se clarissimus evadens, novum ex se populis vocabulum indiderit, inter cujus posteros duo fratres extiterint, summa virtute, alter Pluto, alter Napis appellatus, qui magnis rebus gestis, regno inter se divisò, alteros populos Plutones, alteros Napis vocitaverunt, quorum progenies regiones ultra Tanaim, usque ad Thraciam subegerit: versisq; deinde in alteram partem armis, ad Nilum Ægypti pervenerit: redactis in potestatem omnibus, quæ intermediæ erant, gentibus, & usque ad orientis Oceanum, & mare Cæspium imperium protenderit: multosq; reges habuit memoria dignos. Scytharum autem populos Sacas, alios Massagetas, alios Arimaspos, alios alio nomine vocari dicit: Coloniasq; plures ab eis deductas fuisse, sed duas maximas, unam ex Assyriis inter Paphlagoniam ac Pontum, alteram ex Medis pone Tanaim flumen, cujus populum Sauromatas appellaverint: qui multis post annis, imperio latè diffusò, magna ex parte vastata Scythia, eam penitus desertam cultoribus reddiderint. Trogus Pompejus Scythas cum Ægyptiis de generis vetustate contendisse dicit, eisq; datam palmam tanquam loco editiori natis. Parthos & Bactrianos eorum sobolem esse. Scythiam ab uno latere Ponto, ab altero Riphæis montibus, à tergo Asia & Phasi flumine clausam: multum in longitudinem & latitudinem patere: hominibus inter se nullos fines, neque tecta, aut certas sedes, armenta & pecora semper pascentibus, & per incultas solitudines errare solitis. Iustitiam genti ingeniis, non legibus, cultam: furtum inter eos gravissimè vindicari, argentum & aurum pariter aspernari, ac ceteri mortales appetunt, lacte & melle vesci, ferarum pellibus vestiri. Darium regem Persarum ab his turpi fuga submotum, Cyrum cum omni exercitu à regina eorum trucidatum, Alexandri magni ducem Zopyrionem pariratione cum copiis universis deletum, Vexorem regem Ægyptiorum exercitu cum omni apparatu belli relicto repulsum ac fugatum. Scythas ab Ægypto paludes prohibuisse, qui reversi Asiam domuerint, vestigalemq; fecerint, ac per



mille & quingentos annos tenuerint, usque ad Ninum regem Assyriorum: Romanorum arma audierint magis quam senserint. Pulchre Trogus, sed arbitramur Græcos cum aliquos secutum, quibus mos est omnia in majus extollere. Scytharum natio barbara est, nec iusti nec recti tenax, scedissima apud eos vita, religionum mille modi, idola & serpentes colunt, in libidinem profusi, aurum non concupierunt donec fuit ignotum, ubi splendorem ejus conspicati sunt, nihil non auri causa patravere, & propter regnum sæpe parricidia committere, neque inter se iusti, neque cum aliis veraces, cui plus virium est, huic & juris magis, potentia omnia cedunt. Nec Romani intactos eos reliquere, neque Græci: Alexander ultra Jaxartem fluvium eos cecidit, successores ejus plurimis cladibus Scythas affecerunt: Cneus Pompejus magnos Scytharum exercitus fudit, qui Mithridati suppetias tulerunt, in Septentrionem Scythicum iter tanquam in mari stellas secutus, & omnis Albania atque Iberia ab eo domita est: Regem Colchorum Orodem, positus sub ipso Caucasio castris, iussit in plana descendere, quarum provinciarum, etsi Græca origo fuit, in Scytharum tamen mores populi declinaverant. Imperante Claudio Mithridates Bosphoranus, amissis opibus vagus, postquam Didium Romanum ducem, ac robur exercitus abesse cognovit, spreto Coty juvene, ac rudi novo rege, cum Julio Aquila equite Romano, nationes sibi allexit & perfugas, & coacto exercitu regem Dandariorum exturbavit, & imperio ejus potitus festinavit in Bosphorum, Aquila & Cotys, quia Zorsines Saracorum rex hostilia resumpserat, ad Eunonem, qui Adorsorum genti præcellebat, legatos misere, eumque sibi sociarunt: Pellitur hostis, venitque Sozam Dandaricæ oppidum, quod desertum à Mithridate præsidio munivit, & in Saracos pergunt, & transgressi amnem Pandam, circumveniunt urbem Huspediam, eamque excidunt. Zorsines rex Saracorum, diu pensitato, Mithridatis nerebus extremis, an primo regno consulere: postquam prævaluit gentilis utilitas, datis obsidibus, apud effigiem Caesaris procubuit: magna gloria exercitus Romani, quem invictum & victorem tridui itinere abfuisse ab amne Tanai constitit. Mithridates nullo in armis subsidio fratrem Cotym proditorem atque hostem metuens, ad Eunonem confugit, qui eum, impetrata tantum vita, ad Claudium misit. Multi præterea imperatores, & apud urbem Romam, & apud Constantino-



stantinopolim, de Scytharum gente gloriosissimè triumpharunt. Quod autem ad interiora eorum, & ultima versùs Boream non est ium, paupertas soli fecit, & itineris asperitas, atqve intolerabile frigus, & nullum vincentis præmium. Multos Romani populos (ut Appianus tradit) sese sponte dedentes rejecere, quod nullo esset emolumento eorum imperium: quis arma sumat, & cum mortis periculo dimicet, cum sciat victoriam sterilem esse? id perinde est, ac si quis laudis causa cum bestiis pugnam ineat. Nec Scytharum robur, insuperabile est, magis quam elephantum & taurorum, quos ingenio vincimus: sed in his inest aliquid utilitatis, Scythas illos exteriores si prælio superaveris, non tam tibi quam illis viceris pane alendis, qui multis est incognitus, ubi eorum servitia quæras. Fatemur tamen ab his exisse quamplures, qui res magnas gessere. Facile enim migrant quibus sterilis sedes est, & melioris soli fama multos trahit.

## CAP. XXIX.

*De Asiaticis Scythis, & eorum ferocitate, unde Attilas, de eorum fœditate, & quomodo Hungaros velint esse Scythas, quomodo ve quidam Hungarica lingua sint loquentes.*

**E**X Asiatica Scythia migraverunt in Europam Hunni, feroces populi, quos Jordanus, & alii nonnulli, ex mulieribus Magis & dæmonum semine natos crediderunt: qui transmissa Mæotide, omnem barbariem inter Tanaim & Danubium occupare: ex his magnus ille Attilas ortus est, qui subacta Pannonia, Italiam ingressus, Aquilejam subvertit, & in Germaniam transiens, plurimas vastitates edidit, ac transmissis Rheno, in agris Catelaunicis memorabile illud prælium commisit, in quo supra centum sexaginta millia hominum cecidere: & quamvis victus esset, id tamen solatii tulit, quod Theodoricum Gothorum præstantissimum ducem obtruncatum cognovit. Is domum reversus, dum novis nuptiis operam dat, vino plenus, effuso è naribus multo sanguine, suffocatus est:



est: de quo etiam in posterioribus nonnulla erunt dicenda. Scytharum quoque genus est Turcarum fœdissima gens, qui ut Æticius philosophus tradit, in Asiatica Scythia ultra Pyriceos montes, & Taracontas insulas, contra Aquilonis ubera sedes patrias habuere. Natio truculenta & ignominiosa in cunctis stupris ac lupanaribus fornicaria: comedit quæ cæteri abominantur, jumentorum, luporum, ac vulturum carnes, & quod magis horreas, hominum abortiva: diem festum nullum colunt, nisi mense Augusto Saturnalia: Romanorum imperium admirata magis, quam experta est: Octaviano Augusto in auro littorico censum dedit, & id quidem sponte. nam cum vicinas gentes annua illi tributa reddere animadvertisset, novum dierum ac temporum exortum esse Deum arbitrata, munera illi quotannis misit. Otho historicus qui Frisingensis fuit episcopus, tradit Turcas imperantibus Græcis, ac regnante apud Francos Pipino, annis ab hinc puta sexcentis Caspias portas egressos, cum Avaribus ferocissima pugna, multis utrinque desideratis, conflixisse. Nicolaus Segundinus multa eruditione præditus, græcas ac latinas literas apprime callens, de Turcis ad nos scribens, Asiaticos Scythas illos esse fatetur, qui Pontum Cappadociamque transgressi, ad reliquas finitimas gentes sensim illapsi sint: ii more latronum clandestinis quibusdam excursionibus, vires sibi vendicantes, occupatis montibus & claustris opportunis, unde per occasionem irruptiones facile fieri possent, usque adeo emergere, atque animis sublatisunt, ut palam jam, & pari Marte adversum finitimos de agri possessione certarent, & denique procedenti tempore Galatia, Bithynia, & utraque Phrygia, in potestatem redacta, omnem Asiam quæ minor vocatur, ultra citraque Taurum, ad oras usque Joniæ & littora Græci maris occupaverint: & unum quendam principem, sed alios alii duces & varia auspicia, quasi per factiones secuti, de quibus alio loco dicendum erit. Ferunt & Hungaros, qui Danubii ripas incolunt, Scytharum genus esse, non quasi ab Hunnis ortos quod propter verbi cognationem aliqui crediderunt, sed ab aliis Hungaris, quorum Jordanus meminit, qui notos eos dicit suo tempore fuisse, propter commercium pellium Mardurmarum. Fuit autem Jordanus sub imperio Justiniani, quo tempore nondum Pannoniam Hungari attigerant. Longe post Hunnos, Gothos ac Longobardos, Hungari



Hungari Scythiam egressi, ad Danubium pervenere: pulsisque prioribus incolis, aut sub jugum missis, regnum sibi fecere. de quibus suo loco dicemus. Noster Veronensis, quem supra diximus ad ortum Tanais pervenisse, retulit populos in Asiatica Scythia, non longe à Tanai sedes habere, rudes homines & idolorum cultores, quorum eadem lingua sit cum Hungaris Pannoniam incolentibus, voluisseque cum plerisque sacrarum literarum professoribus, viris religiosis, & ex ordine beati Francisci, qui linguam illam nossent, eo proficisci, & sanctum Christi Evangelium prædicare: sed prohibitum à domino, quem de Mosca vocavit, qui cum esset Græca perfidia maculatus, ægrè ferebat Asiaticos Hungaros Latinae conjungi ecclesiæ, & nostris imbuere ritibus. Fuerunt & qui Gothos ex Asiatica Scythia erupisse putarunt, quorum est pervulgatum nomen. Præsumptio hinc oritur, quod Alani inter eos militavere, & usque in Hispaniam transiere, ibique sedes obtinuerunt, in quibus hodie Catelani tanquam Gothi, Alani vocantur: Alanos autem Ptolemæus in Asiatica Scythia ultra Hyperboreos montes collocat, ad septentrionem maxime vergentes. Jordanus Europæos fuisse Goths affirmat, quem sequi non pudet, suæ gentis initia referentem: neque alienum fuerit, Alanos postquam in Europam migrassent, cum Gothis societatem inisse, ex qua facta sit Catelanorum natio. Multa de Gothis inter res Europæas dicenda erunt, quæ nunc relinquimus, illud conclusisse sat fuerit, non idcirco Scytharum genus in aliena prorupisse, quia cæteris virtute præstarent, sed aviditate melioris agri, & quod in patrio solo nutriri non possent.

Sequitur Asiæ ad nostram supputationem tertium membrum, cui Parthia dabit initium, quamvis rectè in orientem iter habenti Aria occurrat, & Paropamisadum regio, quæ montanae sunt, & in eodem parallelo, qui per Rhodum est, cum Parthia continentur: sed nobis placuit quinto loco de illis agere, qui post Indiam ad occidentem primi reperiuntur. Nos Parthiam in hac descriptione, Medianque, & utramque Armeniam, ac magnam minoris Asiæ Chersonesum comprehendemus: quamvis aliqua ultra citraque Taurum jaceant, & nonnulla in ipsis montium cacuminibus sita sint.



*De Parthis, apud eos vario terremotu, sermone  
misto, de eorum vario incessu, & de regum varia  
successione, atque in bellis multa nunc regni  
populatione, nunc autem auctione.*

**P**arthia, ut Ptolemæo visum est, ab ortu Ariam habet, & Masdoranum montem: ab occasu Mediam, & quibus dissecatur juga: ad meridiem Carmaniam desertam, & Parchoatra montis sublimem verticem: à septentrione Hyrcaniam: & qui medius intercurrit mons Coronus. Regiones in ea quatuor collocat: Comissenam, quæ Hyrcanis imminet: Tabienam, quæ ad Carmaniam respicit: Patauricenam, quæ Ariam: & Sindacam, quæ Mediam in-  
tuetur. Civitates commemorat plures: de annibus qui eam irrigent nullam efficit mentionem, quamvis Bagadram in ea ortum indicare videatur, qui longo itinere per Carmaniam desertam & Hippophagos, non longè à Sureis Persicum illabitur sinum. Strabo fluminibus irriguos Parthiæ campos esse commemorat, quos partim Arius, partim Margus, inundet. Julius Solinus Parthiam Rubro mari à meridie claudit, à septentrione Hyrcano salo, non Parthiam hoc pacto, sed Parthicum circumscripsit imperium, quod in duodeviginti regna divisum dixit, & undecim superiora ab Armenico limite & Caspio littore incipientia, ad terram Scytharum porrecta, quibus concordia essent reliqua septem inferiora. Sic enim vocat ab ortu Arianos habere, à meridie Carmaniam, ab occasu Medos, à septentrione Hyrcanos. Plinius, quæ fuerant olim Persica regna, postea Parthorum intelligi voluit, inter duo maria, Persicum & Hyrcanum: montana Parthiæ Scenatas tenere populos. Strabo refert loca optima, & montibus clausa. Trogus Pompejus urbem claram in monte à Partho primo Arsace conditam dicit: cujus loci ea conditio fuerit, ut nec quicquam munitius inveniri, neque amœnius posset, præruptis undique rupibus cinctus, ut tutela nullis egeat defensoribus: & soli circumiacentis tanta ubertas sit, ut propriis opibus expleatur. Fontium ac sylvarum ea copia, ut & aquarum abundantia irri-  
getur,



getur, & venationum voluptatibus exornetur. Apollodorus Hecatompylon Parthorum regiam appellavit, per mille & septingenta sexaginta stadia distantem à portis Caspiis. In Parthia terræ sunt, quas Rhagas vocaverunt, propter terramotus, qui ibi frequenter fiunt, à quibus multæ urbes (ut Possidonius refert) & duo millia vicorum everfa sunt. Strabo affirmat Parthiam ab initio non multam fuisse, Parthos cum Hyrcanis Persica finiisse, eisqve subfuisse, cumqve regio esset nemorosa & montana atqve inops, reges eam cursu præterisse, cum ne minimam quidem exercitus partem alere possit: successu verò temporis auctam esse: Camiscenamqve atqve Chorenā, & totam ferrè regionem, usqve ad Caspias portas & Aragos & Tapyros, quæ prius Medorum erant, ad Parthos transisse: atq; Apamiam & Héracliam insignes urbes, & Rhagis vicinas, in Parthia videtur describere. Parthorum collegium duplex fuisse affirmat, alterum affinium, alterum Magorum & sapientum, atqve ex his duobus reges creari, nationem Barbaram esse, verum bellacem, & à Scythis ortam, quæ propter præclara belli facinora adeo polluerit, semper aliquid finitimis adimens, ut tandem ad Euphratem propagarit imperium, & vim Scythis attulerit, Bactrianæ partem ejus auferens, & propter imperii magnitudinem cum Romanis vario Marte contenderunt, Scytharum exules crediti, quod ipso vocabulo manifestari Trogius affirmat: nam Scythico sermone exules Parthi dicuntur. Ji Assyriorum & Medorum temporibus, inter orientis populos obscurissimi fuere: postea quocunqve imperium orientis translatum est, veluti vulgus sine nomine, præda victorum fuere, & Macedonibus triumphato oriente servierunt. Parthia frigidissimos habet montes, & planities admodum calidas, administratio gentis post defectionem Macedonici imperii sub regibus fuit: proximus majestati regum est populorum ordo, ex hoc duces in bello, & in pace rectores habere: sermo his inter Scythicum Medumq; medius, & ex utrisqve mixtus: vestis olim sui moris, posteaquam opes accessere, luxuriæ materia, ut Medis, prælucida ac fluida: armorum patrius ac Scythicus mos, exercitum non ut aliæ gentes liberorum, sed majorem partem fervorum habuere: quorum vulgus nulli manu mittendi potestate permissa, ac per hoc omnibus servis nascentibus indies crescit, hos pari ac liberos suos cura, & equitare, & sagittare, magna industria do-



cent. Locupletissimus ut quisque est, ita plures in bello equites regi suo præbet: adversus Antonium cum equitum quinquaginta millia, Parthi duxissent, soli quadringenti liberi fuere, præliari in acie cominus, aut obsessas expugnare urbes, ignari. Pugnaverunt autem procurrentibus equis, aut terga dantibus sæpe fugam simulantes, ut incautiores adversum vulnera insequentibus haberent. Signum his in prælio non tuba, sed tympano dabatur, nec pugnare diu poterant, de quibus Lucanus: Pugna levis, bellumque fugax, turmaque vagantes, Et melior cecidisse loco quam pelleremiles: Illita terra dolis, nec Martem cominus unquam Ausa pati virtus, sed longe tendere nervos: Et quod ferre velint, permittere vulnera ventis. Cæterum intolerandi fuissent, si quantus erat impetus, vis tanta & perseverantia fuisset: plerumque in ipso ardore certaminis prælia deseruerunt, ac paulo post pugnam ex fuga reperierunt, ut cum maxime te vicisse putes, tunc tibi discrimen subeundum sit. Munimentum ipsis equisque veloricæ plumatæ fuerunt, quæ utrumque toto corpore texere, auri, argenti que nullus, nisi in armis, usus: uxores dulcedine libidinis singuli plures habuere, nec ulla delicta adulterio gravius vindicarunt: ob quam rem foeminis non convivium virorum tantum, verum etiam conspectum interdicebant. Carne non nisi venatibus quæsitæ vescabantur. Equis omni tempore vectabantur, illis bella, illis convivia, illis publica ac privata officia obibant: super illos consistere, mercari, colloqui. Hoc denique discrimen inter servos liberosque fuit, quod servi pedibus, liberi non nisi equis incedebant. Sepultura vulgo, aut avium, aut canum, laniatus fuit: nuda demum ossa terra obruere. In superstitionibus atque cura deorum præcipua omnibus veneratio. Ingenia genti tumida, seditiosa, fraudulenta, procacia: quippe violentiam viris, mansuetudinem mulieribus, assignabant: semper in externos, aut in domesticos motus inquieti: nam taciti ad faciendum, quam ad dicendum promptiores. Secunda atque adversa silentio tegebant, principibus metu, non pudore parebant. In libidinem projecti, in cibo parci, fides dicti promissi que nulla, nisi quatenus expedit. Libet hic paulo altius ordiri, & res Parthicas quæ memorabiles fuerunt, longius attingere. Orientis imperium primo Assyriorum fuit, postea Medorum, deinde Persarum, quarto loco Macedonum, quos Parthi simul & Romani debellarunt, seu verius ipsorum domestica & execranda parricidia: post mortem Ale-

xandri



xandri Magni Parthiam tanquam vilem & inopem nemo Macedonum dignatus est. Ob quam rem Sratonori externo socio eam tradiderunt. Exin, Macedonibus inter se civili bello contendentibus, Parthi Eumenem secuti sunt, & eo victo, ad Antigonom transiere. Post hunc à Nicanore Seleuco, & Antiocho, & successoribus ejus possessi sunt. Demum verò à Seleuco, Antiochinepote, defecerunt impunitatem affecuti, quia Seleucus cum Antiocho fratre, de regno contendebat, quo tempore & Theodotus Bactriæ præfectus defecit, quem Strabo Eucedamum appellare videtur: qui cum se regem appellare jussisset, exemplum totius orientis populis præbuit, ut à Macedonibus deficerent. Nullum est enim imperium, quod civilis discordia non evertat. Parthianæ defectionis auctor Arsaces fuit, cui alii Bactrianam originem præbent, alii Scythicam, & qui Scytham fuisse putant, ex parvis ortum affirmant, quos Dahas credunt, & Dahis profectos, qui ultra Mæotim habitavere Xandros sive Parios dictos: nonnulli Dahas circa ostium Caspii maris posuere, ex quibus ortus Arsaces cum plerisque Nomadibus Ochum accolentibus Parthiam invaserit, atque obtinuerit. Trogus incertæ originis dicit, qui solitus latrociniiis & rapto vivere, accepta opinione quod Seleucus à Gallis in Asia victus esset, cum prædonum manu Parthiam ingressus, Mandragoram regionis præfectum oppresserit, & imperium gentis invaserit: duarumque civitatum imperio potitus, parato grandi exercitu, adversus Theodotum Bactrianorum, & Seleucum Persarum regem, se tueri conaretur. Theodoto cito mortuo, filius ejus ejusdem nominis, pacem & fœdus cum Arsace percussit: nec multò post, cum Seleuco rege ad defectores persequendos veniente congressus, victor evaserit, atque is dies Parthorum imperii initium fuerit, qui ab eis solemniter habetur. Ex quo libertas genti orta, revocato deinde Seleuco novis in Asiam motibus, dato laxamento, regnum Parthicum formam accepit, & rectè vivendi normam, constitutis magistratibus, qui belli pacisque munera sub rege gererent. Arsaces quæsito constitutoque regno, matura senectute decedit, cujus memoriæ hunc honorem Parthi tribuerunt, ut omnes deinde reges suos Arsaces appellaverint. Hujus filius & ipse Arsaces nomine, adversus Antiochum Seleuci filium centum, millibus peditum, & viginti millibus equitum instructum, tanta virtute pugnavit, ut ad postremum in societatem ejus reciperetur. Ter-



tius Parthis rex Priapatus fuit, & ipse Arsaces dictus, qui actis in regno quindecim annis decessit, Mithridate & Phraate filiis relictis: quorum major Phraates, more gentis haeres, Madros validam gentem bello domitiam regno adjecit, nec multò post decessit, instituto fratre harede, quamvis multos reliquisset liberos. Quo tempore Eucratides apud Bactros regnavit (de quo supra meminimus cum de rebus Bactriae ageremus) Mithridates adversus Medos bellum gerens, victoria demum potitus, ac viribus auctus, Pharsacem Mediae praeponit, & Elymeorum gentem regno suo adjecit, rege ipsorum in praelio superato, imperiumque Parthorum à monte Caucaſo usque ad flumen Euphraten protulit: nec minor Arsace proavo gloriosa senectute decessit, relicto Phraate filio harede, qui cum bellum inferre Antiocho regi statueret, Scytharum motibus ad sua defendenda revocatus est, profectusque adversus Scythas Hymerum quendam ad tutelam regni reliquit, qui oblitus vicarii officii tyrannica crudelitate Babylonios, multasque alias civitates importunè vexavit. Ipse autem Phraates Græcos secum contra Scythas adduxit, quos prius in bello ad Antiochum gesto, superbè crudeliterque tractaverat: ii cum inclinatam Parthorum aciem vidissent, arma ad hostes transfudere, insigni proditione contumelias ulci: Phraates obtruncatus est, & in ejus locum Artabanus patruus constitutus, Scythæ victoria contenti, populata Parthia, in patriam redierunt. Artabanus bello Thogariis illato, vulneratus in brachio statim decedit. Mithridates filius succedit, cui res gestæ magni cognomen dedere. Multa enim bella cum finitimis summa virtute gessit, & cum Scythis prosperè dimicavit, ultorque injuriæ parentum fuit, ad postremum Ortoadissi Armeniorum regi bellum intulit, deinde propter crudelitatem à senatu Parthico pulsus est. Frater ejus Orodes cum regnum vacans occupasset, Babyloniam quo Mithridates confugerat, diu obsedit: & fame coactos in deditionem oppidanos compulit, & Mithridatem in conspectu suo adductum trucidari jussit: Deinde cum Romanis bellum gessit, Crassumque cum filio & omni exercitu delevit: hujus filius Pacorus missus ad persequendum Romani belli reliquias, magnis rebus in Syria gestis, revocatur in patriam, patri suspectus. Nam quem non timeat, qui fratrem occidit? Exercitus Parthorum illo absente in Syria relictus, à Cassio quaestore Crassi cum omnibus ducibus trucidatur.

Post



Post hæc civili bello Parthi Pompejanarum partium fuere, cum Crassus alterum filium in partibus Cæsaris esse audirent: victo Pompejo auxilia Bruto & Cassio adversus Augustum & Antonium misere, & post belli finem rursus Pacoro duce, inita cum Labieno societate, Syriam & Asiam vastare: castraque Ventidii, qui post Cassium, absente Pacoro exercitum Parthicum fuderat, magna mole aggrediuntur. Sed ille simulato timore diu continuit se & insultare Parthos aliquantisper passus, ad postremum in securos latosque partes legionum emisit, quarum impetu fusi Parthi in diversa abiere. Pacorus cum fugientes suos abduxisset Romanas secum legiones putaret, castra Ventidii aggreditur: ille reliqua parte legionum emissa, universam Parthorum manum cum ipso Pacoro interfecit. Orodes audita nece filii diu sine cibo fuit, nec aliud loquebatur, nisi Pacorum: erant enim triginta filii ex diversis pellicibus, quarum qualibet suum filium loco Pacori substituendum petebat. Dum Orodes deliberat, unus ex filis Phraates eum interfecit, poenasque occisi ab eo fratris exegit: sed Phraates multo sceleratior patre, universos fratres suos trucidat, nec filio suo parcat, veritus ne illum optimates sequerentur, qui sibi erant infesti. Huic Antonius propter auxilium Bruto missum, cum sedecim validissimis legionibus intulit bellum: sed graviter multis præliis vexatus, & amoris impatiens, quo Cleopatram ardebat, à Parthia refugit. Phraates insolentior ea victoria redditus, à populo in exilium pellitur, nec multo post tempore Scytharum auxilio in regnum restituitur. Nullius est enim tanta nequitia, quæ non inveniat adiutores, si quid asferre utilitatis posse videtur. Substituerant interim Parthi Tyridatem, qui audito Scytharum adventu, cum magna amicorum manu ad Octavianum in Hispaniam belligerantem, confugit, obsidem Cæsari Phraatis filium ferens, quem negligentius custoditum rapuerat, paritulum se omni tempore Romanis affirmans, si ad recuperandum regnum adiuuaretur. Phraates & ipse legatos ad Cæsarem mittit servum suum Tyridatem, & filium remitti postulat: Cæsar his cognitis, neque contra Tyridatem se Parthis dixit, neque adversus Parthos Tyridati auxilia daturum. Phraati tamen filium sine precio remisit, & Tyridati, quoad manere apud Romanos vellet, opulentum sumptum præberi iussit. Sed finito Hispaniensi bello, cum in Syriam ad componendum orientis statum venisset, metum Phraati incussit, ne bellum Parthiæ inferret. Itaque

tota



tota in Parthia captivi, sive ex Crassiano, sive ex Antonii exercitu recollecti, signaqve cum his militaria Augusto remissa: sed & filii nepotesqve Phraatis obsides Augusto dati: plusqve Cæsar magnitudine nominis sui fecit, quam armis alius imperator facere potuisset. Misit tamen Augustus, ante quam moreretur, adversus Parthos, rebus novis studens, Germanicum Drusi filium, Caligulae patrem: qui anno quarto Tiberii Cæsaris de illis clarum triumphum egit. Sub Nerone Parthi Armeniam sustulerunt, & Romanas legiones sub jugum misere, ægreque Syria retenta est. M. Antonino & Aurelio Commodo imperium tenentibus, Vologesus rex Parthorum gravi eruptione facta, non Armeniam modo, sed Cappadociam, Syriamqve vastavit. Antoninus tamen per duces suos eum represit, ac Seleuciam Assyriae urbem super Hydasphem fluvium sitam, & multa hominum millia in deditionem accepit, & cum fratre de victoria Parthica magnifice triumphavit. Trajanus qui usque ad Indos imperiū protulit, Parthos pluribus bellis vicit, eisqve non modo australia regna, sed Armeniam quoque abstulit. Sub Hadriano Cæsare, qui Trajanum secutus est, iterum res Parthicae audæ sunt, & Euphrates utriusqve imperii limes factus. Contenderunt cum Severo Cæsare Parthi: & ab eo superati sunt. Aurelius Bassianus cognomento Caracalla, inter Edessam & Carras commisso cum Parthis prælio, interfectus est. Aelius Lampridius non in prælio, sed cum ex prælio recessisset ad requisita naturæ, insidiis eum à Macrino præfecto occisum dicit. Deinceps id orientale imperium nunc Parthicum, nunc Persicum appellatum reperimus: quamvis imperio Persico Macedones finem imposuerunt. Sed scriptores non tam gentem, quæ imperaret, quam locum cui imperabatur, intuiti sunt: ideoque Persarū Reges pro Parthis acceperunt. Aurelius Alexander Xerxem regem Persarum maximo prælio superavit. Gordianus Parthis bellum intulit, qui jam moliebantur erumpere, feliciterqve præliis ingentibus eos afflixit: rediens autem non longe à Romanis finibus, interfectus est fraude Philippi. Post eum imperavit Valerianus, qui septimo & vigesimo loco post Augustum imperio præfuit, à Sapore rege Persarum captus, luminibus orbatus, ignominiose in Persarum servitute consenuit: id officii apud eos sortitus, ut Sapore equum ascendente, incurvatus regem non manu sed dorso levaret. Sub Galieno Parthi Mesopotamia Syriæqve petiti sunt: sed Odenatus his recu-



recuperatis, usque ad Ctesiphontem penetravit. Carus Narbonensis secundus & trigessimus ab Augusto, Persas prælio vicit, Seleuciam, & Ctesiphontem notissimas urbes cepit: & cum castra super Tigridis flumen haberent, non armis hostium, sed ictu fulminis interiiit. Maximianus adversus Narseum Persarum regem, inter Gallinicum & Carras congressus superatus est, fugitque ad Diocletianum in Mesopotamiam, à quo turpiter receptus, & admodum reprehensus, instauratis viribus, iterum cum Narseo Ormisdæ & Saporis avo in Armenia majore pugnavit: victorque pulso Narseo castra ejus diripuit, uxores, sorores, & liberos cepit, & cum ingenti præda ad Diocletianum rediit. Constantius magni Constantini filius, à Persis multa & gravia damna perpeffus est: videbatur tamen superaturus in fine, nisi ad civile bellum contra Julianum redire compulsus esset. Julianus rerum potitus, Parthis intulit bellum, oppida aliquot & castralla eorum in deditionem accepit, & vi expugnavit: Assyriam populatus est, castra apud Ctesiphontem stativa aliquandiu habuit, rediensque victor, dum se inconsultius præliis inserit hostili manu interfectus est, sicut Eutropius refert, qui ejus expeditioni interfuit. Nonnulli divinitus interemptum asserunt, quod ex Christiano ad gentilitatem redisset, propter quod mox, ut vulneratum se intellexit, dixisse fertur, vicisti Galilæe (sic enim apostata per irrisionem appellabat Christum). Jovianus duobus præliis victus, pacem cum Sapore Parthorum rege necessariam, sed ignobilem fecit, abbreviatis imperii finibus: & parte superiore Mesopotamiæ tradita, quod ante eum annis mille centenis & duobus deviginti, ex quo Romanum imperium conditum erat, nusquam acciderat. Justinianus Parthos bella moventes per suos duces pluribus præliis superavit, postea apud Euphratem ejus exercitus victus est: Sed per Belisarium refarcita sunt damna, & fœdus cum Parthis initum. Zeliordes Hunorum rex intra Scythiam manentium, cum viginti millibus adversus Justinianum Cosdroem adjuturus advenit: sed suspectus ab eo habitus, multis vulneribus confossus & interfectus est.



## CAP. XXXI.

*De Cosdroa tyranno & victoria Heraclii, crucem Domini ablatam ac iterum esse restitutam, de Mahumethe pseudo propheta nec non insigni victoria Tamerlanis Parthorum ducis.*

**S**ub Phoca imperatore Cosdroas Mesopotamiam occupavit, & paulò post Palæstinam cum Hierosolyma, & nonaginta millia Christianorum interfecit, partemque crucis dominicæ secum asportavit, Heraclio imperium tenente: & deinde in Ægyptum arma vertit, Alexandriamque occupavit: nec moratus Africam ingressus est, & Carthagine capta, imperio potitus est Libya. Heraclius pacem ab eo petiit, etiam cum dedecore imperii, neque impetravit à superbiēte rege. Itaque duxit in eum, omnia belli fortunæ committens: ille ex Azoto Syriae fugit in Persidem relictis ducibus, qui Romanorum impetum morarentur. Heraclius flexo ad sinistram itinere, & superato monte Tauro, in Persidem transivit, vicitque Sabbarum & Saym duobus præliis: & tertio Razatenem alium ducem superatum interfecit, & vigintiseptem militaria signa intercepit. Cosdroes Medorsē filium regni consortem appellavit, Syrochio præterito, qui natus erat major: propter quod captus ab eo cum Medorse & uxoribus in carcerem conjectus est, atque deinde cum filio necatus. Syrochius Heraclio victori captivos reddit, & crucem domini, & insuper munera dedit. Hoc tempore Mahumethes Pseudopropheta exortus est, qui Arabes ad defectionem compulit: Crux domini Hierosolymam reportata est. Heraclius non multò post in hæresin lapsus, per desidia languens Saracenorum vires tum primum nascentes propagari & crescere sinit, qui sub falsa lege Mahumethis imperium erexere. Arabes enim cum Parthos in suam perfidiam trahere non possent verbis, armis eos agitavere. Decesserat primo regni sui anno Syroches, cuique filius successerat Adhefer, cui pariter infra annum defuncto Ormisda successus est, quem Arabes prælio superatum interfecere, eiusque imperium obtinere. Arabes autem tantis victoriis aucti: nam & Romanorum



norum arma longe propulerant, Antiochia occupata, & in Africam  
 manus injecerant, transmissa Ægypto Saracenorum nomen assump-  
 plere: atque ita & Parthi, & Persæ, & Ægyptii, & multæ aliæ gentes  
 in Saracenicum nomen transiere: neque postea nomen Parthicum  
 auditum est quasi magnum, usque ad tempora nostra, anno circiter  
 decimo priusquam nasceremur. Tamerlanes genere Parthus, gre-  
 garius miles, adeò inter suos vi mentis & corporis agilitate excelluit,  
 ut brevi multarum gentium dux fieret: quibus Parthorum imperio  
 potitus, Scythas, Iberos, Albanos, Persas, Medosque sibi subegit:  
 Mesopotamiam invasit atque Armeniam, transitoque Euphrate, cum  
 quadringentis millibus equitum, sexcentis millibus peditum, omnem  
 Asiam quam minorem appellamus, obtrevit. Regem omnium poten-  
 tissimum Pazaitem Turcarum dominum, cum pari equitum numero,  
 & magnis peditum copiis, fines suos tutantem, apud Armenos præ-  
 lio superatum, ducentis millibus hominum interfectis, vivum cepit,  
 caveaque in modum feræ inclusum, per omnem Asiam circumtulit,  
 egregium & admirandum humanarum rerum spectaculum. Castra ejus  
 in urbis modum ordinata fuere, statuto cuique arti loco atque in par-  
 tes suas distributis exercitiis, ut omnia in promptu essent: ad vitæ  
 usum necessaria summa semper rerum copia inveniebatur, cum nul-  
 lus esset latrocinii locus, tutoque omnia comportarentur: nulla un-  
 quam seditio, nullus tumultus inter milites fuit, adversam fortunam  
 nunquam expertus est. A Tanai flumine usque ad Ægyptum, uni-  
 versam Asiam percurrentes, Smyrnas, Antiochiam, Sebastiam, Tripo-  
 lium, Damascum, multasque validissimas urbes vi cepit, diripuit, atque  
 incendit. Soldanum Ægypti bello superatum, ultra Pelusium repu-  
 lit: Ægyptum ingredi parantem vastæ solitudines & deserta loca  
 averterunt, virum belli artibus insignem, ad ea maximè obeunda  
 promptum, quæ ardua & dura ceteris videbantur: Damasco capta,  
 cum arcis antiquæ expugnatio difficilior videretur, constructo è regio-  
 ne altera, quæ antiquam altitudine superaret, vi cepit, quamvis mul-  
 ta suorum cæde. Capha urbs est Genuensium colonia in Taurica  
 Cherisoneo, non procul à Bosphoro Cimmerico: hanc cum Tamer-  
 lanes invadere statuisset, Scythas negotiatores præmisit, qui pretio-  
 sissimas animalium pelles minori quam consueverunt precio venunda-  
 rent, sciens aurum abscondi posse, pelles suffodi non posse: moxque



bello indicto, admotis urbi machinis, expugnata vi atque armis civitate, & auro & pellibus potitus est. In obsidionibus urbium, prima die albo tentorio utebatur, secunda rubeo, tertia nigro: qui se dabant in albo sedenti, salutem consequebantur. Rubeus color moriendum patribus familiarum indicabat: niger civitatis excidium, & omnia in cinerem convertenda. Fama est populosa cujusdam civitatis, quæ prima die deditionem neglexisset, pueros puellasque omnes in candida veste ramos olivæ præferentes exivisse, ut principis iram placarent: illum omnes ab equitatu conculcari atque conteri jussisse, & urbem captam incendi. Interrogatum aliquando ab homine Genuensi, qui ei familiaris esset, cur tanta crudelitate uteretur: Commotum, ac veluti furem, distorta facie, ac spirantibus ignem oculis, respondisse. Tu me hominem esse arbitraris? falleris: ira Dei ego sum & orbis vastitas: caveo ne post hac mihi occurras, nisi velis interrogationis tuæ poenas dare. Abiit Genuensis, neque ulterius oculis Tyranni objectus est. Ferebant qui Tamerlanem viderunt, cum Hannibali fuisse similem, secundum ea quæ de Pœno scribuntur: nihil ejus animo severius, nihil magis quam latrocinia vindicasse, ut ipse unus esset, qui latrocinari impune posset. Quærebat tanquam virtutis opus, quibus cum bellum gereret. Deletis regibus ac tyrannis permultis, vastatis pluribus provinciis, onustum devictarum gentium spoliis exercitum in patriam reduxit: & civitatem Marchantem condidit, quam varii generis captivis replevit, & hostium spoliis exornavit. Quod si aliquod excellens ingenium ejus acta reperissent, inter clarissima ducum gesta legerentur: vita functus, duos filios reliquit regni successores, qui discordia laborantes effecerunt, ne Parthorum imperium rursus posset emergere. Thomas Apostolus Evangelium Christi ad Parthos detulit, per quem Medi, Persæ, Hyrcani, & Bactriani nostræ fidei sacramenta receperunt. Corpus ejus alii in India, alii in Mesopotamia sepultum asserunt.



## CAP. XXXII.

*De situ Mediæ ac divisione generatim, de montibus  
ejus, fluminibus, Atropatia regione, &  
lacu Spantha.*

**M**ediæ vulgati nominis terra post Parthiam ad occidentem occurrit: quæ (sicut Ptolemæo placet) à septentrione Hyrcano mari terminatur, ab occasu majori Armeniæ & Assyriæ parte, à meridie Perside, ab oriente Hyrcania & Parthia, quæ montibus excluditur. Hyrcaniam Charindas determinat fluvius: inter Persidem ac Mediæ Parachoatras excurrit mons: Assyriam Choatras excludit. Armeniam Caspia juga, & Cambylus amnis. Sagrus & Orontes altissimi montes interiora Mediæ percurrunt: Ex Oronte Straton oritur in Hyrcanum defluens pelagus, ex Zagro Amardes in idem mare decurrens. Eularvus quoque fluvius ex Australi parte Zagri descendens, Mediæ magnam partem irrigat, & Parchoatram scindens montem, per latissimas terras in Persicum defluit sinum. Cyrhus amnis Choatra monte dimissus inter Cambysem & Amardem in Caspium labitur mare. Regiones quatuor memorantur apud Medos: Tropatena quæ occidentalis est, & ad septentrionem vergit in mare, Caspium & Zagrum montem: ad quam Margasi, Mardi, Marundæ, Cadurchi, & Cadusii pertinere videntur: Elymais, quæ ad septentrionem vergens orientem respicit: & Tapuros, ac Dribyces populos. Daritis magna in convalle jacet: hinc Parchoatra inde Oronte clausa. Syromedia regio tota montana est, & ad orientem vergit, & conjuncta Parthiæ, & Ragianæ regioni, Parachoatræ montis insidet juga, & ad meridiem respiciens supereminet Persidi ac Paratacenæ regioni, quam nonnulli Mediæ tradiderunt. Oppida supra quinquaginta memorantur, quorum nomina referre plus tædii quam utilitatis habet, tantum est, quod Ptolemæus nobis de Mediæ tradit. Strabo dicit Mediæ multam & olim potentem regionem, in medio Tauro sitam esse, qui circa hæc loca multifidus, & convalles magnas comprehendit. Mediæ in duas partes diviserunt, quarum alteram majorem vocaverunt, alteram Atropatiam. Majoris Metropolis Ecbatana fuisse, ma-



gna civitas, & imperii Mediæ caput, quæ & Parthi postea usi sunt. Nam reges ibi æstatem agebant, cum sit frigida: hyemem verò Seleuciæ, quæ secus Tigrim est, prope Babylonem. Atropatia ab Atropato duce nominata est, qui obstitit, ne à Macedonibus subigeretur, ut Majoris Mediæ pars. Is postea rex declaratus, regionem hanc à Media sequestravit: cujus successores regnum continuantes, cum Armeniorum regibus affinitatem contraxere: deinde cum Syris, & postremo cum Parthis. Atropatia Armeniæ & Macianæ ad orientem sita est, Mediæ verò majori ad occidentem, utrique ad aquilonem: habitantibus circa Hyrcani maris recessum & Matianam ab Austro jacet. Araxis fluvius Armeniam & Atropatiam determinat à Zeugmate, quod est juxta Euphratem, quousque in Atropatiam perveniatur octo millia stadiorum esse feruntur. Major Media ab oriente Parthia terminatur, & Cossæorum montibus, & Parætacenis, qui etiam montani sunt, & latrones ac Persis continui: (Sed hos Ptolemæus Mediæ ad Austrum opponit) à septentrione Cadusiis, & aliis supra Hyrcanum mare habitantibus, qui à Ptolemæo inter Medos collocantur, & ut Patrocles ait, ad quinque millia stadiorum oræ montanæ circa Caspium occupant mare, loca tenuia & aspera incolentes: ab austro Apolloniatide (quam Sitacinam veteres appellarunt) & monte Zagro, apud quem Massabatica est, quæ ad Mediam pertinet: Quidam ad Elymeam dixerunt pertinere. Ptolemæus, quamvis Sitacinam regionem & Apolloniatem, quantum ad Mediam, meridionalem facit, nonnihil tamen occidentis illis attribuit, & Zagrum montem per mediam assurgere Mediam ostendit: ab occidente Atropaciis, & Armeniorum quibusdam Media concluditur. In Atropacia lacus est nomine Spantha, in quo sales nascuntur & congelascunt: ejus regionis loca opulenta sunt, præter septentrionalia, quæ montana aspera sunt & frigida. Apollonides ait, ex ea regione equitum decem millia, peditum quadraginta millia ad bellum cogi posse: Multa eis cum Parthis & Armeniis prælia fuerunt, tenueruntque dignitatem suam, si quidamiserunt, forti manu recuperantes. Amicitiam cum Parthis, & cum Romanis quasivere. Regia eorum æstivalis Gaza fuit in campo sita, & Vera castellum munitissimum, quod Antonius in Parthica expeditione obiedit. Id ab Araxe stadiis abest duobus millibus & quadringentis, ut Adelphius refert, qui Antonio familia.



familiaris fuit, & illius in Parthos expeditionem conscripsit, in qua non affuit modo, verum etiam præfuit.

## CAP. XXXIII.

*De Mediâ magna, & solo eqvis pascendis apto, ex  
hac Vescos equos genus habere, de herba, quæ  
Medica vocatur, equorum nutritura,  
abundantia.*

**M**ediâ magna ex parte alta & frigida, cujusmodi sunt montes Ecbatanis imminentes, & qui apud Ragas & Caspias partes consurgunt, & omnes denique septentrionales partes, usque Matianam & Armeniam, hujusmodi sunt. Regio verò quæ sub Caspiis portis, & in humili, & in concavo solo jacet, opulenta est: & omnia fert, præter oleam, quæ etsi ibi nascatur, arida tamen & sicca est. Mediâ sicut armenia eximiè pascendis eqvis apta est. Unde pratum quoddam est, quod Hippoboton vocatur, per quod iter faciunt, qui ex Perside & Babylone in Caspias portas proficiscuntur: in eo pasci dicuntur equarum quinquaginta millia, regium id armentum est. Vescos equos, quibus reges utebantur, optimos & magnos, alii hinc genus habere, alii ex Armenia dixerunt: quibus propria forma quædam fuit, quemadmodum Parthicis quæ Græcis cæterisque, qui apud nos sunt. Herba quæ præcipuè nutrit equos, eo quod ibi abundet, propriè Medica vocatur. Longitudo ac latitudo Mediæ penè par, maxima ejus longitudo ea videtur, quæ est à Zagri transitu, qui vocatur Medica porta, per Sigrianam ad Caspias portas, stadiorum quatuor millium supra centum. Tota Mediâ inter quartum & quintum clima continetur: Parallelus qui per Rhodum est, australia ejus attingit, secundum Ptolemæi descriptionem: parallelus qui per Hellespontum, septentrionalia circa Hyrcanum mare percurrens. Ditissimam fuisse Medorum terram (sicut Virgilius ait) ex tributo licet intueri, quod Persis pendebant: duplo enim majus fuit eo, quod à Cappadocibus



cibus exigebatur quod asserit Strabo, præter argentum, mille & quingentos equos, mulorum duo millia, & ovium quingvagina millia pendisse quotannis. Græcas urbes in Media Macedones condidere, Laodiceam, Apamiam, & Rhagam, quæ apud Rhagas est, & prius Ariopus nominata fuit. Parthi Arsaciam ædificarunt, quæ australior est, quam Caspiæ portæ, quingentis ferè stadiis (ut Apollodorus Adriamittenus ait) Ecbatanam Mediæ caput Plinius à Seleuco rege conditam dicit, à portis Caspiis per viginti millia passuum distantem: Idem Margianam regionem, quam Strabo videtur à Media sejungere, inter Medos collocare videtur, apricitatis inclytæ: quæ sola in eo tractu vitifera sit, undiqve montibus inclusa amœnis: ambitu stadiorum mille quingentorum: aditu penè inaccessio, ob incommodum arenosæ solitudinis, quæ per centum viginti millia passuum undiqve versum circumfusa est: cujus amœnitatem Alexander magnus usque adeo miratus est, ut ibi primam condiderit Alexandriam, quam mox à Barbaris excisam Antiochus Seleuci filius reformavit, & de nuncupatione suæ domus dixit Seleuciam: cujus urbis circuitus, in stadia septuaginta quinque diffunduntur. Margus fluvius eam interfluit. In hanc Orodes Romanos Crassiana clade captos deduxit, nostri imperii magnum dedecus. Julius Solinus Tigrim fluvium in Armenia regione caput attollere dicit, in loco edito, ex lucido conspicuoqve fonte: nec ab exordio statim totum esse, primo pigre fluere, non cum suo nomine: At cum fines Medorum invecus sit, Tigrim statim vocari (ita enim Medos sagittam nominare) Arethusam lacum influere gravia pondera sustinentem, cujus pisces nunquam se alveo Tigridis immisceant, sicut nec amnici stagnum attingant Arethusæ, per quod dissimili colore volucris meet cursu: Mox Tauro resistente in profundum mergatur, quem subterlabens in altero ejus latere emicet, ulvas & purgamenta plurima secum trahens, identidem abscondatur: & Adiabenos Arabasq; præterfluens, Mesopotamiam amplectitur: & amnem nobilissimum Hydaspem accipiens, Euphratem quoque desert in sinum Persicum. Sed Ptolemæus nihil ad Mediam pertinere Tigrim demonstrat, quamvis in Armenia fontes habere satetur. Apud Cordicam montem multi inter Medos latrocinium exercuere, sicut Cadusii, montani, & Amardi, & Tapyri, & Cyrtii, & hujusmodi plures. Nam Zagrus, & Niphates, montes has gentes sparsas habuere, quamvis



quamvis Cyrtii, & Amardi, in Perside & Armenia essent eodem nomine appellati, & eandem formam servantes. Cadusii peditum multitudine non multum ab Arianis superabantur, jaculatores optimi existentes. Cossæi olim adversus Susios & Babylonios Elymeorum socii sagittariorum tredecim millia exhibuere. Nearchus tradidit quatuor fuisse gentes, quæ illis in regionibus latrocinium exercebant. Mardos, qui Persis erant finitimi: Uxios & Elymeos, qui Persis ac Susiis imminabant: & Cossæos, qui Medis, atque omnes tributum regibus pendisse, Cossæos tamen cum rex æstate Ecbatanis peracta, Babylonem descenderet, dona accepisse: quorum audaciam Alexander contuderit, hyeme eos adortus. Sed Ptolemæus Mardos & Elymeos boreales facit Hyrcano mari vicinos, & inter Medos connumerat. De portis Caspiis multa memoria est. Nemo tamen satis explicat, ubi terrarum existant. Quidam Amazonas portis Caspiis egressas, ad Alexandrum venisse in Hyrcaniam prodidere: sed illæ Caucasæ fuerunt, per quas transitus est ex Iberia in Scythiam. Neronis quoque principis comminatio ad Caspias portas (ut inquit Plinius) ad eum transitum respiciebat, qui per Iberiam ducit in Sarmatas. Verum mons Taurus tribus in locis interruptus, quasi portis quibusdam pertransitur in Armenia, in Cilicia, & in Media: sed illæ tantummodo Caspiæ portæ appellantur, quæ apud Medos existunt, quemadmodum ex Ptolemæo, Plinio, & Strabone licet intelligere: ac per has transitus est ex Babylone ac Perside ad mare Caspium, & hinc fortasse Caspiæ dictæ sunt: & quod aliquæ gentes vicinis insident montibus, appellatæ Caspiæ. Iugæ verò Caspia procul hinc absunt, & ad Armenios ultioresque populos pertinent. Portæ autem Caspiæ (ut Julius Solinus tradit, Plinium secutus) panduntur itinere manu facto, millibus octo passuum longo. Nam latitudo vix est plaustro permeabilis. In his angustiis & illud difficile, quod præcisorum laterum saxa liquentibus inde salis venis exundant: præterea octo & viginti millium passuum tractus omnis, quoquo inde pergitur, humo arida, nullis puteis aut fontibus sine præsidio sitit: tum serpentes undique gentium conveniæ à verno statim die illuc confluunt: ita periculi ac difficultatis concordia, ad Caspias portas accedere non nisi hyeme conceditur.



*De Medorum in Venerem profusione, de uxorum pluralitate, & Medea quæ hic regnavit.*

**H**Æc de situ Mediæ dicenda reperimus: mores gentis diversi. Montanorum ingenia ferociora sunt, qui campos habitant, mitiorem agunt vitam. Illi regem eligere consueverunt, qui fortissimus esset, ut qui præda & latrocinio viverent: isti sapientiam genusque sequebantur: magna ex parte Armenis similes, omnesque in Venerem profusi. Regibus multas habere uxores mos fuit, nec pauciores quam septem. Mulieres quoque pulchrum sibi existimarunt, ut viris nubarent compluribus, paucioribus quam quinque calamitosum putavere. Equitandi & sagittandi magnum his studium, à quibus & stola reperta est, & cultus, & ornatus: & religiosa à subditis in reges salutatio: & tiara & cithara: & pileus & manicatæ tunicae, quibus postea Persæ usi sunt, qui subactis Medis in eorum mores transivere. Nam qui propemodum nudi videbantur, levissimis induti vestibus: muliebria gestare, & velamentis contegi passi sunt. Medeam quæ ibi regnavit, ferunt eam prius vestem commonstrasse, quæ cum pro rege exiret, faciem suam occultabat. Medi à Medo dicti sunt, Ægei regis Atheniensium & Mediæ filio. Scribit enim Trogus Pompejus Jasonem, cum victa Colchide domum rediisset, rursus à Pelia filiis Thessalia pulsum, cum ingenti multitudine, comite Medea uxore, quam repudiatam miseratione exilii rursus receperat, & Medo privigno, Colchos repetisse: socerumque regno pulsum, restituisse: magna bella cum finitimis gessisse, captasque civitates, partim regno soceri adjunxisse: partim populis, quos secum advexerat, assignasse: primumque humanorum post Herculem, & Liberum patrem, quos reges orientis fuisse tradunt, eam cœli plagam domuisse quæ ad septentrionem & orientem vergit. Post ejus mortem Medum privignum, virtutis ejus æmulum, in honorem matris Medeam urbem condidisse, regnumque ex nomine suo Medorum constituisse, sub cujus maiestate orientis imperium fuerit. Paruere tamen Medi Assyriorum regibus, usque ad Sardanapalum, Sed Arbaces Medis præpositus, igna-



vum regem aspernatus, Medis ad defectionem persuasis, victo Sardapalo, imperium ad Medos transtulit: quod sub Astyage in magno culmine fuit. Cum jam per trecentos & quinquaginta durasset annos, Cyrus ex filia nepos Astyagis Medorum extinxit imperium & ad Persas detulit, victo Astyage: quem regno Mediæ privatum, maximæ genti Hyrcanorum præposuit, non tam victorem, quam nepotem agens. Post Persas Medi Macedonibus parvere, deinde Parthis, quamvis pars eorum Romanam amicitiam secuta sit, & aliquando victricia Romanorum signa Mediam pertransiverint. Tamerlanes his imperavit, hodie sub magno Cane degere creduntur: cujus imperium quamvis latissimum esse traditur, nostratibus tamen inaccessum ac pene incognitum est.

## CAP. XXXV.

*De Armenia, quod Tigris in ea nascatur.*

**A**rmenia major post Mediam ad occidentem occurrit: Ea, quantum ex Ptolemæo licet intelligere, à septentrione Colchidem habet, Iberiam, & Albaniam: ab occasu magnum Euphraticursum, qui Cappadociam, minorem Armeniam, & Syriam Comagenen relinquit à dextris, & versus Euxinum Moschicos montes: ab oriente partem Hyrcani maris, ac Mediam, qua montes assurgunt Caspii: à meridie Mesopotamiam, atque Assyriam. Montes in Armenia memorantur Moschici, qui supra partem Ponti ad Cappadociam se efferunt: Paryardes, in quo fontes habent Euphrates & Araxes: Antitaurus, qui ab Euphrate scissus, & mediam percurrens Armeniam postremo Albus appellatur: Gordica, ex quo Tigris oritur, & in paludem Thospitis defertur: Taurus ac Niphates, qui Mesopotamiam atque Assyriam ab Armeniis determinant: Caspii qui vergunt ad Medos, & Caucasii, qui septentrionalia Iberiam versus Albaniamque concludunt. Flumina quatuor nominantur: Cyrus qui monte ortus Caucaso, à sinistris Iberiam, Albaniamque dimittens, Armeniam à dextris, in Hyrcanum defertur pelagus, Araxes, ex Paryarde (ut diximus) cadens, diu ad ortum excurrit, deinde ad septentrionem flectitur, & longum iter emensus, in duos dividitur amnes:



alter, borealem tenens viam, in Cyrum cadit: alter, ad orientem, versus, mare Caspium petit. Euphrates eodem monte dimissus, ad Moschicos usque montes, & Cappadocum limitem, in occidentem, excurrit, ibi versus ad austrum, non parvum iter efficit: & Antitaurum offendens, apud Armeniam minorem, eum interfecat: pergensque recta in meridiem, Melan in se fluvium accipit, ex Argamonte cadentem: Deinde Taurum attingit, quo scisso, Syriam è dextra, Mesopotamiam à sinistra cadens, in Arabiam usque desertam, prolabitur, multum in meridiem proVectus. Deinde in orientem, ac septentrionem vergens, Babyloniam Mesopotamiamque disternat, rursusque auroram petens, non procul à Seleucia, in meridiem, flectitur; peractoque non parvo cursu, apud Apamiam denuo in orientem currens, miscetur Tigri: & cum eo in austrum flexus, Persicum ingreditur sinum. Tigris quoque in Armenia nascitur, ex monte Gordica, de quo alio loco dictum est, secundum Julii Solini conscriptionem. Nos (si Deus dabit) alio loco secundum Ptolemæum de ipso dicemus, & paulò inferius secundum Strabonem. Regiones Armeniorum nomen habent prope Moschicos montes, Cotacena inter Cyrum & Araxem: Totena ultra Paryardem montem, versus Boream: Sacapena apud Euphratem, qua vergit in Cappadociam Basilicene: & juxta eam, orientem versus, Hobordena: apud Antitaurum, in Boreali parte, Sophena: & illi contigua Astaunitis: ad ortum inter Album, & Niphatem montem Bagrandavena, & Cortea, circa Gordicam montem. Gordena & Thospitis, circa paludem ejusdem nominis: & demum Anzitenà, inter Taurum & Antitaurum. Non procul ab Euphrate paludes tres inveniuntur, quæ magnæ existunt. Thospitis, quam Tigris ingreditur. Arsissa, quæ non procul à Caspiis montibus invenitur: & Lychnites, Araxi fluvio proxima. Oppida quam plurima referuntur, verum sine dignitate à Ptolemæo, qui tantum nomina ponit. Paralleli qui per Byzantium & Hellespontum feruntur, mediam quodammodo Armeniam interfecant: quæ nusquam australior est parallelo, qui per Rhodum deducitur, neque illum attingit à quarto climate, in sextum vergens, quod minime ascendit. Tantum est quod nobis de Armenia Ptolemæus insinuat. Profusior, & svavior Strabo est, quem referre haudquaquam pigebit, secundum quem Armenia nusquam extra Taurum ad Ausum porrigitur: sicut

nec



nec Media. Australes Armeniæ partes Taurum objiciunt, qui eam ab omni regione dirimit. Quæ inter Tigrim est ac Euphratem Mesopotamia dicta.

## CAP. XXXVI.

*De Armenia montibus variis, quod arca Noe in montibus Armenia hæserit, & quanta nive hi sint obruti.*

**O**rientales majori Mediæ & Atropaciæ sunt contigui: septentrionales montes sunt Parachoatræ Caspio mari imminentes. Item Albani, & Iberes, & Caucasus, qui gentes circuit, & Armeniæ, & Moschicis, & Colchicis montibus conjungitur, usque ad eos, qui Tibareni appellantur. Ab occasu sunt cum gentes hæ tùm Paryadra mons & Cidissa, usque in Armeniam minorem, & fluvialem Euphratis regionem, quæ Armeniam à Cappadocia dirimit & Comagena. Montana ferè, sed aspera est Armenia paucis exceptis Mediam versus, ac propterea cum diluvium desedit, arcam Noë in montibus Armeniæ terræ primum hæsisse, sacra tradit historia, Taurus mons ab ulteriore Comagenorum & Melitenorum regione, incipiens, in Armeniam erigitur. Masius quoque ex Mesopotamia & austro Armeniam irrumpit, inter quem & Antitaurum est Sophena regio, cujus regia est Carathocerta. Antitaurus autem ab Euphrate, Tauroque initium sumens, ad orientales Armeniæ partes desinit: cui ad alteram partem Acilisena est, inter Taurum & Euphratis Mesopotamiam sita, priusquam is ad Austrum deflectat. Masio, orientem versus, juxta Gorgodylenam Niphates mons imminet: de hinc Abus quem Ptolemæus Album appellare videtur, ex quo Euphrates & Araxes fluunt: Deinde Nibarus usque in Mediam extenditur. Multi montes & multi colles sunt in Armenia, in quibus non facile vitis nascitur: multæ etiam convalles, aliæ modicæ, aliæ opulentæ, quemadmodum campus Araxinus, per quem Araxes fluit. Est & Sacasena regio, quam existimo Sacapenam vocari à Ptolemæo, Albanæ & Cyro flumini finitima. Deinde Gogarena, fructibus ac domesticis



arboribus affluens, & his quæ semper virent: fert etiam oleam. Phænena quoque Armeniæ pars est, & Orchistena, quæ equis abundat. Chorzena, & Cambisena, quæ septentrionales & valde nivales sunt, Causis montibus & Iberiæ & Colchidi contiguæ: ubi iter agentes, in summis montium cacuminibus, nive obrui dicuntur, quæ ibi plurima cadit: ob quam rem baculos secum ferunt, quos in summam nivem dilapsi, respirandi gratia exerunt, & ut eo signo auxilium è transeuntibus consequantur: quapropter sæpe effossi servantur. In nive glebas quasdam concavas congelascere prodiderunt, aquam optimam tanquam in tunica continentes.

## CAP. XXXVII.

*Qui fluvii sint in Armenia, & de Arsino lacu, aqua quæ in illo propter celeritatem impermixta fervet, de eorum apud eos bonitate, & eorundem opulentia.*

**M**ulti amnes sunt in Armenia: sed clarissimi Phasis & Lycus in mare Ponticum exeunt. In Caspium, Cyrus & Araxes emittunt. In rubrum mare, Euphrates & Tigris. Araxes ex monte Abo descendens, ad orientem illatus, usque in Atropaciam ad occasum septentrionemque deflectit: & primo Azara præterlabitur, deinde Artaxata Armeniæ urbes: postea per Araxinum campum, in mare Caspium emittit. Euphrates à boreali Tauri parte, quæ Abus vocatur, exoritur, primo per Armeniam fluit, occidentem versus: deinde ad austrum flexus, inter Armenios & Cappadocas, Taurum recidit: egressus verò cum prope Syriam pervenerit, ad hyemales ortus revertitur, usque ad Babylonem, & ad Tigrim Mesopotamiam efficit, & ambo in Persicum sinum finiunt. Arsino lacus est in Armenia, quem etiam Thonitum vocant, nitrosus, unde vestes dilacerat ac rumpit, & propterea ejus aqua non bibitur: per hunc lacum Tigris fertur, & à montana regione juxta Niphatem ruens, propter celeritatem undam impermixtam servat, unde & nomen habet:



bet: nam Medi (ut antè diximus) sagittam Tigrin vocant. Lacus hic varios pisces fert: in interiore lacus recessu flumen in voraginem quandam incidens, longo spatio subter terram delatum juxta Chalonitidem exoritur: inde jam ad Opim & Semiramidis murum defertur, à dextris Gordicos & totam Mesopotamiam relinqvens, è contrario Euphrates à sinistra eandem regionem habet: cum verò inter se jam propinquarent, ac Mesopotamiam fecerint, alter per urbem Seleuciam fertur, Persicum sinum versus: alter per ipsam Babylonem. Mantianus lacus, qui caruleus interpretatur, in Armenia magnum nomen habet, & post Maotim maximus creditur: qui usque in Atropaciam progreditur, & salis habet fontes. Armeniae clarae urbes habitae sunt Artaxata, quam Hannibal Artaxiae regi condidit: & Araxata, ambae prope Araxem: Araxata juxta fines Atropatiae: Artaxata apud Araxinum campum bene habitata, & regionis ejus caput, jacens in flexu quodam, qui peninsulam facit, pro muro flumen opponens praeter Isthmum, quem vallo & fossa divisum habuit, nec procul ab urbe castella quaedam munitissima fuerunt Babyrsa & Olana, ubi Tigranis & Artabazi thesauri custodiebantur. Regionis latitudinem Theophanes schoenorum centum esse tradidit, longitudinem duplam, quadragenum stadiorum Schoenum faciens, in quo veritatem transgredi videtur. Est tamen veritati proximum ponere longitudinem ab illo dictam, latitudinem dimidium vel paulò plus. Estodiebantur & auri metalla apud Armenios in Hispiratidae regione apud Cambala, ad quae Alexander Memnonem cum militibus misit. Fuerunt & alia metalla, ejus scilicet quae Opandix dicitur, quem Armenium colorem vocant, Calthae virgultis persimilem, ut scaeniculum est. Nec minus Armenia pascendis equis apta est, quam Media. Unde Nisei equi, quibus Persarum reges utebantur, hinc fuisse creduntur: & Armeniae praefectus quotannis regi Persarum viginti millia pullorum in Phoebeis sacris mittebat. Artabazus Antonio, praeter alios equos, Cataphraكتورum instructorum sex millia ostendit, quando in Mediam cum illo simul irrupit: quorum equorum non Medi solum & Armenii studiosi fuere, sed etiam Albani: nam & illi cataphraetis utebantur.



## CAP. XXXIIX.

*De opulentia Armeniorum, auctione, Thanaide dea, de vestitu atqve Sarapetis populis.*

**O**Pulentos fuisse Armenos hinc documentum sumitur, quod cum Pompejus Tigrani patri Artabazi sex millia talentorum, argenti scripsisset, mox Romanorum copiis viritim distribuit, militi quingvagenas drachmas, centurioni millenas, singulis præfectis provinciæ & Chiliarchis talentum. Tradunt Armeniam, cum prius parva esset, ab Artaxia & Thariada auctam, qui magni Antiochi imperatores fuere: quo superato, ipsi regnū tenere, alter Sophenæ, & Acisenæ & Odomantidæ, & quibusdam aliis locis: alter regioni, quæ circa Artaxata est imperantes, multum convaluere: & vicinis loca plurima abstulerunt: Mediis, Caspianam, & Phaunitem, & Basoropedam: Iberibus, circum montanam Paryadri regionem, & Chorzenam, & Gogarenam trans Cyrum: Chalybum gentibus & Mosinœcis, Parenetam, & Xerxenam, quæ Armeniæ minori conterminæ, vel ejus partes sunt. Cataonibus Acilisenam, & regionem quæ circa Antitaurum est: Syris verò Tamonitam: adeo ut cuncti lingua utantur eadem. Armeniorum mores non multum à Medis alieni fuerunt, & circa religionem quidam Armenii Medi quæ Persarum ritum sequebantur. Coluerunt tamen Armenii Thanaidem quandam deam præcipuo & singulari cultu, ei quæ plurima templa ædificarunt, tum in Acilesina, tum in aliis locis: dedicabant quæ illi non solum servos ac servas, verum etiam nobilissimorum hominum filias, quibus lex fuit, ut diu apud deam prostitutæ nuptui darentur, nec erat qui talibus renueret conjugari. Armeniacam vestem, id est, longas tunicas ex Thessalia sumptam putant. Equitandi quoque studium tam Armeniis quam Medis Thessalicum esse. Armenius ex Armenia Thessaliæ urbe, quæ inter feras jacet, & Larissam juxta Pheras unus ex numero ducum Jasonis recollecta multitudo, quæ amisso Jasonerege, passim vagabatur, Armeniam occupavit, ei quæ nomen & mores dedit: ob quam rem, maximè circa vestitum Armenii Thessalos secuti sunt, qui longas vestes gestaverunt, cum inter omnes Græcos valde Boreales essent, & frigi-



frigida incolerent loca. Dicuntur etiam Thraces quidam, Sarapara: appellati, id est, decapitatores, ultra Armeniam habitasse, prope Guranios ac Medes, montani homines, Barbari indociles & immanes.

## CAP. XXXIX.

*Deregibus & tyrannis qui Armeniam vicissim invaserunt, gravissima inter se praelia commiserunt.*

**P**ost vetustiores illos Armenii successores, Persæ Armeniam invaserunt: postea Macedones, qui Syriam Medianqve habuere: postremus Orontes ex Hidarni genere unius ex septem Persis: Postea ab imperatoribus magni Antiochi, qui cum Romanis bellum gessit Artaxia & Zadriadra (quorum paulo antè meminimus) in duas partes divisa est: hi enim permittente rege imperaverunt: quo sperto, Romanos adorti ac reges appellati, magnum sibiipfis nomen fecere. E genere Artaxiæ fuit Tigranes, is qui eam habuit, quæ propriè Armenia est appellata. Ea Medis, Albanis, & Iberibus contigua erat, usque in Colchidem & Cappadociam, quæ juxta Euxinum est. E Zadriadra fuit Artanes Sophenus, qui Australes partes habuit, eas maximè, quæ vergunt ad occidentem: hic à Tigrane delatus est, qui quanquam rerum omnium potitus, varia tamen fortuna usus est. Nam in initio apud Parthos obses fuit, deinde septuaginta Armeniæ vallibus in precium datis, reversus est. Viribus auctus verò ea loca recepit, & Parthorum regione vastata, Perinium, & loca circum Arbela, Atropatinum quoque & Gordicum regulos, & cum his reliquam Mesopotamiam subegit. Præterea Syriam, Phœniciam vi cepit. Euphratem transgressus elatusqve animo penes Iberiam urbem ædificavit, quam Tigranocerta appellavit, inter Iberiam & Euphratis pontem prope Zeugma Mediæ, hominibus duodecim Græcarum urbium à se everfarum in ea congregatis. Sed Lucullus qui adversus Mithridatem bellum gessit, continuo subsecutus, habitatoribus in sedes suas dimissis, opus quod adhuc erat imperfectum facto impetu demolitus est, atque in parvum vicum redegit. Tigrane ex Syria ac Phœnicia,

L

pulso,



pulso, victus in Ponto à Lucullo Mithridates, desperatione rerum suarum coactus, ad Tigranem Armeniae regem confugerat: Lucullus in Armeniam profectus Mithridatem & Tigranem, & ingentes utriusque regis copias pluribus praeliis fudit. Sed ne summam victoriae manum imponeret, seditio militum impedimento fuit. Cn. Pompejus ei succedens, Pharnacem Parthorum regem adversus Tigranem armavit, Tigranemque filium adversus patrem bellum gerere svasit: ipse Mithridatem nocturno praelio aggressus, victum ac profligatum in Bosphorum profugere compulit, moxque Tigranem in deditionem accepit: adempta Syria, Phoenice, ac Cilicia, in Armenia regnare permisit. Artabazus autem Tigranis filius, quamdiu mansit in amicitia populi Romani, tamdiu fortunatus fuit: Postea verò quam Antonium in Parthico bello hostibus prodidit, perfidiae poenas dedit. Expeditionem enim Antonii in Mediam, non loci natura gravem reddidit, sed viarum dux Artabazus rex Armeniorum, quem ille sibi insidiantem consilii participem fecit, ac bellicae sententiae compotem. Ingressus Mediam Antonius cum legionibus peditum decem & octo, & sexdecim millibus equitum, bellum intulit Parthis: & cum duabus legionibus amissis nulla re prosperè cedente retro rediret, insequentibus Parthis, ab Artabazo per devia & aspera loca deductus, multa incommoda perpeffus est: quamvis & desiderium Cleopatrae majoris incommodi causa fuerit. Nolens enim in Armenia hyemare, octo millia hominum tempestatibus amisit. At cognita quamvis sero Artabazi fraude, eum cepit, victumque duxit Alexandriam, & contumeliosè per urbem circumlatum, postremo in carcere necari iussit, regnumque Armeniae filio suo ex Cleopatra Alexandro concessit: Mithridates tamen alius ex genere Tigranis Armeniam obtinuit, quem Caesar Augustus captum victumque Romam deduxit: ejus frater Pharasmanes Iberorum rex, regnante Claudio, nunciavit Parthos qui Armeniam occupaverant, inter se discordes esse, magnisque bellis implicitos, facile posse Armenia detrudi, si Mithridates eò mitteretur. Annuit Claudius, Mithridates in orientem profectus, Armeniam occupat vi militis Romani, fuso qui praelium committere ausus erat, Demonacte praefecto. Paululum cunctationis attulit rex minoris Armeniae Cotys, sed illo literis Caesaris coercito, cuncta in Mithridatem fluxere, atrociorē quam novo regno conducirēt. Bardanes qui Gotarze expulso Parthorum



thorum imperio potitus erat, Armeniam recuperare aggressus, à Julio Marso Syriæ legato bellum minitante cohibitus est. Nec diu post, inter Armenios & Iberos bellum exortum est, quod etiam Parthos ac Romanos involvit. Pharasmanes (ut diximus) Iberis imperabat: frater ejus Mithridates Armeniis, præsidio Romanorum. Rhadamistus Pharasmanis filius simulata adversus patrem discordia, tanquam novæ odii impar, pergit ad patrum primoresque Armeniorum, ad res novas illicit: deinde spe reconciliationis ad patrem revertitur, paratasque insidias aperit. Pharasmanes bellum Mithridati indicit, causas confingens, quod sibi adversus regem Albanorum & Romanos noluerit opem ferre, copiasque filio tradit, qui subita irruptione Mithridatem campis exutum in castellum Gorgoneas compellit, militibus & loco tutum. Caius Pollio militibus præerat, & cum eo Centurio Casperius viri Romani: oppugnatur frustra castellum, sed avaritia præfecti spem facit. Centurio resistit, tempusque paciscitur, ut ad præsidem Syriæ Quadratum res referatur. Pollio impatiens, milites corrumpit, ut pacem flagitent: compulsus Mithridates diem locumque fructu accipit: Ibi mox catenæ & compedes ei injiciuntur. Pharasmanes cui regni cupido fratre potior ac filia fuit, non ferro aut veneno, sed multa gravique veste opertos & humi projectos, Mithridatem ac uxorem necari jussit: filii quoque trucidati sunt: quia parentum exdibus illachrymaverant, atque ita perfidus rex neque fratri, neque filia, neque nepotibus pepercit. Quadratus qui Syriæ præerat mittit ad Pharasmanem, jubetque à finibus Armeniis filium abstrahere. Julius Pelignus ignavi animi ac ridiculo corporis juxta despiciendus, Cappadociæ procurator erat, Claudio perquam familiaris: is contractis auxiliis provincialium, tanquam recuperaturus Armeniam, dum socios magis quam hostes prædatur, abscessu suorum & incurstantibus Barbaris præsidii egens ad Rhadamistum venit, donisque ejus evictus, ultro regium insigne sumere cohortatur, fumentisque adest auctor & satellites. Elvidius Priscus legatus cum legione montem Taurum transgressus, redire in Syriam jubetur. Vologesus Parthorum rex, materna origine ex pellice Græca natus, fratrem suum Tyridatem in Armeniam deducit: pullisque sine acie Iberis Artaxata & Tigranocerta Armeniorum urbes occupat, fratrique tradit, sed hyeme superveniente parum provisis comestibus, & tunc exorta ex Armenia



recedit. Rhadamistus revertitur truculentior quàm antea: qui dum vastare agros pergit, & multa crudelitate utitur, subjectorum conspiciatione in periculum adductus, pernecitate eorum cum conjuges simul militante salvatur: quæ gravis, primum utcumque fugam & metum hostilem mariti charitate toleravit: post, festinatione continua ubi quæritur uterus, & viscera vibrantur, orat ut morte honesta, contumeliis captivitatis eximatur. Rhadamistus amplecti, allevare, adhortari: modo virtutem admirans, modo terrore ager, ne quis relicta potiretur. Postremo violentia amoris & facinorum non rudis distringit acinacem, vulneratamque ad ripam Araxis trahit, flumini tradit, ne corpus etiam auferretur: ipse præceps per Iberos ad patrium regnum pervadit. Interim Zenobiam (id mulieri nomen) placida illuvie spirantem, ac vitæ manifestam advertere pastores, & dignitate formæ haud degenerem reputantes, obligant vulnus: agrestia medicamina adhibentur, cognitoque nomine & casu, in urbem Artaxatam ferunt: inde publica cura deducta ad Tyridatem, comiterque excepta, cultu regio habita est. Nero qui Claudio successit, cognitis quæ in Armenia gesta erant, legiones orientis juventute supplet, & prope Armeniam collocari jubet. Mittitur Corbulo, qui partem exercitus ab Vinidio Quadrato suscipiens, rebus afflictis consulat. Exoritur in tempore æmulus Vologeso filius Bardanes, abscedunt Armenia Parthi, tanquam differrent bellum: traduntur obsides nobilissimi ex familia Arsacidarum, & prior solitaque reverentia in Romanum populum à Vologeso innovatur. Gloriam facti Quadratus in se trahit, cujus centurio obsides acceperit: Corbulo sibi vendicat, quia non prius conversus rex obsides dederit, quam ipse dux bello delectus, spes ejus ad metam mutaverit. Sed non diu postea bellum relumitur, cum Vologesus Tyridatem fratrem in Armeniæ regno solidare vellet & Corbulo dignum duceret, parva à Lucullo & Pompejo recipere. Armenii dubia fide utraque arma invitabant, situ terrarum, similitudine morum, Parthis propiores, connubiisque permixti, ac libertate ignota, illuc magis ad servitium inclinantes. Tyridates ope Vologesi fratris adjutus, Armeniam insensat, ubi Romanis fidos esse arbitratur: Corbulo præsidium impartitur oppressis, & regem Antiochum proximas sibi præfecturas petere monet. Pharasmanes interfecto filio Rhadamisto, quasi proditore suo, quo fidem in Romanos testaretur,



staretur, vetus adversos Armenios odium promptius exercebat. Tyridates spe delusus, per oratores queritur, cur datis obsidibus Armenia pellatur. Corbulo suadet ut ad Neronem mittat, regnumque petat, tractatur de colloquio, neque convenitur. Interea Corbulo oppidum Volandum vi capit, & trucidatis puberibus, militi diripiendum concedit. Artaxaram caput gentis Armeniæ, cujus moenia (ut ante diximus) Araxis abluit, ultro se dudentibus oppidanis, cum sine valido praesidio retineri non posset, igne delevit, ac solo æqvavit: Barbaros ad speluncas confugientes, fumo & igne consumpsit. Mardos suo more latrocinii Armeniam infestantes, immissis Iberis vastavit, hostilemque audaciam externo sanguine ultus est. Tigranocerta petens auream coronam à civibus oblatam accepit, dataque populo pace, praesidium quod serox juvenus clauserat, non parvo certamine expugnavit. Hyrcanorum legatos qui ad principem Romanum societatem contra Parthos oratum ierant, regredientes, ne transgressi Euphratis ostium, custodiis circumvenirentur, dato praesidio ad littora maris rubri deduxit. Unde vitatis Parthorum finibus, ad primas sedes remeare. Tyridatem per Medos extrema Armeniæ intrantem, abire procul, & spem belli amittere coëgit. Interea Tigranes ex nobilitate Cappadocum regis Archelai nepos, qui diu Romæ obses & usque ad servilem patientiam demissus fuerat, ad capeffendum Armeniæ regnum à Nerone delectus, cum praesidio Romanorum militum Euphrate transmissio Armenia potitur, rebusque secundè cedentibus, Adiabenos conterminam nationem vastat. Monabazus quem penes Adiabenorum regimen erat, auxilium à Parthis petit. Tyridates quoque Armenia pulvis ne deseratur, Vologesus & Adiabeno & fratri auxilia decernit, Monesemque adversus Tigranem ducem declarat, qui etsi famam sui praeiret, non tamen incautum Tigranem offendit: cui Corbulo, qui jam Syriam acceperat, morte Vinidii legati vacuum, duas legiones auxilio miserat: reliquas pro ripa Euphratis locaverat. Tigranes igitur in Tigranocertam sese recepit, copia defensorum & magnitudine moeniorum valida, quorum partem Nicepharius amnis haud spernenda latitudine ambit, ibique obsessus est. Corbulo Casperium centurionem ad Vologesum mittit, qui obsidionem solvi jubeat: reperitur rex apud Nisibim oppidum, septem & triginta milibus passuum à Tigranocerta distans: qui acceptis Corbulo-



nis mandatis, missurum se ad imperatorem Romanum legatos dicit, super Armenia petenda, & firmanda pace: & nihilominus Monesem Tigranocertam dimittere jubet. Scripserat paulò ante Corbulo, ut proprius dux ad res Armeniæ mitteretur. Nero Cesium Patum, cum quatuor legionibus, & Galatarum Cappadocumque auxiliis eò transmissit, legatis Parthorum absque spe ulla remissis. Revocaverat præsidia ex Tigranocerta Corbulo, & Parthi urbem invaserant: Patus transmissò Tauro in Armeniam gloriabundus exercitum duxit. Captis quibusdam castellis gloriæ ac prædæ non parum nactus erat: si aut gloriæ cum modo, aut prædæ cum cura, habuisset. Sed corrupto qui captus erat comæatu, & distante jam hyeme, reduxit exercitum. Magnifica de se ipso Cæsari scribens, quasi jam bellum conficisset. Parthi interea in Syriam irrumpere conati, à Corbulone, cum Euphratis transitu prohiberentur, in Armeniam verterunt, nesciumque Patum atque improvisum magno & infenso agmine invadunt. Patus quasi prælio certaturus obviam procedit, deinde amissò centurione & paucis militibus, quos visendis hostium copiis præmiserat, trepidus remeavit. Tria millia peditum proximo Tauri jugo imponens, quo transitum regis arceret. Alares quoque Pannonios robur equitatus in parte campi locavit, conjugem & filium in castello (cui Arsamosata nomen erat) data in præsidium cohorte, abdidit. Sed Vologesus nihil mutato consilio, vi ac minis alares exterruit, legionarios obtinuit, ipsumque Patum oblèdit. Qui cognito periculo missis ad Corbulonem precibus, auxilium petiit, sed minime expectavit. Nam dum Corbulo per Comagenam & Cappadociam in Armeniam ducit, ad colloquium cum Vologeso veniens, præsentè Monabazo Adiabenno, ita convenit, ut liberatis obsidione legionibus, omnis miles finibus Armeniorum decederet, castellaque & comæatus Parthis traderentur, fieretque copia Vologeso mittendi ad Neronem legatos. Patus una die quadraginta millium spatium emensus, desertis faucibus ad ripam Euphratis, Corbulonem obvium habuit: Pauca inter se locuti sunt, Corbulo irritum laborem questus est, potuisse Parthos deleri, si expectatus fuisset. Patus integra utriusque cuncta respondit, committerent aquilas, & victi invaderent Armeniam abscessu Vologesi infirmatam. Corbulo non ea imperatoris mandata dicere, incertumque esse an Syriam Parthi repeterent, eo quod reversus esset Patus,

qui



qui per Cappadociam hybernavit. Vologesius Corbuloni mandat castella trans Euphratem facta detrahat, amnemq; , ut olim medium reddat: ille Armeniam diversis præsiidiis vacuum fieri expostulat: uterqve paret. Inter hæc legati Vologesi Romam veniunt, Armeniam petentes, cujus possessionem dii potentia populorum arbitri Parthis tradissent, offerentes Tyridatem, accipiendo diademati in urbem venturum. Nero, ut intellexit vacuum Romano milite Armeniam, & Parthos petere quod habebant, bellum maluit, revocatoqve cum ignominia Pæto, Corbuloni eam potestatem dedit, quam olim Cn. Pompejo bellum piraticum gesturo traditam ferunt. Corbulo congregato magno exercitu, Euphratem transmittere parat. Tyridates, & Vologesius legatos ad eum de pace mittunt, nec Corbulo superbe respondet, tempusqve tractando trahit. Interim Megistanas Armenios, qui primi à Romanis defecerant, suis sedibus pellit: castella excidit, plana edita validos atqve invalidos pari metu complet. Vologesius inducias petit, Tyridates locum diemqve colloquio poscit, tempus propinquum, locus, in quo nuper obsessæ cum Pæto legiones erant, ubi ad colloquium ventum est, viso Corbulone rex prior eqvo desilit, nec cunctatus Corbulo, sed pedes uterqve dexteris miscuere. Romanus laudat juvenem, quia omissis præcipitibus consilis salutaria cepisset: ille de nobilitate generis multa præfatus, deniqve iturum se Romam dicit, laturumq; novum Cæsari decus, non adversis Parthorum rebus supplicem Arsacidem. Tum placuit Tyridatem ponere apud effigiem Cæsaris insigne regium, nec resumere nisi manu Neronis. Paucis inde diebus interjectis, magna utrinq; specie, inde eqves compositus per turmas, & insignibus patriis: hinc nomina legionum steterè, fulgentibus aqvilis, signisqve, & simulacris Deum, in modum templi. In medio tribunal sedem curulem, & sedes effigiem Neronis sustinebat. Adquam progressus Tyridates, cassis ex more victimis, sublatum capiti diadema imagini subiecit, magnis apud cunctos animorum motibus, quos agebat insita adhuc oculis Romanorum cædes aut obsidio. At nunc versus casus iterum Tyridatem ostentui gentibus quasi captivum dedit, atqve in hunc modum, quamvis Armeniam Parthi possiderent, Romanis tamen auspiciis imperabant.



## CAP. XL.

*Quomodo Armeni Christiani sint effecti, & Tyridates gentis illius rex, sit ad baptismum conversus.*

**I**N temporibus autem religiosi principis Constantini, Armeni Christiani effecti sunt. Ajunt enim Tyridatem tunc gentis illius regem, ex quodam mirabili signo circa domum suam divinitus ostenso, Christi baptismum suscepisse, qui simul omnes suæ ditioni subiectos, una præceptione jussit, ut similiter Deo colla summitterent. Ex quo factum est, ut ad finitimas quoque gentes Christianum dogma transiverit, & multitudo dilatatum sit: quorum commercio etiam Persæ rudimenta fidei susceperunt, sicut postea suo loco dicitur.

Chersonesus deinceps scribenda est magna & illustris, Armeniæ majori continua, & ad Hellepontum usque porrecta, quam plerique Asiam vocavere, non illam cui in orbis terræ divortio tertiam dedimus partem, sed minorem ac propriam, & in ea comprehensam, quamvis augustioribus inclusa limitibus, tertio loco proxima ponitur.

## CAP. XLI.

*Quanta sit longitudo quantave latitudo Asia minoris.*

**M**Arcus Agrippa ( ut est apud Plinium ) minorem Asiam in duas partes divisit, unam inclusit ab oriente Phrygia ac Lycaonia, ab occidente Ægeo mari, Ægyptio à meridie, à septentrione Paphlagonia: cujus longitudinem quadringentis & septuaginta millibus passuum patere voluit, latitudinem trecentis & viginti: alteram terminavit ab oriente Armenia minore, ab occidente Phrygia, Lycaonia, ac Pamphilia, à septentrione provincia Pontica: à meridie, Pamphylio mari, longam quingentis septuaginta quinque



quinque millibus passuum, latam trecentis vigintiquinque millibus. Quo iudice nusquam Asia Euxinum attingit: modo Paphlagonibus, modo Ponticis gentibus septentrionem obsidentibus. Nonnulli Asiam inter Euxinum & Taurum concludere, ab Hellesponto Ægeoque mari, ad Halyn usque fluvium & Cappadociæ limites extensam, universas in medio gentes complexam, quibus Cræsus imperavit: quem Herodotus gentium dominum appellat, quæ cis Halyn existunt. Alii longe minorem propriam Asiam tradidere præcipue Ptolemæus. Chersonesum vero Triquetram plerique dixerunt, tanquam minima æstimatio ejus lateris facienda sit, per quod ducitur Isthmus: qui tamen nusquam tria millia stadiorum complectitur, quamvis Plinius ducenta millia passuum ei attribuerit, Artemidorum forsan secutus, qui mille & quingenta stadia ponit. Verum Isthmi lineam alii à Sinopensi ora, alii ab Amisensi in Cilicum pelagus & Issicum sinum producunt: quæ descriptio magnam Cappadociæ partem extra Chersonesum collocat. Nobis melior Ptolemæi sententia visa est, qui Chersonesi hujus Isthmum paulo ultra Trapezuntem incipiens, per Moschicos montes, ad Euphratem producit, ac fluvium ipsum per Antitaurum & occurrentes minoris ac majoris Armeniæ campos, ad Amanum usque recta fluentem sequitur, donec Syriam attingat, exin lineam in occidentem per ejusdem Amani monsis juga, usque ad Issicum sinum reflectit. Nec nobis quisquam obliquatam lineam objecerit. Nam & qui ab Amiso in Issicum sinum Isthmum accipiunt, lineam non rectam sequuntur, minus qui à Sinopico sinu, cui non Issicum ac Pamphylium pelagus è regione opponitur, & Tracheæ Ciliciæ litus. Reliqua Chersonesi latera mari undique alluuntur. Aquilonare Pontico ab ostio Bosphori usque in Colchidem: Australe, primo Doriensi, post Lyciaco, mox Pamphylico, deinde Cilicio, & postremo Issico: Occidentale quoque multinomium everberat mare. Intra Byzantium & Chalcedonem Bosphorus Thracius appellatur: ubi latius se pelagus effundit, Propontis est: rursus in angustiis, Hellespontus, exin magis ac magis patens, Ægeum pelagus, cui succedit Icarium, & denique non procul à Creta Myrtoum. Multum in quolibet latere sinus, & multæ peninsulæ, sed nobiliores in occiduo. Longitudo lateris aquilonaris octo millium stadiorum est, reliquum aliquanto minor. Tota Chersonesus septentrionalior est parallelo, qui per Rhodum



ducitur, australior est qui per Byzantium. Si Paphlagonum & aliorum quorundam pleraque loca exceperis, terra magna ex parte ad quintum pertinet clima, propter quod temperata est & frugifera, pecori salubris & homini.

## CAP. XLII.

*In quot sit divisa Chersonesus.*

**P**tolemæus totam Chersonesum in partes octo divisit. In prima Pontum & Bithyniam locavit, duarumque provinciarum apud autores latè memoratarum limites confudit. Secundo loco Asiam circumscripsit, & propriam nominavit, Phrygiam ei Mysiamque & alias plerasque provincias admiscens. Tertio Lyciam: quarto Galatiam, cui & Paphlagoniam, & Lycaoniam, & Pisidiæ partem adjecit: quinto Pamphyliam: sexto Cappadociam: septimo minorem Armeniam: cujus partes ita designavit, ut intra Cappadociam haud dubiè contineri videatur. Ultimam omnium Ciliciam fecit, suos cuique parti terminos assignans, quos prout commodum fuerit, referemus. Strabo plurimas partes fecit, & multas gentes, multasque nationes commemoravit, de quibus suis locis quantum necesse fuerit explicabimus. Nobis aptissima totius Chersonesi triplex partitio videtur: Prior & nobilior pars est Asia, quæ ab Hellesponto usque ad Halyn & Cappadociam porrigitur, & à monte Tauro in septentrionem versa Ponto procumbit Euxino. Altera est Cappadocia, quæ incipiens ubi Asia desinit, orientem versus ad Euphratem usque procurrit, & ab Euxino Antitaurum superans, usque ad Taurum & Amanum montem in meridiem extenditur. Tertia est omnis plaga, quæ à summis Tauri jugis, usque ad mare in Austrum vergit: hæc rursus trifariam dividitur. Nam Lycia in hac parte continetur, & Cilicia, & Pamphylia: similiter & Asiam partimur & Cappadociam. Asiam enim propriam seorsum ponimus, & Bithyniam, & Galatiam, & minori Cappadociæ minorem Armeniam, & oram Ponticam subtrahimus. Facillima hæc partitio, quæ vel gentes respicit, vel fluminum ac montium naturales terminos. Verum reges ac populi qui rerum potiti sunt, pro sua quique libidine atque imperii magnitudine provin-



provinciarum limites aut extenderunt, aut coarctarunt: quæ res locorum cognitioni maximè adversa, scriptores non modo obscuros, verùm etiam inter se contrarios reddidit. Conandum tamen est, ut quæ à majoribus tradita sunt, cognoscentes quantum fieri potest, nova etiam non ignoremus. Magnam igitur Chersonesum ( ut promissum est ) conscripturi, à Cappadocia sumemus initium, quæ orientior est, Armeniæ proxima. Exin reliquas partes prosequemur: nec insulas memoratu dignas omitemus, quæ Asiæ propinquæ sunt.

## CAP. XLIII.

*In quot sit divisa Cappadocia.*

**C**appadocia mutationes plurimas accepit. Persæ in duas satrapias divisere. Macedones ex satrapiis regna constituerunt, & partem Cappadociæ quæ Taurum versus est, propriè Cappadociam nominarunt, alteram Pontum, Euxino expositam. Cappadociæ fines ( quemadmodum Ptolomæo placet ) occidentem versus Galatæ occupant, & Pamphyliorum aliqui: ad meridiem Cilices, per Taurum montem, & Syriorum quidam, per Amanum usque ad Euphratem: ad orientem Mosehici montes assurgunt, & Armeni occurrunt Euphratis accolæ: septentrionem Euxinus claudit ab Amiso usque ad Apſorri fluminis ostia. Paria propemodum Strabo de limitibus Cappadociæ refert. Macedones, & qui post eos in Cappadocia regnare, decem præfecturas constituerunt. Cæsar & senatus, quî Archelao vita functo regnum in provinciam redegerunt, unam addidere: eas nominare nihil sævitatatis habet, quarum aliquæ ad minorem Armeniam pertinent, aliquæ ad ipsam propriam Cappadociam: cui etiam Isuriæ pars conjuncta est. Sed diximis Cappadociam tres partes habere, has nunc prosequi oportet: & primo de minori Armeniæ dicendum est, quæ orientem respicit, Euphrati & majori Armeniæ contermina. Australe ejus latus ad Syriam spectat & Amanum montem: boreale, ad Cidissia jugum usque pertendit Pharnaciæ & Trapezunti vicinum: quæ ad occidentem vergunt, propria Cappadocia excipit.



*De situ minoris Armenia, quomodo Deum coluit,  
quamvis in errores nonnunquam lapsa.*

**I**N Armenia minori (sicut Ptolemæo videtur) non parva pars Antitauri, & Melitena regio, quæ persimilis est Comagenæ. Sola enim ex omni Cappadocia domesticis arboribus tota consita est, & oleum fert, & Monoraticum vinum, quod cum Græco decer-  
tat. Hæc inter Cataoniam & Euphratem jacet Comagenæ continua, & Sophenæ opponitur, majoris Armeniæ regioni admodum fertili. In hac Strabo civitatem nullam esse dixit, sed castella in montibus munita, asseruitque minorem Armeniam satis felicem esse, & semper à potentioribus occupatam fuisse, quemadmodum Sophenam: occupatores autem interdum cum cæteris Armeniis amicitiam habuisse, interdum per sese vixisse: qui & Chaldæos & Tibarenos sibi subjecere, montanos populos, qui Cidissam incolentes medii fuerunt inter Pontum & minorem Armeniam. Mithridates Eupator quinque & septuaginta castella apud eos construxit, & opes suas in illis velut inexpugnabilibus collocavit. Sed manus humana quæcunque facit, eadem destruit, nec ullum est homini tutum in terra refugium. Mithridates in his arcibus tandem à Pompejo clausus est, & tamdiu immoratus, donec per obsidionem in Bosporum fugere cogeretur. Pompejus circa hæc loca in Armenia minori Nicopolim condidit, quæ postea optimè habitata est. Melas fluvius ex Argeo monte descendens, per minorem Armeniam in Euphratem exonerat. Ptolemæus pluri-  
mas civitates, & aliquot provincias minoris Armeniæ commemorat: quarum australiorem Orbisenam dicit, Amano monti propinquam, & magis septentrionalem, Orbalisenam oræ Ponticæ continuam, Cataoniam quoque minori Armeniæ dedit, sed nos Strabonem secuti eam Cappadociæ relinquimus. Successu temporis minor Armenia Taurum transcendit, Ciliciamque complexa est: cujus Turcæ nostra ætate sub Caramano duce, imperium tenent. Armenia tamen minor, proprium ducem habet Christi cultorem, qui ad nos anno superiore legatum misit adversus Turcas suppetias petitem. Armenii enim



enim post accepta fidei sacramenta nunquam Christum negavere, quamvis procul ab Apostolica sede constituti in errores aliquos inciderunt. Gotfrido autem & reliquis Christianis ducibus, qui Hierosolymam petierunt, magno adjumento fuere, commeatus ministrantes, & hostium consilia atque itinera ostendentes. Fridericus imperator, cognomento Barbarossa, qui primus ejus nominis imperavit, trajectis in Asiam copiis, minorem Armeniam occupavit, gesturusque res maximas videbatur, nisi lavandi gratia perspicuum amnem ingressus, absorptus aquis disparuisset, & vanas hominum cogitationes ostendisset.

Cappadocia, quæ major & propria dicitur, ab orienti minore Armenia terminatur, ab occidente Lycaonia & parte Galatiæ, à meridie Tauro monte, ex quo boream versus usque ad Comana Ponti & Amasiorum australia protenditur. Apud veteres separati fuerunt à Cappadocibus Cataones, tanquam alterius linguæ genus. Ariarates eos Cappadociæ addidit, qui primus Cappadocum rex est appellatus. Illi postea usque adeo in Cappadocum linguam ac mores transivere, ut nulla peregrinæ gentis signa remanserint.

## CAP. XLV.

*De Cataonia, & de Pyramo fluvio  
ejusque alveo.*

**C**ataonia plana est, & concava, & omnia fert præter ea, quæ semper virent. Montes, cum alii, tum Amanus à parte australi, qui à Tauro Ciliciæ quodammodo avulsus est, & Antitaurus in contraria abruptus eam intercludunt, ut Straboni videtur. Sed Ptolemæus Cataoniam inter Taurum & Antitaurum collocat, ut qui Taurum non ante Amanum vocat, quam Syriam attingat. Strabo etiam in Cilicia Amanum appellat, & Cataoniæ contra Notum opponit. In Antitauro, qui per Cappadociam ad septentrionem inclinat, & orientis nonnihil apprehendit, convalles profundæ & angustæ sunt. In his Comana civitas fuit, & Bellonæ sanum, & sacrorum servorum, quos numine affatos putabant, ingens multitudo.



Strabo cum ibi peregrinaretur, supra sex millia se invenisse testatur viros ac mulieres: tanta illic hominum turba obsequio dæmonum, mancipata erat. Cataones urbem incoluere, qui etsi regi subditi erant, sacerdoti tamen parebant: qui & fani & sacrorum servorum magna ex parte dominus habebatur, ex progenie regum electus, & secundo loco post regem in honore habitus. Sacrorum genus Orestem cum sorore Iphigenia è Scythia Taurica illic attulisse putabant: quæ Dianæ Tauropoli vocabantur. Creditus est hic Orestes lugubrem comam deposuisse, atque hinc urbi nomen datum. Eam Sarus amnis interfluit, qui per Tauri convalles devolutus, ad Cilicum campos, & subiectum pelagus excurrit. Pyramus amnis, ut Ptolemæus existimat, in Orbisena provincia, quam minori Armeniæ dedimus, caput attollit: ut Strabo, apud Cataoniam è media planitie, qui mox exortus navigabilis est: nec diu currens memorabilem fossam ingreditur, per quam aqua purissima magno spatio occultè sub terram fertur, deinde in summum exoritur, tanta vi, ut immergi superne vix hasta possit: cum Tauro se adjungit, mirum in modum contrahitur fluvius, & mira est montis cæsuræ, per quam aquæ ducitur alveus. Imminentes flumini petrae utrinque ferè usque ad montis summa pertendentes, duorum triumve jugerum spacio concavae sunt: solum quod interjacet totum saxeam, valde profundum, & angustam rupturam, in medio habet, ut eam canis ac lepus saliat: & fluminis quidem alveus ad labrum usque plenus est, latitudine aquæductus par, qui propter obliquitatem & angustias & vallis profunditatem, tanquam tonitru procul exauditur: montes egressus tantum limum in mare devolvit, partim ex Cataonia, partim ex Ciliciæ campis, ut non ab re carmina illa in modum oraculi ferantur: Tempus erat rapidis olim cum Pyramus undis In sacram veniet congesto littore Cyprum. In Sargauresina prætura, quæ Lycaoniæ vicina est, oppidum fuit Herpa apud flumen Carmalum, quod in Ciliciam emittit, & Argus munitio alta juxta Taurum, & Nora, quæ postea Noraxus dicta est, in qua Eumenes obsessus diu restitit, & postea Sisinus thesauros habuit, is qui Cappadocium imperium adortus est, cujus regia fuit Cadyna, in modum urbis ædificata, & in montibus Lycaoniæ sita. Savera quoque olim vicus fuisse dicitur, qui postea magnificè ædificatus, regionis Metropolis extitit. In Morimena regione Jovis fanum celebre fuit, in quo sacrorum servorum



vorum ferè tria millia habitabant, qui cum crederent se Deo servire, demoni famulabantur. Sacerdos ejus sacram regionem habuit admodum fertilem, ex qua proventum annuum accepit talentorum quindecim, & durante vita sacerdotium tenuit, quemadmodum Comanus, secundus post illum in honore habitus.

## CAP. XLVI.

*De Tyanensi prætura, quot Cappadocia prætura, ubi Asiae fanum in quod nude mulieres nudis pedibus primores ingrediuntur.*

**I**N Tyanensi prætura Tyana urbs fuit Tauro subjacens, quæ apud Cilicas portas est, ad quas montium cacumina in Ciliciam ac Syriam tendentia facillima sunt & omnibus communia. Ptolemæus Tyanam urbem & præturam ab ea dictam ad Borealeas Antitauri parteis collocavit: hæc urbs aggeri Semiramidis subjacuit optimè munita, non procul hinc Castabala fuerunt: & Cybistra oppida monti propinqua. In Castabalis fuit Dianæ Perasiæ fanum, in quo sacras mulieres super prunas nudis ingredi pedibus illæsas crediderunt: tantum præstigia demonum potuere. Perasiam id est translatitiam idcirco deam dixerunt, quia ejus sacra per Orestem è Scythia advecta, sicut Comana, putaverunt. Regionem juxta Taurum Eusebiam vocavere, magna ex parte planam & fertilem, inter præturas Cappadociæ, quas undecim esse diximus, unam Cilicam Strategiam appellarunt, quæ ultra Antitaurum versus Boream jacet. In hac mons est Argeus omnium altissimus Asiæ minoris centro proximus, cujus cacumina semper nive albicant, è quibus dicunt qui eo ascendunt, quamquam paucissimi sunt, sereno cœlo æquor utrumque perspicere Ifficum scilicet & Ponticum. Mazacam sub Argeo sitam Cappadoces matrem urbium habuere, quæ etiam Eusebie nuncupata est, & magna Cæsarea: hæc ad civitatis habitationem incommoda fuit, (nam & sicca & debilis erat, & immunita) sed hoc fortasse de industria factum, ne freti moribus cives nimis confiderent, planitiem habitantes arduis collibus clausam. Circumstantia loca omnino sterilia & inculta erant, quamvis



vis campeſtria arenis plena & petris, & paulo ulterius igne exuſta, ſolumq̃ve per multa ſtadia incenſum. Quapropter neceſſaria è longinquo non ſine periculo afferebantur.

## CAP. XLVII.

*De Argeo, & quomodo Cappadocia lignis careat,  
& de Argei ſitu.*

**N**Am cum tota ferè Cappadocia lignis careat: Argeus tamen ſylvoſus eſt, ſed loca ſylvæ ſubjecta ignes habent, & gelidis aquis plena ſunt: nec tamen aut ignis aut aqua in ſummum exit, & ſolum herbidum eſt, & quibusdam in locis paluſtre, ex quibus per noctem flammæ conſurgunt. Locorum gnari caute lignantur, periculum eſt præſertim pecori in obſcuras ignis foſſas incidenti. Mazacea flumen habet Melas, loco humillimo: ſed plus damni affert quam emolumenti, cum non aptum habeat exitum, & in lacus ac paludes diffuſus, urbis aërem æſtate corrumpat, & lapidicinis non parum noceat, alioquin utiliſſimæ paludes ipſæ ſæpe ardere viſæ ſunt. Rex Ariarates ut regioni conſuleret, anguſtiis quibusdam obſtructis, ad quas Melas exitum in Euphratem habet, proximam planitiem totam lacu diluit: atq̃ve inſulas quasdam tanquam Cyclades comprehendens ibi per hyemem immorabatur. Clauſura verò ad imum rupta, aqua ſoluta eſt: intumeſcensq̃ve Euphrates habitationes ac conſita multa delevit, ob quam rem iis, qui damnum paſſi erant, trecentis talentis mulctatus eſt à Romanis. Idem circa Herpam contigit Carmali exitu obſtructo, & ore deindrupto, cum aqua quædam Cilicum loca devaſtaſſet: ſæpe enim contra evenit, quam cogitamus, & damnum ferimus, ubi ſperavimus lucrum. Elegerunt, autem reges Mazacinorum loca ad habitandum, quæ totius regionis media erant: & lignis ac lapidibus abundabant, & herba, qua plurimum ad alenda pecora indigebant: alioqui incommoda, ſed montibus & vicinis munita caſtellis.



## CAP. XLVIII.

*De Mazaca, de exemplo quomodo parentes vereri debeant pueri hic gesto, quibus abundet Cappadocia, Onychitem lapidem in ea inventum.*

**D**istat Mazaca à Ponto stadiis octingentis Austrum versus, ab Euphrate paulominus quàm duplum, à Ciliciis portis sex dierum itinere. Mazaceni Charondæ legibus utebantur, assumentes aliquem legis peritum, qui leges eis interpretaretur, quemadmodum apud Romanos jurisconsulti, atque ita civitatis duplex erat servitus, jurisconsultorum & regum. Nam populi, qui legibus vivunt, his proculdubio serviunt, qui leges interpretantur. Mazacenos Tigranes Armenius malè affecit: omnes enim transtulit in Mesopotamiam & Tigranocerta magna ex parte ex his coluit, postea captis Tigranocertis, potentiores reversi sunt. In hac urbe (sicut Aug. in libro de civitate Dei scribit) decem fratres fuere, septem matres & tres foeminae, inter suos cives non ignobiles: qui cum matri viduae parum obtemperarent, ab ea maledicti sunt, moxque divinitus ea poena coerciti, ut horribiliter omnes membrorum tremore quaterentur, ex quibus duo ad Augustinum pervenere Paulus frater & Palladia soror, & apud memoriam beati Stephani martyris orantes sanitatem consecuti sunt: quo exemplo, & parentes vereri, & sanctos Christi martyres venerari docemur. Gabadania regio campestris est, & cæteris australior, nam Taurum subit, & vix ullam fructiferarum arborum producit, sed pascua habet optima, sicut reliqua Cappadocia frugibus abundat, maximè frumento, & pecore omnis generis, quæ cum Ponto australior sit, frigidior tamen est. In ea Sinopica nascitur rubrica omnium optima, quæ cum Iberica decertat, & appellata est Sinopica, quia mercatores eò illam deferrebant, prius quam Ephesiorum emporium tam celebre esset, quam postea factum est. Archelai inquisitores Onychitem lapidem in Cappadocia, & crystalli crustas invenerunt. Cappadorus amnis (ut Plinius ait) genti



nomen dedit, antea Leucosyri dicebantur, de quibus in Ponticis rebus mentio fiet. Alexander qui post Narcissum Hierosolymitanæ præfuit ecclesiæ, vir doctrina clarus, & morum sanctitate conspicuus ex gente Cappadocum fuit, & pontificatum in patria sua gessit, at Hierosolymam peregrinationis causa petens divina illic voluntate retentus est, non ambitione propria, ut multi hodie ad meliores ecclesias migrant.

## CAP. XLIX.

*De Ponto, quare Cappadocia aliquando dicta Leucosyris, cuius sit figura Pontus.*

**S**equitur Pontus qui (ut Strabo ait) ab occidenti Haly flumine clauditur, ab oriente Colchide, à meridie minori Armenia, & ipsa propria Cappadocia: nec termini in hac parte satis certi ostenduntur: Boream Pontus immittit, à quo nomen acceptum. Ptolemæus (ut ante diximus) Bithyniam Pontumque commiscuit: quamvis & circa Trapezuntem Pontimentionem videatur afferre. Michridates Eupator Ponti rex constitutus, ab Haly flumine usque ad Tibarenos, & Colchos, & Armenios regnavit, & cis Halyn quasdam Paphlagoniæ partes, usque Amastrin & oram Heracliam possedit, Pontumque appellavit, cui minorem Armeniam adiecit: atque his finibus eo sublato Pompejus provinciam accepit, qui distributis inter principes secum militantes his, quæ versus Armeniam & Colchidem sunt, reliqua in undecim gubernationes divisit, & Bithyniæ adiecit, ut ex utrisque una efficeretur provincia, quam Ptolemæus videtur describere. Paphlagonum quosdam his regendos dedit, qui erant à Pylamene, quemadmodum Galatas his qui erant genere Tetrarchæ. Postea Romanorum duces alias atque alias partitiones fecerunt: nam & reges & principes constituerunt, & ex civitatibus alias liberarunt, alias principibus tradiderunt, alias sub Romano populo dimiserunt. Quibus ex rebus haud mirandum est, si Pontus ipse alios atque alios accepit terminos: & aliquando à Bosphoro Thraciæ usque in Colchidem procurrit, aliquando in Heraclia finem accepit, aliquando alibi. Nos in hac descriptione Strabonis limites amplectimur,



ab Halys fluvio auspicientes: hic fontes habet in majori Cappadocia juxta Cambisenam, & multus ad occidentem fertur: postea ad septentrionem conversus, Leucosyros in dextera, Galatas & Paphlagonas in sinistra relinquit: & in Euxinum exit, non procul à Gadilone. Cappadoces (ut diximus) Leucosyri prius appellabantur, ad differentiam Syrorum qui extra Taurum sunt, colore adusto, quod albiores essent, nomen adepti: his sedes apud Halyn fluvium Euxinumque fuerunt. Pindarus ait Amazonas, Syrium hastatumque exercitum duxisse, significans Themiscyræ habitatores. Themiscyra enim Amisenorum Leucosyrorumque fuit, qui post Halyn orientem versus in Ponto erant. Pontica regio haud multum lata fuit, & formam, quodammodo pyramidis habuit: tantò magis arcta atque reducta, quantò in orientem ulterius procedit. Nam circa Pharnaciam & Trapezuntem, plurimum minoribus Armeniæ montibus coercetur: apud Halyn qui Galatas & Paphlagonas determinat basim habet: nec tamen hæc latitudo amplior est sexentis aut octingentis stadiis, à mari usque in Cappadociam: hujus oræ partem Amisini habuerunt, partem Pompejus Deiotaro dedit, ut ea quæ Pharnaciæ & Trapezunti proxima sunt in Colchidem & Armeniam minorem, atque horum regem fecit, cum paternam Tetrarchiam haberet: hic est pro quo apud Julium Cæsarem oravit Cicero.

## CAP. L.

*De Gadilonitica regione.*

**P**ost Halys ostia versus auroram Gadilonitica occurrit regio usque ad Saramenam tota campestris, & lustrum omnium ferarum: oves in ea pellis & lanæ mollioris fuerunt, quod in tota Cappadocia & Ponto perrarum dicunt. Inerant & damæ, quæ alibi raræ sunt: post Gadilonem Saramenam posuere, & Amisum civitatem insignem, distantem à Sinope stadiis nongentis: hanc prius Milesii condidere: postea princeps Cappadocum reformavit, Deinde Athenienses Pyræum vocantes habitavere. Eupator templis exornavit, & partem muris instruxit. Lucullus obsedit. Pharnaces trajecto Bosphoro vexavit, Julius Cæsar libertate donavit. Straton.



tyrannus invasit. Marcus Antonius regibus dedit. Augustus Cæsar, post bellum Actiacum libertati restituit, quæ diu bene usæ est. Hæc regionem optimam habuit, & Themiscyram possedit, antiquum Amazonum domicilium, & Sidenam.

## CAP. LI.

*De Themiscyra campo, & quomodo Pontus regio sit fertilis, & in ea viri docti orti sint.*

**T**hemiscyra campus est ab Amiso sexaginta stadiis distans, qui pelago alluitur, & monti adjacet arboribus pleno, & aquis irriguo, ex quibus flumen unum efficitur, cui Thermodoonti nomen est. Id campum percurrit, & Amazonum fabulis clarum habetur. Est & alterum flumen huic æquale, eandem planitiem irrigans, nomine Iris, cujus fontes in ipso Ponto reperiuntur. Iris mediam Comanorum Ponticorum urbem perfluit, & in occidentem versus Daximoneticam felicem campum permeat: postea apud Gazium illustrem quondam regiam, quæ jam pridem corruit, ad septentrionem convertitur, deinde rursus ad auroram, & Scylace fluvio atque aliis amnibus assumptis, ad ipsa Amasiæ mœnia egreditur in Phanaroëam. Illic Lycus ex Armenia minori descendens, & cum eo concurrens nomen amittit: Postremo per Themiscyram actus, in mare devolvitur. Planicies Themiscyræ semper roscida & herbida est, equorum bouumque nutritrix, milium & panicum multum producit, nec unquam fame vexatur. Præterea montana regio agrestibus pomis abundat, uvæ, pruna, mala, & nuces sponte in sylvis enascuntur: quocunque anni tempore in sylvas exieris, fructus invenies, aut in arboribus pendentes, aut in foliis jacentes: & propter alimoniarum copiam multa est ferarum omnis generis venatio. Themiscyram sequitur Sidenæ planities, licet non valde ferax, irrigua tamen, habens in ora maritima loca munita, Sidam, ex qua Sidenæ nominatur, & alia pleaque, atque hucusque Amisena pertenditur. Hinc viros in disciplinis excellentes commemorat Strabo. Demetrium Ratheni filium mathematicum, & Dionysiodorum, & in grammaticis Tyrannionem, quem ipse



ipse audivit. Post Sidenam fuit Pharnacia, oppidum munitissimum, deinde Trapezus græca civitas, in quam ex Amiso duum millium & ducentorum stadiorum navigatio est, hinc ad Phasim mille & quadringentorum, sive ut alia translatio habet, quadraginta: tanta est totius oræ Ponticæ longitudo. In hac ora ab Amiso navigantibus, promontorium Herculanum prius occurrit, deinde Jasonium, mox Genetes, postea Cutoras oppidum, à quo in Pharnaciam migrarunt inquilini. Subinde Hirschopolis humi postrata, ulterius sinus in quo Hermonassa est & Cerasus: unde appellata creduntur Cerasa, loca abundè habitata: nec procul ab Hermonassa habitationem ponunt, Zygopolim appellatam: tantum Strabo de hoc litore tradit. Ptolemæus ulterius & promontoria, & urbes, & flumina usque ad Asporum amnem commemorat: verum sine dignitate & historia. Trapezunti & Pharnaciæ ad austrum imminebant olim Tibareni, & Chaldæi, & Sami prius Macrones nominati, & Armenia minor, & Apaitæ his quodammodo locis proximi erant, qui prius Cercitæ dicebantur. Inter hos Cidissa mons asperimus erigitur, & Moschicis conjungitur, qui ad Colchidem pertinent: cujus summa ab Heptacomētis, id est, Septipagis obtinentur. Pariadra quoque per hos præterit, qui à locis Sidenæ & Themiscyræ proximis, usque in Armeniam protenditur. Omnes hi agrestes homines fuerunt, præsertim Heptocometæ, quorum nonnulli super arboribus ac turribus habitarunt. Unde & Mosmæci dicti sunt, id est, turricolæ. Mosmos enim turres vocant. His cibus farina, caro, & arborum fructus erat. Peregrino generi infestiores Pompeji cohortes obtruncarunt, cum per montana transirent: miscentes enim crateras furentis mellis, quod rami arborum ferunt: potos & mente alienatos adorti, faciliè interemerunt. Quidam ex his barbaris Bizeres vocabantur. Et qui Chaldæi dicti sunt, prius Chalybes appellabantur, apud quos Pharnacia sita est, in mari habens Pelamydum copiam, in terra ferri & argenti metalla. Sed argentaria postea defecere, ut est terrenarum omnium rerum finis. Oia hic maritima prorsus angusta est. Continuo enim rupes incumbunt nemoribus ac metallis refertæ: cultura agriorum exigua, ideo ex fossionibus & piscationibus victum quærunt, & multam ex delphinis arvinam recipiunt ad res varias utilem. Homerus in dinumeratione gentium quæ ad Trojanum bellum iere, cum Paphlagonum meminisset,



postea Halizonas adjecit, quos Strabo Chalybes esse arbitratur: de quibus modo locuti sumus. Sed quidam Halizonas, quidam Amazonas scripsere, quarum varia historia est: alii eas apud Cariam, Lydiamque collocarunt, alii Migdonum campum illis attribuerunt, alii in Hellesponto sedes dedere, alii ultra Borysthenem in Scythia eas quæsiwere. Vulgarior opinio Themiscyram illarum fuisse patriam, censet, quamvis Scythicam originem ducerent. Leucosyri earum postea sedes invaserunt, à quibus Henetes exisse putavit Mæandrius, qui Trojanis auxilium tulere, atque inde cum Thracibus digressi, in Adriæ sinu habitaverè.

## CAP. LII.

*De Sidena & soli fertilitate.*

**P**Harnaciæ versus occidentem, ut diximus, continua est Sidena, postea Themiscyra. His ad Austrum Phanarœa incumbit, quæ Ponti partem beatissimam obtinet: nam & oleis & vitibus consista est, & cæteris rebus excellit. Hæc à partibus orientalibus Pariadram montem obtendit, in longitudine secum pariter progredientem, ab occasu Phazemoneticam regionem. In Sidena convallis quædam est, longitudine ac latitudine insigni, quam Lycus ab Armenia minori descendens irrigat, & in media valle miscetur Iri. In concursu amnium Amasia urbs fuit Strabonis patria optimè munita, quam primus fundator Eupatoriam à se nominavit. Pompejus cum inchoatam invenisset colonis introductis, & regione illi addita Magnopolim appellavit. Ea in media planitie jacuit, & profunda valle, per quam fertur Iris, mira providentia & natura constructa, quæ civitatis usum exhiberet, fuitque optimè munita turribus & propugnaculis, & præruptæ petrae rupibus, apud quam & regie fuerunt, & regum monumenta. Sub ipsis Pariadræ radicibus Cabira sita fuerunt, stadiis centum quinquaginta quam Magnopolis australiora. Hic erat Mithridatis regia apparatu magnifico structa, hic aquarum balnea calidarum, serarum vivaria, propinque venationes, aurofodinae. Fuit & Novus locus appellatus, stadiis ducentis à Cabiris distans, petra munita ingentis altitudinis, undique prærupta,



pta, & mœnibus cincta, quæ in vertice fontem uberrimum habuit, & ad radicem flumen, & cisternam profundam, & montana in circuitu ad centum viginti stadia altissimis tecta sylvis. Hic preciosissimi Mithridatis thesauri comperti sunt, quos Pompejus in Capitolio dicavit: qui cum Cabira in urbis modum struxisset, Diopolim nominavit. Sed Pithodoris eam augens Augustam appellavit, & pro regia sua usus est. Ptolemæus Sebastopolim vocat, quod idem sonat. Non procul hinc vicus fuit urbis amplitudinem habens, nomine Ameria, in quo fanum mensis Pharnacis appellatum est, multis sacris servis ornatum, & regione sacra dives: quod adeo reges venerati sunt, ut quod ipsi regis jusjurandum vocarent, id regis fortunam, & Pharnacis mensem dixerint. Supra Pharnaceam versus meridiem Comana fuerunt Pontica, eodem nomine quo majoris Cappadociæ Comana, eidem deæ sive eidem dæmoni consecrata, simile templi ædificium, & similem fere ritum habentia, & sacrorum, & divinationum, & cultus erga sacerdotes: in his maximè quæ ante reges fiebant, quoniam bis in anno in festis, quæ deæ exitus appellabantur, sacerdos diadema gestabat, & secundus erat in honore post regem. Pompejus huic templo Archelaum sacerdotem præfecit, & sexaginta stadia regioni adiecit, cui sacri servi fuerunt sex millia: cæca & perdita hominum manus. Archelaus filius fuit ejus, quem Sylla & senatus in honore habuerunt: & qui Mithridatis Eupatoris se filium effingens, Ptolemæi regis Aegypti filiam duxit uxorem, & à Gabinio postea in prælio interemptus est. Lycomedes post Archelaum sacerdotium accepit, & eo sublato Dyteutus Adiatorigis filius, qui ob virtutem hanc dignitatem obtinuit. Nam Cæsar Augustus Adiatorigem cum uxore ac filiis in triumphum ducens, illum cum filio majore statuit interimendum: major hic erat. At cum secundus, militibus qui eum ducebant, majorem se affirmaret, diu inter ambos contentio fuit, & pulchrum de morte certamen, cum præmori vellet uterque, quousque parentes Dyteuto persuasere, ut juniori cederet, asserentes ipsum, qui ætate provectior esset, majorem de matre ac reliquo fratre curam habiturum. Itaque secundus cum patre interemptus est: Dyteutus servatus vel invitatus, qui hanc dignitatem est consecutus. Nam Cæsar, re cognita, vehementer doluit, & eos, qui servati erant, beneficio & cura prosecutus est. Comana



mana urbs populosa fuit. Multi ex Armenia, & ex vicinis civitatibus ad festa conveniebant, viri simul ac mulieres, & sacra deæ, ut ipsi putabant, ex voto perficiebant. Incolæ molles ac delicati, mulierum multitudo maxima, & operatrix: & magna ex parte quamvis sacra, meretricio vivens. Tanta gentilium stultitia fuit, ut lupanaria etiam sacra putarent. Ager circumjectus vitibus confitus est, aptissimus qui Veneri fomentum præstaret.

## CAP. LIII.

*De Coma urbe & quanta incolarum superstitio, de variis Ponti regionibus, & unde Germani salis habeant excoctionem, de Sandara monte ubi metalla effodiuntur, & qui Pontici Christum colant.*

**R**Egio Zelitica Comanis ad orientem jacet, in ea urbs fuit Zela super aggere Semiramidis condita, & illic Anaitidis falsæ deæ templum, quæ ab Armeniis colebatur. Hoc in loco maxima cum sanctimonia fiebant sacra, quamvis dæmoni celebrarent, & iusjurandum maximis de rebus apud aram sumebatur. Sacrorum fervorum multitudo ingens, & sacerdotium præcipui honoris fuit. Zela olim reges non ut civitatem, sed ut Persicorum deorum templum colebant. Sacerdos rerum omnium potestatem habebat, eratque urbs valde dives, & Pompejus multas ei provincias adiecerat, minori Armeniæ finitimas, in quibus sales fossiles reperiebantur, & Megaolopolim appellaverat. Post Phanarœam occidentem versus Phazemonetica regio sequitur, cujus septentrionale latus Gazilotus & Amisenus claudit ager, occidentale Halys, australe Amasiensium terra, quæ plurima est & cæterorum optima. Pompejus hanc regionem Megalopolim nominavit, & facta apud Phazemonem vicum habitatione eam Nicopolim appellavit. In Phazemonetica lacus est pelagi magnitudine nomine Stiphana, cui Cizara castellum adiacuit munitissimum, quo destructo prope regia constructa



structa extitit, reliqua terra magna ex parte nuda, frumenti tamen ferax. Amasiensibus imminebant aquæ calidæ, valde salubres, quæ Phazemonensium sunt. Imminebat etiam Sagyllum castellum super monte quodam situm, erecto & excelso, & aquis abundantissimo, quod postea neglectum est: hic Arsaces dominatum & novas res querens, à filiis Pharnacis regis fame captus & interemptus est, cum ex planicie pulsus sine comitatibus eò confugisset. Dehinc est Diacopena, & Pimolisena regio, tota felix usque ad Halyn. Et hæ sunt septentrionales Amasiensium partes quingentorum fere stadiorum longitudine patentes, nec minor reliqua pars est circa Ximenam, quæ etiam usque ad Halyn descendit. In Ximena sales sunt fossiles à quibus Halyn flumen dici putant, quod imitati Germanorum populi, omnia loca, in quibus sales excoqvuntur, Halys appellant. In Amasiensi agro, multa regio sub Mithridate deserta fuit, & multa castella diruta. Is arboribus plenus erat, & pascendis eqvis & cætero pecori idoneus, & totus habitabilis. Amasiam prius reges habuere, postea Romanorum provincia facta est. Pimolisena regio Halys fluminis utramque ripam occupat: in ea Sandaracurgium, mons est concavus propter metallorum effossionem. Operatores ex aliquo maleficio redempti huc mittebantur, qui propter laborem & letiferum aerem è glebis prodeuntem cito moriebantur, nec plures quam ducenti adesse solebant. Tantum est quod de Ponto explicare possimus. Pythodoris regina plurimum in Ponto valuit, cui & Tibareni & Chaldaei usque in Colchidem subiecti fuerunt. Sidenæ, quoque & Themiscyra & Phanarœa illi paruit. Hæc filia Pythodori Traliani fuit & uxor Polemonis, cum quo aliquandiu regnavit, deinde imperio successit, eo in prælio defuncto. Ex Polemone filii duo relictæ sunt, & filia quæ Coty Sapæo nupsit, eoquæ dolo interempto cœlibatum egit, susceptis ex viro filiis, quorum natu major patris imperium tenuit. Ex filiis Pythodoris alter cum matre paternam hæreditatem administravit, alter majoris Armeniæ rex declaratus est: ipsa Archelao nupta, cum eo mansit usque ad extremum. Aquila Ponticus fuit veteris testamenti translator & interpret, nescimus qua civitate. Is verba Prophetæ de virgine paritura prolata ad juveneculam transtulit, non satis capiens divina mysteria. Pontus Christi sacra cepit, & usque in hanc diem quadam in parte servavit. Mar-



cion Ponticus quamvis Christianus videri vellet, alium tamen creatorem omnium rerum esse dicebat quam Christi patrem, illumque majorem aiebat, & aliquos in suum errorem traxit. Trapezuntii sub Imperatore sunt Christi cultore, qui anno proximo legatum ad nos misit, auxilia contra Turcas orans, quorum arma atque impetum verebatur. Novissime Venetorum literas accepimus quæ Turcarum imperatorem in Pontum cum exercitu trajecisse ferebant, nec dubium faciebant, quin Trapezuntii sese dederent, cum Hismael Sinopensium Dominus, qui diu resisterat, tandem imperata fecisset: nondum vero fama æqvata est. Trapezuntius imperator uni ex Turcarum principibus filiam nuptui dedit, quæ res fidem ejus non satis firmam ostendit. Quis enim Christianus est, & inimico Christi ecclesiæ sacramenta communicat? Multa metus & regnandi cupiditas admittit indigna: Sed non est cœlesti regno idoneus, qui pro terreno cœlestem regem contemnit. Reliqua Ponti & Cappadociæ in potestate Turcarum existunt, quamvis ubique misti ferantur Armenii Christi cultores. Atque in hunc modum absoluta est Cappadocia, quam totius minoris Asiæ tertiam fecimus partem: in qua illud memoratu dignum contigit, quod efferentibus Romanis libertatem & populare regimen, Cappadoces regem petiere, quæ res stupenda Romanis visa est, quibus regia potestas exosa, & arbitrium populi pro libertate fuit. Sed Cappadoces maximè servos arbitrabantur, quorum cervicibus populare jugum immineret, cuius nec superbiam tolerare, nec avaritiam explere quisquam potuit.

Minoris Asiæ tres partes fecimus: Prima est ipsa quæ propria dicitur, altera Galatia, tertia Bithynia. De Galatia prius dicendum quæ orientalis est: hujus termini erunt (quemadmodum nos partim ex Ptolemæo, partim ex Strabone atque aliis accepimus) ab oriente Cappadocia & Haylis fluvius, qui Pontum determinat: ab occidenti Bithynia & Asia, à meridie Pamphylia, à septentrione Pontus Euxinus. In hac parte Lycaonia continebitur, quæ totius Asiæ medium quodammodo locum, & arcem occupat. Pisidia quoque pars comprehenditur Austrum versus, & ad Taurum exposita: circa Pontum Paphlagonæ & Mariandyni sedes habuere. Ptolemæus ab Amiso usque Cytorum boreales Galatiæ partes perduxit, atque ibi Bithyniam incipere voluit Eupator, qui Pontum tenuit, à Colchide usque



que Heracliam imperavit. Reliqua usque ad os Euxini & Chalcedonem reges Bithyni habuere: sublatis regibus Romani eosdem terminos servavere, ut Heracliam Ponto concederent, citeriora Bithyniæ. Strabo Sangario flumine Bithyniam clausit, quem sequi non pudet, & hoc litus ab ostio Sangarii usque Halyn, deinde mediterranea explicare. Ptolemæus Prusiam civitatem mox post Sangarium collocat, deinde Hippum flumen, postea Candiopolim, mox Elatam amnem: nec procul hinc Diopolim, cui succedit Heraclea, de qua paulò post dicemus. Mariandyni circa Heracliam collocantur, de quorum origine parva cognitio est. Strabo eos à Thracia profectos arbitratur, Theopompus Mariandynum barbarum quendam Paphlagoniæ portionem imperio tenuisse refert, & facto impetu Bebriam regionem occupasse, ei que de suo nomine vocabulum indidisse. Fuerunt tamen Mariandyni Bithynis persimiles, quos Milesii qui primi Heracliam condidere, in servitutem redegerunt: hi Caucones expulerant, qui hanc oram usque ad Parthenium flumen coluere, habentes urbem Thejum, ex qua Philetarus natus est autor generis regum Attalicorum. Caucones alii Scythas, alii Pelasgos fuisse putant: quorum genus omnino interiit.

## CAP. LIV.

*De Heraclia ex qua Heraclides.*

**H**eraclia optimum portum habuit, & ad Ponticam provinciam pertinuit, cum Bithynia à Romanis ordinata. Civitas aliòquin memoratu digna, quæ plurimas colonias emisit, & cum prius libera esset, postea sub tyrannis fuit: deinde rursus in libertatem se vendicavit, & iterum à Romanis regem accepit, & Romanorum coloniam in partem urbis & agri admisit. Adiatorix Deme-necli tetrarchæ Galatarum filius, cujus in Ponticis rebus mentio facta est, hanc urbis partem ab Antonio accipiens, quam Heraclienses tenebant, paulo ante Actiaca bella Romanos noctu adortus ad unum jugulavit, id sibi ab Antonio imperatum dicens: sed non tulit impune scelus, captus ipse post victoriam Augusti, & in triumphum ductus (ut ante diximus) cum filio jugulatus est. Archiam poetam, pro



quo Cicero oravit, in hac urbe honoratum fuisse constat, & Platonicum Heraclidem hic natum: abest à Ponti ora (ut Plinius ait) milliariis ducentis. Portus Acone non procul hic jacet, veneno aconito dirus.

## CAP. LV.

*De Henetis, Sinopensibus, & de eorum vico, Har-  
mena: unde Diogenes Cynicus & alii  
complures.*

**P**ost Parthenium amnem Heneti sequebantur Cytorum habitantes, apud quos feroces fuisse mulos affirmat. Hi clarissima Paphlagonum natio fuere: ex qua natus est Pylæmon, cum quo plurimi apud Trojam militarunt. Qui amisso duce in Thraciam post captum Ilium trajecere, errantesque in eam regionem devenere, quæ post Venetia appellata est. Quidam Antenorem & ejus filios classi præfuisse putant, quæ in intimum Adriæ recessum Henetos vexit: alii nationem quandam Cappadocibus finitimam prodiderunt sub Henetorum nomine cum Cimмериis militasse, & postea in Asiam pervenisse. Id genus in Paphlagonia prorsus defecit, quamvis non procul ab Amastri vicum esse in Ponti littore nonnulli tradiderint, qui usque ad Romanorum tempora coleretur. Ab Henetis Zenodotus Henetiam describens, eam significari putat, quæ Amisus appellata est, cujus in Ponto fecimus mentionem. Paphlagoes inter Mariandynos & Halyn fluvium collocantur, & rursus inter Galatas & Euxinum. Parthenius amnis occidentalia claudit, cui proxima fuit Amastris, de conditricis nomine appellata, quæ in Peninsula jacuit, & portus habuit ex utraque Isthmi parte. Amastris uxor fuit Dionysii Heracliae tyranni, & Oxiartis filia fratris Darii, Roxanæ soror, quæ Alexandro nupsit, cum quo Darius bellum gessit. Hæc mulier ex quatuor urbium incolis unam civitatem fecit: Sesamo, Cytoro, Cronina, & Teio, quæ cito à communione defecit, cæteris in ea permanentibus. Sesamus Amastris arx dicta dicta est, Plinius totam urbem Sesamon, olim appellatam tradit. Cytorum prius Sinopensium emporium fuit  
à Cy.



à Cytoro Phryxi filio dictum. In Amastriano agro plurima atq; optima buxus nascitur, præsertim juxta Cytorum, à quo per centum stadia vicus fuit Cronina appellatus, postea Ægialus, & duo scopuli, qui à colore vocabantur Erythri, erant enim rubri. Ulterius Carambis occurrit, promontorium magnum ad septentrionem porrectum, arietinæ frontis habens formam, quod longo spatio pelago incumbens, Scythicæ objectum peninsulæ, Euxinum Pontum bimarem videtur efficere. Post Carambim nonnulla fuerunt oppida indigna quæ nominentur, præter Armenam, de qua proverbium factum est: Cui nullum negotium erat, Armenam munivit: Sinopensium vicus fuit & portum habuit. Deinceps sita est ipsa Sinope urbiū quæ in regione sunt clarissima. Milesii eam condidere, sicut Heracliam. Magna hujus urbis potentia fuit, quæ classe comparata, mari, quod intra Cyaneas est, imperavit. Extra verò, multorum certaminum particeps cum Græcis fuit. Sinopenses urbis suæ conditorem Stenidem quendam putavere, unum ex iis qui cum Jasone navigarunt, quem ut deum colebant, & ejus oraculum habebant. Sed Milesii loci oportunitate & incolarum imbecillitate perspecta, illos pepulerunt, & novos inducere colonos. Ea naturali providentia optime munita fuit super collem cujusdam peninsulæ sita, ex utraque Isthmi parte portus & stationes habens, & miras Pelamydum piscationes. Peninsula undique ripas jugosas ostendit, & fossas quasdam in petris excavatas, quæ mari tumido complentur, ut non facile adiri possint: petrae quoque summa echinis plena, nudo pedi inaccessibilia sunt. In superiore urbis parte optimum solum, & agrestibus hortis ornatum fuit, præsertim suburbanum. Ædificia in urbe magnificè structa, Gymnasium & forum porticus & templa splendida & ampla. Diu civitas cum libera fuisset, amissa libertate Pharnaci tandem obtemperavit, & successoribus ejus usque ad Eupatorem: & Romanis, qui eum suslulerunt. Eupator ibi natus educatusque ac denique sepultus eximie illam coluit, & regni Metropolim fecit. A Pharnace subito & præter opinionem ingruente capta fuit, & à Lucullo per obsidionem, Bachide, qui præpositus erat miris modis cives affligente. Romani coloniam eò misere, cui & urbis & regionis pars data est. Distat ab ostio Ponti Sinope, stadiis tribus millibus & quingentis, ab Heraclia duobus millibus, à Carambi septingentis. Hic Diogenes Cynicus, & Timotheus Patrion orti sunt, phi-



Iosopphi celebres, & Diphilus poëta comicus, & Bathon qui de rebus  
 Persicis scripsit historiam. Sinopensis ager usque ad Halyn proten-  
 debatur: Hac urbs jamdudum in potestate Turcarum fuit. Ferunt  
 Sinopis tyrannum prædivitem esse, propter æris metalla quæ in Si-  
 nopica terra effodiuntur. Mahumetes Turcarum imperator, thesau-  
 ris ejus inhians, anno superiore exercitum ad capiendam Sinopem  
 misit: qui turpiter rejectus est. Hoc anno majoribus copiis terra ma-  
 riqve comparatis, ipse per sese urbem invadendam statuit. Sed Isma-  
 hel loci Dominus non expectato impetu sese dedit, quamvis legatum  
 ad nos miserit, multa pollicitus, si sibi auxilia mitterentur. Sed lon-  
 gum est Christianos, non modò armare, sed consulturos de sumendis  
 armis congregare. Non miramur si apud obsessum principem plus  
 instans metus, quam spes longinqua & dubia potuit. Tota Sinopica  
 regio ac montana quæ illi imminet usque in Bithyniam, optimam ad  
 ædificandas naves materiam, & ductu facilem habent. Acerem quo-  
 que Sinopica gignit, & nucem montanam, è quibus mentas faciunt:  
 tota oleis confita fuit, paulo supra mare culturam habens. Heracliam,  
 Amastrim, & Sinopem, post Homerum conditas putant: nusquam  
 enim eas nominat. Olgasis mons altissimus & aditu difficillimus,  
 quamvis citra Halyn Sinopicae regioni contiguus esset, tamen ad Pon-  
 ticam regionem pertinuit, in quo plurima Paphlagonum templa fue-  
 runt. Blaëna, & Domanetica regio monti adjacet, satis ferax, per  
 quam Amnias flumen illabitur, quem Ptolemæus Zaliscum appellare  
 videtur: & Olgasim Oligam. His in locis Mithridates Eupator, Ni-  
 comedes Bithynici copias per imperatores suos ita delevit, ut pauci  
 cum eo evaserint, & post eam victoriam Bithynia & Asia usque in  
 Cariam ac Lyciam ad victorem defecerint. Hic urbs postea Pompe-  
 jopolis constructa est, prope Sandaracurgium montem, de quo dixi-  
 mus in rebus Ponticis. Post Pompejopolim, Magni opus, reliqua est  
 Paphlagonia mediterranea, occidentem versus, usque in Bithyniam:  
 quæ quamvis parva est, multos tamen Dominos habuit, priusquam  
 Romanorum esset. Ciniata castellum munitissimum fuit, Olgasi mon-  
 ti subjectum, quod Mithridates condidit, eoqve receptaculo usus Pon-  
 ti imperium acquisivit, & qui ab eo profecti sunt, usque ad Eupatorem  
 successionem servarunt: postea Dejotarus Castoris filius cognomento  
 Philadelphus Paphlagonia imperavit, & Gangra regiam habuit, quæ  
 oppi-



oppidum simul & castellum fuit. Eudoxus pisces fossiles in Paphlagonia locis siccis reperiri tradidit, nec tamen mendacio suo satis certos limites circumscripsit. Hæc de Paphlagonia traduntur, quam Plinius Pylæmoniam prius dictam asserit à flumine ( ut credimus ) Pyli, quem ipse pro Parthenio videtur accipere, qui apud Galatas ortus inter Paphlagonas & Mariandynos fertur in Pontum.

Australes Paphlagoniæ partes Galatis hærent, à quibus Galatia dicta est: cui ab occidente Bithynia & propria adiacet Asia, ab oriente Pontus, à meridie Lycaonia: quamvis Strabo inter Galatiam & Lycaoniam alam quandam Phrygiæ collocaverit, & usque in Capadociam extenderit, quem Ptolemæo in hac parte posponimus.

## CAP. LVI.

*De Galatia, & in eam Gallici hostis  
pulchra victoria.*

**T**Res Galatarum gentes fuere, Trogmi, Tolistobogi & Tectosages: priores à Dacibus nominatæ sunt: tercia à gente, quæ in Celtica est. Galli abundante multitudine, cum eos non caperent terræ, quæ genuerant, trecenta hominum millia ad sedes novas quærendas emisérunt: & portio in Italia consedit, quæ post annos ducentos, cum jam Italica esset effecta, urbem Romam cepit atque incendit: portio Illiricos sinus per strages barbarorum penetravit, & Pannonia subacta in ea consedit, ac per multos annos cum finitimis gravia bella gessit. Hortante deinde successu diversis agminibus, alii Græciam, alii Macedoniam petivere: tantusque terror Gallici nominis erat, ut etiam reges non laceßiti, ultro pacem ingenti pecunia mercarentur. Ptolemæus Macedoniæ rex, ausus in armis occurrere, victus & multis vulneribus saucius captus est, caput ejus amputatum & lanceæ affixum, tota acie ad terrorem hostium circumlatum. Sosihenes unus de Macedonibus contracta raptim juventure, Gallos victoria exultantes compescuit, & Macedoniam ab hostili depopulatione defendit. Sed adventante Brenno altero Gallorum duce, qui in Græciam se effuderat, victus est, & in  
munitis



munitiones repulsus. Galli nemine prohibente totius Macedoniae agros vastare, neque contenti hominum spoliis, eorum quoque quos deos putabant, spoliare templa aggressi sunt. Sed dum Apollinis aedem apud Delphos adorantur, partim obruti terræmotu, partim grandine & frigore dissipati, urgentibus oppidanis, usque ad internecionem cæsi sunt. Brennus in prælio vulneratus, cum dolorem vulnerum ferre non posset, pugione vitam finivit. Belgius alter ex ducibus cum parte agminis à Græcia excessit, quem inter fugiendum cum toto exercitu perisse Trogus affirmat. Tanta demonibus cura fuit ejus domicilii conservandi, in quo divinos consequerentur honores. Sed constat Gallos (sive horum reliquiae fuerunt, sive novum examen fecunda hominum Gallia misit) post multos errores & multas excursiones in Asiam peruenisse, & loca nonnulla occupasse, Attalicis regibus ac Bithyniis subdita, ibique tamdiu permanisse, donec eam, quæ postea Galatia & Gallogræcia dicta est, ab eisdem regibus non invitis acceperunt. Dux transitus in Asiam, Leonorius quidam fuisse videtur. Una trium gentium lingua fuit, ipsi tamen unam quamque gentem in partes quatuor divisere, quas Tetrachias vocare, singulae proprium tetrarcham habuere, & judicem & tribunum tetrarchæ subiectos, & duos subtribunos. Fuit & tetracharum concilium, qui erant viri trecenti, & in locum conveniebant nomine Drinæmetum: concilium de sanguine, tetrarchæ ac judices de rebus cæteris judicabant. Hæc antiquiora, postea ad tres duces res delata est, deinde ad duos, postremo ad unum Deiotarum, cui successit Amyntas, postea Romani, omnibus in unam provinciam reductis. Partem, quæ Pontum & Cappadociam respicit, Trogmi habuere, quæ totius Galatiæ optima est: ii tria muro castella cinxerunt. Tujam, quod indigenarum emporium fuit, & æneam Jovis statuam habuit, & delubrum ejus, asylum: & Mithridatium, quod Bogodiatore Pompejus dedit: & Danalam, ubi Lucullus & Pompejus convenere: cum alter in belli successione, alter illi potestate permessa ad triumphum pergeret. Tectosages versus majorem Phrygiam juxta Pessinuntem sedes obtinere, castello usi cui Ancyra vocabulum fuit. Tolistobogi Bithyniis finitimi fuerunt & Phrygiæ quæ Epictetus dicta est. Horum castella fuerunt Blutium & Pejum, quorum alterum Dejotari regia erat, in altero thesauros habebat,



bebat. Nec procul Pessinus fuit, commune regionis emporium, & in eo templum maximum, & magnæ venerationis, matris Deûm. Sacerdotes olim præpotentes quidem erant, & sacerdotium maximum habebant: postea eorum dignitas imminuta est. Attalici reges hunc locum magnificaverunt, templo & porticibus ex albo lapide structis. Romani statuam hinc deæ accersiverunt, quemadmodum eam, quæ Aesculapii erat, ex Epidauro. Mons quidam urbi imminebat, nomine Dindyma, à quo Dindymene dicta est, quemadmodum à Cybelis Cybele. Prope Sangarius amnis fluit, non procul ab ortu suo in Galatia Cim fontem habet, secus quem antiqua erant Phrygum domicilia, & Mydæ, & prius Gordii: & aliorum quorundam, quæ postea in vicos redacta sunt. Hic Gordium fuit, in quo magnus Alexander nexum plaustrî rescidit, de quo vaticinium erat, eum tota Asia regnaturum, qui nodum solvisset. Fuit & Corbejus Castoris Saocondari regia, in qua Dejotarus generum & filiam jugulavit, quamvis ei summas Cicero laudes attribuat.

## CAP. LVII.

*De Lycaonia & lacu Tatta, & de mira salis  
congelatione, & cujus fraude interie-  
rit Amyntas.*

**P**OST Galatiam Austrum versus usque ad Taurum inter Phrygi-  
am & Cappadociam Lycaonia extenditur, tota mediterranea.  
Hic lacus est nomine Tatta, Cappadociæ adiacens juxta Mori-  
menam, quem Strabo majori Phrygiæ dedit, secundum quem non  
fuisse Lycaonia Galatiæ contermina (quemadmodum Ptolemæo  
visum est) cujus opinionem sequimur. In quo lacu Tal nascitur, atque  
adeo facile circa res immerfas congelatur, ut sæpe cum funalem tor-  
quem dimiserint, salis coronas educant, & volucres aquas ejus alis  
contingentes, propter salis concretionem facile capiantur. In Lyca-  
onia colles sunt frigidi, & nudi, & pascendis onagris apti: ubi mul-  
ta aquæ penuria est, nec invenitur, nisi in puteis admodum profun-  
dis,



dis, sicut Soatris, ubi aqua venditur. In Garfabora, quæ Lycaonum regio est, vicus fuit in urbis modum ædificatus, qui multas oves nutrit, quamvis siccitas circumiaceret. Amyntas super trecentos ovium greges in his locis habuit, sed lanam asperam præbuere. Insunt & duo lacus, Coralis major, Trogitis minor dictus est. Circa hoc Iconium fuit oppidum optimè habitatum, quod fortunatiorem regionem habuit, quam ea quæ Onagros producit. Polemo hoc possedit. Ptolemæus id Cappadociæ dare videtur Lycaoniæ propinquum. Conradus Imperator circa hoc obsidionem tenens, periclitatus est, cum Hierosolymam peteret, Manuele secundo Græcorum imperatore, qui commeatum ministrabat, gypsum farinæ commiscente: Quæ res fecit, ut exercitum morbo afflictum, re infecta in Europam cogeretur reducere. Taurus his in locis appropinquat, cujus pars in septentrionem vergens Cappadociam & Lycaoniam terminat, ad imminentes Cilicas Trachiotas. Lycaoniæ etiam Isaurica est Taurum versus, quæ duos vicos habuit, quibus alia loca obtemperabant: omnia latronum domicilia, quæ Romanis negocia exhibuerunt. P. Servilius cognomento Isauricus ea Romanis subegit, & multas piratarum munitiones, quæ in ora maritima erant, vi cepit. In Isauricæ lateribus Derba fuit Cappadociæ adjuncta, Antipatri Derbensis sedes: cujus & Laranda erat apud Cappadoces, & Isaura in Lycaonia. Amyntas Antipatrum adortus Derbam cepit, & illum interemit: Isauram verò à Romanis accepit, ubi antiqva Isaura diruta regiam sibi construxit, sed non perfecit. Huic Antiochia parebat Pisidiæ finitima, & tota Lycaonia, & multa ora montana usque Apolloniadem. Apamiæ vicinam, quæ Cybotus dicta est: eaque potentia fretus, Cilicas delere conabatur, & Pisidas, qui è Tauro frequentibus incursionibus suum regnum infestabant. Cepit itaque multa prædonum loca, quæ prius inviolata fuerant, & inaccessibilia credebantur, è quibus Cremna fuit. Sandalium autem accedere non est ausus, quod inter Cremnam atque Sagalassum jacuit. Cremnam habuere postea Romani coloni. Sagalassus sub eodem Romano duce fuit, sub quo totum Amyntæ regnum, distans ab Apamia diei itinere, descensum habens ab arce ferè triginta stadiorum, quæ alio nomine Selgessus vocata est, & ab Alexandro olim capta fuit: Amintas cum Cremnam cepisset, progressus ad Homonadenses Tauri cultores, qui nunquam capi



capi posse existimabantur: multa eorum loca expugnavit, & tyrannum interemit: Sed uxoris illius fraude deceptus, captus est, & ab illis interfectus: neque ultimus, cui foemina illuserit. Cyrinius eosdem fame confecit, & quatuor hominum millia à se capta, in alias propinquas urbes habitatum traduxit, regionem juventute desertam reliquit. Est etiam in altis Tauri partibus, & in rupibus præruptis & magna ex parte inaccessibilis, in medio planicies concava & ferax, & in multas valles distincta. Hanc excolentes in superioribus montium superciliis ac speluncis habitabant, & cum frequentius armati essent, ad aliena excurrerant.

## CAP. LVIII.

*De Pisidis, & quomodo Storace sylva  
abundent.*

**H**is contigui fuerunt, cum alii Pisidæ, tum etiam Selgenses Pisidarum optimi. Maxima eorum pars summa Tauri obtinuit, Pamphiliæ imminencia loca edita & oleis consita, quorum quædam Aspendo & Sidæ Pamphiliæ urbibus imminebant, montana, quæ supra hos sunt Catennenses incoluere, Selgensibus & Homonadibus finitimi. Selgam urbem ab initio condidere Lacedæmonii, quæ propter legitimam gubernationem tantum adolevit, ut aliquando viginti millia virorum haberet. Mira locorum natura, quæ in summis Tauri partibus adeò ferax fuerit, ut tanti multitudini sufficeret. Pleraque loca oleis & vitibus consita erant, & omnium pecorum pascuis abundabant: sylvæ materiæ plenæ circumjacebant, in quæ plurimus nascebatur Storax arbor magna & recta, ex qua Storcinae hastæ fiebant corneis similes: illic liliū optimum ad unguenta reperiabatur: aditus per montana difficilis, è quibus Enthymedon & Cestius oriuntur flumina, quæ in Pamphylium mare decurrunt, nec sine multis pontibus transeuntur. Selgenses longo tempore libertate usi sunt, & cum regibus decertarunt. Alexandro per legatos responderunt, se ut amicos imperata facturos: cum Romanis certis conditionibus convenire, postea omnino jugum subierunt, sicut &



vicini qui sub Amynta fuerunt. Isauria igitur eam Tauri partem occupavit, quæ inter Lycaoniam & Tracheam Ciliciam excurrit: reliquam partem versus occidentem usque Apami- am, Pisidæ tenere. Hinc ad Tracheam Ciliciam, ac Pam- phyliam: inde ad Lycaoniam pertinentes, qui per tyrannides di- vili, quemadmodum Cilices, vicinos latrocinii vexabant: inter hos Leleges quidam vagi olim admitti fuerunt, & propter morum simili- tudinem ibi remanserunt. Artemidorus Pisidarum tredecim civi- tates nominavit, quarum aliæ omnino montanæ fuerunt, aliæ usque ad montium ima descenderunt: ex utraque parte Ptolemæus Cele- norum iuga apud Lycaonas collocavit, & sub iis Laodiceam combu- stam & Neapolim & Apolloniam. Lycaoniam beatus Bartholomæus in sortem prædicationis accepit, quamvis postea usque ad Indos ju- bente spiritu profectus, sacro martyrio vitam finierit. Atque in hunc modum Galatia terminata est, cum qua & Paphlagonēs, & Mariandy- nos, & Lycaones, & Isauros, & Pisides ostendimus. Nunc Bithynia sese offert.

## CAP. LIX.

*De Bithynia ejusque urbibus compluribus.*

**L**imites Bithyniæ ab oriente (sicut Straboni videtur) Paphlago- nes & Mariandyni excipiunt & pars Epicteti: à septentrione ma- re Ponticum, quod ab ostiis Sangarii usque ad os Euxini ten- dit, quod inter Byzantium est atque Chalcedonem: Ab occi- dente Propontis: Ad austrum Mysia & Phrygia, quæ dicitur Epicte- tus sive Hellespontia Phrygia. Nos in hac parte propriam Asiam col- locamus, ei que Mysiam & Phrygiam adjecimus. Ptolemæus ad orien- tem Bithyniæ terminos usque ad Parthenium flumen extendit: nobis Strabonem sequi placet, qui Sangarium amnem ab oriente confinium, facit. In Bithynia urbs est Chalcedon, sita in ore Ponti: Hanc Me- garenses condidere cæci appellati, qui nunc potius oppositum litus elegere, in quo jacet Constantinopolis optimo loco. Hic olim ma- gna Synodus celebrata est, quæ inter octo numeratur, quibus Roma- na ecclesia præcipuum impartitur honorem. Chalcedonenſis agri fuit Chryſo-



Chrysopolitanus vicus, & sanum in extremo angulo ad ostium Ponti situm, ubi septentrionale Euxini Ponti littus incipit, ad dexteram in orientem navigantibus. Flumina quæ in eam partem labuntur, nomen habent Pissis & Calpas, & postremo Sangarius, cujus fontes apud Sangiam vicum reperiuntur centum & quinquaginta stadiis à Pessinunte: hic magnam Phrygiæ ac Bithyniæ partem percurrit, & Gallum in se amnem recipit, Modris Phrygiæ ortum, ex quo auctus efficitur navigabilis. Post Chalcedonem sequitur littus quod Astaceum sinum appellavere, & ad Propontidem pertinet. In eo condita fuit Nicomedia, dicta de nomine regis cujusdam Bithynii, qui eam condidit: multi enim eodem nomine vocati sunt, quemadmodum Ptolemæi propter prioris claritatem. In hujus civitatis villa Magnus Constantinus obiit, qui cum vellet in Jordane fluvio baptizari, atque idcirco Hierosolymam peteret, morte præventus ab Eusebio Nicomediensi episcopo Arrianae perfidiæ sectatore baptizatus est, quæ res Christiani principis fidem apud plerosque in dubium vertit. Nobis non est verisimile, eum principem qui per omnem vitam suam Arriani dogmatis hostis fuerat, in extremo spiritu ei dementiæ consensisse, quàm summo studio de suo imperio prius eliminaverat. Apud Nicomediam tempore Diocletiani Caesaris sævissima Christianorum persecutio viguit, multiqve ibi Christi martyres sunt effecti. In hoc sinu urbs fuit Astacus, quæ illi nomen dedit. Megarenses & Athenienses eam condidere, Dedalus ampliavit, Lyfimachus diruit, & habitatores ejus in Nicomediam transtulit. Huic sinui alius continuatur ad orientem Solem recedens, in quo Prusias civitas fuit, quæ Cius antea vocabatur. Cium Philippus diruit Demetrii filius & Perseus pater, deditqve Prusiæ Zelæ F. qui in hac diruenda & vicina urbe Myrlea socia arma præstiterat. Ille eam excitans Cium quidem à se Prusiadem nominavit, Myrleam verò Apamiam, ab uxoris nomine. Hic est ille Prusias, qui post Antiochum superatum, fugientem ad se Hanibalem hospitio suscepit, quiqve ex Hellespontia migrans Phrygia, secundum Attalicorum foedera cessit eam. Priores parvam appellavere Phrygiam: postea Epictetam, id est, acquisitam. Prusiadi mons imminet, quem Argantonium vocavere. Hoc in loco Hylam, unum ex sociis Herculis, qui etiam argonauta erat, cum aquatum egredere-tur, à nymphis captum finxerunt. Cius quoque Herculis comes à Col-



chis rediens, & in his locis residens, urbem de suo nomine condidit. Prusienses diu postea festa celebrarunt, in quibus per montes vagi ac saltantes Hylam vocabant, quasi in sylvas ad illum inquirendum egredierentur: hi cum benevolè erga Romanos se gessissent libertatem obtinere. Apamenses Romanorum coloniam acceperunt. Prusa urbs fuit in Olympo Mysio sita. Hanc Prusias condidit, qui cum Cræso bellum gessit. Hinc ortus est Dion Philosophus, qui de regno scripsit, & Trajani tempore claruit. Inter Phryges Mysos ac Bithynios determinare fines arduum est. Nam cum incolæ barbari & militares essent, & quæ vicissent non firmiter tenerent, sed modo ejicerent, modò ejicerentur, consequens fuit sæpe mutari confinia. Strabo tamen inter Bithyniam & Æsepi ostium Mysiam posuit, & mari contiguam fecit, & usque ad totum pene Olympum progredientem. Ptolemæus duplicem Mysiam minorem & majorem commemoravit & utramque extra Bithyniam in Asia posuit, non procul ab Ida. Scylax Cariandrus dixit Phryges ac Mysios circa lacum Ascanium in Bithynia habitasse, Dionysius verò conditarum urbium scriptor ait, angustias, quæ apud Chalcedonem & Byzantium mediæ sunt, olim Mysium Bosphorum nominatas fuisse: Homerus verò Æsepum Myforum confinium dixit & Troum. Olympus autem Mysius in ipsa Bithynia assurgit, cujus latera versus orientem usque ad Ascanium lacum Epictetus occupat, Epictetum verò aliam Mysiacam, aliam Phrygiacam dixere: Mysiaca Trojanis propinquior fuit. Olympus in vertice sylvas habuit ingentes alendis latrociniis accommodatas, & loca optime septa: ex quibus sæpe tyranni & prædones vicinas gentes infestavere: inter quos fuit Cleon latro, Sigismundi Malatestæ, qui nostro tempore proditorum princeps habetur, similis: qui cum esset è vico Gordo, quem postea augens urbem fecit, & Juliopolim appellavit, in initio prædonum receptaculo loco validissimo utebatur nomine Callidio. Is Antonio valde utilis fuit, nam profectus ad eos, qui pro Labieno tributa colligebant, omnia impedivit, quo tempore ille Asiam obtinebat. In Actiaco autem bello quum ab Antonio descivisset, Cæsaris ducibus adhæsit, & supra quam ejus meritum pateretur, in honore habitus est, & ultra munera ab Antonio data, accepit etiam quæ Cæsar dedit, ita ut pro latrone principis habitum gereret. Idem ætate nostra fecit Jacobus Caudola, qui centum millibus aureis emptus à Martini quinti pontificis



tificis maximi nepotibus, mox novo auro inarrhatus, ad Euge-  
 nium pontificem maximum defecit, dicens, adeò se proditio-  
 nibus auctum, ut proditorem se compellare nemo coram auderet.  
 Cleon Jovis Abretanii sacerdos erat, quem deum Mysii colebant,  
 postea Comanorum sacerdotium in Ponto accepit, ad quod cum  
 venisset intra mensem obiit, ex nimia crapula morbo correptus. In  
 eo fano prohibitus erat suillarum esus carniū, unde nec in totam  
 urbem sus inferebatur: sed Cleon latronum morem ostendens, non  
 ut sacerdos, sed ut corruptor primo ingressu consuetudinem præ-  
 varicatus est, atque idcirco creditus est ira deæ percussus interiisse.  
 Olympum in circuitu habitaverunt, à septentrione Bithynii, & Myg-  
 dones, & Doliones, reliquum Mysii habuerunt, & Epicteti: qui-  
 dam verò Doliones eos dixerunt, qui circa Cyzicum habitare ab  
 Æsepo flumine usque in Ryndacum & Dascyliticum lacum: post hos  
 Mygdones fuisse, usque in Myrleanorum agrum: supra Dascyliticum  
 lacum alios duos extitisse lacus, Apolloniaticum, & Miletopolitanum:  
 Dascylium civitatem Dascylitico lacui nomen dedisse, & Miletopo-  
 lim Miletopolitano: & Apolloniam (cujus Ptolemaeus meminit) quæ  
 prope Ryndacum sita fuit, Apolloniatico: quorum locorum ma-  
 ximam partem Cyziceni postea possederunt. Ejus Phrygiæ quam  
 Epictetum vocavere, & circa Olympum fuit, sex civitates nomi-  
 navit Strabo, inter quas Cados posuit, quos quidam ad Mysiam per-  
 tinere dixerunt. Mysiam in Mediterranea posuere, ab Olympina re-  
 gione usque in Pergamenam, & Caici campos descendentem: Ex  
 quo fit, ut manifestè ad Asiam propriam pertineat, extra Bithyniam  
 sita.

## CAP. XL.

*De Salone & Nicaa ejusque figura.*

**D**Ein Mediterranea Bithyniæ regio memoratur, Salon appellata, pa-  
 scendis bobus idonea, unde etiam Salonensis caleus dictus est.  
 Hic Nicaa Bithyniæ Metropolis juxta lacum Ascanium, & cam-  
 pus ingens & valde felix circumstat, æstate non admodum salu-  
 bris.



bris. Nicæam primus Antigonus condidit Philippi filius, & Antigoniæ nominavit: postea Lyſimachus, à nomine uxoris Antipatri filiae Nicæam appellavit. Urbis ambitus ſtadiorum ſexdecim fuit, in figura quadrata, quæ in campo ſita quatuor habuit portas ad rectos angulos, ex uno lapide, qui circa medium gymnaſium poſitus erat, omnes quatuor portæ cernebantur. Hic jubente Conſtantino ſa-moſa illa Synodus celebrata eſt trecentorum decem & octo epiſcoporum, & perfidum Arii dogma reciſum. Petrus eremita, & Rainaldus Teutonicus, qui Gotofredi in expeditione Aſiatica fuere comites, in agro Nicæno duo oppida occupavere, Heregorgon ac Cynicum: ſed Turcarum ſubita irruptione concluſi, Petrus per ſpeciem legationis auſugit, Rainaldus cum aliquot millibus, abnegata Chriſti fide, deditiōem ſecit: reliqui omnes à Turcis trucidati ſunt. Paulo poſt Gotofredus tranſmiſſo mari Nicæam circumſedit, & eam poſt dies quinquaginta obſidione preſſam obtinuit, Turcis cum rebus & armis abire permiſſis: poſtea malè deſenſam iterum Turcæ occupa-vere. Hujus urbis ætate noſtra pontificatum accepit Beſſarion Græcus, quem Eugenius Pontifex maximus inter Cardinales aſſumpſit, virum excellentem & moribus & literis: ſed nunquam plebem ſuam adiit, quæ vel minima eſt hodie vel nulla. Ex lacu fluvius oritur, quem pariter Aſcanium priſci vocavere, is in Propontidem cadit. Apud eum Buſſam eſſe tradunt nobile Turcarum emporium, & eorum qui ſunt in Aſia præcipuam regiam: paulo ſupra Aſcanium lacum ad orientales Bithyniæ partes Otroæa civitas fuit. Ptolemæus Begdonis regionem apud Aſiam propriam in Bithynia collocavit, Olympinis vicinam, & Thimuntis regionem ultra Nicomediam verſus Pontum: & plurium locorum meminit, quorum relatio lectori oneroſa eſſet. Bithyniam prius Bebryciam fuiſſe dictam Julius Solinus affirmat, deinde Mygdoniam: poſtea à Bithynio rege Bithyniam & in ea Libiſſam lacum Nicomedie proximum, ſepulchro Hannibalis famæ datum: qui ne traderetur Tito Quintio, ob hanc cauſam in Bithyniam miſſo, captivusque Romam duceretur, guſtato veneno animam expulit, & à Romanis ſe vinculis morte deſendit. Ex Bithynia fuerunt viri in diſciplinis memorabiles Zenocrates philoſo-phus, & Dionyſius dialeſticus, & Hipparchus, & Theodoſius, &  
filii



filius ejus mathematicus, & Cleophanes orator ex Mirlea, & Asclepiades medicus Prusensis, & quem paulò antè nominavimus Dion.

Asiam nunc minorem & propriam aggrediemur, huic septentrionem Bithynia claudit: Auroram modò Lycaonia & Pisidia exhibet: occiduas partes maria exterminant, quæ à Propontide usque in Cariam & Doricam extenduntur: In Austro Taurus occurrit. Rursus minorem Asiam in quinque alias partes subdividimus, quarum prima major Phrygia erit, altera Mysia, tertia Troas, cum qua Æolis concurrat & aliquanto major est: quarta Ionia, quinta & ultima Caria.

## CAP. LXI.

*De Majori Phrygia, ejusque urbibus, & quomodo à Christo delapsi.*

**M**AJOR Phrygia ab Epicteto incipit, & in Austrum vergens, ad Taurum usque protenditur: sinistra Bithyniam & Pessinuntem relinquens: à dextera Mysos, Maonas, & Lydos, & Cares. Hac partim montana est, partim campestris: nam & montes attingit, quos Pisida obtinere, quibus propinqua fuit, Apamia, quæ Cibotus dicta est, & Laodicea, quæ Phrygiarum urbium maximæ fuerunt. Sed in Calenorum jugis, quæ ad Lycaoniam pertinet, urbs fuit nomine Calenis, quæ destructa Antiochus Soter homines transfudit in eam, quæ postea Apamia dicta est. Urbem appellavit de nomine matris Apamiæ Artabazi filia, quæ Seleuco Nicanori nupta fuit. Urbs in ostiis Marsiæ sita fuit, qui amnis mediam urbem percurrerebat, ab ipsa ortum habens. Sed vehementi ac prope flumine in suburbanum delatus, in Mæandrum exonerabatur. Insigne hic emporium fuit, secundas post Ephesum ferens laudes, & commune Italicorum & Græcorum hospitium habuit. Non procul hinc lacus extat, qui calamum gignit ad tiliarum linguas idoneum: hinc fabula conficta est de contentione, quam cum Apolline Marsias habuit, & sunt qui putant ab eo lacu Marsiæ & Mæandri fontes emanare. Laodicea cum pritis parva esset, postea maximum cepit augmentum, quamvis ab obsidione Mithridatis plurimum labe facta-



ta fuerit: nam loci virtus & cives quidam fortunati, eam valde magnificarunt. Primum Hiero, qui hæreditatem populo dimisit supra duo millia talentorum, & multis donis civitatem exornavit. Postea Zeno orator & Polemo ejus filius, qui ob res fortiter gestas prius ab Antonio, postea ab Augusto ad regis dignitatis fastigium erectus est. Loca Laodiceæ proxima oves optimas serunt, non modò lanæ mollicie, quæ Milesiis præstant, sed etiam colore, unde magnos proveniunt asservuntur. In hoc tractu Caper & Lycus influunt in Mæandrum, & Laodiceam à Lyco dictam putant. Urbi mons imminet nomine Cadmus, ex quo Lycus fluit, & alter eodem nomine, quo mons appellatur: hic plurimum sub terram delapsus, postea erumpens in idem influit, in quo alia flumina: estque regio valde cavernosa & quassabilis: nam & Laodicea & proxima ei regio plurimum terræmotibus concussa est. Apamia quoque ante Mithridaticum bellum sæpe terræmotibus afflicta fuit: rex verò cum urbem everfam videret, ut repararetur, centum talenta exhibuit. Dicunt & Alexandri tempore similia contigisse, quibus ex rebus maxima apud eos in veneratione Neptunus fuit, putantque à Celæno Neptuni filio ex Celæna una Danaidum procreato urbem appellatam, ex qua cultores in Apamiam translatos diximus. Inter Laodiceam & Apamiam lacus fuit pelagi magnitudinem habens, qui cœnosam & super errantem exhalationem emisit. Carura Phrygiæ Cariæque confinium fuit: hic vicus diversoria habuit, & ferventes aquas in Mæandrum exeuntes. Fama est leonem cum magno scortorum grege in diversorio hospitatum, factò per noctem terræmotu, cum omnibus periisse: nam tota serè regio circa Mæandrum terræmotibus quatitur, & aquæ & ignis ductibus pererratur. Inter Laodiceam atque Caruram templum fuit mensis Cariæ appellatum, in maxima veneratione habitum, in quo medicorum scholam Zeuxides construxit. Mæander igitur ex Cælenis ortus Caruram usque per Phrygiam labitur, quo in loco Lycum excipit, quem possumus Phrygiæ Cariæque limitem facere. Lylias præter montanæ regio & ipsa Phrygiæ datur. Hæc jugum quoddam habet, quod abortu in occasum vergit: huic planities utrinque subjacet, & urbes fuere à septentrione Philomelium, & ex altera parte Antiochia juxta Pisidiam, quæ partim in campo jacuit, partim in colle, & Romanorum coloniam admisit. Magnetes



tes prius eam habitarunt, qui juxta Maandrum fuere, Romani ex potestate regum eripuerunt, & libertate donarunt. In ea sacerdotium quoddam fuit mensis Arcæi, quod maximam sacrorum & servorum & locorum multitudinem habuit: sed post Amyntæ obitum, eversum est, ab his qui in ejus hæreditatem missi fuerant: perraro enim religionis affectus ad hæredes transit. Ptolemæus Antiochiam, quæ Philomelio opposita fuit, Lycaoniæ dedit. Synnada urbs non magna ad Phrygiam pertinebat, ante quam planities jacuit oleis confita sexaginta fere stadiorum. Ulterius magis ad septentrionem Docimia vicus fuit, in quo Synnadicus lapis effodiebatur: sic enim Romani appellabant, indigenæ verò & Docimitem, & Docimeum. Vena à principio parvas glebas emittebat, postea propter maximos Romanorum sumptus columnæ integræ & ingentes extrahebantur, varietate Alabastro persimiles, multaque hinc onera ad mare devehebantur, & columnæ ac lapideæ tabulæ magnitudine & pulchritudine admirabiles Romam deferrebantur. Amorium quoque & Eumenium oppida in Phrygia fuere, & alia multa commemorat Ptolemæus, quorum insipida est absque historia nominatio. Phrygiæ majori Midas imperavit, partem Galatæ tenuere: Regio Sipylo vicina ab antiquis Phrygia dicta est, sed utrum majoris, an minoris Phrygiæ pars fuerit, incertum: Unde Niobem, & Tantalum, & Pelopem Phrygas dixerunt. Phryges Christianam fidem receperunt, & diu tenuerunt, sed emerfit apud eos Montanus quidam, qui se Paracletum nominavit, gentemque illam infecit, cum quo mulieres Prisca & Maximilla relictis viris suis incedebant, & illius inspiratione prophetisæ dicebantur, multisque erroribus & Phrygiam & vicinas regiones impleverunt. Hæc de majori Phrygia, & Epicteto quæ minor fuit jam diximus.

Mysiam duplicem esse dixere, alteram Olympinam, Bithyniæ & Epicteto continuam, cui cultores ab Istro venisse Artemidorus affirmat: alteram Pergamenam, quæ ab Olympina in Caicum pergit. Harum circumscribere terminos operosum est, quando & Phryges, & Lydi, & Mæones intermissi fuerunt, neque separare eos facile est. Dicemus ergo de Mysis, Lydis, & Mæonibus simul, & unam ex omnibus provinciam faciemus, eamque mediterraneam: quæ ab Olympo & Bithyniæ finibus, usque ad Ioniam versus meridiem protenditur: ab oriente majorem Phrygiam, ab occidente Trojadem relinquens.



## CAP. LXII.

*De Mysis, Lydis, & Maonibus, quomodo viri hi  
literati & ad Christum proni.*

**M**Ysos alii Thraces, alii Lydos fuisse dixerunt: & quoniam Lydi fagum acetosum (quæ multa nascitur in Olympo) Mysiam vocavere, ab eo Mysos dictos putarunt, quibus sermo fuit ex Lydo Phrygioque permixtus, & hi circa Olympum habitantes usque ad Caicum fluvium se extenderunt. Phryges vero ex Thracia profecti circa Trojam confederunt, & aliquibus in locis commisti Mysi fuere, & aliquando circa Cyzicum & Prædium habitare: postea mutantes loca, alii circa Olympum in Epicteto, alii magis versus meridiem & orientem sedes accipere, quos majores Phrygas appellavimus. Hæc autem quæ de Phrygibus Mysisque memorantur, Trojanis temporibus antiquiora sunt. Intra Mysiam omnis ager continetur, qui ab Olympo & Ida montibus usque ad Caici fontes per mediterraneam protenditur, & quoniam Lydi & Maones inter Mysos computantur, ulterius in Austrum, usque in agrum Fordicensem trans Hermum amnem & Laodiceam Caistrinam, Mysia excurrit, Bithyniæ nonnihil comprehendens, in qua est Olympus. In his terminis mons Tmolus concluditur, & Simpylus, & combusta regio, & Theutanea, & Pergamenus ager, & Thebanus, qui supra Adramytteum fuit: hunc propter fertilitatem prius Mysi ac Lydi, postea Græci infestaverunt, deinde Adramyttei obtinuerunt: & sunt qui dicunt ipsum Adramytteum à Lydis fuisse conditum, in quo & portæ fuerunt Lydiæ appellatæ. Astyram autem vicum Adramyttei propinquum, non dubitarunt ad Mysiam pertinere, in quo Astyræ Dianæ templum fuit, & lucus cui Antandrii religiosè præerant, quorum civitas propinqua fuit. In mediterranea supra Antandrum & Adramytteum ad stadia circiter quinquaginta Theba fuit, quam cinctam sylvis Homerus dixit: non procul ab Ida inter Thebam & Astyram sexaginta stadiorum spatium posuere, sed hæc nunc loca deserta sunt. Fuit & Lyrnessus locus natura munitus, stadiis octingentis ab Adramyttei distans, qui prorsus corruit. Hæc loca Trojani belli tempore



pore Cilices tenebant, in duos divisi principatus, alterum Nectionis, alterum Mynetis. Nectioni Theba paruit, Myneti Lyrnessus. Chryseis Thebæ capta fuit: è Lyrnesso Briseis. Prope Thebam locus fuit Cilla appellatus, & Apollinis Cillei templum, & Cilleus fluvius, qui ex Ida delatus Antandri perlabitur agrum. Inter Elæam Pitana[m]que loca maritima, & Pergamum, quæ mediterranea urbs est, Teuthraniam fuisse dicunt, distantem à qualibet earum circa Caicum supra stadia septuaginta. Euripides fabulam scripsit in qua refert Aleum cum filiam Augeam ab Hercule corruptam reperisset, in urna quadam cum Telepho filio impositam in mari demersisse: sed urnam Palladis providentia ad Caici ostia transmissam evasisse. Teuthrantem verò qui Cilicum & Mysorum rex esset, cum eos excepisset, Augeam in uxorem, Telephum in filium habuisse: fabulosa & contemnenda, quæ deorum tanquam hominum supra commemorant. Alii tradunt Arcadis filiam cum Mysorum rege congressam Telephum peperisse, qui regno successerit, & Teuthrantem regioni Teuthraniæ nomen dedisse, quæ Caico proxima est. Telephus ejus filius Eurypylum progenuit, quem Neoptolemus interfecit, cum quo Cetii corruerunt, à fluvio Ceto nominati, qui torrens similis in agro Elaitico exortus in alium similem incidit, & deinde in alium, qui in Caicum devolvitur. Caicus autem non fuit ab Ida (ut aliqui dixerunt) sed ex Temno monte, qui in mediterranea Thebano campo imminebat. E Temno Mysus amnis fuit in Caicum emittens, sub fontes ejus, prope ejus ortum vicus Gergetha fuit, in quem Attalus eos transtulit, qui in Troade erant, cum locum eum cepisset. Eurypylum (cujus mentio facta est) in locis Caico proximis imperasse Homerus tradit: ob quam rem credibile est, magnam Cilicum partem sub eo fuisse, & tres extitisse Cilicum principatus, quamvis duo tantum commemorentur. Caicus amnis regionem valde bonam, & totius ferè Mysiæ optimam percurrit, cujus principatum Pergamum obtinuit.



## CAP. LXIII.

*De insigni civitate, quæ diu sub Attalicis regibus  
fortunata fuit.*

**I**Nsignis civitas, quæ diu sub Attalicis regibus fortunata fuit, & postea Romanorum provincia facta est. Attalici reges à Philatero Tyanensi eunucho ortum habuere. Lysimachus Agathoclis filius, qui unus fuit ex Alexandri successoribus, turbineum & acutum montem supra Pergamum communiit, & suos ibi thesauros posuit, quorum custodiam Philatero tradidit, cum optimè esset educatus, & sibi charus: sed is cum ab Arsinoë Lysimachi uxore dissideret, quæ eum accusaverat, tempus ad defectionem expectavit. Interea Lysimachus malo consilio ductus Agathoclem filium interfecit: Seleucus autem Nicator rursus illum sustulit, & ipse à Ptolomæo Cerauno sublatus est, & dolo interemptus. Inter hos tumultus eunuchus in arce se continens, nunc illi, nunc illi, quem validiorem esse animadvertit obsequens, viginti annis castellum & pecunias possedit. Duo ejus fratres erant, Eumenes natu grandior, & Attalus junior: ex Eumene natus est alter Eumenes, qui Pergami successionem habuit, & Antiochum Seleuci filium apud Sardes prælio superavit, & cum regnasset annis viginti duobus, mortem obiit, cui successit Attalus ex Attalo & Antiochide Achei filia natus, qui primo rex est appellatus, & prælio maximo Galatas superavit, & Romanorum amicus in classe Rhodiorum cum eis adversus Philippum pugnavit, obiitque jam senior cum imperasset annis quadraginta tribus, relictis quatuor filiis ex Apollonide Cyzicena. Eumenes primogenitus regnum suscepit: qui cum Romanis adversus magnum Antiochum, & adversus Perseum bellum gessit, & totam eam regionem à Romanis accepit, quæ sub Antiocho citra Taurum erat, regnavitque annis quadraginta novem, urbem munivit, lucum Nicophorum levit, templa construxit, & bibliothecas & palatia, & mirum in modum civitatem amplificavit. Imperium Attalo filio reliquit, ex Stratonice Ariaratis Cappadocum regis filia nato, sed admodum puero: fratrem Attalum tutorem constituit, qui viginti & uno annis regnavit, & adversus Demetrium Seleuci filium

cum



cum Alexandro Antiochi bellum gessit : contra Pseudo Philippum Romanorum socius fuit : Diegylin regem cepit, ducto in Thraciam exercitu : Prusiam interemit, præfecto illi filio Nicomede. Postremo Attalo, qui sub tutela erat, urgente morte, reliquit imperium. Is Philometor cognominatus, cum annis quinque regnasset, morbo decedens, Romanos hæredes instituit, qui eam regionem in provinciam rede gere : ut sunt res humanæ, quæ parvis ex principiis, cum multum creverint, postea corruunt. Viri excellentes Pergami fuere, Mithridates Menedoti filius, & Adobogion ex Tetrarchia Galatarum stirpe genitus : qui contracta Julii Cæsaris amicitia, ad id honoris pervenit, ut materni generis Tetrarcha & Bosphori rex efficeretur. Sublatus est autem à Lyfandro, qui Pharnacem regem occidit & Bosphorum occupavit. Apollodorus etiam orator Pergamenus fuit, qui artes conscripsit, & Apollodoriæ sectam introduxit, & Augusti Cæsaris magister fuit, & discipulum habuit memoratu dignum Dionysium, civem suum cognomine Atticum, qui sermones & historias conscripsit. Attalus civis Pergamenus, Christi nomine in Gallia martyrium pertulit, & in ipsa Pergamo complures occisi sunt, Christum Deum esse confessi, inter quos Papirius & Carpus, & Agathonica optima scæmina martyrii coronam acceperunt. Progredienti ad urbem, orientem versus, urbs Apollonia fuit, in loco edito imposita : ad sinistram Caici fluminis partem, urbem Tyatiram commemorant, Macedonum habitationem, quam nonnulli Myforum ultimam dicunt. Hic una fuit ex septem ecclesiis, ad quas Joannes Apostolus scripsit Apocalypsim. Ulterius ad meridiem Hermi campus occurrit, & Sardis olim urbs magna, posterior Trojanis rebus, antiqva tamen, quæ promontorium munitissimum habuit, & Lydorum caput fuit : Tmolus ei imminabat mons felix, qui speluncam in vertice habuit albi lapidis, à Persis conditam : ex qua circumstantes spectabantur campi usque ad Caystrum. Lydi, & Myli, & Macedones circum habitare. Pactolus à Tmolo multa olim auri ramenta deferbat, ex quo præclaras illas Cræsi & majorum divitias ferunt, nunc auri vena deficit. Pactolus in Hermum deferretur, & Hylas, qui postea Phrygius dictus est. Nonnulli Hermum initium esse Myliæ dixerunt : è monte Dindymenæ sacro per regionem exultam in Sardianum agrum & mare deferretur.



fertur. Urbi Sardianæ planicies subjacuit, & Cori, Hermi, & Caystri campi, qui continui sunt, & camporum omnium optimi.

## CAP. LXIV.

*De Sardensibus, & viris apud hos excellentibus,  
de Troade, & ad hanc pertinentibus  
urbibus.*

**Q**VADRAGINTA stadiis ab urbe lacus fuit, quem Homerus Gygaum appellavit, postea Coloë dictus est, ubi Coloëna Diana venerationis maximæ templum habuit. Circa Coloë antiqua regum monumenta fuere: apud Sardes verò Halvattis ingens tumulus super excelsa crepidine, cujus maximam partem ancillæ perfecerunt, quæ (ut Herodotus ait) omnes meretricabantur: quidam meretricis monumentum hoc fuisse dicunt. Callisthenes ait: Sardes prius à Cimmeriis captam, postea à Treribus ac Lyciis: deinde à Cyro & à Cræso: exin civitas hæc ob loci virtutem ita instaurata est, ut nulli finitimarum cederet. Imperante Tiberio Cæsare multa ejus ædificia ex terræmotibus corruerunt, sed imperator & hanc & multas alias suo beneficio reparavit. Viri memorabiles ex Sardis fuere, duo Diodori oratores, quorum natu grandior cognomento Zonas, multa certamina pro Asia concertavit: accusatus autem quod civitatem ad Mithridatis amicitiam pelliceret, habita excusatione, omnes calumnias diluit. Junior Diodorus Straboni amicus fuit, & historias scripsit, & poemata, quæ antiquis non cederent. Xanthus rerum scriptor antiquus, Lydus fuit, an Sardianus, incertum est. In Sardis ecclesia fuit una ex septem Asiæ, quarum Joannes meminit. Melito Sardensis ecclesiæ antistes, pro Christiana fide multa scripsit, & Apologeticos libros imperatoribus misit, qui propter regnum Dei eunuchus effectus, & spiritu sancto plenus, apud suam plebem quæiebat. Philadelphia quoque, quæ ad Myfos pertinuit, urbs terræmotibus concussa, cujus incolæ magna ex parte in agris degebant, non tamen magnopere agriculturæ studebant, quamvis terram haberent fertilem. In hac etiam urbe una ex septem



septem ecclesiis & Christi sacra recepit. Supra *Philadelphiam* orientem versus exusta regio patet, stadiis longa quingentis, quadringentis lata: quam alii *Mæoniæ*, alii *Mysiæ* dedere. Nullæ hic arbores inveniuntur, præter vitem, quæ exustum vinum fert, ita elegans, ut nulli cedat. Summa camporum facies cinerulenta est, montana, petrosa, & nigra: quidam ex crebro fulminum ictu id contigisse arbitrantur, nec dubitant, quæ de *Typhone* dicuntur, hoc in loco fabulari: sed credibilius est subterraneum ignem, qui postea defecerit, regionem exussisse. *Tmolus* coactus est & ambitum mediocrem habet, atque in ipsis *Lydiæ* partibus terminatur. *Larissa*, quæ in agro *Epheso* collocatur, & in campo *Caystrano* sita, *Tmolo* quam *Epheso* vicinior, sub mœnibus fuit. *Ephesii* enim multos ex agro *Mæonio* absciderunt, quos postea *Lydos* appellavere. *Sipylum* montem & regionem quæ circa est, quidam majori *Phrygiæ* dederunt, quidam minori, nos *Mysiæ* apponimus. Sub eo *Magnesia* fuit *Hermo* vicina, quam terræmotus dejecit. Altera est apud *Mæandrum*, de qua postea dicemus: tantum est quod de *Mysis* ac *Lydis* explicare placuit, quamvis etiam inter *Cares* & majores *Phrygios*, usque ad *Taurum*, *Lydorum* *Myſorum*que nonnulli concurrerint. *Troas* fama percelebris *Mysiæ* ad occidentem subjacet, tota mari exposita: *Homerus* ab *Æsepo* usque ad *Caici* fluminis ostia ejus fines produxit, *Eudoxus* à *Priapo* sedit initium, *Damastes* à *Pario*, *Charon Lampſacenus* à *Prætio*, *Scylax Cariandius* ab *Abydo*: tanta veterum discordia fuit, ut *Strabo* refert. Nobis *Homeri* limites placent, sed addimus id terræ spatium, quod ab ostio *Ryndaci* fluminis est, usque ad *Æsepum*, ut oram *Cyzicenam* includamus, quam *Ptolemæus* propriè *Asiæ* dedit, qui etiam minorem *Phrygiam* *Troadi* commiscuit: nos eam *Bithyniæ* applicavimus, *Olympo* *Mysiæ* adjacentem: sed quoniam *Æolis* *Troadi* permixta fuit, eaque usque ad *Hermum* fluvium percurrerebat, non ab re fuerit ad eundem limitem meridiem versus extendere *Troadem*, ut inde *Ryndaco*, hinc *Hermo* claudatur: quamvis nonnulla *Jonicæ* loca ad dexteram *Hermi* jaceant. A *Ryndaco* igitur incipiemus, qui *Troadis* terminus est septentrionalior. Hic fluvius ex *Azanitide* regione, quæ *Myſorum* fuit, ortum habet, & per *Miletopolitanum* & *Apolloniaticum* agrum decurrit, assumptisque cum aliis, tum etiam *Mæeste*, ex *Abretana* *Mysia*, in *Propontidem*



tidem juxta Besbidim insulam emittit, quæ Cyzicenorum fuit, & montem habuit arboribus plenum nomine Artacem. Non procul hinc Cyzicus insula fuit, quingentotum serè stadiorum ambitu, admodum ferax, & duobus pontibus juncta continenti, quæ juxta pontem ejusdem nominis urbem habuit, & portus duos clausos & navalia. Pars urbis in planicie jacuit, pars monti adhæsit, qui Urſorum appellabatur, cui mons alius imminebat Dindyma nomine, unicum habens verticem, in quo Dindymenæ matris Deum (ut erat stulta gentilitas) Argonautæ delubrum ædificaverunt. Civitas & magna fuit & pulcherrima & optimis instituta legibus & paci & bello aptissima, in qua tria fuerunt armamentaria, aliud armorum, aliud instrumentorum, aliud frumentorum, quæ ne corrumperentur, chalcidica terra præstabat. Mithridates cum centum quingvagina millibus hominum, & multo equitatu hanc urbem obsedit, cujus impetum Cyziceni cum quadringentis navibus perfregerunt, ipsumque prope in cuniculo oppresserunt contra effodientes. Lucullus auxilia obſessis misit, & pestis adjumento fuit, quæ regem multis suorum amissis discedere coegit. Romani liberam civitatem dimiserunt, & multum agri ei addiderunt, cum ex Troadis regione, tum ex aliis. Nam & ad Rhyndacum, & Æſepum Cyzicenorum ager protendebatur. Nunc quid sit Cyzicus nobis non satis constat, adeò claritatem rebus adiununt tempora, & nos humunciones diuturnam quærimus in hoc seculo gloriam, quam potentissimæ civitates retinere non potuerunt. A Cyzicena regione, & locis Æſepo & Granico vicinis, usque Abydum Propontidis ora producit, quæ ad Troadem pertinuit: ex Abydo verò usque Lectum promontorium & Ilium & Tenedi, & Trojanæ Alexandriæ regio fuit. Hisque omnibus Ida imminebat: à Lecto usque ad Caicum complura alia loca fuerunt, quibus ex adverso Lesbiorum insula consurgit, quæ omnia Trojanorum fuere, per principatus octo vel novem administrata, quibus post deletum Ilium Æoles sese immiscuere, à Cyziceno agro usque ad Caicum Troadis terminum. Sed Æoles ulterius processere usque ad Hermum, Cumanum agrum & Phocensem occupantes, ubi Joniæ fuit initium. Dicunt autem Æolicam coloniam quatuor seculis antiquiorem esse, Jonia. Penthilus Orestis filius annis sexaginta post Trojam captam, patre suo in Arcadia mortuo, in Thraciam processit, quo tempore

Heracli-



Heraclidæ in Peloponnensum rediere. Deinde Archelaus Penthilo natus, cum Æolica classe in Cyzicenam regionem trajecit: Graus verò filius junior, usque ad Granicum fluvium profectus est, qui ab eo nomen accepit, & deinde in Lesbum insulam transmisit eamque occupavit. At Clebas Dori filius & Malaus, qui & ipsi Agamemnonis genus fuere, eodem tempore quo Penthilus exercitum contraxere, sed circa Locrensem agrum & Phritium montem diu commemorati, postea in Asiam transgressi Cumam condidere, quam Phritioniam vocavere. Penthili classis transitum ex Thracia anticipavit, Æolesque per totam Troadem dispersit, atque idcirco Æolis & Troas simul accipitur. Ida mons altissimus ad Troadem spectat, habetque multos pedes, latus ejus septentrionale ex angustiis Abydi usque ad Stesepum & Cyzicenum agrum, ad Propontidem pertinet, & circa Zeliā finitur: occidentale, ad Hellespontum respicit: Australe, promontorium facit, quod Lectum appellatur, parvo freto à septentrionali parte Lesbi insulæ disjungitur: orientalia Idæ ad Mysos declinant. Primus è mari exitus in Idam ascendentibus apud Lectum fit, abundatque mons aquis, & multa flumina ex eo descendunt, in cujus summitate locus fuit Gargarus appellatus, à quo Gargara Æolica civitas dicta est. Zelia in extrema Idæ prætermontana fuit, distans à Cyzico stadiis centum & nonaginta, à proximo mari, in quod Æsepus emittit stadiis octoginta. Circa Zeliā Tharsius effluebat amnis, quem viginti locis ea via pertransibant. Prope Æsepi ostia tumulus quidam fuit, in quo Memnonis sepulchrum ostendebatur, ejus quem Titoni filium dixerunt, & proximus Memnonis vicus. Inter Æsepum & urbem Priapum Granicus effluxit amnis, magna ex parte per Adrastræ campos delatus, ubi Alexander Darii satrapas prælio superavit, totamque regionem cepit, quæ inter Taurum erat & Euphratem. Ad Granicum urbs fuit & regio, nomine Sidena, sed urbs diruta jacet. In Cyziceni & Priapeni agri confinio Harpagia fuit locus, ex quo Ganymedem gentilis theologiæ dedecus atque infamiam raptum dixerunt, quod alii circa Dardanium promontorium contigisse arbitrantur. Priapus ad mare jacuit, & portum habuit, cultores ejus alii Milesios dixerunt, alii Cyzicenos: Priapus ei nomen dedit, quem cives tanquam Liberi patris filium & nymphæ colebant. Lactantius Fir-



mianus obscœnam causam refert, propter quam matronæ Priapum in exilium actum colere cœperint. Circumvicina regio Adraastia vocabatur, ab Adraasto rege, qui primus Nemesi, id est Fortunæ templum ædificavit, Adraastiamque vocavit. Romani quoque huic deæ templa dicavere, stulti, qui substantiam esse aliquam fortunam putarunt, regnorum & opum dispensatricem, quæ solius dei nutu huc atque illuc transferuntur.

## CAP. LXV.

*De Adraastia, & quomodo homines cum serpentibus cognationem habere dicantur.*

**A**Draastia civitas inter Priapum & Parium fuit, quæ diruta lapides transvecti sunt, & ibi ara ædificata Hermocreontis, opus magnitudine memorabile. Parium ad mare situm fuit, & portum habuit majorem quam Priapus: cives Attallicis rebus parvum, quorum favore multum agri Priapensibus absciderunt. Hic genus hominum fuit, quos Anguigenus vocavere, & cognationem quandam cum serpentibus habere crediderunt: quorum mares proditum est serpentum moribus fuisse remedio, si eos continuo attigissent, ac primo livorem transtulisse, postea tumorem ac dolorem ledasse. Auctorem gentis heroem quandam tradidere ex serpente immutatum, ut est antiquitas fabulosa. Vis ea aliquandiu in genere mansit, quemadmodum in Calabria fama est de iis, qui ex progenie scilicet Pauli appellantur. Nam & hos mederi serpentum moribus affirmant. Parium Milesii, & Erythræi, & Parii condidere. Ex Pario fuit Neoptolemus cognomento glosographus, vir memoratu dignus. Pyihta apud Pythiadem Parianæ regionis fuit, & montem Pythium imminemtem habuit, inter Parium & Priapum sita, juxta Linum, qui locus ad mare fuit, ubi cochleæ Linusiæ appellatæ optimæ omnium capiebantur. Claritas loco ab irritamento gulæ tradita est. E Pario Priapum naviganti antiqua Proconesus occurrit, & nova, quæ civitatem habuit, & albi lapidis largam venam apprime laudatam,



tam, unde Cyzicenorum opera pulcherrima extructa fuerunt. Hic  
 fuit Aristeus carminum poëta vir facundis blanditiis vehemens. Rheæ  
 montes alii Zeliæ vicinos putaverunt, alii Lampſaco ad quadragin-  
 ta ſtadia. In his Thera fuit, prima Lydorum regia, poſtea Perſarum,  
 nunc ignota eſt, & ſine nomine jacet. Fuit & templum matri deorum  
 ſacrum, quod Rheæ vocaverunt. Urbs Lampſacus ad mare jacuit, &  
 portum habuit optimum, ſicut Abydus, à qua diſtabat centum &  
 quingvagenta ſtadiis, Pityuſa prius appellata. Xerxes hanc urbem  
 Themistoeli in vinum dedit, nam tota hæc regio & Pariana vineis  
 abundavit. Hinc fortasſe temulenta matronarum turba, & Veneri  
 dedita, Priapi cultum invenit. Lampſacus Calliopoli opponebatur,  
 quadraginta ſtadiis ab ea diſtans. Inter Lampſacum & Parium urbs  
 fuit & Peſus flumen: urbe diruta Peſini Lampſacum migravere, cum  
 & ipſi Mileſiorum coloni eſſent, quemadmodum & Lampſaceni. In  
 agro Lampſaceno locus fuit Gergethium appellatus vineis conſitus,  
 & civitas Gergetha à Gergethis dicta, qui in Cumano erant: ex Lam-  
 pſaco fuit Charon historicus, & Adimanthus, & Anaximenes, & Me-  
 trodorus Epicuri ſodalis, ipſum etiam Epicurum quodammodo Lam-  
 pſacenum dicunt, ut Lampſaci verſatum, atque Leontei & Idomenei  
 amicitia uſum, qui primi erant in ea civitate: nec alienum eſt volu-  
 ptatis laudatorem eam civitatem amaſſe, in qua vinum erat optimum,  
 ſine quo languida voluptas eſt. Ex hoc loco Agrippa leonem, qui cor-  
 ruerat tranſtulit, Lyſippi opus: eumque collocavit in luco, qui inter  
 lacum & Euripum erat. Lampſacus & Parius Trojanis temporibus  
 nondum erant, ſed Arisbe in his locis fuit propè Seleentem amnem.  
 Aſii Hyrtacidis regia fuit, & Practius amnis & urbs ſub Aſio: ſed hæc  
 loca prorsus deſecere cum tempore, quod omnia vorat: poſt Lam-  
 pſacum Abydus fuit, quam Mileſii condidere, Gyge Lydorum rege  
 permittente, qui totius Troadis imperium habuit: & ab eo promon-  
 torium quoddam juxta Dardanium Gygas appellatum eſt, & in ore  
 Propontidis jacet, & Helleſponti, æquali ſpatio à Lampſaco & Ilio  
 diſtans, per ſtadia circiter centum & ſeptuaginta. Hic eſt illud ſe-  
 ptemſtadium mare, quod Aſiam dirimit ab Europa, à Xerxe ponte  
 junctum: Abydus in Aſia, & Seſtus in Europa, triginta ſtadiis inter ſe  
 diſtabant à portu in portum: locus pontis paululum ab urbibus digre-  
 dienti verſus Propontidem fuit. Thraces poſt res Trojanas Abydum



habitavere, deinde Milesii. Sed quum Darius Xerxis pater è Scythia, rediens, Nomades adversus se transitum parare intellexisset, ne urbes inimico exercitu commeatum præberent, multas earum concremavit: Inter quas & Abydus passa incendium. Sæpe enim suis urbibus plus domini quàm hostes nocent. Abydeorum regioni Aftyra imminebat, urbs diruta, quæ olim suis legibus vixerat, & auri metallis abundaverat, quæ postea consumpta sunt. Abydus ab Ælepo distabat septingentis stadiis, recta tamen navigatione paucioribus: totumque hoc spatium Troadis ad Propontidem respicit. Hinc Hellespontus incipit, & Iliensia sequuntur, quæ extra Abydum sunt Austrum versus, cum cætera maritima usque Lectum, quibus mediterranea Trojani campi, & Idæ prætermontana adjungimus: post Abydum promontorium Dardanium occurrit, & civitas Dardanium septuaginta stadiis ab Abydo distans, & Rhodius amnis: quem alii in Ælepum emittere tradunt, alii per se in mare putant exonerari.

## CAP. LXVI.

*De Dardania.*

**D**ardanium prisca res adeò spreta fuit, ut sæpe reges alii eam Abydum transfulerint, alii rursus in pristinam conditionem habitaverint. Cornelius Sylla & Mithridates Eupator, ut bellum dissolverent, hoc in loco convenerunt. Non procul hinc Hectoris lucus fuit in loco conspicuo, deinde lacus Ptheleus, & urbs Rhœtejum in colle sita, & regio littoralis Rhœtejo continua, & Ajacis tumulus, & templum, & statua, quam ab Antonio ablatam & in Ægyptum asportatam, Augustus Cæsar sicut pleraque alia restituit Iliensibus. Post Rhœtejum Sigæum urbs fuit, & navale, & Achivorum portus, & Achaica castra, & lacus, qui Os dicitur, & Scamander in campo concurrentes multum devehunt, & maritimam oram exaggerantes, ore obstructo, maria stagnantia, & loca palustria efficiunt. A Rhœtejo usque Sigæum & Achillis tumulum recta navigantibus stadia intercedunt septuaginta, totaque hæc ora novo Ilio subjacet, duodecim ferè stadiis ab eo distans, juxta Achivorum portum, à prioribus autem aliis triginta stadiis. Ad partem quæ est Idam versus Achilles tem-



templum habuit, & tumulum juxta Sigæum, Patroclus & Antilochus tumulos, quibus omnibus & Ajaci sacrificabant Ilienses, tanquam dii essent, qui homines fuerant, & quidem sanguinarii. Herculem non colebant, causam afferentes, quod is urbem fuerit depopulatus. Sed aliud in causa esse oportuit, siquidem Achillis & sociorum opera urbs funditus corruit, & Hercules parvam civitatem diripuit, qui cum sex tantum navibus & paucis viris potitus est victoria. Græci qui cum Achille fuerunt, magnam & præclaram urbem delevere. Nam Priamus ex parvo magnus, & rex regum effectus erat. Paulum ab hac ora progredienti Achejum fuit, & ad ulteriorem Tenedorum regionem pertinuit: hæc omnia ad mare sita erant, quibus Trojanus campus imminebat, usque ad Idam stadia plurima ascendens orientem versus. Hujus prætermontana perangusta quidem partim ad meridiem extensa, usque ad loca quæ apud Scepsim erant: partim ad Septentrionem, usque Lycios, qui juxta Zeliæ habitabant. Hanc Homerus sub Ænea & Antenoride posuit, Dardaniamque vocavit: quod nomen & urbi dedit & regioni: sed urbis nec vestigium quidem extat. Plato post diluvium tria hominum genera fuisse putavit. Primum simplex & agreste, eorum qui aquas formidarent, & montium cacumina incolerent. Secundum, eorum qui plus aliquid audebant: & in ipsis montium radicibus habitabant. Tertium eorum qui omni semoto metu, impatentes campos exiere. Et has differentias ab Homero traditas dixit, qui pro primo exemplo Cyclopeos posuit, fructibus sponte nascentibus utentes, & montium cacumina in speluncis habitantes. In secundo Dardanum, qui Dardaniæ ædificavit antequam Ilium conderetur. In tertio Ilium, quem Ilii conditorem tradunt. Unde patet est eum in medio campo sepultum esse, quoniam prior ausus est in campis habitare: possent & plura hominum genera inveniri, eorum qui vel in littore maris, vel insulis habitarent. Sed nec omnino ausus est Ilium, qui non ad mare, ubi novum fuit Ilium, sed superius triginta fere stadiis ad orientem Idam & Dardaniæ versus, urbem condidit. Post Dardaniæ Cebrenia occurrebat, magna ex parte campestris, quæ quodammodo pariter cum Dardaniæ progrediebatur, & in ea urbs Cebrenia. Demetrius usque huc Ilii agrum Hæctori subditum pertendere arbitratus est, progredientem à navali usque in Cebre-



Cebrenam, ibique Alexandri & Oenones sepulchrum ostendi, quam dicunt Alexandri uxorem fuisse, priusquam Helenam raperet. Cebreniam verò Scepsim usque procedere, & eorum confinium esse Scamandrum. Cebrenos cum Scepsis semper inimicitias exercuisse, donec Antigonius eos in Antigoniam transtulit, quæ postea Alexandria dicta est: & Cebrenos cum aliis Alexandria remansisse, Scepsios Lysimacho permittente domum rediisse.

## CAP. LXV.

*De Ilio duplici, de Ida & ejus fluminibus, deque  
pinu quæ mira magnitudine pulchra  
est cognominata.*

**S**ed quoniam Iliensia jam attigimus, quæ toto orbe decantata sunt, monstrandum est quo in loco fuerit Ilium, pro quo Græci decertavere, & de quo scripta est Ilias Homeri. Dictum est Idam montem Hellesponto imminere, in quo multæ convalles existunt, & multi colles ab eo derivantur, nec pauci amnes descendunt ex eo: duo flexus, tanquam duo cubiti, ad mare decurrunt, alter Rhœtejum, alter Sigæum versus atque dimidiati circuli lineam afficiunt, duodecimque fere stadiis in planicie procul à mari desinunt. Duplex Ilium antiqui commemorant, alterum inferius intra dictorum flexuum finem, alterum superius intra initium. Interius Simoisius campus comprehendebatur per quam Simois ibat: & Scamandrius, per quem Scamander: atque hunc proprie Trojanum campum appellare, & Homerus maximam certaminum partem hoc in loco factam ostendit: nam & latior est, & loca hic celebrata fuerunt, & flumina Simois, & Scamander, quorum alterum Sigæo, alterum Rhœtejo proximum in conspectu inferioris Ilii concurrunt: postea Sigæum delata lacum efficiunt, qui Os dicitur: utrosque campos, alterum ab altero ingens quidam collis dictorum flexuum dirimit, qui ab inferiori Ilio incipiens, & ei conjunctus, usque in Cebrenam tendit, super quo alterum Ilium fuit, quod superius appellavimus, distans ab inferiori stadiis triginta. Ulterius decem stadiis Caliconam tumulum



mulum quendam fuisse tradunt, juxta quem ad stadia quinque Simois labebatur. Caliconia verò stadiis quadraginta ab inferiori Illo distabat. Erat & Tymbra campus Illo superiori proximus, & Tymbræus fluvijs, qui per eum ad Apollinis Tymbræi templum fluebat in Scamandrum. Superius Ilium quadraginta duobus stadiis à mari aberat: Inferius duodecim. Hoc antea vicus fuit, quia Palladis templum habuit, quod Alexander, ex victoria apud Granicum habitans, magnificis donis exornavit: & arbitratus illic Priami sedem fuisse, vicum appellari urbem jussit, & ut ædificia repararentur, curatoribus mandavit, ac liberam & immunem censuit, subactisque Persis facturum se majora promisit. Erat enim Homeri studiosus & propter Æacidarum cognationem, qui Molossis imperarunt, apud quos regnavit Andromache Hectoris uxor, erga Ilienses magnopere affectus. Post ejus obitum Lysimachus urbis cura suscepta delubrum construxit, & murum ad stadia quadraginta circumduxit, ac vicinas & antiquas urbes in eam habitatum deduxit, quæ jam erant labefactatæ. Sed cum Romani Asiam ingressi magnum Antiochum ejecerunt, collapsa erant Lysimachi mœnia. Extabat tamen vicus, urbis amplitudinem habens. Demetrius Scepsius inquit, cum adolescens in eam urbem peregrinaretur, adeo neglectam vidisse, ut coctiliis tectis careret. Hagesianax scribit Gallos ex Europa transgressos, tutelæ gratia in urbem transcendisse: sed eam sine mœnibus repertam, illico reliquisse: postea multum reparata fuit, & deinde à Romanis, qui cum Fimbria erant, labefactata. Fimbria quæstor, cum Valerio Flacco consule adversus Mithridatem missus orta seditione consulem in Bithynia occidit, & exercitu potitus Ilium venit: unde cum tanquam latro excluderetur, admoto ad urbem exercitu, undecimo die eam cœpit. Sed glorianti quod tam cito urbem cepisset, quam vix anno decimo cum mille navibus ex tota Græcia ceperat Agamemnon, respondit quidam ex Iliensibus: Non enim Hector aderat, qui pro civitate pugnaret. Sylla verò cum Fimbriam sustulisset, Mithridatemque domum cum quibusdam conditionibus remisisset, Ilienses multis beneficiis solatus est: deinde Julius Cæsar maximam de his curam suscepit, Alexandrum æmulatus, cujus erat amantissimus, & certissima cum Iliensibus signa cognationis habebat, tanquam Romanus. Romani enim autorem generis sui Æneam putaverunt.



taverunt. Julius ab Julio quodam viro ex progenitoribus & ille ab Julo cognomen hoc habuit, qui unus fuit ex posteris Æneæ, quem Vergilius filium fuisse testatur. Regionem itaque eis tribuit libertate & immunitate servata, in quibus diu permansere. Sed hoc non fuit Ilium Homericum, quod Græci everterunt. Illud enim quadraginta duobus stadiis (ut antè diximus) à mari distabat, hoc duodecim, cum Alexandri jussu reparatum est, & campus ante urbem fluminis aggestio erat, quem Trojani tempore belli multo minorem esse oportuit, nec poterant tam brevi spatio inter urbem & mare HomERICA praelia fieri, neque urbs in hoc loco propter perpetuum jugum circumiri poterat, HomERICA verò poterat. Multa præerea ex Homero colliguntur, quibus palam fit Hectoreum Ilium superius fuisse, cujus Alexandro aut Julio imperante, nullum extabat vestigium. Nam vicinæ urbes vastatæ, non prorsus erutæ. Exusto Ilio lapides inde ad instauranda sua mœnia transtulerunt. Ito nunc & in rebus humanis spem ponito, aut te diu mansurum credito, quando Ilium ingens, & totius Asiæ columen adeò extinctum est, ut neque cadaver inveniatur, & dubium sit, quo in loco tanta gloria fuerit. Sunt qui putant reliquias Iliensium noluisse super ruinis antiquæ urbis novum Ilium ædificare, existimantes locum eum, in quo prius fuerat inauspicatum esse, & calamitatibus obnoxium, vel quod Agamemnon antiqua consuetudine eum fuerit execratus, & sunt qui urbem hanc multa loca mutasse tradunt. Postremo juxta mare in loco, quem designavimus, ex oraculo constitisse. Neque ab initio urbs fuit, sed multis annis vici formam habuit, & paulatim (ut diximus) crevit. Hellanicus volens Iliensibus gratificari, concessit novam & antiquam urbem eandem fuisse, quæ deleta, qui Sigæum & Rhœteum habitabant, regionem inter sese diviserunt, ea autem restituta omnia reddiderunt. Sed hic non satisfacit his, quæ ab Homero sumpta contrarium svadent: vicum postea in eo loco ædificatum dicunt, in quo vetus Ilium fuit, & Trojanorum regia, ex qua originem cuncti se ducere jactitant, qui nobilissimi videri volunt: nam & Franci & Angli, & alii complures hinc majores suos venisse tradunt. Sed Romanorum genus ab Ilio profectum multi autores prodidere, quibus fides habenda est.



## CAP. LXVIII.

*De Ida & ejus fluminibus, deq; pinu, quæ mira  
magnitudine sua pulchra est cognominata.*

**S**upra Ilium Idam esse diximus, quem multi fontem appellaverunt, propter fluminum multitudinem ex eo cadentium, præsertim ubi Dardanica regio ei subjacet usque Scepsim & Iliensia. Demetrius collem quendam Idæ esse dixit, nomine Cotillum, ultra Scepsim ad centum & viginti stadia, ex qua Scamander, & Granicus, & Æsepus fluunt. Sed hi ad septentrionem & Propontidem tendunt manantes ex pluribus fontibus, Scamander ad occasum ex uno fonte, cursus Æsepi quingentis ferè stadiis terminatur. In Scamandrum Andrius influit, ex quadam Caresinæ montana regione, compluribus vicis habitata, & optime culta, quæ Dardaniæ adjacebat, usque ad loca Zeliæ, & Pityjæ finitima: eam regionem à Careso flumine dictam putant. His in locis & Rhesum fluvium posuere, qui postea Rhoites dictus est, & in Granicum influit, Septemvadás ab Homero vocatus, quia septies pertransitur, in locis pulchræ Pinui finitimis: digna fuit arbor quæ nomen haberet. Attalus, qui primo regnavit in Attalica gente, ambitum ejus fuisse pedum viginti quatuor scripsit, altitudinem à radice sexaginta & septem, postea in tria scissam æqualiter in se distantia, & iterum in unum apicem cohiberi, totam ejus altitudinem duorum jugerum, & quindecim cubitorum spatio contineri, distantem ab Adramytteio stadiis centum & octuaginta, septentrionem versus. Nunc nulla est, habent & arbores suam mortem, aut percussæ cadunt, aut suo tempore areseunt. Nihil est in terra non mortale. Caresus à Malunte fluit, qui locus inter Palæscepsim jacuit & Achæum: posteriores Tenediorum agri. Immittit autem in Æsepum Rhodius, qui fluit in Ænium à Cleandria & Gordo descendens, quæ loca sexaginta stadiis à pulchra Pinu distabant, in Æsepi convalle, quæ à sinistra cursus ejus est. Polichna locus munitissimus fuit, deinde Palæscepsis, mox Hallazonium, quod Amazonum fabulis applicatum est. Postea Caresus urbs deserta, & Carecina regio, & amnem ab eo dictum quod vallem ingentem efficit, minorem tamen



ea, quæ Æsepi est. Deinceps Zeliæ sequuntur campi, & loca collibus plena, & olim optime culta. In Æsepi dextera Argentariæ fuerunt, apud novum vicum Polichniæ & Palæsepsi oppositæ. Palæsepsis ab Æsepo stadiis triginta distabat, ab urbe Ænea quinquaginta. Sed ad oram maritimam revertamur.

## CAP. LXIX.

*De Tenedo insula, & quod in ea castellum fuerit nobilissimum, quod cum Veneti & Genuenses pro eo multis inter se præliis contenderent, communi consensu est deletum. Item de urbe Alexandrina quæ prius Sigæa vocabatur, deq; in ea Sminthæi delubro sacris muribus habitato.*

**P**ost Sigæum promontorium Achillæum seqvebatur, & Achæjum, & regio Tenediorum, atque in ipsa Tenedos insula, distans à continenti stadiis quadraginta. In qua priusquam in agrum Trojanum Græci descenderent, stationem habuerunt, & Agamemnon Iphigeniam immolare non dubitavit. Vincebat patris affectum regnandi cupiditas, & quod credenti Abrahæ ad iustitiam reputatum est, huic ad iniquitatem cessit. Ambitus hujus insulæ stadia octuaginta continebat. Urbs Æolica in ea fuit, & portus duos habuit, & Apollinis Sminthæi delubrum. Duæ insulæ circumstabant, Calydnæ olim appellatæ, & aliæ quædam ignoræ. Tenedum alii Calydnam vocaverunt, alii Leucophryn, id est, candidum supercilium. Vergilius opulentam fuisse sub Priamo insulam dicit. Diodorus ait Tennem Cygni filium Colonæ Lesbicæ, quæ erat in Troade, imperasse, deinde relicta patria, congregatis colonis, in insulam desertam nomine Leucophryn navigasse, distributisq; insulæ agris inter eos qui secumerant, urbem condidisse, atque insulam nomine Tenedon vocavisse, & cum multa hominibus, beneficia contulisset, post obitum inter deos relatum. Nonnulli serunt Cygnum patrem uxoris calumniâ inductum, Tennem filium in arca positum in mare dejecisse, qui



qvi mirabili deorum ope servatus, tempestate in Tenedum appulerit, & in odium tibicinis, qvi novercæ faverat insidiis, lege sanxerit, ne qvis Tibicen templum ingrederetur. Belli Trojani tempore, cum Achilles, post Græcorum in Tenedum ascensionem, urbem Temnum delevisset, statuerunt postea Tenedi, ut in templo qvod noviter ædificaverunt, nemo Achillem nominaret. In hac insula nobilissimū postea castellum fuit, propter qvod Veneti & Genuenses multis inter se præliis contenderunt. postremo ea lege pax facta est, ut castellum deleteretur cōmuni consensu, apud Sabaudia comitem, qvi pacis arbiter electus erat, depositum. Achæo continua erat Larissa, & Colona prius, post Chrysa in loco excelso & portuoso, & Hamaxitus Lecto subjacens in promontorio. Nec procul ab Achæo in mediterranea constituta est Alexandria, in quam plurium oppidorum incolæ migravere, sicut ex Larissa, Chrysa, Amaxito, Cebrena & Mæandria, & aliis compluribus. Locus in qvo Alexandria condita est, prius Sigæa vocabatur. Lysimachus Alexandriam curavit, quæ jam ab Antigono habitata erat, & Antigoniam appellata. Lysimachus nomen mutavit. Pium enim visum est Alexandri successoribus ut prius de nomine illius urbes conderent, postea de suorum multò justioribus, quam hi qvi alienis operibus sua imponunt nomina, nec verentur deletis veri auctoris signis, sua vel pingere, vel sculpere. Alexandria diu permansit & aucta est, & Romanorum coloniam accepit, & inter claras nomen habuit. In urbe Chrysa priusquam rueret, Apollinis Sminthei delubrum fuit, & signum qvod nominis veritatem servaret. Nam mus qvidam pedi statuae subiacebat, statuam Scopas Parius fecerat. Ferunt Teucris è Creta profectis oraculum fuisse datum, ut ibi sedes ponerent, ubi terrigenæ eos adorarentur: idcirco Amaxitum & Chrysam contigisse, maximamqve agrestium murium multitudinem noctu exortam, qvæcqvæ armorum & utensilium ex corio invenissent corrosisse, Teucros ibi mansisse, atqve Idam ab Ida, quæ in Creta erat appellasse: ajunt & mures ibi circa templum abundasse, qvos vana gentilitas sacros existimavit. Simulacrum verò ita constructum fuisse, ut murem pedibus premeret. Alii Teucrum qvendam prodidere ab urbe Troum, quæ postea Xype-teon nominata est, ex Attica profectum: Teucros verò nullos ex Creta venisse, signumqve conjunctionis Troum cum Atticis dicunt, qvod apud utrosqve Erichtonius qvidam generis autor prædicatur.



Multi hodie qui videri docti volunt, Turcas appellant Teucros, quos Scytharum genus esse haud ambiguum est, quemadmodum postea dicemus, cum de Turcis agemus. Alia Chrysa in agro Thebano fuit, de qua dictum est, & illi magis HomERICA conveniunt.

## CAP. LXX.

*De agro Lecti, campo Halesio, idem de salibus  
Tragesais qui Etesis ventis spirantibus,  
sponte nasci dicuntur.*

**I**N agro Lecti seorsum est Halesius campus, & Tragesai sales qui sponte nascuntur, & Etesis ventis congelascunt. Duodecim deorum aram (verius demonum dixerimus) apud Lectum construxit Agamemnon. Hæc loca contra Ilium erant ad stadia ducenta vel paulò plura, sicut ex altera parte Abydensia, quanquam paulò antè propius Abydus fuit, ex quo usque Lectum stadia computarunt circiter quadringenta: cum Lectum circumflexeris, clarissimæ occurrunt Æolum urbes, & sinus Adramyttinus, in quo maximam Lelegum partem Homerus collocavit, & duplices Cilicas. Hic & Mitylenorum litus fuit, quod vicos aliquot habuit in continenti. Hunc sinum etiam Idæum nominarunt. Nam jugum à Lecto ad Idam porrectum, primis partibus huiusce sinus imminet, in quibus Leleges siti erant, & urbs eorum Pedasus fluvio Satmoëti juncta, quæ prorsus deserta est. Hæc loca Dardanio agro & Scepsio continua erant, tanquam alia quædam Dardania, humiliora tamen. Neandriini ultra Amaxitum erant magis mediterranei, & magis Illo propinqui quam Lectus. Nam centum & quinquaginta stadiis ab Illo distabant. Ultra hos erant Cebreni, & postea Dardanii, usque Palæscepsim atque Scepsim. Alceus Antandrum urbem Lelegum esse dixit, Scepsius ad Cilicas traxit australe Idæ latust terminantes usque ad oram maritimam. Post Lectum Polymedium sequebatur, in quo parvus erat lucus supra mare: octuaginta stadiis peractis, Gargara reperiebantur, in promontorio, quod sinum efficit Adramyttinum vocatum. Nam tota ora à Lecto usque ad Canas, quod est alterum promonto-



montorium hoc eodem nomine appellabatur: in quo & Elaiticus comprehendebatur, sed proprie Adramyttinum dicebant, qui à promontorio, in quo Gargara fuerunt, cludebatur, & ab altero quod Pyrrham vocabant, in quo Aphrodisiū situm fuit. Oris latitudo à promontori ad promontorium est centum & viginti stadiorum. Interius Antandros jacuit, cui mons iminebat Alexandria vocatus, ubi deas à Paride judicatas dicunt, quarum quæ spretæ fuerunt, Trojanum incendium paraverint: Indigna res quæ divinitati attribuatur. Proximus Aspaneus erat lucus, ubi materies Idæ cadebatur, hic enim eam aptabant: postea per flumen deducebant. Deinde vicus Astyra & lucus Astyrenæ Dianæ sacer: in proximo Adramytteum Atheniensium colonia, quæ portum habuit, & navale extra sinum, & promontorium Pyrrham. Urbs Cisthena cum portu fuit, quæ destructa est, & ultra eam in mediterranea æris vena & multa habitatio. In sequenti Mytilenorum ora Coriphantis lucus, & Heraclia, & Actea, & Atarneos, & Pitana usque ad Caici fluminis ostia, quæ loca ad Elaiticum sinum pertinebant. & ultra flumen Mæa, & reliquus sinus usque Canas. Sed in his locis paululum immorandum est, propter ea quæ propriam historiam habent.

## CAP. LXXI.

*De Palæsepsi, & qui ex ea Socratici fuere Philosophi, item de Theophrasto & ejus bibliotheca.*

**P**alæsepsis ultra Cebrenam fuit ad excelsiorem Idæ partem. prope Polichnam. Ea olim Scepsis vocabatur, quæ cum esset in loco circumspecto, à Scamandrio Hectoris & Ascanio Æneæ filiis, ad sexaginta stadia inferius traducta est, quorum genus multo tempore in eo imperavit, postea in paucorum principatum civitas declinavit. Deinde cum Milesiis popularem statum accepit, & nihilominus, qui ex eo genere erant, reges dicebantur, & honores quosdam habebant. Successu temporis Antigonus Scepsios Alexandriam deduxit, qui deinde Lysimacho permittente domum rediere. Scepsius



Scepsius Æneæ regiam Scepsim fuisse putat, quæ media erat inter regionem illi subditam, & Lyrnessum, in quam ab Achille agitatus fugisse dicitur. Homerus (sicut Straboni placet) Æneam imperii successorem apud Trojam significat remansisse, ac Trojæ imperium, extincto Priamidarum genere, natis natorum tradidisse. Alii (quæ vulgatiores fama est) fatentur eum propterea, quod Priamo esset infensus, bello superfluisse, sicut Antenoridas, qui propter hospitalitatem cum Menelao habitam evaserunt, & cum Henetis primo in Thraciam, deinde in Adriam pervenerunt, quæ ab eis Henetia dicta est, nunc addita litera Venetia nominatur. Æneam cum patre Anchisa, & Ascanio filio, multis comitantibus enavigasse, quem plerique circa Macedoniam & Olympium habitasse dicunt, nonnulli circa Mantineam Capuas in Arcadia condidisse. Alii, quibus accedit Vergilius, in Siciliam profectum cum Elymo Trojano, Erycem & Lilybeum occupasse tradunt, & fluvios circa Egestum appellasse Scamandrum & Simoentem. Postremo in Latium trajecisse, ibique permansisse, jubente oraculo ut ibi maneret, ubi mensas ederet: quod in agro Lavinio completum est, ubi panis ingens pro mensa per imprudentiam appositus, cum carnibus quæ super eo erant, absumptus est. E Scepsi fuerunt Philosophi Socratici, Erastus & Coriscus, & Neleus Corisci filius, qui Aristotelem & Theophrastum audivit, & successor fuit bibliothecæ Theophrasti, in qua erant Aristotelica. Nam Aristoteles & bibliothecam & scholam Theophrasto reliquit, & primus fuit (ut Strabo arbitratur) qui libros congregavit, & Ægypti reges bibliothecæ ordinem docuit, incertum plus boni an mali rebus humanis attulerit, quoniam componendi libros nullus est finis, & multorum ingenia depravata sunt, quæ in perversa dogmata inciderunt: ob quam rem consultè agunt, qui damnata volumina exurunt, neque passim omnibus scribendi facultatem permittunt, ut est illud Persianum, Scribimus indocti doctique poemata passim: sed hodie tanta est doctorum turba, ut nemo lere indoctus reperiatur, ex his qui aliquid scribunt, qui non doctoris nomen titulumque receperit. Theophrastus bibliothecam Neleo tradidit, Neleus eam Scepsim detulit ad homines imperitos, qui libros inclusos ac negligenter compositos tenebant: cumque Attalicorum regum, sub quibus erant, studium sentirent, ad instruendam Pergami bibliothecam, eos in fossas

quadam



quadam sub terra occuluerunt: & demum tineis & humiditate labefactatos qui ex eo genere erant, Apeliconi Tejo tradiderunt magno emptos argento, Aristotelicos scilicet atque Theophrasticos. Apelicon qui magis librorum esset studiosus quam sapientia, quales multos ætate nostra cognovimus, volens corrosiones emendare, eos transcribendos dedit, scriptura non recte suppleta, librosque dedit erroribus plenos. Continuo post Apeliconis obitum, Sylla, qui Athenas cepit, ablata illius bibliotheca, eam Romam translulit: quo in loco Tyrannion grammaticus, cum Aristotelis amantissimus esset, conciliato sibi bibliothecæ præfecto & librarii quidam scriptoribus utentes non bonis, nec scripta conferentes, opera minus emendata ediderunt. Quod si græca exemplaria corrupta fuerunt, quid de his putandum est, quæ in latinum conversa sunt? illa præsertim priora, quæ qui legunt, non tam quod dicatur quam quod dici velit, nosse laborant. Quippe si revivisceret Aristoteles, multa sua esse negaret, quæ nos illi attribuimus. Sed melius cum eo actum est quam cum aliis, quorum opera funditus periire, & ipse causa extitit, cur multa perirent, qui aliorum gloriam ad se traxit: ruet etiam quamvis magnus. Neque enim verum est quod sibi aliqui persuadent, literarum monumenta non interire: omnia occidunt, nec literis sua mors negata est, quamvis aliæ aliis plus vivant. Ætas cuncta aufert, nec hominis opus est, quod in tempore non evanescat. Apud Scepsi ultra eos quos nominavimus, Demetrius grammaticus floruit, qui Trojanam extructionem exposuit, & post Metrodorus, qui è philosophica vita in civilem mutatus est, & propter elegantiam, quanquam pauper erat, clarum conjugium apud Chalcedonem obtinuit, & à Mithridate reddendo juri præpositus fuit, à quo non erat provocatio. Sed legatus ad Tigranem missus, cum descivisset, invitatus remissus est Mithridati jam è pateano regno fugienti, & in itinere, siue regis opera, siue morbo, decessit: sensitque philosophicam vitam imprudenter se reliquisse, quæ si neque honores neque opes accumularet, at saltem periculis & molestiis quam pluribus caret.



## CAP. LXXII.

*De Anderis, mirandoq; lapide, qui solus combustus in ferrum, cum terra quadam in argentum falsum. Quæ terra, si æs accepisset, in aurichalcum vertebatur: de Pitana urbe Æolica, quodq; apud eam lateres inventi sint, qui super aquas innatarent.*

**P**ost Scepsim Andera fuerunt, circa quæ lapis quidam inveniebatur, qui combustus ferrum fiebat, deinde cum terra quadam in fornace decoctus, pseudargyrum, id est, mentitum argentum exsudabat: quæ terra si æs accepisset, in aurichalcum vertebatur. In his locis Leleges habitaverunt, qui & Pionias, & Gargarenses agrum, & Assensem occuparunt. Assus & arte & natura munita civitas fuit, quæ à mari & portu longum & rectum ascensum habuit, ex quo Stratonici dictum est: qui celeri passu Assumit, mortis periculum adit. Hinc fuit Cleantes philosophus Stoicus, qui Zenonis Citienensis scholæ successit, quam postea Chrysippo Solensi reliquit, Hermias eunuchus Trapezitæ cujusdam famulus Athenas profectus, Platonem Aristotelemq; audivit, & domum reversus cum Domino suo Atarnenses & Assienses aggressus eos subegit, & illis simul cum Domino imperavit, quo mortuo solus dominium adeptus, Aristotelem & Zenocratem ad se accersitos diligenter curavit: Aristoteli etiam fratris filiam uxorem dedit. Sed non illi, ut tyrannidem invaderet, philosophi svaserunt, nec rursus ut retineret, præstare potuerunt. Memnon Rhodius, simulata cum Eunūcho amicitia, eum ad se vocatum comprehendit, & ad regem Persarum misit, ibiq; vitam suspendio terminavit. Philosophi fugientes loca à Persis occupata, incolomes evasere. Assum aliqui dicunt à Methymneis conditam, aliqui Æolicam fuisse volunt: ipsi verò Assii Gargara & Lamponia condiderunt, quæ cum non bene habitarentur, reges ex Mileto incolas eo deduxerunt, & pro Æolibus semibarbaros effecere. Leleges hæc loca sub Priamo tenebant, & inter eos multi erant, qui sub Ænea fuere. Cilices quoque



quoque cum his habitabant, & Cares aliqui: sed ab Achille vastati Leleges, in Cariam migravere, quo & Cares Cilicesque Taurum transivere. Oram, quæ post Leleges sequitur, Adramyttini habuerunt, & Atarnenses, & Pitanei, usque ad Caici fluminis ostia. Non procul ab Adramytteo Apollinis Cillei templum fuit, & Cilli monumentum, ingens quidam tumulus. Hunc Pelopis aurigam & ducem equorum dicunt, à quo forsan Cilicia dicta est. Adramytteum in bello Mithridatico calamitate maxima oppressum fuit, culpa Diodori, qui civium consilium delevit, cum regi cuperet gratificari, & se principem Academicorum philosophorum ostendere. Rege autem everso poenas dedit, qui de multis criminibus accusatus, infamiam ferens, turpiter & obstinate periit. Sæpe enim eorum ignominiosus est finis, qui nimium gloriæ cupidi sunt. Ex Adramytteo fuit Zenocles orator, clarus Asiatici styli, qui in senatu pro Asia dixit, quo tempore Mithridaticæ factionis est accusatus: dehinc Atarneus fuit Hermiæ tyranni sedes, postea Pitana urbs Æolica, quæ portus duos habuit, & fluvium Evenum, qui eam perfluebat, ex quo aqueductus Adramyttenus factus est. E Pitana Archesilaus academicus fuit, qui cum Zenone apud Polemonem didicit. Fama est apud Pitanam lateres inventos esse, qui super aquas innatarent, quod de aliis locis traditum est. Post Pithanam Caicus amnis ad stadia triginta in sinum Elaiticum emittit, qui Pergamenum agrum irrigat. Eleapolis duodecim stadiis ultra Caicum ad meridiem fuit, Æolica civitas, & Pergamenorum portus, centum & viginti stadiis à Pergamo distans, deinde ad stadia centum est Cana promontorium, quod contra Lectum consurgens, Adramytteum efficit sinum, cujus pars est Elaiticus. Canæ Locrorum oppidulum fuit, ad australia Lesbi extrema, situm in agro Caneo, qui usque ad Arginusas protendit: & ulterius promontorium, quod Ægam nominarunt, eodem modo quo animal: sic enim totum montem appellabant, quem postea Canam & Canas vocavere. Circa montem Austrum & occasum versus mare procumbit, ad orientem Caici campus, ad Aquilonem Elaiticus ager: mons satis per se contractus est, vergit tamen ad Ægeum pelagus, unde ei nomen est. Postea id promontorium (ut Sappho dicit) Ægea est appellatum: reliquum verò Cana: & Canæ urbs. Deinceps Elea sequitur, quæ portum habuit, & navale regum Attalicorum, Mnesthei opus & Athenien-



sium, qui cum eo apud Ilium militarunt: distans à Gryneo Myrineorum oppido stadiis septuaginta, hæc Elaitico sinui nomen dedisse videtur. In Gryneo Apollinis fanum, & pervetustum oraculum, & templum candido lapide sumptuosum plebes admirabatur: deinde Achivorum portus extitit, in quo duodecim deorum aræ constitutæ fuerunt certissima dæmonum theatra. In ultimo vero sinus recessu, ad sexaginta fermè stadia Myrina fuit Æolica civitas, quæ portum habuit, & ab una ex Amazonibus nomen accepisse credita est. In ora sinus Hydra promontorium fuit, quod Amatunti adversum Elaiticum sinum efficit. Oris latitudinem septuaginta ferè stadia complexam dicunt: post Hydram Adæ fuerunt ad stadia quadraginta.

## CAP. LXXIII.

*De Cuma Æolicarum urbe maxima, & quomodo  
Cumani insulsi & hebetes sint putati:  
item de Larissa.*

**D**Einceps Cuma, Æolicarum urbium maxima & optima, & omnium ferè metropolis, quas numero triginta fuisse tradunt, quarum maxima pars corruit. Cumanos insulsos & hebetes homines putavere, qui post trecentos annos ab urbe condita portoria exegerunt: tamdiu proventum ejusmodi non cognovere. Feruntur etiam publica pecunia mutuo recepta porticum struxisse, cumque die constituta pecuniam non reddidissent, à deambulatione fuisse prohibitos: creditores verò, cum plueret, edictum misisse, ut Cumani porticum subirent: ex quo proverbium factum est: Cumanos non sentire porticum in pluvia subeundum esse, nisi præco admoneret. Ex Cuma vir sine controversia clarus Ephorus fuit, Isocrati oratori familiaris, & historiæ conscriptor, & antè ipsum Hesiodus poëta, qui patrem suum, relicta Æolica Cuma, in Bœotiam migrasse dicit. Homerum hinc fuisse non satis constat, multi enim de eo disceptant. Quod si Cumanus fuit Homerus, non est cur miremur concives ejus obtusioris ingenii fuisse. Nam quicquid in urbe divinum erat, id secum Homerus abstulit. Cum Æolicis urbibus Ægæ fuerunt, &  
Temnus,



Temnus, unde Hermagoras fuit, is qui de dicendi arte conscripsit. Hæ urbes secus montanam regionem jacuere, quæ Cumano & Phocensi & Smyrneo imminet agro, juxta quam Hermus labitur. Post Cumam Larissa fuit, quam Pelasgi coluere. Larissas tres in Asia reperimus: Primam apud Hamaxitum, de qua dictum est: Alteram apud Cumam: Tertiam apud Caistrum: Quartam in Thessalia, unde Larissæus Achilles appellatus. Invenimus Lelegum populos, & Cilicum, & Pelasgorum, & Cetiorum, multis in locis permistos fuisse, sed intra Caicum quem Troadis terminum esse diximus. Post Caicum Pelasgi per sese usque ad Hermum habitavere, prius quam Æoles adventarent. Leleges sub Alceo fuerunt, Cetii sub Eurypylo, Pelasgi sub Hippothoo & Pylæo. Cilices alios duces habuere. Quod autem Pelasgi magnæ natio, Menecrates autor est, qui totam oram quæ postea Ionica dicta est, facta à Mycale initio, prius à Pelasgis habitam fuisse tradit, & propinvas insulas. Lesbii quoque se sub Pylæo positos affirmabant, quem Homerus Pelasgorum ducem appellavit. Chii suos autores Pelasgos ex Thessalia profectos putavere: Quæ gens errabunda & ad transmigrandum facilis, ut multum crevit, ita pariter tota extincta est, eo maxime tempore, quo Æoles Ionesque in Asiam trajecere. Larissa Hamaxito proxima ducentis fere stadiis ab Illo distabat. non ergo ei conveniunt ea, quæ de Hippothoo dicuntur, quoniam procul à Larissa cecidisse Homerus tradit, dum pro Patroclo pugnatur, sed ab ea quæ Cumæ proxima est, nam mille stadia intersunt. Caystrianam vero seu Ephesiam Larissam non satis constat, an Trojani belli tempore condita fuerit, de Cumana certum putant. Tradunt enim eos, qui Phrycio Locrensi monte ultra Thermopylas erant, inde profectos in eum locum venisse, ubi postea Cuma condita est. Cumque Pelasgos invenissent Trojano bello labefactatos, adhuc tamen Larissam obtinentes, septuaginta stadiis à Cuma distantem, condidisse apud illos locum, qui Novus murus appellatus est, triginta stadiis à Larissa, atque inde profectos, Cumam condidisse, homines qui superfluerant, eo habitatum deduxisse. Cumam verò à Locrensi monte Phrycionida appellasse, eodem modo Larissam, quæ postea omnino deserta est. Hastenus Æolis protenditur. Deinceps Phocæa est, & Hermus non ignobilis amnis, & Ionæ initium: verum, quia Troadi à Lecto promontorio usque ad Cumas, Lesbos insula



opponitur, quæ & ipsa Æolica fuit, & ad Troadem pertinuit, de hac dicendum est prius quam Joniam attingamus.

## CAP. LXXIX.

*De Lesbo Ægæi maris insula, & quot in ea urbes memoratu dignæ sint: item qui philosophi, poëta, & rerum scriptores ibidem floruerint: insuper de scæmina, quæ urbem à Turcis una servavit.*

**L**Esbos olim non solum Æolica sed Æolicarum urbium altera Metropolis fuit & universæ Troadis imperium obtinuit: ambitus ejus stadiorum centum supra mille à Borea in Austrum protensa: quingenta & sexaginta stadia longitudinis habens, feraci agro, & multa materia ad classes conficiendas idonea. Tantum à Chio Lemnoque distans, quantum à Tenedo intra quinquaginta ferè. Urbes in ea fuere memoratu dignæ, Mitylene, quæ adhuc extat, & ab ea nunc insula vocatur: & Pyrrha in occidentali latere sita, quæ ab antiquo subversa est, relicto suburbano, quod habitaretur. Fuit, & Eressus in colle jacens, & Antissa cum portu Methymna promontorio Lecti opposita. Mitylene inter Methymnam jacet & Maliam, quod est australissimum extremum insulæ, Canis oppositum. Hæc urbs rebus omnibus pulcherrimè instructa fuit, portusque duos habuit, quorum Australis clausus erat, quinquaginta triremium ac navium capax. Borealis verò magnus ac profundus aggere protectus: ambobus quædam parva insula objecta fuit, partem urbis habens ibi habitatam: distat à Malia stadiis septuaginta, à Canis centum ac viginti, totidem ab Arginus, quæ tres insulæ sunt parvæ continenti proximæ, & Canis adjacentes. Inter Mitylenem & Methymnam ubi vicus Ægirus fuit, angustissima insula est tractum habens in Pyrrheum Euripum, passuum duorum millium & quingentorum. Ex Mitylene fuit Pittacus unus ex septem sapientibus, & Alcæus poëta, & Antigenides frater ejus, quem Babyloniorum socium Alcæus dicit



cit magnum certamen peregrisse, atque eos è maximis laboribus eripuisse, viro pugnacissimo, & (ut inquit) regum luctatore interempto: cum his & Sappho claruit, admiranda mulier & poëtica peritissima, cui post tot secula non est reperta, quæ posset æquari. Diophanes orator multo tempore posterior fuit, & Potamon & Lesbocles, & Crinagoras, & Theophanes rerum scriptor, qui Pompejo magno admodum familiaris fuit: nam & res ejus gestas posteritati commendavit, & Græcorum omnium clarissimum se exhibuit: cujus filius Marcus Pompejus Cæsari quoque Augusto charus fuit, à quo Asiæ curator constitutus est, & postea inter primos Tiberii familiares locum obtinuit. Ex Eresso fuere Theophrastus & Phantias philosophi peripatetici, & Aristoteli familiares. Theophrasti patris Tyrtaemo nomen fuit, Aristoteles mutato vocabulo Theophrastum vocavit, simul prioris nominis absurditatem evitans, & futuram simul ejus facundiam significans. Aristoteles enim discipulos suos omnes eloquentes fecit, Theophrastum verò eloquentissimum, quæ res admodum eos confundit, qui Aristotelis opera omni eloquentia nude in nostram linguam converterunt. Altera quoque Sappho (ut nonnulli asserunt) hinc orta est poëtica perita, sed Mitylenensi minor. Ex Methymna ortus est Arion, is, quem Herodotus à prædonibus in mari obrutum, & à delphine incolumem devectum in portum ad Tanarum fabulatur, quem Citharædum fuisse constat. Ex hac insula & Terpandrum fuisse dicunt, musicæ artificem, qui primus pro tetrarchordo lyra heptachordo usus est, ad quem versus illi referuntur. Hos tibi mutato chordarum quattuor usu, Jam nova pars septem modulatur carmina nervos. Hellanicus quoque rerum scriptor, & Callias (qui Alcaum & Sapphon exposuit) Lesbii fuisse perhibentur. Mitylenæis durissima fuere cum Atheniensibus certamina, & vecordia: adeoque Athenienses in eos favere, ut senatus consulto decreverint, omnem Mitylenæorum pubem jugulare, penituit tamen eos, decretumque mutata sententia una die antè allatum est ad imperatores, quam mandata essent peracturi. Non tam benigne cum Capuanis Fulvius egit, qui susceptis reipublicæ literis ut senatu Capuano ignosceret, quem statuerat perdere, prius scilicet vitæ suæ satisfecit, quam literas legeret: tanta illi sanguinis aviditas erat. Plurimæ apud Mitylenæos intestinæ seditiones fuere, & plu-



res tyranni civitatem oppressere, inter quos & *Pittacum* numerant. Sed is ad dominatus eruendos, principatu usus est, non ad tyrannidem exercendam, qui sublatis tyrannis, mox cives in pristinam libertatem restituit, ostenditque sapienti principatum non esse appetendum. Sed neque libertas diuturna speranda est civibus neque perpetuo metuenda servitus: altera succedit alteri, sicut montibus vâles. Hanc insulam (ut *Diodorus* ait) *Pelasgi* primum habitavere. *Xanthus* enim *Priapi* filius, *Pelasgorum* qui ex agro venerant rex, parti *Lyciæ* imperavit, deinde *Lesbum* cultoribus vacuam petens, agro *Pelasgis* dimisso, insulam quæ *Issa* prius dicebatur, ab eis *Pelagiam* vocavit. Septima deinde progenie, ob diluvium tempore *Deucalionis* factum, cum insula deserta remansisset, *Machareus* in eam pervenit, *Cyrnaci Ionis* filius apud *Achajam* natus, eoque *Ionas* transtulit, & humanitate ac justitia plurimum auctus, & hanc & vicinas insulas possedit. Successu deinde temporis *Lesbus* *Lapithi* filius in hanc insulam navigans, sumpta in uxorem *Macharei* filia *Methymna* nomine, apud eum perseveravit, & claritatem assecutus insulam à se *Lesbiam* nominavit. Fuit & altera *Machareo* filia *Mitylene* appellata, quæ nomen civitati dedit, in hoc usque tempus permanenti. E *Lesbo* coloni in *Chium*, & in *Samum*, & in *Rhodium* missi feruntur. Ex insulæ cum saluberrimum aërem haberent, & frugibus abundarent: loca verò in continenti opposita, propter diluvii humiditatem, pestilentia & frugum sterilitate laborarent, Fortunatæ sunt cognominatæ. *Machareus* legem valde utilem apud *Lesbios* edidit, quam *Leonem* ab ejus animantis virtute ac robore appellavit. Res *Mitylenenses* nunc prosperæ, nunc adversæ, per multas manus actæ sunt. *Pelasgi*, ut diximus, priores insulam habitavere, cum staret *Troja*. Postea *Æoles* successerunt, deinde *Persarum* imperium subiit, postea *Macedonum*, deinde *Romanorum*. Cum *Romana* res in *Constantinopolim* translata esset, sub *Græcorum* imperatoribus, varia insulæ fortuna fuit. Postremo cum *Kalo Johannes Constantinopolitanus* imperator à *Cantacuceno* per arma pulsus, ope *Francisci Gatalusii Genuensis* imperium recuperasset, hæc insula ob gratitudinem auxiliatori tradita est, atque in ejus posteris usque in hæc tempora durat. Ab eo qui nunc regnat, cum frater natus major aliquandiu rem administrasset, in vincula con-

jectus



jectus est, publicata causa, quod insulam Turcis Christianamque fidem prodere statuisset, ut est calamitatis infamia comes. Ætate nostra Turcarum classes sæpenumero in Lesbum delatæ, homines & armenta abegerunt, nihil extra urbium mœnia relinquentes, quarum unam scæminea manu servatam tradunt. Oppugnaverant Turcarum exercitus insulæ oppidum non contemnendum, muriqve partem machina dejecerat, & facta clypeatorum testudine irrumperere properabat: nec oppidanis animus erat ad ferendum impetum, aliis deditionem, aliis fugam meditantibus. Sed affuit virgo virilibus armis induta, quæ, mirabile dictu, salutem patriæ peperit. Adhortata enim cives ne hostem metuerent, primam se Turcis obiecit, ac pro loci fractura depugnans, nonnullos obruncavit: cujus audaciam admirati oppidani, & ipsi animum resumpsere, tantamque hostium stragem ediderunt, quantam vix credere quispiam possit. Turcæ è terra pulsi agrè in navigia se receperunt, quos Catalusia classis insecuta, magno detrimento affecit. Laus tamen servatæ insulæ penes virginem fuit, cujus tædet non habere nomen: digna enim erat non minori memoria quam Sappho: sed isti majora præmia in cœlesti patria reservantur. Episcopus Caphensis Calisto pontifici maximo nobis præsentibus hæc enarravit, qui tunc transitum per Mitylenem fecerat, ab ecclesia sua Romam petens. Atque in hunc modum tota Æolis ac Troas absoluta est, quæ invicem (ut sæpe diximus) permixtæ fuerunt. Hæc cum aliundè scribere statuissemus, tum Federicus Comes Urbinas nos impulit literis clarus & armis, nostriqve temporis ductor exercitus. Nam cum è Roma Tybur peteremus, obvius in itinere cum parte copiarum suarum, dum Christianos equites, armorum splendorem admiraremur: quæsit ex nobis, an præscorum militiam tam splendide armatam fuisse arbitraremur, respondimus: nisi apud veteres hujusmodi armaturæ fuissent, non potuisse Vergilium atqve Homerum eas describere, quas & pulcherrimas & ornatissimas commemorant, his, quibus nostra utitur ætas, perquam similes. Quæsit ulterius Comes quæ nobis opinio de rebus Trojanis esset, nam ipse eas fuisse minimas censebat, sed Poëtarum studio amplificatas: diximus minores fuisse, quam fabulæ ferant: magnas tamen quando hinc Græcia, inde Asia in bellum ruit. Etsi enim non tota Chersonesus sub Priamo fuit universa, tamen ei suppeditas misit, & multi etiam qui ultra Halyn, & ultra Euphratem



tem habitabant: nec regnum Priami minimum fuit, quod à Rhyndaco fluvio meridiem versus Caicum usque protendebatur, & ulterius circa maris littora usque Cumam, per stadia circiter mille quingenta in mediterranea. Non satis explicare possumus orientem versus quousque imperium ejus excurrerit. Nam Troas in mediterraneis Mysiæ Phrygiæque permixtae sunt, & Mysorum Phrygumque duces Priamo suberant. Diximus regnum ejus in octo sive novem principatus fuisse divisum, ita enim Strabo refert, sed qui fuerint hujusmodi principatus, & qui duces non satis explicat. Videtur tamen Hectorem, Æneam, Antenorem, Pandarum, Asium, Eurypilum, ac filios Meropis Adrastum & Amphium, simulque Hippothoum, & Pylæum, inter duces referre: ii fratres erant, & Pelasgis dominabantur, unumque tantum principatum efficiebant, sicut & filii Meropis, qui Adrastiae campos, & Pityiam atque Apæsum possidebant. Dardanii quoque in duos principatus dividebantur sub Ænea & Antenore constituti, Lycii sub Pandaro, Zelienses & Aphini sub Asio, Ilienses sub Hectore, Cetii & Lyrnessa sub Pylæo. Quodque magna fuerit Priami potestas, & ad Lesbum insulam se extenderit, Achilles ipse testatur, quem ita loquentem inducit Homerus: Ante tuas nora-  
mus opes spatiosaque regna, quod felix pariter Lesbos complectitur,  
& quæ comprehendit Phrygiæ tellus atque Hellespontus. Non igitur contemnenda sunt, quæ de Trojanis dicuntur, nec minima existimanda. Quamvis nec Ilium nec Iliensia bella famam æquarint.

## CAP. LXXV.

*De Ionia minoris Asia regione, de Mileto & Epheso, quæ totius Ioniae urbes fuere clarissima, de Branchidis oraculum Didymæum Xerxi prodentibus, de viris ex Mileto memoratu dignis, de Latino Endymionis astrologi monte. Item de Averno pestiferas exhalationes habente.*

Ionia Æoliæ succedit, quæ ab Hermo fluvio & urbe Phocæa meridiem versus, usque ad Milesiorum & Caricorum montium Posideum juxta mare procurrit. Pherecides Miletum & Myuntem ad hanc oram perti-



pertinere dixit, & Cares prius Mycalentia & Ephesia habuisse, oram verò sequentem Leleges usque Phoceam & Chium, & Samum: sed utrosque ab Ionibus ejectos ad reliquas Cariæ partes evasisse. Fama est multos ex Pyliis cum Melantho Codri patre Athenas concessisse, & totam hanc gentem cum Ionibus in Asiam transivisse, ibique duodecim urbes condidisse, quæ Ionica & Colonia appellatae sunt. Androclus Codri Atheniensium regis legitimus filius Ephesum condidit, & Ionum regiam ibi constituit: hujus posteriusque ad tempora Romanorum reges nominabantur, & honores quosdam habebant, in certaminibus praesidentes, & purpuram gestantes regii generis insigne, quamvis hodie apud Italiam purpura etiam mercatorum, apud cæteras gentes histrionum gestamen existat. Neleus Miletum condidit, qui genere Pyleus fuit, & aram in Posideo collocavit. Cydrelus Codri filius nothus Myuntem ædificavit, Androcopus Lebedum, Colophonem Andramon Pylius: Prienem Epitus Nelei filius: Theum prius Athamas: quapropter Anacreon Athamantidam eam vocavit, postea Naudus Codri filius spurius: eam auxit Erythras Gnodus atque is etiam Codri filius nothus: Phoceam Athenienses cum Philogene: Clazomenas Paralus: Chium Egertius, mistam multitudinem ducens: Samum Tymbrion, ac deinde Patrocles. Addita est loco tertio decimo Smyrna Ephesiorum opera: nam his olim cohabitabant, cum Ephesus Smyrna vocaretur. Smyrna Amazon fuit, quæ Ephesum tenuit, urbiqve nomen dedit: Smyrnei à Milesiis secedentes exercitum in eum locum duxere, in quo postea Smyrna condita est, non procul ab Hermo fluvio, cum Leleges eum tenerent, quibus ejectis antiquam Smyrnam condidere, distantem ab ea, quæ postea ædificata est stadiis viginti: deinde ab Æolibus pulsi Colophonem aufugerunt, & cum Colophonis redeuntes regionem suam recuperavere: sed de his posterius dicemus. Nunc de principalioribus agendum est, Mileto scilicet atque Epheso: hæ namque totius Ioniæ optimæ urbes clarissimæque fuerunt: hodie parum habitationis habent, & ruinas magnas ostendunt. Nam Turcæ regionis Domini nauticarum rerum ignari, & Piratas & Christianorum arma timentes, ad mediterranea se contulerunt, Græci tantum, & hi non multum in maritimis urbibus remanserunt. Diximus supra Australem Ioniæ terminum Milesiorum Caricorumque montes esse, in quibus Posideum fuit: ab eo septentrio-



nem versus iter habenti oraculum fuit Apollini Didymæo sacrum, quod Branchidæ decem & octo stadiis in mediterranea ab eo distantes, Xerxi prodiderunt, & cum eo abierunt, ne pœnas darent: sed ab Alexandro (ut antè diximus) quamvis sc̃to, graviter tamen puniti sunt. Xerxes templum incendit, sicut cætera Asiana Epheso excepto: Milesii postea id reparare aggressi, cum & omnium maximum erexissent, propter magnitudinem cooperire non potuerunt, ut sæpe spes humanas destituunt vires: hinc ad Miletum brevis admodum via fuit. Cretenses Miletum prius supra mare condidere. Sarpedon habitatores ex Miletu Cretensi deduxit, & urbi nomen ab illo imposuit, cum prius Leleges hunc locum tenerent: postea Neleus urbis locum mutavit, & Iones introduxit. Urbs quatuor portus habuit, quorum unus classis erat capax: multæ hinc coloniæ exiverunt, & maxima pars Euxini ab his habitata est & Propontis, & Hellepontus, & alia multa loca. Ex Miletu fuere viri memoratu digni, Thales unus & septem sapientibus, qui primus Physiologiæ ac Mathematicæ autor inter Græcos est habitus, & Anaximander ejus discipulus, & Anaximandri Anaximenes, & Hecataus qui scripsit historiam, & Æschines orator, non ille qui cum Demosthene contendit, sed alter, qui assumpta nimia erga Pompejum magnum licentia pariter in exilium missus est. Ruit enim omnis audacia, & moderata tantummodo durant. Hæc civitas, cum Alexandrum exclusisset, vi capta est, quem admodum Halicarnassus: prius etiam à Persis oppressa fuerat. Phrynichus tragicus cum actum fecisset, qui Miletum à Dario captam ostendit, mille drachmis ab Atheniensibus mulctatus est. Neque enim semper tuto veritas dicitur, ubi cum tyrannis aut plebibus agitur. Ante Miletum in proximo jacuit Lada insula, & aliæ pleræque stationes Piraticas habentes. Deinceps Latmius occurrit sinus, in quo Heraclia oppidulum fuit, & ibi mons Latmius, quem Hecataus cum esse putat, qui, ab Homero Pediculorum appellatur, & à Milesiorum agro per Cariam versus orientem tendit. In eo Endymionis sepulchrum in spelunca quadam ostendebatur. Post Heracliam Pyrrha succedit, centum serè stadiis ab earemotā, à Miletu duplum, si quis in sinum sese inferat. Nam recta navigatio ex Miletu Pyrrham stadia triginta continet: adeò longum iter habet littoris præternavigatio: E Pyrrha usque ad Mæandria ostia quinquaginta stadia computaverunt, propter stagna



stagna & paludes : subministratoriis scaphis adnaviganti stadia triginta, Myus occurrit, una lex duodecim Ionia civitatibus, quàm propter hominum paucitatem Milesii habitavere. Hanc Themistocli Xerxes in obsonium dedit, cum Magnesium in panem, Lampfacum in vinum dedisset. Huic proxima fuit Thymbria vicus, juxta quem Avernum esse dixere, & sacrum specu Charonium appellatum, pestiferas exhalationes habens. Ulterius Magnesia fuit Mæandrum versus, de qua post dicemus. Post Mæandri ostia Boream versus Prienensium littus fuit, & ipsa Priene, & Mycale mons seris & arboribus plenus, qui Samiæ regioni adjacet, & ad eam quasi octo stadiorum efficit Isthmum, ultra Trogilium promontorium. Priene à quibusdam Cadme appellata est, quoniam Philotas ejus conditor è Boetia venit. E Priene fuit Bias unus è septem sapientibus. Ante Trogilium parva insula jacet eodem nomine. Trogilium promontorium pes quidam est, qui à Mycale procurrat, & alius ei mons adjacet, qui Ephesii agri est, nomine Pactyes, ad quem mediterranea defleat : à Trogilio Samum usque stadia insunt quadraginta.

## CAP. LXXVI.

*De Samo Ægei maris insula, de tabulis, statuis, & colossis in ea pulcherrimis, de Polycrate annulum aureum in mare projiciente, & eum paulo post in piscis à piscatore accepti ventre inveniente, de Pythagora philosopho, & quod Calliphontis confabulatoris sui animam, diu noctuq, secum degere dicebat.*

**S**Amus urbs ad Austrum spectavit, maxima pars ejus in plano fuit, & mari bluebatur : pars in montem ascendit : ad dexteram naviganti urbem versus Posideum fuit, quod promontorium Mycalen versus septem stadium efficit fretum, & Neptuni templum habuit, ante quod Narthecis parva insula jacuit : ad sinistram suburbanum fuit, & Imbrasis amnis, & arcum vetustissimum sa-



crarium, & ades, quæ pictarum tabularum armarium erat, & locus sub divo pulcherrimis statuis plenus, quarum tria colossica opera Myronis erant, super una Basi sita. Quæ cum Antonius abstulisset, Augustus Cæsar duo in eandem basim reposuit, Palladem & Herculem: Jovem autem transtulit in Capitolium, & sacellum ei construxit, errore sui temporis imbutus, in quo idola colebantur & salforum deorum statuae. Circumnavigationem insulæ Sami sexcentorum stadiorum esse dixerunt. Ea prius Parthenias dicebatur à Caribus inhabitata, postea Anthemus, deinde Melamphylus, postremo Samus à quodam heroë indigena, qui colonos ex Ithaca & Cephalenia deduxit. Mons qui insulam corrigit, Ampelus vocatus est. Insula est vino infelix, cum cæteræ circumvicinæ vino optimo abundant. In cæteris rebus feracissima, propter quod bellis afflicta est: qui eam laudant, eam Gallinæ lac ferre dixerunt. Multæ ei cum Atheniensibus inimicitia fuerunt, & plurimas tyrannides passa est. Polycrates & Syloson fratres cum varia fortuna ejus dominium tenuere. Polycrates adeò clarus fuit, ut etiam mari dominaretur. Is annulum de industria gemmis & sculptura pretiosum in pelagus projecit. Paulò post piscator quidam piscem eduxit, qui eum devoraverat, in cujus ventre annulus est inventus. Quod cum rex Ægyptius Amasis intellexisset, finem ejus infortunatum dixit, qui talibus prosperitatibus uteretur. Ille à Persarum satrapa dolo captus, suspensus est. Nam quæ prosperitas sine clauditur non luctuosa? Polycratis tempore fuit Anacreon Lyricus, tota poësis ejus mentione plena erat. Mirabilis & ipsius Anacreontis exitus, qui (ut est apud Plinium) acino uvæ strangulatus interiit, magnum fragilitatis humanæ documentum. Pythagoras philosophus famatus, tyrannidem Polycratis fugiens, urbem deseruit, & in Ægyptum ac Babylonem discendi studio abscessit: cumque reversus durare tyrannidem invenisset, in Italiam navigavit, ibique vitam contrivit, totamque illam Italiæ partem erudivit, quæ olim Magna Græcia dicta est. Illud hic non est subticendum, quod Hermippus de Pythagora tradit (ut est apud Josephum) Pythagoras uno confabulatorum suorum defuncto nomine Calliphonte genere Crotoniate, illius animam dicebat secum degere die noctuque, ac præcipere, ne transiret de loco unde asinus onus portaret, & ab aqua scetulenta semetipsum abstineret,



neret, & ab omni blasphemia recederet: digna verba quæ memoria teneantur. Syloson privatus relictus, cum Dario Hystaspis filio, priusquam regnaret, vestem quam serebat cupienti largitus esset, ab eo regnum consecutus, Sami tyrannidem obtinuit, qui acerbè imperans urbem hominibus viduavit, ex quo proverbium fecerunt: Sylosontis opera locus amplius est: quod etiam de multis Italiae civitatibus nostro tempore dici potest. Nam & Pisa in Hetruria Florentinorum, & Sena paucorum civium opera facta est ampla: amplior Aquileja, atque Ravenna apud Adriaticum sinum: amplissima juxta Tiberim Roma, non sine culpa suorum civium. Athenienses misso Pericle imperatore, & Sophocle poeta cum eo, Samios non obtemperantes gravi obsidione affecerunt: postea duo municipum millia ex suis miserunt, qui vastatam urbem incolerent. In his Neocles fuit Epicuri pater Grammaticæ magister, quem & hic & in urbe Teo educatum ferunt, adolescentiam verò Athenis egisse, cui Menander comicus æquævus fuit. Creophylum esse Samium tradunt: qui cum aliquando Homerum hospitem accepisset, creditus est ab eo inscriptionem poematis obtinuisse, quod Oechaliæ captivitatem vocavere. Sed Callimachus in epigrammate contrarium ostendit, opus scilicet à Creophylo compositum, Homeri tamen existimatum. Quidam hunc Homeri magistrum fuisse tradunt, quidam non hunc, sed Aristum Proconnesium: quicumque is fuerit, multo est à discipulo superatus.

## CAP. LXXVII.

*De Icaria insula & quæ de ea dicta sunt fabulosa, de Ortygia insula in qua Latona peperisse fertur, de Curetibus & Ephesia Dianæ templo nonnihil scitu dignissimum. Item qui apud Ephesum viri memoratu digni fuerint.*

**S**AMO adiacet insula Icaria, à qua Icarium pelagus nominatur. Ea ab Icaro Dædali filio nomen habuit, quem dicunt paternæ fugæ comitem, cum ambo pennati à Creta aufugissent, in hoc loco cecidisse, via non servata quam pater ostenderat. Nam cum



cum celsius se ad solem extolleret, liquefacta cera pennæ effluerunt. Fabulosa hæc, documentum tamen habent, mandata parentum ne, filii contemnant. Insulæ ambitum trecentorum stadiorum esse dixerunt, & in ea Dianæ templum, Tauropolium appellatum, & oppidulum Oenoem. Distat à Samo stadiis octoginta, cum defecissent in ea homines, Samii pro pascuis usi sunt. Post Samium fretum, quod Mycalen respicit Panionia fuit, tribus stadiis supra mare: ubi Panionia, communia omnium Ionum festa Neptuno Heliconio celebrabantur, quæ quamvis in agro Ephesio fierent, Prienenses tamen sacrificiis præerant. Proxima huic loco Neapolis fuit, quam Ephesii pro Marathesio agro cum Samiis permutarunt. Deinde Pygella, oppidum, ubi Agamemnon Munichia Dianæ templum edidit, & Pygalios dimisit, gentem morbis defatigatam, quos natibus agnatos Pygas vocant: unde locus nomen accepit. Exin portus fuit nomine Panormus, & Dianæ Ephesiæ templum memorabile, deinde civitas ipsa: de quibus mox dicemus. In eadem ora paulò supra mare Ortygia fuit, lucus omnis generis materiæ pulcherrimus, præsertim cyparisso. Cenchrius amnis per eum fluebat, in quo dicunt Latonam ex partu lotam. Hic enim eam peperisse fabulabantur, & nutricem partus Ortygiam fuisse: adytum in quo peperit, & proximam deam, ad quam primo post partum quieverit, ostendentes: & montem luco imminentem nomine Solmissum, in quo Curetas armorum sonitu Junonem obtuderint, ex æmulatione insidiantem, eoque modo Latonæ partum eam latuisse. Scilicet ea diis cura erat, & adulterinis partibus implere cælum oportebat. Urbem Ephesum, Cares & Leleges habitavere, sed cum maximam eorum partem Androclus ejecisset, eam ex his supplevit, qui ad se circa Athenæum & Hypelæum convenerant, assumpta prætermontana Corisso proxima: atque in hunc modum usque ad Croesi tempora habitata fuit. Postea à prætermontana descendentes circa templum habitavere, usque ad Alexandri tempora. Lysimachus condita urbe alio loco magis eminenti, cum homines non libenter eò migrarent, observato vehementi imbre canales obstruxit, urbemque submersit, atque ita cives vel invitos traduxit, urbemque de uxoris nomine Arsinoën appellavit, sed antiquum nomen obtinuit. In ea senatus conscriptus erat, cum quo & hi conveniebant, qui vocati dicebantur, & omnia admini-



administabant: quemadmodum Venetiis cum domino & duce togati conveniunt. Dianæ templum primus Chersiphron mire fabricatus est, postea aliud fecit majus illo, quod Herostratus famæ gratia incendit. Senatus decretum edidit, ne quis ejus nomen literis manderet, dignum supplicium: sed minimè obtemperatum est, quando usque ad nostram ætatem sacrilegi nomen pervenit, verum cum infamia & dedecore, cujusmodi & Neronis nomen, & proditoris Judæ: & ejus, qui nunc vivit, Sigismundi Malatestæ invidiosum est nomen. Ephesii incenso templo, cui Xerxes pepercerat, aliud præstantius construxerunt, mulierum ornamentis & multis operibus ad id collatis, non ut Timæus Tauromenitanus ait ex Persarum depositis, cum nulla essent: & si quæ fuerant, cum templo conflagraverant. Ferunt Alexandrum, cum templum instaurari accepisset, factas & futuras impensas pollicicum, si ejus rei titulus sibi adscriberetur, illos ajunt renuisse, Ephesiumque laudibus quendam attollunt, qui regi dixerit, non decere Deum diis quicquam dedicare. Norat scilicet amicam regibus adulationem esse, & in magna fortuna plurimum posse. Sed Alexander ab India reversus, & veneno apud Babylonem hausto, mortalem se esse cognovit, quamvis Deus existimari veller. Cheromocrates ultimo loco templum instauravit, qui Alexandriam construxit in Ægypto, & Alexandro pollicitus est, se montem Athon in ejus formam fabricaturum: facturumque duas urbes, alteram ad dexteram, alteram ad sinistram: ita ut ab altera in alteram amnis afflueret. Sed homines faciliè ea promittunt, quæ ventura in periculum non creduntur. Ædes plena fuit Praxitelis operibus, & nonnulla Thrasonis inerant, Sacerdotes eunuchi honore maximo potiebantur: cum his virgines aliquas sacras esse oportebat. Templum Asylum erat, cujus libertatis termini sæpe mutati sunt. Alexander ad stadium extendit, Mithridates paululum plus addidit. Antonius etiam urbis partem comprehendit. Augustus Cæsar id irritum fecit, quod multis causam malefaciendi præstabat. Sentiunt id Romani, apud quos tot sunt asyla, quot Cardinalium ædes, in quibus servati fures atque sicarii, urbem alioqui peccatam & nobilem veluti latronum speluncam efficiunt. Ephesus navale & portum habuit, & loci opportunitate multum crevit, & maximum citerioris Asiæ emporium fuit. Viri memoratu



digni ex ea fuerunt, Heraclitus cognomine Scotinus & Hermodorus, qui propter excellentiam ingenii & doctrinam, & quia frugi erat, in exilium missus fuit, dicentibus Ephesiis: Nemo nostrum frugi esto, alioqui cum aliis ejiciatur. Propter quod ait Heraclitus, dignos esse Ephesios, ut omnes strangularentur. Pari supplicio & Nursinos dignos censuisset, qui literatos ex Concilio pellunt. Ephesius fuit etiam Hipponax poeta, & Parrhasius pictor, & Appelles, & Alexander orator, & Theodotion Judæus, qui sacram scripturam interpretatus est. Timotheus apostoli Pauli comes apud Ephesum episcopatum accepit. Irenæus dicit Ephesiorum ecclesiam à Paulo quidem fundatam fuisse, sed à Joanne aedificatam, qui supra pectus Domini in cœna recubuit. Is enim non solum Ephesinæ, sed omnium ecclesiarum, quæ erant in Asia, gubernacula suscepit, & usque ad Trajani tempora prudentissimè rexit, post Domitianum ex insula regressus. Polycarpus Smyrneorum episcopus referre solebat Joannem apostolum, cum balneas apud Ephesum aliquando lavandi gratia fuisset ingressus, & Cerintum ibi vidisset, continuo exiluisse, dixisseque: fugiamus hinc, ne balneæ ipsæ corruant, in quibus Cerintus lavatur veritatis inimicus. Tanta erat apud illos fidei fundatores cura, ne ab hæreticis inficerentur: quorum consortia nostra secula facile admittunt, non sine magno religionis damno. Duo fuerunt apud Ephesum sepulchra, & utrumque Joannis appellabatur. Nam & duo Joannes fuerunt, quorum etsi alter non fuit apostolus, magnus tamen vir extitit, & eum Papias Hieropolitanus episcopus audivit, & sunt qui Apocalypsim illius esse asserunt, quibus non consentit ecclesia, quæ sub nomine apostoli legit Apocalypsim. Hic Drusiana fuit mulier sanctissima, & apostoli amantissima, quæ ut reversum eum ab exilio cernere mereretur, à mortuis suscitata est. Multa in hac urbe dilectus à Christo discipulus signa peregit, & tandem dormitione sua eam honoravit. Antrum ejus ibi ostenditur, in quo multa scripsit, id sacrum incolæ habent. Una quoque ex filiabus Philippi apud Ephesum sepulta est. Pauci nunc habitatores in urbe semidiruta morantur, & ii Græci non parum ab Romana ecclesiâ dissidentes. Ephesinus episcopus disputator vehemens sub Eugenio quarto Florentinum concilium adiit, nunquam tamen sæpe & multum rogatus veritati acquiescere voluit. Post Ephesum Caystri ostia ad septentrionem



nem sequuntur, & deinde lacus nomine Selinusius, ex pelago refusus, deinde alius in eum confluens, qui deæ sacri, magnos proventus templo afferebant. Reges eos abstulerunt, Romani restituerunt, postea publicani sibi vendicavere. Artemidorus legatus Romam missus lacus deæ recuperavit, & Heracleotim quæ desciverat evicit, propter quas res aurea affigie in fano donatus est.

## CAP. LXXVIII.

*De Colophone, & qui ex ea viri fuere clari, de Lebedo, & quod eo in loco scenicorum histrionum fuerit collegium, de Erythris civitate Jonica, de Coryco monte à quo & Corycei Pirata sunt dicti.*

**P**Aulo ulterius Galleſius mons aſſurgit, & civitas Colophon Jonica, & ante eam Apollinis Clarii lucus, in quo tradunt Calchantem augurem cum Amphilocho Amphiarai filio, è Trojano bello redeuntem declinaſſe, & Mopſum augurem ex Mantho Tireſiæ filia natum inveniſſe, ac propoſitis quæſtionibus cum eo contendiſſe, & alterum de ſuuctibus capriſici, alterum de prægnante ſue quæſiviſſe, victumque Calchantem mœrore obiſſe. Colophonii navales opes ſatis amplas habuere, & in equeſtribus certaminibus tantum excelluere, ut victoriam inde futuram ſperarent, unde Colophonius pugnaret equeſtatis, & in proverbiiſ dicerent: *Colophonem addidit*: cum ſumma operi manus imponebatur. Par gloria apud Italos ſuperiori tempore Peruſinorum fuit, nec adhuc proriſ extincta eſt. Majus tamen hodie Sfortiadum nomen habetur, & major equeſtatis, qui Longobardorum imperium armis adepti ſunt. Ex Colophone fuit Mimnermus tibicen, & elegiæ poëta. Item Xenophanes phyſicus, qui poëmata de Pſyllis edidit, & Polymnaſtus muſicus: ſunt & qui Homerum hic ortum dicunt. Ab Epheso Colophonem uſque ſtadia numerant recta navigatione ſeptuaginta: poſtea



stea Coracium montem collocant, & insulam Dianæ sacram, in quam cervas parituras tranare crediderunt, tanquam Diana numen haberet, & opem posset animalibus afferre. Lebedus deinde succedit, centum & viginti stadiis à Calophone distans. Hoc in loco Scenicorum histrionum collegium fuit, qui ludos ac certamina Libero patri quotannis celebrabant. Prius Teo habitaverant, quæ consequens Ionum civitas erat, sed orta seditione Ephesum confugerunt. At cum Attalus eos in Myonneso collocaret, qui locus inter Teum & Lebedum medius erat, Tei Romam miserunt oratum, ne Myonnesum sibi admuniri paterentur: Romani illos Lebedum, transmisere, ubi propter hominum paucitatem benignè suscepti sunt. Teos à Lebedo centum viginti stadiis procul fuit, in peninsula portum habens, Anacreontis Lyrici patria: cujus tempore Tei relicta domo Abderam Thracum urbem migraverunt, cum Persarum contumelias ferre non possent. De Apelicone diximus, qui Tejus fuit, & Hecataus historicus. His in locis pulchra Chersonesus est, quam Tei & Erythrai habitaverunt, & Clazomenii. Chalcides Isthmum facit, cujus australe latus Tei habuerunt, boreale Clazomenii, extrema Chersonesi Erythrai. Chalcidibus lucus imminabat, Alexandro Philippi filio dicatus, in quo lones ludos, Alexandria vocatos, quotannis celebrabant. Circumnavigatio Chersonesi stadia plusquam mille continuit. In fronte Erythrae civitas Ionica fuit, quæ portum habuit, & quatuor oppositas insulas admodum parvas. Priusquam Erythras perveniretur, oppidulum Eræ fuit, deinde Teum, postea Corycus mons excelsus, & portus Calystes sub eo: & alii nonnulli. Tota Coryci præternavigatio latronibus plena fuit, qui Corycæi dicebantur. Hi per varios dispersi portus, mercatorum consilia explorabant, eosque solventes in alto aggrediebantur & diripiebant. Hinc factum est, ut omnes curiosi, occulta ac secreta auscultare conantes, Corycæi appellarentur, & in proverbio diceretur: *Hunc ergo Coryceus auscultavit*, cujus consilia secreta patefacta sunt. Post Corycum Halonnesus insula jacet, deinde Argennum promontorium agri Erythrai, quod Chiorum Posidio proximum fuit, sexaginta ferè stadiorum interjacente freto. Inter Erythras & præcipitium, quod in boreali parte Chersonesi reperitur Clazomenis proximum, Mimas assurgit, mons altissimus, felix, atque arboribus plenus: deinde



de vicus Cybelia, & promontorium nomine Melæna, ubi molæ effodiebantur. Ex Erythris Sibylla fuit, quam numine afflatam crediderunt: antiqua sanè mulier & divinatrix: & tempore Alexandri alia quædam eodem modo futura prædicens, nomine Athenais. Ex eadem civitate fuit Heraclides Hierophilus medicus, Apollonii condiscipulus, ejus qui Mus est cognominatus.

## CAP. LXXIX.

*De Chio insula, deq; in eo vino Ariusio Græcanicorum optimo. Item de Mastiche ibi nascente.*

**C**Hius insula nongentorum stadiorum ambitu continetur. Urbs in ea portum habuit optimum, sicut & hodie. Si quis circumnaviget, & insulam à dextris habeat, locum primo inveniet, ubi Posidium fuit: deinde Phans, portum profundum: postea ubi Apollinis templum erat, & palmarum lucus. Deinceps litus australe, quod stationes habet: mox alterum littus, Leus appellatum, Deinde Melæna promontorium, cui opposita est Psyra insula excelsa, quadraginta stadiorum ambitu, & urbs ejusdem nominis. Deinde Ariusia, locus asper & importuosus, stadiorum trecentorum, qui vinum fert Græcanicorum optimum: propter quod Chii nomen affecti sunt. Huic succedit mons Pelinæus, omnium ejus insulæ altissimus, ex quo marmor effoditur. Viros protulit Chius memorabiles Ionem tragicum & Theopompum historicum, & Theocritum sophistam. De Homero ambiguitas est, Chii suum civem esse volunt, atque eos in testimonium adducunt, qui Homeridæ vocabantur, ab illius genere profectos, quorum Pindarus meminit, & cantores optimos esse dixit. Chii olim classem habuere, & maris imperium & libertatem sibi vendicarunt. Hujus insulæ sicut & aliarum varii casus fuere, postremo ruente Constantinopolitanorum imperio, in Genuensium potestatem facta est, qui eam non sine magno discrimine contra Turcarum impetum defenderunt. Mastiches hic nascitur, quæ res Genuensium reipublicæ magnum emolumentum affert: sunt qui ajunt



nusquam alibi nasci, quod non credimus. Ait enim Strabo in Lybia regionem esse Cyreneis proximam, quæ Silphium id est mastichen gignit: quamvis Barbari odio quodam ingruentes, radices ejus penè omnes eruerint. Sed possent alia quoque loca ejusdem naturæ inveniri, ex quibus difficile sit ad nos aliquid asportari, mercatoribus ea inferentibus, quæ facilius haberi possint.

## CAP. LXXX.

*De Clazomenis & Smyrneorum sinu ac civitate, de Leucis gentibus, & quod apud eas P. Crassus in prælio occubuerit.*

**P**ost præcipitium Clazomenæ sequuntur, quæ octo insulas in fronte habitatas habuerunt. Hæc Anaxagoræ physici patria fuit, Anaximeni Milesio familiaris. Auditores ejus commemorantur Archelaus physicus, & Euripides poëta. Deinceps Smyrneorum sinus & civitas succedit, subinde alius sinus, & antiqua Smyrna, distans à nova stadiis viginti. Lydii Smyrnam everterunt, quæ per annos quadringentos vici modum retinuit. Antigonus eam suscitavit, Lyfimachus ampliavit, deinceps omnium pulcherrima facta. Pars ejus in monte sita fuit, sed pars maxima in campo: portum habuit & gymnasium, & matronarum locum, & vias in rectum distinctas, lapidibus instratas, & porticus quadratas magnas & altas, & bibliothecam, & Homerum cum ejus statua. Nam & hæc civitas hunc sibi poëtam maximè vendicavit, & nummo æneo utebatur, qui Homerus vocabatur. Melas amnis moenia præterfluebat: sed cloacarum commodo caruit, propter quod imbrium tempore excrementa fluitabant è vasis dimissa. In hoc Dolabella Trebonium obsidione cepit, unum ex his qui C. Cæsarem dolo occiderunt, & multas urbis partes diruit. Patrum nostrorum memoria Tamerlanes Parthus, hanc urbem funditus evertit Rhodiis parentem. Post Smyrnam Leucæ fuisse, parvum oppidum, quod Aristonicus post Attali Philomatoris obitum ad defectionem produxit, & putans se regia stirpe natum, imperium sibi vendicare cogitavit. Sed prælio superatus ab Ephesiis, in  
Mediterra-



mediterraneam confugiens, hominum inopum ac servorum ad libertatem vocatorum, quos Heliopolitanos appellabat, tumultuariam manum congregavit: Thyatiramque & Apolloniadem capiens, alias civitates invadebat: quæ suis viribus & aliquorum regum auxiliis ejus impetum sustinuerunt. Quinque tamen legati Romanorum in bellis contra Aristonicum fatigati sunt, & deinde consul P. Crassus, qui in prælio apud Leucas occubuit. Deinde M. Perpenna, qui capto Aristonico quoque Romam missus, bellum absolvit: Aristonicus in carcere obiit, quamvis honestiori titulo bellum gessisset quam nostri prædones Italici, qui ex infima plebe nati, quamprimum militare cœperunt, urbes sibi & regna deberi putant, multos tamen digna supplicia exceperunt. Manlius Aquilius consul cum decem legatis in Asiam missus, ea quæ Aristonicus occupaverat, in provincie formam composuit. Post Leucas in sinu Phœcia fuit Atheniensium colonia, unde profecti sunt qui Massiliam apud Gallos non procul à Rhodano condidere, de qua suo loco dicemus.

## CAP. LXXXI.

*De Magnesia, & de juxta eam Thorace monte, apud quem Daphita grammaticus, propterea quod reges versibus inceserat, cruci est affixus, unde & proverbium (Cave à Thorace) natum est. Item de Trallibus, & ex eis viris illustribus, de Nissa, & mirabilis naturæ antro Coronio.*

**D**inceps Ionum fines atque Æolum, quos in Mediterraneis separare arduum est, sicut & Phrygas & Mysos & Cares in mediterranea. Oræ Ionica via fuit quæ ab Epheso usque Mæandrum & Antiochiam protendebat, per loca Lydis Caribus, & Græcis admixta, inter quæ prima erat Magnesia, quæ ad Mæandrum vocabatur, cui propinqua fuit: sed vicinior Lethæo qui fuit in Mæandrum, ex Pactio cadens Ephesiorum monte. Magnesia in campo jacuit juxta montem, qui Thorax appellabatur, in quo dicunt



dicunt crucifixum fuisse Daphnam grammaticum, propterea quod reges versibus incesaret. Ex quo proverbium tractum est: *Cave à Thorace*. Neque enim consultum est in eos scribere, qui possunt proscribere. Malè hæc animadvertit Sigismundi Malatestæ poeta, quem cum suo domino non Thorax, sed durior eo ultima foetentis horti expectabat cella. Magnetes à Delphis profectos putant, qui Didymos montes in Thessalia coluerunt. Hæc urbs Dianæ sanum habuit, quod magnitudine & multitudine rerum dedicatarum ab Ephesio superabatur: artificio verò & structuræ concinnitate longè præstabat. Magnetes olim à Treribus funditus deleti fuerunt, quæ gens Cimerica diu secundis rebus usa est, postea Milesii eum locum occupavere. Viri ex Magnesia clari extiterunt Hegesias orator, qui Asiatici styli autor fuit, immutato more Attico, qui tunc vigebat: & Simon modulator, qui & ipse corrupto prisco cantandi instituto, novum introduxit. Item Cleomachus pugil, qui in amorem ancillæ incidens, quæ à Cinædo alebatur, Cinædorum & orationem & mores est imitatus, propter quod minoris pretii habitus est. Post Magnesium via est quæ Trallis ducit, mediterraneam à sinistris habens, à dextris Mæandri campum, quem Lydi simul & Cares, & Iones, & Milesii, & Æoles habitabant: Eademque locorum ratio fuit usque Nyssam & Antiochiam. Trallianorum urbs in vertice quodam plano sita fuit, qui promontorium natura munitum habuit, & circuitum abundè septum. Multus in ea populus & opulentissimi cives fuere, & inter principales Asiæ, qui Asiarchæ appellabantur, semper aliqui ex Trallianis erant. Inter hos Pythodorus fuit, vir ab initio Nyssaënsis, postea propter claritatem huc migravit, Pompejoque amicissimus fuit, & regales opes supra duo millia talentorum possedit, quas à Julio Cæsare venundatas, cui propter Pompejum erat infensus, postea redemit, & filiis non minores reliquit. Hujus filia Pythodori fuit Ponti regina, cujus supra meminimus. Trallianus Menodorus vir doctus & Larissæi Jovis sacerdos, ab amicis Domitii Ænobarbi accusatus, tanquam classem prodidisset, ab illo interemptus est: tanta est delatorum potentia. Oratores clari fuerunt Dionysocles, & Damasus Scombrus. Hanc urbem ab Argivis & Thracibus conditam ferunt, & aliquandiu circa Mithridatis tempora sub tyrannide filiorum Cratippi fuisse. Hic una è septem ec-

clesiis



clesis fuit, ad quas scripta est Joannis Apocalypsis. Nyssa ad Mediterraneam jacuit supra Tralles ad orientem, & maxima ex parte monti accubuit, torrente quodam divisa, qui convallem efficit, ponte tamen conjuncta. Inter Tralles atque Nyssam vicus fuit, Acharaca nomine, & Plutonium luo sumtuosè circumdatum, & Plutonis ac Junonis delubrum, & antrum Charonium natura admirabile, in quo ægrotantes multos dies jejuni & quieti permanentes excubabant, & aliquando ex propriis insomniis sacerdotum consilio curas recipiebant. Non procul à Nyssa trans Mæandrum multæ habitationes fuere, & ultra urbem in monte Aroma. o. litera correpta, unde vinum Aromense ex mediterraneis optimum judicarunt. Viri è Nyssa illustres fuere, Apollonius philosophus Stoicus, Panætii familiaris, & Menecrates Aristarchi discipulus, & Aristodemus ejus filius, quem valde senem juvenis admodum audivit Strabo. Item Sostratus Aristodemi frater, & alius Aristodemus ejus consobrinus, qui magnum Pompejum erudit. Trans Mæandrum meridiem versus, his in locis ad Cariam cuncta pertinebant. Superius verò ad orientem loca permixta fuere, & modò Phryges, modò Lydi, modò Mysii urbes coluerunt, invicem coeuntes.

## CAP. LXXII.

*De Mycale monte, de Hierapoli urbe, & quod aquas caldas habeat, quæ in Tophum durabantur.*

*Item de ore Plutonio non nihil mirum creditu.*

**M**Ycale mons est, qui à Celanis incipit, & in occidentem vergit: ejus oppida versus Celanam & Apamiam, partim Phryges, partim Mysii ac Lydi occupaverunt, partim Cares & Iones. Flumina quoque eodem modo se habebant, præsertim Mæander Caystriano campo, qui inter mediterraneam cadit, & Tmolium montem. Continuus fuit orientem versus, Cilbianus campus multus & bene habitatus, qui regionem optimam habuit. Postea Hyrcanius, cui Persæ nomen imposuere, & Hyrcanos



nos incolas adduxere. Pari modo & Cyri campus sic à Persis appellatus, deinde Peltinus jam Phrygius, & Cillanus & Tabenus, in quo semi Phrygia fuerunt oppida, Pisidicum quiddam obtinentia. Superantibus verò Mediterraneam inter Caras & Nysæum agrum, trans Mæandrum ad meridiem usque in Cibyrensem & Cabalensem regionem, contra Laodiceam urbs fuit Hierapolis, ubi aquæ calidæ scaturiebant, quæ in tophum admodum facile durabantur, & Os Plutonium in parvo quodam montis supercilicio ita commensuratum, ut hominem suscipere posset, mira profunditate: cui vallum prepositum erat quadratum ambitu semijugeris, nebulosa & crassa caligine plenum, ut vix solum discerni posset: exterius tranquillo cœlo aër innoxius. Animal si quod ingrederetur, statim moriebatur, & tauri introducti mox cadebant, educebanturque mortui. Strabo se passerem immisisse ait, qui subito expiraverint. Galli execti usque ad os illæsi appropinquabant, & immergebantur, nec debebantur, quousque possent spiritum continere. Apud Hierapolim aqua quædam, adeò tingendis lanis idonea fuit, ut ex radicibus tinctorum cum his decertarent, quæ ex vermiculo purpuraque tingebantur: atque hæcenus de Ionibus aliisque gentibus, quæ cum eis coierunt.

## CAP. LXXXIII.

*De Caria, & apud Halicarnassum Mausoleo.  
Item de Salmaci fonte celeberrimo.*

**C**ariam, quam propriæ Asiæ ultimam partem fecimus, Strabo à Borea Mæandri flumine clausit, ab occidenti Icaro & Myrto pelago, à meridie Rhodiensi, ab ortu Lyciis & aliis gentibus: magnamque Tauri montis partem in Caria conclusit, oram omnem Rhodiam ei attribuens, quæ meridionalis est. Nos partitioni nostræ inhærentes, Cariam inter Mæandrum & montem Taurum collocabimus, reliqua Lyciæ attribuemus, quanquam Miletum & alia pleraque maritima loca Ionæ attribuerimus, quæ Iones condidere. Principium nobis Halicarnassus præstabit, quæ prius Zephyra dicta est, & Cariæ principum regia fuit, circa initium Tau-



ri sita. Hujus urbis varii casus fuere. Hecatomnus Cariae rex tres filios habuit, Mausolum, Idryeum, & Pixodorum: & filias duas, è quibus Artemisia natu grandior, Mausolo majori ex fratribus nupsit: Idryeo, qui secundus erat, altera soror nomine Ada. Mausolus regnum obtinuit, quo mortuo uxor imperium habuit, quæ sepulchrum illi construxit adeò magnificum, ut ex septem spectaculis orbis hoc unum censeretur, & nihilominus Artemisia tabe consumpta est propter luctum, quem ex viro susceperat. Trogius Artemisiam Halicarnassi reginam in auxilium Xerxi adversus Græcos venisse commemorat, inter priores duces acerrimè bellum cientem: & in Xerxe quidem muliebrem timorem, in Artemisia virilem audaciam fuisse. Incertum an hæc Mausoli conjunx fuerit. Post Artemisiam Idryeus imperavit, cui ex morbo absumpto pariter successit uxor. Pixodorus autem, qui reliquus erat ex filiis Hecatomni, hanc ejecit, & Persicarum partium satrapem ad communicationem imperii accivit, qui eo defuncto Halicarnassum tenuit, & adventantis Alexandri sustinuit obsidionem. Huic Ada Pixodori filia conjunx erat. Altera verò Ada Hecatomni à Pixodoro ejecta ad Alexandrum confugit, opemque ad capiendam urbem ei præstitit, propter quod Regina ab eo declarata est, & ad obsidendam arcem dimissa, quam paulò post obtinuit. Apud Halicarnassum Salmacis fons caluminatus est, quod eos emolliat, qui inde bibant: sed verosimilius est divitias & victus incontinentiam molliciei causam præbuisse. Ex Halicarnasso fuit Herodotus historicus, quem postea Thurium vocaverè, eo quod particeps fuisset coloniae in Thurios missæ, & Heraclitus poeta Callimachi sodalis, & alter historicus Dionysius. Deinceps Temerium sequitur Myndiorum promontorium, quod Scopiae Ptolemaeus appellat, ei Scandaria opponitur Coum promontorium, à quo distat stadiis quadraginta.



## CAP. LXXXIV.

*De Coe maris Ægai insula, Langoum à nostris jam dicta, deque in ea Venere ab Apelle picta, & quod in ipsa domus Hippocratica ostendantur adhuc ruinae.*

**C**oorum urbs antiquitus Astypalæa vocabatur, & in alio loco habitabatur ad mare: Postea propter seditionem inde migratum est, & juxta Scandariam civitas ædificata, quam (sicut insulam) Coen appellavere: quæ olim magna fuit, optimè habitata, & aspectu jucundissima, iis qui eo navigabant. Ambitus insulæ quingentis & quinquaginta stadiis clauditur, tota fertilis, & optimo vino abundans, sicut Chios & Lesbos. Ad austrum promontorium habet nomine Lacterium, in quo Halisarna locus fuit. Ad occidentuas partes Drecanum habuit, & vicum nomine Stomalimnes id est, os paludis. In suburbano Coi Æsculapii templum fuit valde insigne, & multis donis opulentum: inter quæ nuda Venus erat, quæ postea Julio Cæsari Romæ dicata est. Augustus eam patri posuit, ut generis parentem. Apellis hanc picturam crediderunt, pro qua remissa Cois centum talenta ex imperato tributo dicunt: tanti erant illius artificis opera. Ex hac insula Hippocrates fuit divinus ille medicus, cujus adhuc extant opera, & Simus ejusdem artis & Philetas poeta, & Nicias, qui Coorum tyrannus fuit, & Ariston Peripatetici auditor & hæres, & Theomnestus vir clarus, cantor nobilis, & in administranda republica Niciae æmulus. Hanc insulam ætate nostra Rhodii habuere, quam Turcæ diris calamitatibus affixerunt, nostri Langoum hodie vocant: ruinas ibi domus Hippocraticæ ostendi asserunt, & hortum, in quo medicas herbas habuit in ora continentis.



## CAP. LXXXV.

*De Astypalæa maris ejusdem insula, ex Cycladibus una, & quod in ea Dianæ Myndiadis templum fuit, quod circumplui crederetur, dein mediterraneis tribus memoratu dignis urbibus Mylasis, Stratonicia, & Alabandis.*

**P**rope Myndium agrum Astypalæa promontorium assurgit, & Zephyrion, postea Myndus ipsa sequebatur, quæ portum habuit: deinde Bargylia civitas, & inter hæc Carianda lacus, & insula eodem nomine, à Caryandensibus habitata. Unde Scylax ortus est, antiquus rerum conscriptor. Prope Bargylia Dianæ Myndiadis templum fuit, quod circumplui crediderunt: ut erat gentilium dementia. Ex Bargyliis vir clarus fuit, Protarchus Epicureus, præceptor Demetrii, qui Lacon appellatus est, si modo claritas ulla debetur Epicuri sectatoribus, quorum Deus voluptas fuit. Deinde Iassus in insula quæ continenti adjacet, sita fuit, & portum habuit, cujus incolæ magna ex parte victum ex mari captabant, cum sterilem regionem haberent, piscosam tamen. Fama est Iassios, cum citharædum quendam audirent, ut tintinnabulum increpuit, quod erat vendendorum piscium signum, ilico omnes à foro piscium discessisse, præter unum surdastrum. Citharædum propius ad illum accessisse, gratiasque egisse, qui & se & musicam honorasset, cum ceteri abiissent. Surdastrum verò interrogasse an jam tintinnabulum tenuisset, & affirmante citharædo, surrexisse pariterque discessisse: Tantum distant inter se palati voluptas & aurium. Ex Iasso fuit Diodorus dialecticus cognomento Cronus. Post Iassum Milesiorum Posidium sequitur, ubi Ioniæ templum fecimus. In Mediterranea tres urbes memoratu dignæ fuerunt Mylasa, Stratonicea, Alabanda: cetera castella magna ex parte sub his fuere. Mylasa in campo jacuerunt admodum fertili, cui supra verticem mons imminebat, & albi lapidis vena, quæ ad publicas & privatas fabricas magnum præbuit adjumentum: urbs enim & porticibus, & templis, pulcherrimè instructa fuit. Sed mirandum



est, quod tam erecto & acclivi præcipitio conditores urbem subjece-  
runt, quod si non metuebant, at certe erubescere debebant. La-  
branda vicus fuit in monte juxta transitum, qui ex Alabandis ad My-  
lasa fuit, & in eo per vetustum Jovis militaris templum, à circumvici-  
nis mirifice cultum. Via per sexaginta ferè stadia usque ad urbem in-  
strata, nomine sacra, per quam factorum pompa mittebatur: Sacer-  
dotes ex civibus nobilissimi eligebantur, quorum sacerdotium cum  
vita durabat. Traditum est hanc urbem olim vicum fuisse, patriam  
ac regiam Carum regum & Hecatomni, mari proximam, non procul  
ab Phylæo, in quo Mylasii portum habuere. Hinc viri memoratu di-  
gni fuerunt rhetores simul & oratores, Euthydemus & Hybreas, prior  
ingentes opes à majoribus suis accepit, & ipse magnas per se paravit,  
non solum in patria clarus: sed tota in Asia primos honores adeptus.  
Hybreas, ut ipse narrare solebat, & cives confitebantur, pater mulum  
lignarium & mulionem reliquit, à quibus aliquandiu nutritus est:  
postea Diotrephem Antiochenum audivit, & domum reversus ædili-  
tati se tradidit, nec multa lucratus ad gubernandam rempublicam ani-  
mum intendit, ac forum secutus cito crevit, & in admiratione ma-  
xima habitus est, vivente adhuc Euthydemo: nam his crescunt pa-  
trimonia fabris: Sed illo mortuo civitatis compos omnino fuit. Eu-  
thydemus dum viveret multum anteibat, cum simul & potens esset,  
& utilis in republica: & si quid erat in eo tyrannidis, id reipublicæ  
utilitate compensabatur. Quapropter laudatum est vehementer illud  
Hybreas, quod extremo in concione dixit: Euthydemè, malum es  
civitatis pernecessarium: nam nec tecum vivere possumus, nec sine te.  
Quod in plerisque civitatibus Italiæ nostra ætate erga nonnullos haud  
inconvenienter diceretur. Habent enim & nostra tempora suos Eu-  
thydemos. Hybreas cum plurimum crevisset, & optimum se civem  
atque oratorem exhibuisset, ad extremum erravit, contra Labienum  
aliter atque alii in re publica sentiens. Nam cum ceteræ urbes Labie-  
num admitterent, cum societate Parthorum adventantem, hic suis  
civibus ut resisterent, svasit. Sed Labienus impetu facto urbem vi-  
cepit, & domum ejus commolitus est cum pluribus aliis. Hybreas  
Rhodum aufugit, & post tempus reversus se atque urbem reparavit,  
cum jam Labienus Asiam reliquisset. Stratonicea quamvis in Caria  
sitæ esset, Macedonum tamen habitatio fuit, sumptuosis fabricis à re-  
gibus



gibus exornata. Prope urbem Jovis Chrysaorei templo Cares omnes convenire solebant, de communibus rebus deliberaturi, conventus Chrysaoreus appellabatur, ex vicis constans, ubi qui plures viros afferebant, in suffragiis antecellebant. Stratonicensēs quamvis non Carici generis, in conventu tamen participabant. Ex ea urbe vir fuit memoratu dignus Menippus orator, cognomento Catocas, quem supra omnes Asiaticos oratores à se auditos Cicero laudat. Magnum tanti viri præconium fuit. Est & aliud oppidum Stratonicia Tauro monti adjacens. Alabandam urbem duobus montibus subjectam, ita dispositam extitisse dicunt, ut cistæ inversæ præberet speciem. Unde Apollonius cognomento Malacus, cum sales dicacitatis in hanc urbem jactaret, propter scorpiones qui multi inerant: Urbs est (inquit) cista inversa scorpionibus plena. Gvarinus Veronensis hunc Strabonis locum è Græco in latium convertens, asellum pro cista posuit: tanta est translatorum diversitas. Alabanda homines molles, & Psaltrias multas habuit. Hinc viri memorabiles fuere duo fratres oratores, Meneclēs & Hierocles, & Apollonius & Molon, qui Rhodum migraverunt.

## CAP. LXXXVI.

*De Antiochia Asiatica & Cibyreis populis quatuor linguis utentibus, quodq; apud eos facile erat ferrum extornari, de Caribus, qui Leleges dicti sunt. Item qui propriè dicebantur Barbari.*

**A**D Cariam & Antiochia pertinet, quæ mediterranea fuit, Phrygiæ proxima, mediocris urbs, ad Maandrum sita, Phrygiam versus: & pontem habuit in summe, & regionem multam ex utraque parte amnis totam fertilem, & caricam plurimam producentem, quam modò Antiocheam, modò Triphyllon vocare. Locus facile concutiebatur, sicut cætera regionis ejusdem. Hinc fuit Sophista clarus Diotrephes, quem Hybream diximus audisse. Antiochiæ propinqui Cabalenses fuere, de quibus non satis certum est, an Cares fuerint an Pisidæ. Sunt qui eos Solymos fuisse crediderunt:



didere: nam collis qui Termessio promontorio imminabat, Solymus vocabatur, & ipsi Termessii Solymi dicuntur. Proximum erat Bellerophontis vallum, & Pisandri filii ejus sepulchrum, qui in bello cecidit contra Solymos gesto. Termessus Pisidica urbs sine controversia fuit, quæ proximè ac plurimum Cibyrae imminabat. Cibyrei è Lycidis profecti dicuntur, qui Cabalensem agrum tenuerunt. Postea Pisidæ finitimi eam habitavere, atque in alium locum transtulerunt, & munitissimam reddiderunt, ambitu serè centum stadiorum. Hæc urbs propter equitatum plurimum crevit, & vici propagati sunt, à Pisidia & finitimo Mysia agro usque in Lyciam, & ulteriorem Rhodiorum regionem, additis tribus urbibus proximis Bubone, Balbura, & Oenoandro, quarum conventus Tetrapolis dictus est: harum singula singula suffragia habuere. Cabyra verò duo de triginta pedum mittebat, equitum duo millia. Cabyra longo tempore sub Tyrannis fuit, quorum regimen temperatum erat, & in Moageta finem habuit. Muraena tyrannidem sustulit, & Balburam Bubonemque Lyciis adjecit, quæ montana erant loca. Cibyrensis tamen administratio inter maximas totius Asiae censebatur. Cibyrei quatuor linguis utebantur, Pisidarum, Solymorum, Græcorum, ac Lycorum. Proprium apud Cibyreos fuit, ferrum facile extornari. Milyas montana est, quæ ab angustiis Termeli, & à transitu qui per eas fit ad citeriora Tauri, usque ad Apameorum regionem & Sagalassum protendit. Sed quoniam de Caribus hoc in loco tractatio est, scire oportet eos sub Minoë fuisse, sed tunc Leleges dicebantur, & insulas habitabant. Postea in continentem migravere, multumque maritimæ oræ & mediterraneæ occuparunt, prioribus habitatoribus expulsi, qui & ipsi magna ex parte Leleges erant & Pelasgi. Rursum his Græci partem abstulerunt, Iones scilicet ac Dorei. Fuerunt autem Cares circa rem militarem admodum studiosi, cujus rei indicium est, quod lora, cristas, & cætera insignia militaria olim Carica dicebantur, ut est illud Anacreontis: Nescite bene compactum Caria lorum, manum inferantes: & Alcaeus: Caricam, inquit, quatiens cristam. Sed quaesitum est: cum multæ barbaræ nationes in auxilium Priami venissent, cur solos Cares barbarici sermonis Homerus dixerit? Strabo arbitratur, ab initio confecto nomine eos barbaros appellatos, qui difficulter asperè atque duriter loquerentur, ut blasos, balbosque dicimus. Sumus



mus enim ad confingenda cognata rebus nomina ingeniosi. Omnes igitur qui crasse loquuntur, barbaros dici, quales sunt nationes omnes præter Græcos, & primo quidem per convitium, quasi duri-loquis, & crassilinguibus barbariem imputatam. Postea verò id nomen per abusionem receptum esse, cæteras gentes à Græcis distinguens: fuisse quoque in Græca lingua quandam loquendi pravitatem, eamque barbaram vocatam, si quis non rectè græca pronunciarret, sed ita nomina proferret quemadmodum Barbari solent, qui ad græcam dictionem introducti expedire linguam non possunt, sicut, nec Græci illorum orationem, quod apprime Caribus contigit. Nam alii non multum cum Græcis versabantur, nec Græcè vivere, nec eorum dictionem discere pertentabant, nisi perrari admodum. Carres verò per totam Græciam erraverunt, stipendia merentes, & ex illo tempore Barbari sunt appellati, & multo magis postea quam insulas habitaverunt, & cum in Asiam profecti sunt, ubi cum Græcis vixerunt: nam Iones cum eis ac Dores trajecere. Rectè igitur, barbarum eis sermonem imputat Homerus, qui græcè minus expedite loquebantur. Barbarismus quoque in his dicebatur, qui malè græcizabant, non autem in his qui Carice loquerentur. Apostolus Paulus in epistolis omnes inter sese barbaros esse dicit, qui se invicem non intelligunt; & Romani omnes barbaros vocavere, qui latinè loqui nescirent, præter Græcos, quibus honorem detulerunt, barbariemque nonnunquam etiam de moribus traxere. Solœcis-mum autem qui orationis artem respicit, à Solis ductum putant, quæ civitas Ciliciæ fuit, postea Pompejopolis appellata: nec plura de Asia propria, cujus ultimam partem Cariam fecimus.



*De Lycia minoris Asiae tertia parte, deque in ea  
Dorica Chersoneso, de Gnido promontorio.*

*Item de Cannis populis viridem colorem  
habentibus.*

**R**estat minoris Asiae tertia pars, quæ trans Taurum appellatur, objecta noto: in hanc Lyciam Pamphyliam, & Ciliciam collocavimus, Lycia (ut Ptolemæus voluit) & ab occasu & a septentrione Asiam propriam habuit, ab ortu Pamphyliæ partem, à meridie Lycium mare. Nec Strabo Ptolemæi sententiæ multum adversatur: quamvis Lyciæ terminos angustiores ab occidenti fecit. Multa ii extra Taurum Cariæ tradiderunt, quæ nos Lyciæ concedimus, totam scilicet oram Rhodiensem, quæ à Phœnicis promontorio usque ad Dædala protenditur, & insuper totam Doricam regionem, in reliquis concordēs erimus. Prima igitur Lyciæ pars, Dorica Chersonesus erit, quæ Myrtoe Rhodiensi quæ pelago cincta, ultimum Asiae angulum ad occidentem ac meridiem occupat: quænamodum Bithynica Chersonesus Borealem & occidentalem, alterum tenet angulum. Nam his veluti duabus columnis basis ipsa sustinetur Asia, live duo velis cornua dicere, quorum alterum Thraciam respicit, alterum Cretam, oram Hellepontiam in medio constitutam, quasi bovinam frontem habentia, etsi non est hinc atque inde par distantia. Circa Isthmum Doricæ Chersonesi in australi parte mons Phœnix est, omnium ejus regionis altissimus, in cujus summo castellum fuit ejusdem nominis, & in fronte ad quatuor stadia insula Eleusa, octo ferè stadia in ambitu habens: & Loryma ora aspera, ubi flexus quidam Chersonesi ad Aquilonem inclinatus: deinceps recta navigatio usque in Propontidem quasi quandam meridianam lineam facit, quæ millia circiter stadiorum quinque complectitur. Post Loryma Cynossema fuit Canis sepulchrum, & insula Syma. Postea Gnidos promontorium, quod nostra ætas Chii caput appellat, & civitas quæ portus duos habuit, & in fronte insula, quæ stadia septem ambitu complectebatur, theatralis & alta, aggeri-



aggeribus juncta continenti. Ea Gnidum quodammodo biurbem fecit: nam maxima pars civitatis insulam habitat, ambos portus conregentem. E Gnido viri memorabiles fuerunt, Eudoxus mathematicus Platonis sodalis, & Agatharchides peripateticus historiae conditor, & Theopompus Julio Caesari familiaris, qui apud eum plurimum potuit, & Artemidorus ejus filius, & his antiquior Cresias, qui Xerxem medicatus est, & res Syriacas Persicasque conscripsit. Post Gnidum in septentrionali Chersonesi latere, duo supra mare oppida fuerunt, Ceramus & Bargasa, Coorum insulae est regione opposita. Deinceps Halicarnassus extra Isthmum, quem vix duorum stadiorum esse arbitrantur: eum saepe Rhodii interrumpere cogitaverunt. In ruinis Halicarnassi castellum sancti Petri Rhodii apprimè communitum possident, apud quod multa insunt antiquae nobilitatis ruinae & res. Halicarnassum Cariae dedimus. In australi verò litore, & in Rhodiorum regione Phycus oppidum fuit, in quo Mylasii ad Cariam pertinentes portum habuere: ibi Latonae lucus erat, quam gentiles Dianae matrem, deamque fuisse falso credidere, quamvis ex adultero peperisset. Ulterius ad orientem Caunus civitas fuit, & in proximo Calbis profundus amnis, per quem res invehebantur: urbs navalia habuit, & portum clausum, & imminentem in colle arcem nomine Imbrum, & regionem felicem adiacentem: sed aërem aestate & autumno gravem propter aestum, & pomorum copiam. Stratonicus citharædus cum Caunios viridi colore animadvertisset, hic est (inquit) quod poeta dicit: Tale quidem genus est hominum quale & soliorum. Reprehensus autem quod urbem veluti morbidam carperet: Ego (addidit) eam morbidam dicere ausim, ubi mortui ambulant? Hæc eadem ad eos transferri possent, qui maritimam Senensium oram incolunt. Caunii cum aliquando à Rhodiis descivissent, judicantibus Romanis recuperati sunt, his eadem lingua cum Caribus fuit, sed propriis legibus utebantur, ex Creta originem ducentes. Calymna civitas huic proxima fuit, & promontorium Artemissium & templum, & alter Latonae lucus. Calymna sexaginta stadiis à mari recessit. Ulterius Glaucus sinus sine portu, & magis ad orientem Dadala loca, & promontorium, in quo Rhodiensis ora finiebat, & Lyciae secundum Strabonem præternavigatio incipiebat, mille & septingenta ac viginti stadia con-



tinens: aspera sanè ac difficilis, sed portuosa, & ab hominibus temperantibus habitata, quam paulò post attingemus. Nam prius de Rhodo dicendum est, quæ his locis exposita est, de quibus modò locuti sumus.

## CAP. LXXXVIII.

*De Rhodo insula, & quod apud eam Telchines populi ferri & æris fabricam primi invenisse dicuntur, de Colosso & Protogenis tabula, de viris in ea claris, de religiosis militibus beato Joanni dedicatis.*

*Item de canibus Christianis adventantibus blandientibus, & Turcas morsibus impetentibus.*

**R**Hodus insula noningentorum ac viginti stadiorum ambitu patet, secundum nostram descriptionem Lyciæ opposita, secundum Ptolemæum & Strabonem Cariæ, inter Asiaticas insulas tertia. Lesbos enim & Cyprus majores habentur, Rhodii tamen rerum gestarum gloria prævaluerunt. Insula prius Ophiusa dicta est, deinde Stadia, & postea Telchinis, eò quod Telchines insulam incolerent, quos, nonnulli fascinatores & maleficos fuisse tradunt, tanquam Stygiam aquam stirpibus & animalibus pernicipi gratia inspergerent. Alii contra sentiunt, Telchines eximios artifices extitisse, primosque ferri & æris fabricam invenisse, quos ex Creta in Rhodum profectos, vicini per invidiam fascinationibus perdidissent: sed priorem infamiam valuisse. Sæpe enim apud homines succumbit veritas. Post Telchines Heliades insulam tenere, quorum posterius Lindon ac Ialysos, & claram Camiron condiderunt: alii tamen à Cleopolemo conditas ajunt, qui cum primum virilem inisset ætatem, patris sui avunculum Licymnium senectute gravem interfecit, & navibus ædificatis frequentem cogens populum, fuga in Rhodum pervenit, ibique habitavit ab Argis profectus: propter quam rem originem Rhodiorum, alii Æolicam, alii Doricam esse tradunt. Sunt enim qui Dorientes cum maximas ædificassent urbes, post Codri obitum



tum partim Argivorum aggregatos regno tradant, partim coloniæ in Cretam missæ participes factos, partim Rhodum petisse. Sed hæc posteriora sunt his, quæ ab Homero dicuntur, qui Rhodios non Dores nominat, sed Æoles, ac Boëotios innuit, apud quos Herculis & Lycymnii habitatio erat. Est autem Rhodiorum vetustissimum nomen, siquidem ante olympiadum institutionem claruere, qui longè à domo profecti in Hispaniam navigarunt, ibique alteram Rhodum urbem condidere, quam postea Massilienses occuparunt, & in bello Trojano fuisse traduntur, atque eo peracto Gymnasia insulas ædificasse, quas quidam Balearides esse putant. Poëtæ antiquitatem ac nobilitatem insulæ astruentes, fabulam confinxerunt, dicentes aurum in insula pluisse, cum Pallas ex Jovis capite nasceretur, ut Pindarus inquit. Nomen insulæ ab urbe sumptum, quæ pari modo Rhodus appellatur, in orientali promontorio sita: ea portubus olim, & viis & mœnibus, & reliquis ornamentis tantopere cæteras superavit, ne ullam putaretur æqualem habere. Legum præstantia, & navalis rei peritia adeò valuit, ut annos multos maris imperio potiretur, & piratarum latrocinia sustulerit, Romanis & Græcis amica: quæ cum libera esset, multis & donis & simulacris excellentissimis claruit: præcipua tamen fama Colossi extitit. Statuam enim alii Jovis, alii Solis fuisse tradunt, quam Chares Lindius decies septenum cubitum altam edidit ære: postea ex terræ motu fractis genibus corruit, nec Rhodii ipsam attollere ausi sunt, oraculo quodam prohibiti. Hoc inter oblata dona excellentissimum, & inter septem miracula maximum omnes confessi sunt. Soldanus Ægypti cum insulam invasisset, ex ære hujus statuæ, quam confractam reperit, noningentos camelos onerasse fertur, atque in Alexandriam terrestri itinere transmississe. Fuit & Protogenis pictura insignis in valvis, scilicet Satyrus juxta columnam stans, super qua perdix erat, ad quem ita homines hiabant, cum nuper tabula esset posita, ut illum solum admirarentur, Satyrum verò contemnerent, quanquam perfectissimum opus. Augebant admirationem perdices mansueti, qui à nutritoribus allati & contra pictum appositi canebant, & congregi gestiebant, quod præter opinionem Protogenes accidisse videns, ædituos rogavit, ut se avem delere permitterent, quod illi annuerunt. Fuerunt & navalia apud Rhodum instructissima, & aliqua occulta & ignota plebi, in quæ si quis intropexisset, capite plectebatur.



batar. In hac urbe & Massiliæ, & Cyzici fabrorum & architectorum instrumenta, armorumque varia genera, in thesauris summa cura studioque locabantur, magis quam penes alios usquam. Ex hac insula viri illustres multi prodierunt, & imperatores & pugiles, è quibus Panætii philosophi progenitores fuere, & Memnon qui Persarum regibus militavit, & eorum copias duxit. Circa res civiles, & Philosophiam, & artes liberales Panætius ipse, & Stratocles, & Andronicus peripateticus, & Leonidas Stoicus, ac priores Praxiphanes, & Hieronymus, & Eudemus. Possidonius vero quamquam Rhodi vixit, & sophisticam exercuit, Apamiensis tamen è Syria fuit: quemadmodum Apollonius Malacus, & Molon, qui Alabandenses fuere (ut supra diximus) sed prius Apollonius Rhodum profectus est, postea Molon. Pisander etiam, qui Heracliam scripsit, poeta Rhodius fuit, & Simias grammaticus, & Aristocles. Dionysius quoque Thrax, & Apollonius, qui Argonautas composuit, Alexandrini quidem fuere, Rhodii tamen vocati sunt, quoniam Rhodi habitavere. Cleobulus insuper, unus è septem sapientibus è Lindo fuit, cujus urbis habitatores (quemadmodum Camienses & Ialysii omnes) in urbem Rhodiam migraverunt. Ubi Lindus fuit: nunc carcer est religiosorum militum, qui atrociter peccant, & munitio quædam altissimo saxo vix humanis expugnanda viribus. Multa hæc civitas Rhodia per civilia Romanorum bella perpeffa est, nec sub Græcorum imperio calamitatibus caruit. Sed postquam Saraceni Ægyptum & Syriam, Turcæ verò Asiam obtinuerunt, longè majoribus cladibus subiecta fuit: & aliquando Venetorum jugum, aliquando aliorum Christianorum pertulit, neque ullo pacto Turcarum viribus restitisset, nisi religiosi milites (qui beato Joanni dicati sunt) insulæ ejus curam suscepissent. Hi enim post perditam Hierosolimam in eam sese receperunt, & urbem pene dirutam instaurantes, navaliaque & classes reformantes, non solum insulam ipsam tutati sunt, sed Cyprii & aliis finitimis Christum colentibus magno præsidio fuerunt, quorum virtute, quicquid in oriente nostræ religionis est, Christo servatum fateri licet. Abusacus Ægypti Dominus (quem Soldanum appellant) magnis classibus per nostram ætatem armatis, toto quinquennio Rhodum vexavit, multò tamen minora intulit damna, quam pertulit, nec dispari fortuna Turcarum conatus in Rhodiis facti ceciderunt. Nam & apud oppidum sancti Petri.



Petri, quod Rhodii in continenti munitissimum possident, & in ipsa insula magnas saepe strages acceperunt. Calixtus tertius Papa, qui nos in beati Petri sede praecessit, classem non parvam in auxilium Rhodiorum misit, quæ diu apud eos morata plures Turcarum naves prælio superatas demersit, & corpora hominum palo suffixit, Stalimumque insulam, Lemnum olim appellatam, & Naxum, & Andrum, & alias quasdam minoris nominis Turcarum imperio ademit: nec Ægyptios quiescere permisit, neque Syrios, neque Cilicias. Sed mortuo Calixto dissoluta classe, Ludovicus Cardinalis Aquilejensis, qui ei praefectus erat, Romam rediit, Rhodo & omni oriente nostræ religionis cultore in discrimine summaque desperatione relicto: Et acquisitæ insulæ ad hostes redire, cum nos intestinis Italiae motibus, & subditorum seditionibus occupati, longinqua prospicere non possumus, præsertim cum Roma ipsa in periculo esset, non solum Baronibus per circuitum, sed aliquibus Romanis civibus, res novas molientibus, & ecclesiasticæ potentiae insidiantibus. Haecenus de Rhodo, in qua mons omnium altissimus Atabyris vocabatur, pro gentili dementia Jovi sacer, qui ex loco Atabyris dicebatur. Castellum sancti Petri, quod in continenti munitissimum magno sumptu custodiunt Rhodii, non parvo usui Christianis est, qui manus Turcarum incidunt, saepe eo fugientes salvantur. Canes ingentes noctu extra muros excubant, de quibus fama est, quod Christianos odore cognoscant, eisque adventantibus blandiuntur, Turcas autem latratu prodant, & moribus insectantur. Nunc reliquam Lyciam absolvamus.



## CAP. LXXXIX.

*De Lycia in qua tres & viginti urbes in suffragiis dandis participabant, de tribus Chelidoniis insulis asperis, de Climace monte, qui iter facientibus eum pelago nudante pervius est, & quod apud eum Alexander per hyemem incidens, cum suis militibus mare fluctu restagnante, umbilico tenus est mersus.*

**L**ycii adeò civiles & continentes extiterunt, ut quamvis feliciter usque in Italiam mari dominarentur, nullo tamen unquam turpi lucro sese extulerint. Viginti tres urbes apud eos erant, quæ in suffragiis dandis participabant, & ex quaque civitate in commune collegium conveniebant, id decernentes, quod pars maxima comprobasset. Maximarum civitatum quælibet tria suffragia ferebat, mediæ duo, cæteræ unum: parique modo pro portione, tributa ponebant, & alia munera subibant. Hæc de his Lyciis dicimus, quos Strabo ultra Dædala versus orientem collocavit. Nam Dorica & Rhodiensis ora ad Cares pertinebat. Artemidorus Lyciorum sex maximas fuisse urbes asseruit, Xanthum, Pataram, Pinaram, Olympum, Myram, & Tlon. In collegio civitatum primo eligebatur Lyciæ præfectus, post alii urbium magistratus: judicia in communi fiebant. Antiquitus de bello, de pace, de sociis consultabant: postea Romani hanc eis potestatem abstulerunt. Sed cum justè viverent, libertatem consecuti sunt, & patriam pacatam habuerunt, & Piratas funditus deletos viderunt, primum à Servilio Isaurico, postea à Pompejo magno, qui supra mille & trecenta navigia concremavit, & eorum habitationes delevit, & ex hominibus qui in prælio superfuerant, alios in urbem Solos apud Cilices habitatum deduxit, & urbem Pompejopolim appellavit: alios Didymenam, quæ hominibus carebat, & postea Romanorum Colonia facta est. Sed Piratæ ut plurimum aut Pisidæ, aut Isauri fuerunt, aut Cilices



Cilices Trachiotæ, qvi apud Sidam Pamphyliaë urbem navigia faciebant, ibique captivos sub hasta venditabant, non diffitentes eos liberos esse. Pisidæ & Isauri, ut diximus montani, fuerunt, ultra & circa Taurum jugum habitantes, & summos etiam vertices incolentes, de quibus satis dictum est in superioribus, quamvis magna pars eorum australia Tauri teneret, & ad tertiam, quam nunc describimus, Asiaë partem respiceret. Post Dædala Lyciorum montem in proximo fuit Telmissus oppidum, & Telmissias promontorium, & in eo portus. Hunc locum Eumenes in bello adversus Antiochum gesto à Romanis accepit: sublato regno, Lycii locum receperunt. Deinceps Anticragus mons assurgit, & in ejus convalle Carmylessus locus habitatus, deinde Cragus in octo promontoria divisus, & urbs ejusdem nominis. Hic fabulas de Chimæra montibus confinxere, & prope convallis fuit nomine Chimæra, à littore porrecta in mediterranea. Crago subjacuit Pinara, una ex maximis Lyciæ civitatibus, in qua Pandarus colebatur. Dubium, an is qvi apud Trojam in prælio fuit, nam & illum ex Lycia dixere. Postea Xanthus fluvius prolabitur, quem priores Sirbim vocavere: juxta hunc procul à mari septuaginta stadiis Xanthus erat civitas, una ex majoribus, & post eam Patara & ipsa maxima, Patari opus, quæ portum habuit, & templa plurima. Ptolemæus Philadelphus eam auxit, & Arsinoën Lyciacam nominavit: sed antiquum nomen delere non potuit. Nicolaus hic pontificatum habuit, vir sanctitate præcipua clarus. Is cujus nautæ in tempestatibus singulari patrocinio utuntur, & qvi auro in domum inopis patrisfamiliæ clam injecto, tribus puellis, ne proflituerentur, divinitus consuluit. Deinde ad stadia viginti supra mare in sublimi colle Myram locaverunt: postea Limyri fluminis ostia ascendenti stadia viginti pedestri itinere Limyra oppidum occurrebat: in hac præternavigatione portus & insulæ multæ, quarum maxima Cisthene fuit, ejusdem nominis urbem habens. Deinde in mediterranea Phellus & Antiphellus appellata loca, postea Hiera promontorium, & tres insulæ Chelidoniæ asperæ, & magnitudine æquales, stadiis quinque inter se distantes: à terra verò sexaginta, quarum una stationem habuit. Quidam initium Tauri è regione Chelidoniæ surgere putaverunt, propterea quod promontorium altum est, & à Pisidicis montibus descendit. Sed revera à Rhodio-



rum transmarina Pisidam versus, montana regio perpetua est, quæ etiam Taurus appellatur. Post Hieram Crambusa fuit, & Olympus civitas maxima, & mons ejusdem nominis, qui etiam Phœnicus vocabatur. Deinde Corycus litus, postea Phaselis tribus munita portubus, civitas insignis & lacus, cui mons nomine Solyma incumbit, & Telmissus Pisidica civitas angustiis adiacens, per quas in Milyadem transitur. Sed de Telmisso supra diximus, quam Alexander cum angustias aperire veller, cepit ac diruit. Inferius ad mare circa Phaselidem angustia sunt, & mons nomine Climax, Pamphylico pelago adiacens, quem Ptolemæus Massiticum appellare videtur. Is transitum arctum relinquit in littore, qui tranquillo mari nudatur, & iter facientibus pervius est, pelago affluente undis contegitur; transitus per montem & arduus & prolixus est, atque idcirco in tranquillitatibus littore utuntur. At Alexander in hyemem incidens, & maximam partem suarum rerum fortunæ permittens, priusquam fluctus rediret, movit: & totam diem in aquis habuit, ita ut umbilico tenus milites mergerentur. Periculum per tot pericula dux simul & exercitus quærebat. Phaselis Lyciaca urbs fuit, in montibus sita, qui Pamphyliam spectant, sed cum Lyciis non communicavit suis utens legibus: nonnulli Lycios prius Solymos vocatos putaverunt. Postea Termilas ab his, qui cum Sarpedone ex Creta venerunt, deinde Lycios à Lyco Pandionis filio, quem domo profugum Sarpedon in regni partem suscepit: Sed melius sentiunt, qui Solymos in boreali Tauri parte collocant, & postea Milybæ appellati sunt. Homerus verò Solymos diversos facit à Lyciis, quorum Rex ad Trojanum bellum misit Bellerophontem, de quo dicitur: Hic Solymis iterum præstantibus intulit arma. Lycii Christiana sacra receperunt, denique servaverunt. Beatus Christophorus apud eos martyrium accepit in civitate Samonæ, quem virgis ferreis attritum, & flammis exustum divina virtute salvatum ferunt: Postremo sagittarum ictibus confossum, dum constanter in Christi confessione peristeret, capite obruncatum; sed nostra ætate Lycii omnes in potestate Turcarum facti, rectam fidem amiserunt.



## CAP. XC.

*De Pamphylia & in ea Cataracte fluvio admodum  
quam impetuoso, quodq; in ipsa Pamphylia Christi  
Evangelium sit susceptum, postea in Mahu-  
metis dogma deventum.*

**P**amphylia tota montana ex Tauro in mare procumbit, ab ori-  
ente Tracheæ Ciliciæ junctæ, ab occidente Climaci monte seu  
Masitico, qui Lyciam determinat: Pisidæ ei à septentrione in-  
cumbunt, qui Taurum obtinent, de quibus mentio facta est. Ini-  
tium Pamphylia Olbia præbuit, Phaselidi propinqua, ingens muni-  
tio. Postea Cataractes effluit amnis, multus & torrentis more im-  
petuosus, ab alta petra descendens, cujus impetus longissimè ex-  
auditur. Deinde Attalia Philadelphi Attali opus, à quo dicta est.  
Sunt qui dicunt inter Phaselidem & Attaliam Thebam quandam &  
Lyrnessum fuisse, quod non est alienum credere, si, quod Callisthe-  
nes autor est, Trojanos Cilices post Ilium deletum ex Thebano  
campo in Pamphylia exivisse, à quibus facile fuit oppidis, quæ  
conderent, ea nomina imponere, quibus in patria utebantur. Attaliam  
prætergresso Cestrus occurrit fluvius, quem ad stadia sexaginta navi-  
ganti, Perga civitas offerebatur, & proximum loco edito Pergæ  
Dianæ sanum, ubi quotannis festa celebrabantur, dæmonibus expe-  
ctata solatia. Deinde ad stadia quadraginta supra mare urbs alta,  
quæ à Pergæis conspici poterat: deinde lacus ingens nomine Capria,  
& fluvius Eurymedon, & superius stadiis sexaginta in ejus ripa urbs  
Aspendus plena populo, quam Argivi condiderunt. Ptolemæus hunc  
amnem inter Cataractem & Cestrum posuit. Strabo ultra Cestrum  
ad orientem locavit. Ultra Aspendum Petnelissus defluit amnis, de-  
inde & multæ in fronte insulæ parum cognitæ. Postea Sida Cuma-  
norum colonia, quæ Palladis templum habuit, & Piratarum commu-  
ne forum: & ei proxima minorum Cibyrensiū ora: & Melas amnis.  
Postea Ptolemæis urbs, & non procul Pamphylia fines, & Coracesium  
Trocheæ Ciliciæ initium. Tota Pamphylia præternavigatio sexcen-



torum & quadraginta stadiorum spatium continet. Herodotus autor est Pamphylios ex sociis Amphilochi & Calchantis fuisse, mistis sanè hominibus, qui ex Troja illos sequebantur, atque ex his alios hic remansisse, alios in alia loca fuisse dispersos. Callinus asserit Calchantem apud Clarum obiisse: gentes verò, quæ cum eo erant, Taurum cum Mopso transgressas, partim in Pamphylia remansisse, partim in Ciliciam Syriamque usque ad Phœniciam processisse. Pamphylia sicut & reliquæ Asiæ provinciæ sacrosanctum Christi Evangelium suscepit. Postea de via vitæ recessit, sceleratum Mahumetis dogma, & inanes secuta fabulas, & in hoc usque tempus delirat, Turcarum imperio subiecta, quibus ad voluptatem humano generi amicam multa permissa sunt: Sed jam ad Ciliciam transeamus.

## CAP. XCI.

*De Cilicia duplici Trachea scilicet & Campestri, de emporio nomine Delus, apud quod mancipiorum millia multa quotidie venundabantur, de Arsinoë & Hamaxia cedrinifera, de Scandaloro oppido, cujus Dominus hominum viginti millia armare posset. Item de Athenæo Philosopho, ruina domus per noctem oppresso.*

**C**ilicia prius ad Pelusium usque Ægypti pertendebat, Lydia, Pamphylia, Cappadocia, Armenis ac Medis, sub imperio Cilicum constitutis. Mox ab Assyriis edomita, in breviorē modum scripta est: ab oriente Amanus clauditur, à septentrione Tauri jugis, ab occidente Pamphylia, & plurima jacens campo in australi latere sinu lato mare Issicum recipit. Cilix ei nomen dedit, quem pristina ætas pene ultra ævum memoriæ abscondit. Phœnice ortus, qui apud gentiles antiquior Iove, de primis terræ alumnis habebatur. Ciliciam duplicem esse diximus, alteram Tracheam, alteram Campestem. Trachea oram maritimam per angustam habet, & nullum



nullum vel raro locum in plano. Taurus ei incumbit, male habitatus usque ad latera borealia, quæ circa Issauriam & Homonades existunt, usque in Pisidiam. Incipit autem Trachiotis Cilicia à Coracesio, & usque Magnopolim excurrit. Campestris verò à Magnopoli & Tarso Issum usque pertendit: cui ad boreale Tauri latus Cappadoces adjacent. Primum igitur Tracheæ castellum Coracesium dixere in petra prærupta situm. Hoc ex loco Diodorus cognomento Tryphon regibus Syriæ bellum intulit, & varia ulus fortuna, ab Antiocho tandem filio Demetrii in quodam loco conclusus, sibiipsi manum conscivit, dignus homine finis, qui sine regno nesciret vivere. Quod autem Cilices Piratæ fierent, ipse Tryphon in causa fuit, & regum ignavia, qui tunc Ciliciæ ac Syriæ ex successione imperantes, & inter se dissidentes plurima neglexerunt. Neque enim natis regibus atque electis pars solertia inest. Invitabant etiam lucra ad maleficio, & ipsa facilitas capiendi & vendendi captivos. Delus non procul aberat emporium magnum & pecuniosum, quot multa mancipiorum millia & recipere & remittere eadem die poterat. Ex quo proverbium factum est: *Mercator naviga & expone, jam omnia venundata sunt.* Nam Romani post Carthaginis & Corinthi everisionem divites effecti, multis servis utebantur, quos apud Delum emebant. Piratæ igitur & prædandi & vendendi opportunitate oblata, mirum in modum coaluerunt, adjuvabant & Cypri reges & Ægypti Syris infensi. Nec Rhodii illis benevoli erant, quapropter impune Piratæ grassabantur. Romani tamen quamvis parum eos qui trans Taurum erant, curarent, Scipionem Æmilianum miserunt, qui populos & urbes inspiceret: sed intelligentes ex improbitate principum, à Seleuco Nicatoris per successionem prosectorum, id malum evenire, non providebant. Pudebat enim Romanos id regnum abolere, quod ipsi constituissent. Inviti enim destruunt homines, quæ ipsi construxerunt: ea res Parthos qui trans Euphratem erant, postea regionis ejus dominos fecit. Deinde etiam Armenios, qui regione transmarina usque in Phœniciam occupata reges & genus eorum universum funditus sustulerunt, mare, autem Cilicibus concessere, quos Romani opibus auctos & bello & exercitu delevere. Sed vicinis rebus, & in conspectu sitis occupati, postea ea loca neglexerunt. Ultra Coracesium orientem versus urbs Arsinoë fuit, deinde Hamaxia in colle sita, quæ habitatio stationem.



habuit, ad quam materies ad fabricandas naveis deducebatur, maxima ex parte cedrina, quæ arbor in ea regione plurima est: Atque idcirco Cleopatram ab Antonio donata fuit, quæ fabricandis navibus esset idonea. Laertes subinde castellum in tumulo situm fuit, qui mammillæ speciem præbuit, & stationem habuit: nec procul Selinus amnis in mare decurrit: postea Cragus petra prærupta supra mare, & Charadrus munitio cum statione. Ulterius mons Andriclus, & aspera quædam præternavigatio nomine Platanistus. Dehinc Anemurium promontorium, ubi continens Crommyo Cypri promontorio appropinquat, ad stadia trecenta & quinquaginta à Pamphyliæ finibus Anemurium usque, Ciliciæ præternavigatio octingenta ac viginti stadia continet. Reliqua usque ad Solos circiter quingenta: In Cilicia Trachea civitatem hodie magnam esse dicunt, quam Sataliam vocant, & oppositum mare Satalicum pelagus, quod angustiiis Cypriis proximum ferunt: & oppidum esse non parvum Scandalorum appellatum, cujus dominus viginti millia hominum armare posset, qui quanquam Turca sit, Caramanum cum & Ottomanum inimicis Rhodiis amicitia jungatur. Post Anemurium Agidus civitas occurrit, deinde altera Arsinoë statione prædita, cui succedit locus Melania nomine, & Celendris civitas, quæ portum habuit. Quidam in hoc loco Ciliciæ initium fecerunt, non in Coracesio, quibus Artemidorus consensit. Holmus deinde sequebatur, quæ prius habitarent, qui postea Seleucenses appellati sunt. Sed condita Seleucia apud Calycadnum, eo commigrarunt. Calycadnus fluvius est, qui ultra Sarpedonis promontorium in mare prorumpit: per hunc Seleuciam navigabant, urbem bene habitatam, & à Cilicio & Pamphylia more plurimum abhorrentem. Hinc ferunt ex peripateticis philosophis viri memorabiles Athenæus, & Xenarchus: ille in republica versatus aliquandiu, in patria populum duxit, deinde contracta cum Muræna singulari amicitia, & cum illo fugiens captus est, cum insidiæ contra Cæsarem, Augustum deprehensæ essent, sed insons inventus à Cæsare dimissus est. Rediens autem Romam cum ab amicis interrogaretur, unde veniret, illud Euripidis respondit: Advenio ab imis atque cæcis inferum tenebris: sed breve tempus supervixit, à ruina domus per noctem, oppressus (ut fit) quod uno superato periculo, alterum incurrimus. Xenarchus (quem Strabo audivit) non diu domi permansit, sed Alexandriæ



xandriæ & Athenis & Roma electa docendi vita, usque ad senectutem in honore habitus est, primum Arii, postea Cæsaris Augusti amicitia usus, sed paulò ante obitum amisit visum.

## CAP. XCII.

*De Pæcila petra scalis excisa, de Coryco monte & antro crocum optimum producente, deq; ibidem specu flumen ingens emittente, quodq; flumen ipsum à terra invisibiliter absorptum in mare delatum exeat, de Zeniceto Pirata, qui capto monte Isaurico, se cum tota domo concremavit.*

**P**ost Calycadnum petra fuit nomine Pæcila, quæ scalas habuit vi excisas, quibus in Seleuciam ibatur: deinceps alterum Anemurium promontorium, & Crambusa insula, & Corycus mons, & ulterius ad stadia viginti Corycium antrum, in quo crocus optimus nascebatur. Antrum autem ingentem quandam concavitatem in orbem ductam vocaverunt, cui labrum petrosum & altum circumjacuit, cum descenderis solum est inæquale ac petrosum, & fruticosa, ac semper virenti, & domestica materia plenum. Adjacens solum olim croco satum erat, & ibi specu, quod fontem ingentem habuit puræ ac nitentis aquæ in flumen exeuntis, quod mox à terra absorptum invisibiliter delatum exit in mare: amaram id aquam vocaverunt. Post Corycum Eleusa insula continenti adjacet, quam Archelaus habitavit, & regiam fecit, tota Cilicia Trachea assumpta præter Seleuciam, sicut prius ab Amynta & à Cleopatra fuerat olim habitata. Nam cum locus terra & mari idoneus esset ad latrocinium, satius esse judicarunt ea loca sub regibus administrari, quam sub ducibus Romanorum, qui ad judicia missi non semper adesse cum armis possent: atque hoc pacto Archelaus Cappadociam & Tracheam Ciliciam assumpsit. Post Eleusam Latmus fluvius & vicus ejusdem nominis occurrebat. In excellis autem Tauri partibus Olympus fuit, Zeniceti Piratæ sedes & mons, & castellum eodem nomine,



ex quo tota Lycia, & Pamphylia & Pisidia cernebatur. Zenicetus capto monte Isaurico, se cum tota domo concremavit, dignus exitus; qui nostri temporis latrones haberet, quando poenitentiae speciem nullam faciunt. Illius erat Corycus, & Phaselis, & multa Pamphyliæ loca, quæ omnia in Isaurici potestatem venerunt. Neque enim diuturna sunt, quæ malis artibus acquiruntur. Post Latmum Soli occurrebant, civitas insignis alterius Ciliciæ initium, quæ circa Issum jacet: hæc Achivorum opus fuit, & Rhodiorum, qui ex Lindo venerunt: hinc Solœcismum appellatum existimant, quod Grammaticæ artis vitium est. Pompejus magnus in hanc hominibus exhaustam reliquos Piratas transtulit, quos dignos existimavit, qui servarentur, & mutato nomine urbem Pompejopolim appellavit: hinc fuit Chrysippus philosophus Stoicus ex patre Tarsensi ortus, qui inde migravit: Philemon poëta comicus, & Aratus qui de astris versus conscripsit, cujus plurima carmina Cicero in latinum vertit.

## CAP. XCIII.

*De Zephyro Ciliciæ promontorio, & Anchiala urbe, in qua Sardanapali sepulchrum cum statua videbatur: de Cyano flumine & ejus natura, de Tarso, & quod apud id viri fuerint percelebres complures, inter quos & Paulus Apostolus.*

**S**equitur Zephyrium promontorium eodem nomine, quo aliud juxta Calycadnum. Ulterius Anchiala fuit paulo supra mare sita, Sardanapali opus, ubi Aristobulo teste sepulchrum ejus ostendebatur, & lapidea statua, quæ dextræ manus digitos committens atque collidens applaudere videbatur. Epigramma quoque Assyriis sculptum literis hujusmodi aderat: Sardanapalus Anacyn-  
daraxis filius, Anchialam & Tarsum una die condidit: Ede, Bibe, Lude. Dignum epitaphium (ut Cicero dicit) quod non in hominis sed in bovis sepulchro inscriberetur. Ultra Anchialam munitio fuit,  
nomine



nomine Qvinda, in qva Macedones thesauros servabant, qvos Eumenes ab Antigono deficiens abstulit. Ultra hæc & Solos montana sunt, in qvibus Olbus civitas erat, qvæ Jovis templum habuit, Aiakis Teucris fratris opus, cujus sacerdos etiam Tracheæ dominabatur. Postea tyranni eam adorti latrocinia constituere, qvibus sublati iterum sacerdotes principatum obtinuerunt, vel Teucris vel Aiaces vocati. Aba Zenophanis filia unius ex tyrannis per cognationem in hanc domum ingressa principatu potita est, qvem pater, antea procuratorio nomine acceperat. Postea Antonius & Cleopatra eum illi concesserunt, obsequiis & cultu deliniti. Sed Aba sublata principatus ad eos rediit, qvi ex eodem genere erant. Post Anchialem Cydnus fluvius erumpit in mare, juxta locum, cui Rhegma nomen fuit. Stagnum id erat, in qvò Cydnus exit Tarsum perfluens, qvi supra urbem ex Tauro cadit. Tarsi, verò navale lacus fuit. Hucusque tota ora à Rhodiorum transmarina incipiens, ad æquinoctiales ortus, ab occasu ejusdem nominis extenditur. Postea ad hyemalem ortum conversa Issum usque, deinde flexum qvendam sumit in Austrum usque in Phœniciam, reliquum occidentem versus usque ad columnas Herculis. Tarsus in campo jacuit, Argivorum opus, qvi lo qværentes, cum Triptolemo erraverunt. Julius Solinus matrem totius Ciliciæ Tarsum appellat, & à Perseo nobilissima Danaës prole conditam dicit. Sardanapalus in epitaphio, qvò antereculimus, Tarsi conditorem se jactavit. Urbem Cydnus mediam perfluebat juxta gymnasium juniorum, cujus ortus non procul ab urbe fuit. Alveus per profundam vallem recta in urbem ibat, aqua rapidissima ac frigida, hominibus ac bestiis, qvæ crassiores nervos haberent, auxiliari putabatur. Alexander captus ejus amœnitate, projectis armis plenus pulveris ac sudoris, cum in ejus undam se projecisset, periculosissimum incidit morbum, de qvo vix tandem curatus evalit. Tarsenses adeo philosophiæ studiosi fuerunt, ut Athenientes & Alexandrinos superarent. Verum indigenæ Tarsi discebant, peregrini non multi, nec rursus indigenæ domi manebant, sed foris proficiscebantur, & perfecti libenter peregrinabantur, detinebantur autem perpauci. Athenientibus contra evenit: nam multi eo proficiscebantur, & libenter immorabantur. Indigenæ non multi admodum ibi studebant,



nec alienas urbes discendi studio quærebant. Alexandrinis utrumque contigit: nam & multos peregrinos suscipiebant, & à suis non paucos emittebant. Ex Tarso viri illustres inter Stoicos fuerunt, Antipater, Archedamus, & Nestor, & duo Athenodori, quorum qui Cordylion dictus est, cum Marco Catone vixit & apud eum mortuus est. Alter Sandonis filius, quem Cananitam à vico quodam dixerunt, Cæsaris præceptor fuit & in honore maximo apud illum habitus. Ex Academicis Nestor Tarsensis Marcellum Octaviæ sororis Cæsaris filium instituit. Plutades & Diogenes Tarsø nati, per alias urbes peregrinati sunt, & scholas optimè rexerunt. Diogenes etiam poemata in adolescentia composuit, maxima ex parte tragica. Dionysides optimus tragicæ poëta, & Artemidorus & Diodorus grammatici ex eadem urbe fuerunt. Sed nullius viri gloria Tarsum magis extollit, quam Pauli Apostoli, qui vocatus à domino, segregatus in Evangelium, doctor gentium factus est, & vas electionis appellatus, cujus mira fuit eloquentia, & divina doctrina, & ei non solum Hebræi, sed Græci & Latini crediderunt.

## CAP. XCIV.

*De Mallo urbe, & qui apud eam viri clari fuere,  
de montis Amani portis Amanides appellatis, de  
Pindo amne, juxta quem Alexander cum  
Dario confligit.*

**P**roxima Tarso Mallus fuit, Pyramo fluvio (de quo supra diximus) intercurrente. Mallus in edito loco sita Amphiloichi opus & Mopsi Latonæ & Apollinis auguris, de quibus multa confecta sunt, & quæ de Calchante supra diximus, nonnulli huc transferunt, dicuntque Mopsum, & Amphiloichum ex Troja profectos, Mallum condidisse, postea Ampiloichum Argos digressum, cum Argivis non placuisset, illo rediisse: sed à regni communicatione exclusum, singulari certamine cum Mopso concurrisse, & cum ambo cecidissent, non multum inter se distantes, juxta Pyramum fuisse sepultos. Ex Mallo fuit Crates grammaticus, qui Papætium philosophum



phum instituit. Ultra hanc oram Halejus jacet campus, per quem Philotas Alexandri equitatum duxit: cum ille phalangem per oram maritimam & Mallensem agrum Issum versus, & Darii copias ex Solis ageret. Heliodus dicit Amphilochem ab Apolline apud Solos interemptum, quidam apud Halejum campum, quidam in Syria. Alexander ei propter cognationem cum Argivis gentili dementia sacrificavit. Post Mallum Ægeæ oppidum succedunt, deinde Amanides portæ, in quas Amanus mons definit à Tauro descendens, qui ultra Ciliciam est orientem versus, semper à tyrannis occupatus, loca munitissima obtinentibus. Tarcodementus vir memoratu dignus his locis potitus est, qui ob præclara facinora rex à Romanis nuncupatus, successionem suis posteris tradidit. Post Ægeas Issus oppidum fuit statione præditum, & Pindus amnis, juxta quem Alexander cum Dario confligit, ac victor percurrit orientem. Hic sinus Issicus ab oppido dictus, & Rhosum civitatem, & Myriandrum, & Alexandriam, & Nicopolim continet, & Mopsi domicilium, & portas quæ Cilicum Syrorumque confinium appellantur, & in ultima Ciliciæ terra Dianæ Sarpedoniæ sanum & oraculum fuit, ubi demonibus arrepti responsa dabant. In Syria verò prima civitas fuit, Seleucia Pieriæ, juxta quam Orontes exonerabatur. Ex Seleucia usque Solos recta navigatione stadia circiter mille computarunt. Sunt qui arbitrantur Cilices Trojanos, quorum Homerus meminit, horum Cilicum autores fuisse, de quibus nunc actum est, quamvis ab illis plurimum distent, ut quidam econtrario censent. Nos suam cuique sententiam relinquimus. Ciliciam campestem Caramanus obtinet, qui secundus in honore apud Turcas habetur. Is etiam minoris Armeniæ & Cappadociæ partem possidet, quadraginta milia armatorum, cum necessitas ingruit, in campis habens. Is qui modo regnat Abraham nomine, sæpe nostris præcessoribus & nobis scripsit, auxilia contra Ottomanuum petens, cui inimicus est, quamvis in cultu Mahumeti consentiat. Reliqua quæ extra Taurum in Asia sunt Ottomanus habet, exceptis quæ Scandalari dominus possidet. Hactenus de Cilicia & Asia, quam minorem diximus. Sed quoniam Cyprus etiam Austrum jacet, de hac simul agendum est, quæ peragrata, finis erit Asiaticæ descriptionis.



## CAP. XCV.

*De Cypro insula & in ea promontoriis, quodque in eo cuius summitas olympus dicebatur, Veneris Acrea templum fuerit, quod mulieribus nec videre nec adire licebat, de Clidibus & Carpasiis circum Cyprum abiacentibus insulis, de promontorio unde qui Apollinis aram tetigissent præcipitabantur. Item de Treta, Boosura Palapapho, Arfinoë altera, Hierocepia & Papho.*

**C**YPRUS inter majores nostri maris insulas locum sibi vendicat, cuius septentrionales partes Tracheæ Ciliciæ oppositæ sunt, ibique continenti proxima est: Orientales Issico sinui: occidentales Pamphilicum alluit pelagus: australes Ægyptium. Ambitus insulæ trium millium & quadringentorum ac viginti stadiorum in sinum se inferenti dicitur. Longitudo à Clidibus in Acamantem pedestri itinere mille & quadringentorum stadiorum ab oriente in occidentem progredienti. Clides duas insulas vocaverunt, ad orientales partes ante Cyprum sitas, quæ à Pyramo stadiis distant septingentis. Acamas promontorium est sylvofum, quod duarum mamillarum speciem præbet, & in occidentalibus insulæ partibus situm, tendit ad aqvilonem, Tracheæ Ciliciæ proximum. Tota insulæ figura parte altera longior est. Crommyum promontorium Anemurio Ciliciæ Tracheæ promontorio per trecentorum & quinquaginta stadiorum opponitur intervallum: à Crommyo usque Clidas naviganti recta navigatione, stadia septingenta insunt, insulam ad dexteram, continentem ad sinistram habenti. In hoc spatio Lapathus civitas fuit, statione prædita ac navalibus, Laconum & Praxandri opus, & juxta eum Agidus & Aphrodisium, atque ibi insula angustissima: nam 70. stadiorum intervallo ad Salaminam transitur. Deinde Achivorum acta, quo primum appulisse ajunt Teucrum, à patre Telamone pulsum, qui Salamina in Cypro condidit. Postea Carpasia civitas, quæ portum habuit circa Sarpedonem promontorium sita. Deinceps mons & promontorium, cuius summitas Olympus dicitur, in quo Veneris



Veneris Acreæ templum fuit, quod nec adire, nec videre mulieribus licuit. In fronte Clides & aliæ complures insulæ fuere. Postea Carpathiæ, & ultra eas Salamis, unde fuit Aristus historicus: ulterius Arsinoë civitas & portus, & promontorium Pedasium, cui collis altus & asper imminet, mensæ cujusdam figuram præbens, gentili more olim Veneri sacer, à Clidis 680. stadiis distans. Postea sinuosa quædam & aspera præternavigatio, quæ Citium iter erat, civitatem clauso portu præditam, ex qua Zeno fuit Stoicæ sectæ autor, & Apollonius medicus, ex quo loco usque Berytum stadia mille & quingenta computavere. Deinde Amathus civitas & inter medio spatio oppidum nomine Palæ, & Olympus mons, qui mamillæ speciem præbuit, & Curias peninsularis, & Curium urbs ab Argivis condita, quæ stationem habuit in occidentali parte insulæ, quæ Rhodum respicit. Postea promontorium est, unde jaciebantur, qui Apollinis aram contigissent: tanta erat apud cæcam gentilitatem, non Dei, sed demonis reverentia. Ultra promontorium Treta fuit, & Boosura, & Palæpaphus ad decem stadia supra mare sita, quæ stationem habuit, & antiquum Veneris Paphiæ templum, subinde Zephyrium promontorium, & altera Arsinoë cum statione & templo, & luco: non procul à mari Hierocepia, & Paphus ab Agapenore condita, quæ portum habuit, & templa optime constructa, distans à Palæpapho itinere pedestri stadiis 60. In qua via viri simul ac mulieres ex omnibus urbibus confluentes, festa quotannis celebrabant. Quidam dixerunt Paphum ab Alexandria distare per tria millia & sexcenta stadia: adhuc urbs extat, & episcopum habet, quem nos creavimus.

## CAP. XCVI.

*De Acama promontorio, Nicosia, Famagusta & Atracensi, hodiernis in Cypro urbibus, quod apud Colossum castellum cucurbitæ nascantur, adeo ingentes quod ex eis picatis efficiantur dolia. Item quod æs, metallum, vitriolum, rubigo æris, canna mellis ex qua saccharum excoquitur, plurimum apud Cyprum abundant.*

Post Paphum est Acamas promontorium, unde incipit in orientem navigatio, deinde Solus, quæ portum habuit & flumen, & Veneris



& Ifidis delubrum. Phalerus & Acamas Athenienses eam condiderunt. Incolæ Solii dicebantur, & fortasse ab his solæcismus nomen accepit, quamvis in Cilicia ejusdem nominis civitas fuerit, cui hoc tribuitur. Hinc fuit Stasānor Alexandri sodalis, vir qui principatum meruit. Ulterius in mediterranea civitas Limenia fuit, cui proximum erat, Crommyi promontorium, unde circumnavigationem inchoavimus. Hæc fuerunt antiquarum urbium nomina, hodie Metropolis & regia est Nicosia, quæ nostris temporibus magnas calamitates pertulit. Est & Famagusta, quam Genuenses obtinent, & Paphus de qua dictum est, ubi Nicosiensis episcopatus est: turris quædam extat, & templum dirutum, vulgò Limissum vocant. Atracensis civitas in mediterraneis fuit, nunc destructa est, quamvis habeat episcopum, qui villis aliquibus præest. Sunt & oppida quædam non contemnenda, inter quæ Cerines nominatur, in quo Ludovicus rex obsidionem perpeffus est, stadiis quatuor ab oppido mons est, & in eo caput S. Hilarionis custoditur è regione Ciliciæ: nec procul hinc monasterium Græcorum, in quo S. Epiphaniî corpus miraculis claret. Inter Paphum & Limissum castellum est munitum nomine Colossus, à Rhodiis custoditum, ubi cucurbitæ nascuntur ingentes, de quibus picatis efficiunt, dolia. Insula ferme tota australior est parallelo, qui per Rhodum ducitur, virtute nulli insularum inferior. Nam & vino abundat & oleo, frumenti quoque satis habet, æris etiam metalla in ea ferunt, in quibus vitriolum & rubigo æris nascebatur, ad medicinæ usum idonea. Cannamellis multa in Cypro reperitur, ex qua saccharum excoquitur. Ex pilis quoque caprarum pannus conficitur, cui Zambelloto nostra ætas nomen dedit. Multas res insula ad alias gentes mittit, ex quibus lucra non pauca redundant, alienis non multum eget, sed ærem salubrem habet. Tota insula deliciis incumbit, sceminae admodum lascivæ sunt. Trogus autor est consvesse Cyprios virginibus suas priusquam nuptui traderent, exteris nautis insulam petentibus offerre, prostitutasque demum viris dare: ut non ab re sacrum Veneri Cyprum dixerit antiquitas. In initio per singulas urbes tyranni fuerunt, sed postquam Ptolemaici Ægypto potiti sunt, Cyprus etiam faventibus Rom. in eorum ditionem concessit. Postremus Ptolemaeus cum ingratus erga bene merentes inventus esset, sublatus est, & Romani insulam occuparunt, & provinciam prætoriam fecerunt.

Tollendi



Tollendi regis autor fuit P. Claud. Pulcher, qui à Piratis Cilicibus captus, imperato sibi redemptionis pretio, misit ad regem ut se redimeret. Ille pretium adeò exiguum remisit, ut Piratæ id accipere recusaverint, Publiumque sine pretio dimiserint, qui liberatus gratiam utrisque retulit. Nam creatus plebis tribunus evicit, ut M. Cato in Cyprum mitteretur, eam à rege ablaturus: Ptolemæus re intellecta seipsum interfecit. Cato insulam accepit, & regis opibus venundatis pecuniam in pub. ærarium detulit. Cyprus diu postea provincia fuit, quamvis parvo tempore interjecto, Antonius eam Cleopatrarum & sorori ejus Arsinoæ tradidit. Sed brevi omnia ejus acta rescissa sunt, postquam manus sibi consciverat. Antiqua hæc sunt: & nova digna relatu, quæ paucis absolvemus.

## CAP. XCVII.

*Historia de bello apud Cyprum factò. Item quomodo Jacobus Cyprius nothus, Soldano fœdum & execrandum præstitit juramentum.*

CYPRUS cadentibus rebus Romanis diu sub imperio Græcorum fuit, qui post Constantinum apud Byzantium regnare. Ricardus Angliæ rex Græcos ex insula dejecit, cum Hierosolymam classe petens, eò tempestate delatus portu prohiberetur. Indignatus enim arma, quæ in Saracenos paraverat, in Græcos vertit, eisque insulam abstulit, spoliataque firmo suorum præsidio communitam reliquit. Nec diu postea Gvidoni Lusiniæ genere Gallico, qui de Hierosolymitano regno contendebat, eam permisit: quam ille ab Anglico acceptam, sibi & posteris suis usque in hæc tempora obtinuit. Post varias successiones regnum ad duos fratres pervenit, quorum alter nomine Petrus, classe instructa, cum Catelanis ac Gallicis Alexandriam Ægyptiorum invasit, ingressusque urbem mediam diripuit, & quamvis occurrentibus maximis Ægyptiorum copiis sese commiserit, ingentem tamen prædam & ditissima spolia reportavit: nec diu postea à fratre interfectus est. Nulla enim sancta reperitur regni societas. Cruentus fraterno sanguine rex constituitur, sed neque ei lon-



ga quies fuit, neque impunè cessit parricidium. Nam cum solenne convivium instituisset, (quod annis singulis instruere mos erat) ingens calamitas obtigit. Invitati Genuensium ac Venetorum mercatorum iudices, quos Baliuvos appellant, magna inter sese contentione de priori confesso certare cœperunt. Cumq̃ve rex Venetis propensior videretur, indignati Genuens. armis suam dignitatem retinere statuerunt, atq̃ve in regiam tectis sub veste gladiis profecti sunt, quod intelligentes Venetorum primores Regem adeunt, atq̃ve insidias suo capiti paratas dicunt, & idcirco juventutem Genuens. armatam intrasse palatium. Rex missis evestigio, qui rem inquirant, inventos cum armis Genuens. in sublimem palatii locum rapi jubet, atq; ex altissimis fenestris in forum præcipitari, statuta militum cohorte, quæ lanceis atq; gladiis cadentes exciperet, tantum maligna potuit accusatio. Reliqui etiam per Cyprum commorantes Genuenses perquisiti ac necati sunt, ita ut vix unus ex tanta clade superfuerit, qui rem gestam in patriam renuntiaret. Accepit tamen dux Genuens. ac senatus paulò post atrocem suorum civium injuriam, atq̃ve in ultionem erectus, intra 40. dies potentissimam classẽ armavit, & in Cyprum misit. Cujus adventus eodem ferè tempore, & visus est & auditus. Trugosius, qui classi præfectus erat, expositis in terram copiis, mox Nicosiam profectus ægre defensam cœpit, breviq̃ve regem ac reginam, & universam insulam in potestatem suam redegit: & interfectis nephandi consilii autoribus ingenti ditatus præda, majori cum gloria, & breviori tempore quam sperarent, domum rediit. Rex cum conjugẽ aliquandiu in carcere servatus est, & regina prægnans in captivitate peperit: tandem venia regi data est, & regnum tributarium factum est, & urbs nobilissima totius Cypri emporium Famagusta, de regno recepta, Genuensi populo applicata, portu & vectigalibus dives. Puerum regi natum Janum appellavere, quod in Genua natus esset, quam nostra ætas Januam vocat. Adversus hunc cum patri successisset, in ultionem direptæ Alexandria Soldanus Ægypti Melchella validissimam classẽ transmisit, quæ veluti tempestas horrida cuncta corripuit. Cyprios occurrere ausos prostravit in campo. Janum regem captivum abduxit, Nicosiam regni caput diripuit, ecclesias incendit, & omnem sermè populum rapuit in servitutem, vacuas urbes & insulam penè solam reliquit. Rex postea centum & viginti-



viginti quinque millibus aureis redemptus, & tributarius Ægyptiorum factus, in regnum rediit. Sed dum insulam Ægyptii spoliarent, & eorum navigia paucis custodibus servarentur, in littore navis Veneta, quæ peregrinos quotannis Hierosolymam vehit, voto peracto rediens huc applicuit, & paulò post sex Cæclanorum naves adventarunt, quarum patroni Venetum allocuti, ei suaserunt, ut signa deponeret, simulque classem Ægyptiam aggrederetur: futurum ut opulenta spolia referret. Paruit Venetus, sed inter noctis tenebras Cæclanis mutato consilio dilapsis, redeuntes in ortu lucis ad littus Ægyptii, navem Venetam solam, & sine signo inventam adoriuntur, ac brevi expugnant, jubentque peregrinos qui aderant, si vivere velint, erectis digitis Christum negare. Mira virtus, nemo repertus est, qui pluris vitam quam fidem fecerit: ob quam rem viri triginta, qui prælio superfuerant, vincti deponuntur in littore: atque ibi lapidibus cæsi & obruti, usque ad ultimum spiritum Christo benedixerunt. Felix exitus, & optimo cuique optandus. Fœminas in captivitatem ductas, apud Alexandriam Veneti mercatores redemerunt, inter quas una ex nostratibus fuit Corsiniani nata, vidua & sancta mulier, quæ domum reversa, hæc nobis à se visa narravit. Janus per tot adversa vitam agens, tandem relicto filio impubere, Joanne mortem obiit. Filius inter fœminas educatus, cum virilem ætatem attigisset, mulierem se magis quam virum ostendit: inter epulas atque delicias languens, semper sub tutoribus & curatoribus vixit: uxorem tamen duxit ex familia Montis ferati, quæ ubi in Cyprum venit, peractis nuptiis, sive æris intemperie, sive, ut fama fuit, veneno extincta est, & comitatus ejus penè universus interiit, nec postea repertus est ex occidentalibus regibus, qui suam sibi filiam despondere vellet. Ad Græcos igitur itum, & in Peloponneso quæsitæ conjunx, ex Palæologorum prosapia, Helena nomine, ingeniosa & cordata mulier: verum Græca instituta perfidia, Latinis inimica sacris, & Rom. hostis ecclesiæ. Quæ ubi consummato matrimonio viri recordiam cognovit, non tam reginam, quam regem egit, regnum ipsa gubernavit, magistratus deposuit atque instituit. Sacerdotia pro suo arbitrio ordinavit, & eliminato Latino ritu, Græcanicum superinduxit: belli pacisque leges dixit. Vixit satis fuit convivari, deliciisque assuere, atque in hunc modum



universa insula in potestatem Græcorum rediit. Potentissima apud  
 reginam nutrix ejus fuit, & apud nutricem filius, apud quem sum-  
 ma regni esse videbatur: cum is matrem, mater reginam, regina  
 regem regeret. Joanni ex concubina Jacobus natus est magni spiri-  
 tus adolescens, ex conjuge Carlotam tamen suscepit: quæ postquam  
 adolevit, Joanni regis Portugalliae patrueli nupsit. Vir ejus con-  
 sensu procerum in regnum accersitus est, qui vivente socero rem  
 administraret. Jam enim muliebris regiminis non minus tædebat  
 populum quam pudebat. Adventante igitur Joanne, celebratis-  
 que nuptiis, cuncta in ejus manu posita sunt, & forma regiminis cor-  
 recta, divina & humana reformata negotia, Romanus ecclesiæ ri-  
 tus instauratus, Regiæ ac nutrici adempta potestas. Nutricis filius  
 novi principis faciem veritus Famagustam concessit, quo  
 ex loco matri suasit, ut, si se cum filio salvam vellet, Joan-  
 veneno extingueret: quo vivo sperare vitam ipsa non pos-  
 set: nec surdo cantata fabula est. Venefica mulier consentien-  
 te regina (ut fama est) nobilissimum Principem toxico sustulit, atq;  
 ita priores illecebræ & damnata Helenæ imperia redierunt. Filius  
 quoque nutricis gloriabundus ex Famagusta rediens, quasi dominus  
 & rerum omnium moderator receptus est. Qui Carlotam ludibrio  
 habens multis eam contumeliis affecit: illa ad fratrem confugiens  
 suas conquesta calamitates, opem petit. Jacobus non tam sororis  
 gratia quam regni sibi parandi græculum cunctis insultantem sua  
 manu interfecit. Cœpit cum amicis id agere, ut rex appellaretur, quod  
 jampridem in animo gesserat. Ut primum enim sapere aliquid cœ-  
 pit, videns patrem mentis inopem, ex matrimonio virili prole care-  
 re, ad regnum aspiravit, indignum existimans, aut sororem sibi, aut  
 sororis virum præferri. Quod præfagiens Helena, viro persuaserat,  
 ut filium regni cupidum extra matrimonium natum, ecclesiæ trade-  
 ret, ac sacris ordinibus initiaret, sic futurum ut regnandi spem po-  
 neret. Vacua per id temporis pastoris regimine ecclesia Nicosien-  
 sis erat. Hanc igitur Jacobo spondent, postularique in præfulem cu-  
 rant, atque in possessionem deducunt, quod Romana ecclesia nun-  
 quam ratum habuit: sed post græculi eadem regina & nutrix ad-  
 versus Jacobum insurgentes, eum urbe regia pepulerunt. Ille apud  
 judicem



iudicem Venetorum aliquandiu latitans, tandem apparato navigio concessit in Rhodum, quo in loco non sine honore habitus est. Interim Carlota suasiu matris ac procerum Ludovico Sabaudia ducis filio nubit, cumque quam celerrimè ad se proficisci hortatur. Medio tempore Jacob spe regni amissa, per amicos apud Nicolaum Pont. max. instat, ut ecclesiae Nicosiensi praeficiatur: sed Helena & Carlota contranitiuntur, negantque sanguinarium hominem, & qui regnum seditionibus agitet in ecclesiae militiam recipiendum. Literae casu à Jacobo intercipiuntur, qui contracta amicorum non parva manu, in Cyprum navigans, clam regiam urbem ingreditur, eorumque domos adiens, quos sibi norat insensos, cunctos interficit: bona inter amicos partitur, & tanquam victor in civitate moratur. Regina interim moritur, & paulò post rex: vir muliere corruptior, quamvis forma & habitu corporis regio dignus honore videretur. Sed quam erat exteriori decorus specie, tam fuit ignavus & turpis animus. Inter hæc turbato multifariam regno, accersitus crebrioribus nunciis Ludovicus apud Venetias classe parata, in Cyprum navigat, magnoque omnium applausu ac favore rex appellatur. Jacobus ejus adventum, haudquaquam expectare ausus, consilio & ope (ut ajunt) Marci Cornari potentis amici, qui sibi navigium concessit, cum amicis ferme centum in Alexandriam navigavit, Soldanum quam primum diceret conventurus, ejusque opem imploraturus. Soldanus missis obviam primoribus suae curiae, eum ad se quam celerimè venire jussit, & magnis honoribus venientem accepit, qui ut in conspectum datus est: Supplex (inquit) ad te confugio regum maxime atque potentissime. Tu mihi dominus es, & ut clementia tua spondet adiutor & tutor eris. Joannes pater meus, qui tibi quottannis tributum pendebat, superioribus diebus è vita decessit, nec præter me virilem sobolem reliquit. Soror mea virum sibi ex Gallis accersivit, eum Cyprii regem susceperunt, me posthabito, quem regnare par fuerat. Sed tuum est regnum Cypri, tuum est distinguere quem regnare oporteat. Natura masculis non sceminis imperium dedit, nec æquitas permittit regum filios extraneis cedere. Respice oro fortunam meam, nec me regem natum, regno priuari sinas: pater-



nam hæreditatem à te postulo, qui meus iudex es: nisi causam meam suscipis, exul à patria, regius sanguis mendicabo panem. Indigna hæc tuo nomini inuretur nota, qui subditorum justas causas non defenderis, nec è re tua fuerit me repulso cujus majores servire tibi didicerunt, Gallicum hominem Cyprorum regno præesse. Nosti superbiam gentis & quanta Ægyptiorum imperio attulerint Gallorum classes incommoda: nunquam Alexandria, aut aliæ maritimæ urbes pacem habebunt, tenentibus Cyprum occidentalibus regibus. Quod si me foveas, tam tua Cyprus quam Ægyptus erit: nec tu difficilem rem credideris, paternum atque avitum regnum mihi restituere. Multi sunt qui meis rebus student, nec aliud optant quam tuo favore præditum, me redeuntem cernere. Parva me classis in solium paternum collocabit: satis amicis meis fuerit tua signa vidisse, & tuis auspiciis bellum geri, cætera ipsi expedient: nec dubita, brevi me servum tuum Cypri regem videbis, tantum facito, ut te vellem intelligam. Moverunt ea verba, non Soldani modò, sed omnium, qui aderant animum, nec quisquam fuit, qui non indigna pati adolescentem arbitraretur, eique subveniendum existimaret. Erat enim Jacobus duos & viginti natus annos, forma egregia & statura corporis patri perquam similis: verum animi dotibus & eloquentia longè dispar. Placuit igitur subvenire supplici, moxque regiis ornamentis allatis, Jacobus veste purpurea indutus, cæterisque insignibus adornatus (quibus regibus uti mos est) in conspectu Soldani, & omnium procerum rex declaratur: ac per urbem circumductus, præcipuis honoribus cumulatus est, classe decreta, quæ illum mox in Cyprum veheret. Prius tamen literæ in hanc sententiam Soldani nomine ad Ludovicum scriptæ sunt: Venisti ab occiduis partibus ut alienum regnum in oriente invaderes, paterna hæreditate filium exueres, vana est cogitatio tua. Cyprus mihi vestigalis est, & meum de re judicare. Nisi quamprimum abieris, Ægyptio peribis gladio. Si uxor tibi cordi est, potestatem facio, ut eam tecum auferas: si tamen prius recesseris, quam secundo monearis. His acceptis toto regno trepidatum est, ingensque mœror omnium mentes pervasit, cum neque Soldani iussibus resistere possent, neque sine turpitudine obedire. Postremò cum remedium nullum aliud invenirent, Legatos ad Soldanum mittere placuit, qui ejus mentem lenirent: miserunt & simul Rodii viros ex religione primarios, qui

apud



apud Cairum convento Soldano Ludovici causam humilibus verbis defendere conati sunt. Nil eum de jure Soldani ablaturum venisse, dicentes. Joannem Cypri regem Carlotam filiam unicam ex matrimonio suscepisse, quam secundum Christianas leges reliquisset heredem: Jacobo ex concubina nato, regnum nequaquam deberi, maritum pro conjuge coronæ jura sortiri: hortari ne regni consuetudines confunderet, neve Christianis Christiana inter se jura negaret. Ludovicum Soldano in omne tempus amicum futurum, tributumque suis temporibus præstiturum, Jacoboque decem millia aureorum singulis annis quoad viveret traditurum. Res diu in consilio apud Soldanum agitata est, & jam eo ventum erat, ut postulata Ludovici admitterentur, triginta millibus aureis superadjecis: hanc enim summam loco impensarum Soldanus exposcebat, nec Ludovicus pro redimenda pace abnuebat. Sed ambiens Jacobus modò istos, modò illos amicos, ac Soldani fidem accusans, qui se paulo antè regem declaratum desereret, Gallicaque perfidiæ proderet: Purpuratos quosque in curia potentes hortabatur, ut Soldano suggererent, ne Gallicis oratoribus auscultaret, neque se semel in fidem susceptum relinqueret. Aderat ei Soldani filius æqualis ætatis, qui ejus fortunæ miserebatur. Aderant & tres Mamaluchi in palatio potentes, qui precibus assiduis Jacobum commendabant. Sed parum eorum conamina valuisse, nisi Mahumetis Turcarum imperatoris legatus opportuno in tempore affuisset, qui verba hujusmodi habuisse fertur. Accepit amicus tuus Turcarum imperator Mahumetes, te Jacobum Cypri regem appellasse, eumque in patrium regnum statuisse restitueret: digna res, quæ de tuo solio manaret, & nostræ religioni accommoda. Sed renuntiatum postea est, te mutato consilio pacem cum rege Gallico pacisci, & quem juvare cœpisti velle deserere, tanquam ignores, quanto persequatur odio gentem nostram Gallicus sanguis, neque Gotfridi Balduinive, aut aliorum ejusce gentis facta mentem teneas, qui sæpe majores nostros magnis cladibus affligerunt. Vide quid agas. Si pax tibi cum Gallico genere cordi est, cum nostro bellum expecta, nec tibi cum solis Turcis inimicitias futuras putes. Ægyptii, Syrii, & Arabes, quibus præes, summo te odio prosequuntur, nec tuus tibi filius habet, qui religionem nostram Gallicano sanguini prodideris. Quod si promissam fidem Jacobo servaveris, classemque pararis in Cyprios: Ma-



humetes quoque alteram parabit in Rhodios & utriusque insulae spolia tua erunt, solum tantum insulae Rhodiae Mahumetes sibi servatum cupit. Placuerunt Soldano Turcae oblata, atque in ejus postulata consensit. Apparata est de vestigio classis, & Jacobus cum magna militum manu in ea vectus Cyprum appulit: non tulerunt ejus imperum Galli, quamvis Rhodios adjuutores haberent: neque ausi apud Nicosiam expectare, in castellum quod Cerines appellatur sese receperunt. Jacobus reliquis omnibus in potestatem receptis, obsidionem aliquandiu circa castellum tenuit. Deinde spe potiunda munitiois deposita, dimissis custodibus qui Gallos ab incursione prohiberet, Nicosiam reversus, ad reformationem regni se convertit, Legatosque ad nos misit, qui multa peterent faciem honestatis habentia. Sed revera nil aliud quærebat, quam Christiani regis apud sedem apostolicam nomen usurpare: sed contra illi evenit quam putabat. Neque enim oratores suos tanquam regios admisimus, cum accepissemus eum. Soldano Ægypti, eo tempore quo regnum ab eo suscepit, turpissimum juramentum præstitisse. Adjurato enim quadrages Deo (ut accepimus) sic ait: Per Deum magnum & altum misericordem, & benignum formatorem cœli & terræ, & omnium quæ in eis sunt, & per sancta hæc evangelia, per sanctum baptismum, per sanctum Joannem Baptistam, atque omnes sanctos, & per fidem Christianorum promitto & juro, quod omnia quæ novero, aperta erunt domino meo altissimo Soldano Ægypti, & totius Arabiae imperatori, Alefferapho Asnali, cujus regnum Deus fortificet, ero amicus amicorum suorum, & inimicorum inimicus. Nihil eum celabo, neque Piratas in regno meo patiar, neque his victum aut auxilium dabo. Ægyptios qui meo in regno serviunt emam, & libertate donabo, auri quinque millia nummum in Calendas Septembris aut Octobris, tributum nomine in templis altissimis Hierusalem & Lamech singulis annis offeram. Collos eos prohibebo, ne Piratis arma ministrent: quæcunque digna cognitu noviter emerferint, Soldano renunciabo, in justitia & veritate procedam, nihil mea in parte fraudulentum erit, quod si aliquid horum neglexerim, ero apostata & mandatorum sancti evangelii Christianæque fidei prævaricator, dicam Evangelium falsum esse, negabo Christum vivere, & matrem ejus Mariam virginem fuisse, super fonte baptismatis Camelum interficiam, & altaris presbyteros maledi-



maledicam, divinitatem negabo, & Jesu nuntii humanitatem adorabo. Super altari cum Judæa fornicabor, & sanctorum patrum maledictiones omnes in me recipiam. Hoc juramentum in scriptis redactum, & ex Arabica lingua in Latinam traductum, Legati Rhodiorum viri præstantes ad nos detulerunt, asserentes certissimum esse, ita Jacobum apud Cairum Soldano jurasse: propter quam rem Oratores ejus multum increpatos absque honore remisimus. Carlota interim quæ Rhodum petierat, comparatis aliquibus auxiliis, cum nova militum manu, quam socer ex Sabaudia miserat, ad virum quem Cypri reliquerat apud Carinam rediit, eo proposito ut Nicosiam peteret, non parva spe freta recuperandi regni. Jacobus consiliis ejus exploratis, iter intercipit, consertoque prælio multos Gallorum interficit, reliquos in castellum repellit. Quo in loco usque in hanc diem Ludovicus obsidionis incommoda fert, reliquæ partes insulae Jacobo tanquam regi parent, excepto Colossi oppido, quod Rhodii tenent, & Famagusta quam Genuensium esse diximus. Carlota viro apud Carinam dimisso Rhodum contendit, & deinde plena calamitatis ad nos navigavit, sibi & viro ut consuleremus non sine lachrymis orans. Nam & ipsa multa in mari adversa pertulerat: nos quæ potuimus humanitate prudentem sanè & cordatam foeminam consolati sumus. Vinum & triticum, quod regi mitteretur obfessio, apud Ancona obtulimus, & sibi quæ omnium rerum erat indiga equos & mulos coëmimus, & viaticum dedimus, quo in Sabaudiam (ut reginam deceret) proficisceretur ad socerum: auxilia quoque polliciti, quibus in regnum restitui posset, si nostris consiliis uteretur. Facile namque exulibus regibus commisereri scimus. Sed digna Dei ultio. Nam cum nos apud Mantuam conventum ageremus, regesque hortaremur, ut in tutelam regionis assurgerent, nequæ hinc Turcas, inde Sarracenos in Christianos favire permetterent: Hujus Ludovici pater, qui multa promiserat, inter primos repertus est, qui orthodoxæ fidei auxilium negavere. Ipse quoque Ludovicus adolescens, cum per Padum navigaret, essetque Mantuæ propinquus, in eo loco ubi Mincius Pado miscetur, haudquaquam dignatus est nos visere, aut nostram benedictionem expolcere, quibus ex rebus saepe oratores Sabaudienles allocuti, eorum facta cannavimus, futurumque diximus, ut in poenam eorum, quæ pater faceret



ceret, filius regnum amitteret, frustra que opem ab aliis peteret, quam suus pater negasset ecclesiæ, sicut postea cum magno religionis damno secutum est.

## CAP. XCVIII.

*Qvo jure Soldanus Cyprum, & Turca Rhodum sibi pertinere dicant. Item disputatio qui primum populi Asiam minorem coluerint, quique duces apud eam armis præcipue claruerint.*

**H**Æc habuimus quæ de Cypro diceremus. Aliquanto longius quam consuevimus propter historiam nostri temporis, quæ non videbatur negligenda, quod etiam in aliis locis facturi sumus, ubi nostra ætas aliquod habuerit memoratu dignum. Soldanus suam esse Cyprum dicit & Rhodum, propter Hierusalem, de cujus regno has insulas esse putant: & cum ipse Hierosolymam possideat, ad eas quoque jus sibi competere arbitratur. Turcarum imperator de Cypro nihil adversatur, Rhodum verò sui juris esse contendit, qui vicina in continenti littora obtinet. Antiqui & Rhodum & Cyprum Asiæ tradiderunt, quibus nulla continens propinquior est. Nam Rhodus Cariae, Ciliciæ Cyprus obijcitur, quæ Asiæ partes existunt.

Asiam ipsam minorem qui primo coluerint non satis certum est: quidam indigenas putant, nos ex Syria primos cultores advenisse arbitramur, quando ex unis parentibus omnes originem ducimus. Illi vero in terrestri paradiso creati, atque illinc ejecti in Damasceno primum agro locati sunt, indeque genus humanum. Nisi Armenica magis origo alicui placeat, quia in arce Noë servata sit humana caro, & illa in montibus Armeniæ cessante diluvio requievit, unde rursus propagati homines ad colendas provincias exierint. Sed omnes ab Adam prognati, quem filii Noë sui generis autorem faciunt. Ante Trojanum bellum cultores Asiæ inter primos memorantur.

Caucones



Caucones, quos alii Pelasgos, alii Scythas fuisse tradunt: hos Bebrices à Bithynia pepulerunt: Bebrices Mariandyni cum Paphlagonibus, ex quibus Mariandyni exiverunt & Heneti, nobilis Paphlagonum natio. Mygdones Olympi cultores, quæ Boream respicit, & Doliones inter Rhyndacum habitantes & Æsepum: & Mysi, qui ex Mysia profecti sunt Europæa, apud Danubium sita: & Lydi, qui & Mæones appellati sunt, & antiquiores quàm Mysi creduntur, & ab aliquibus Mysorum patres existimati sunt, Asiæq; indigenæ. Et Leleges, qui per insulas habitantes sub Minoë Cretensi fuerunt, postea in continentem Asiæ migrantes, australe inde latus usque Assum, & deinde usque ad Caicum & Her-mum, oram maritimam tenuere: & Cares, qui prius Leleges esse, putantur & insulares, postremo terrestres facti apud Mæandrum sedes obtinere: & Phryges qui ex Thracia profecti, primo Sangarii ripas habitavere, deinde ad orientem Mediterraneam petierunt: & Lycii, qui prius non procul ab Illo sortiti sedes, in duos divisi principatus, denique ultra Taurum migrasse creduntur: & Teuceri quos alii ex Creta, alii ex Attica ortos existimarunt, & circa Hamaxitum habitaverunt: & Cilices qui sub Hectore fuerunt Thebam colentes, Illo proximi, quo deleta, Taurum transivere: & Dardani sub Ænea & Antenore constituti, Idæ accolæ: & Cetii prope Caicum sub Eurypilo militantes: & Pelasgi qui Larissam Cumanam prius coluere: Gens ab origine Thessalica, quæ postea multum crevit, & tamen cito defecit: & Solymi in mediterranea supra Cares ad Taurum habitantes: & Leucosyri ultra Halym in Ponto collocati: & Amazones, quæ Themiscyræ campos incoluere: & Chalybes, qui montes Pharnaciæ & Trapezunti rivos insederunt. Omnes hujusmodi gentes ante bellum Trojanum in Asia fuisse traduntur. De Lycaonibus, & Capadocibus, & Cataonibus, & Armeniis, & Pamphyliis, & Pisidibus, & Isauriciis, & Thracibus qui Cimnerii fuerunt, & Magnetes deleverunt, & aliis compluribus incertum est. Æoles, & Iones, & Dore, & Macedones, & Galatas nemo dubitat post cladem Iliacam in Asiam pervenisse: quæ sæpe frequenter externo subiecta imperio, aut raro, aut nunquam regem protulit in armis clarum, cujus vetusta origo Asiatica fuerit: sive quod imbelles genus hominum facile jugum subiit, sive quod regionis ubertas externos reges ad eam acquirendam, summis conatibus attraxit. Nam priusquam Troja Græcorum armis rueret,



multi Asiæ externi reges invaserunt. Jupiter, sive Cretensis fuit, sive (ut alii volunt) Ægyptius Asiæ imperium adeptus est: & Hercules ille primus, & Dionysius quem Bacchum vocaverunt, & Osiris, quem cum superioribus stulta Ægyptus tanquam deum coluit. Sciostris quoque rex Ægypti Asiæ sibi subiecit, & Idanthyrus Scytharum rex, qui sibi & successoribus suis per mille & quingentos annos vexit galem Asiæ fecisse traditur, & Amazones Scytharum soboles magnam sibi Asiæ partem vendicaverunt, & Ninus rex Assyriorum usque ad Hellespontum cum exercitu pervenit, omnemque Asiæ domuit, quæ & sibi & successoribus usque ad Teuthrantem paruit, sub quo trojanum bellum exortum est. Teuthras autem per legatos à Priamo requisitus Memnonem Tithoni filium cum decem millibus Æthiopum, & totidem Susianis ac ducentis curribus in auxilium misit, cum amplius mille annis Asia sub Assyriis fuisset. Hercules etiam Alcmenæ filius Trojam depopulatus est. Sed neque Hercules, neque Agamemnon in Asia imperium continuarunt, qui habita victoria in varias regiones dispersi sunt, quemadmodum & Cimmerii, qui multas in Asia civitates desertarunt, nec totam Asiæ occuparunt: neque Jasonis socii, quamvis aliqua loca obtinuerint post Trojam deletam. Lydorum res magnæ fuerunt, apud quos Midas, Gyges, & Alyates, & Cræsus rerum potiti sunt: deinde Persæ horum imperium delevere, qui usque in Græciam penetrarunt. Persas verò Macedones deiecerunt, & ipsi à Romanis pulsi sunt. Post Romanos Græci Asiæ obtinuerunt, cum apud Byzantium imperii sedem Constantinus posuisset. Græcos autem Turcæ eliminarunt, quos Tamerlanes (ut antè diximus) magnis affecit cladibus, sed tanquam fulgur (cum omnia pertrivisset) brevi defecit, & res ad Turcas sine controversia rediit.

## CAP. XCIX.

*De Mithridatis Eupatoris laudibus admirandis,  
Item de mulieribus in Asia clarissimis.*

**I**Nter Asiaticos autem, qui armis claruerit, unum reperimus cunctis excellentiorem, & cui pauci possint ævari, Mithridatem scilicet  
Eu-



Eupatorem, cujus progenitores Pontici fuerunt, & ipse apud Sinop enatus educatusque est, & ibi tandem sepultus. Ad hunc puerum. (ut Apianus Alexandrinus scribit) & parentibus orbatum principatus translatus est, qui mox ut adolevit, finitimos Barbarorum populos in potestatem suam redegit, Scytharum non paucos sibi subjecit, in Romanos per quadraginta annos variis eventibus bellum gessit, Bithyniam & Cappadociam non semel adeptus est: Asiam, Phrygiam, Paphlagoniam, Galatiam ac Macedoniam cum in Græciam transisset, potenter invasit, multa & præclara egit, mari à Cilicia ad Ionium usque dominatus est, quo ad Sylla intra paterni regni limites eum inclusit, centum & sexaginta millibus hominum bello sibi ademptis. Inter lubricos prolapsus casus minimè animum posuit, bellum facile instauravit, cum optimis ducibus prælio decertavit, à Sylla quidem & Lucullo Pompejoque victus, sæpenumero magnas illis intulit clades: L. Cassium, & Q. Oppium, & Manium Aquilium captivos sibi deditos palam circumduxit, quoad hunc, qui totius belli causa fuerat, interemit, reliquos Syllæ tradidit. Vicit Fimbriam ac Murænam, Cottam quoque consulatu illustrem, & Fabium ac Triarium. Ingenium illi ad res difficiles præcellentissimum fuit: victus sæpe minimè ab incepto desistit, nec una via Romanos aggressus est. Cum Celtis scædus iniit, & Sertorium in Hispaniam misit: per insidias sive ab hostibus sive ab aliis ferro impetitus & faucius, nullo tamen ab opere cessavit. Sanguinolentus & crudelis in omnes fuit. Nam matrem, fratrem, ac filios tres impuberes, totidem filias interfecit. Statura ingenti fuisse traditur, valetudine prosperrima usus usque ad ultimum vitæ tempus. Equitare, jaculari, ac mille stadia eqvis per intervalla dispositis una die discurrere, currus sex & decem eqvis agitare. Græcis imbutus disciplinis, & ob id sacris eorum usus, musica præterea deditus, sobrietatis eximie in pluribus, laborumque patientissimus, solum mulierum devictus illecebris. His moribus Mithridates cum orbis plurimas & præclaras regiones cladibus involvisset, postremo desertus à suis, & filii fraude circumventus, ad veneni remedia convolvavit, quibus non satis celeriter opitulantibus, quod antidoto assvesfactus erat, à Bituito quodam Celtarum duce, ut se ferro interimeret, precibus impetravit, atque ita rex quondam potentissimus, è vita decessit, sextus decimus à Dario ultimo Persarum rege, octavus sive sextus à Mithri-



date illo, qui à Macedonibus defecit, & Ponti regnum sibi vendicavit. Vixit annis octo sive novem supra sexaginta, in quibus per septem & quinquaginta regnum tenuit, consensu Pompeji regali sepulchro apud Sinopem conditus, & solennia funeris magnifice consecutus, sed neque is vetusta origine Asiaticus fuit. Mithridates enim qui primus Cappadociæ Pontique regnum invalit, è genere Persarum regio fuisse traditur. Fuerat ille Antigoni amicus. Antigonus verò cum per somnum sese agrum auro serere vidisset, & Mithridatem aurum metentem in Pontum recedere, expergesactus, illum interficere conatus est. Mithridates cum sex duntaxat equitibus fugiens, quendam locum Cappadociæ munivit, multisque illuc per Macedonum incuriam confluentibus, Cappadociam finitimasque circa Pontum tenuit nationes. Postremo imperium in majus propagatum filiis tradidit, quod vicissim unus ab alio suscepit, usque ad Eupatorem, qui etiam Dionysius vocatus, de quo modo locuti sumus. Mulieres in Asia clarissimæ ante omnes fuerunt Amazones, quarum genus è Scythia profectum diximus. Deinde Artemisia Halicarnassi regina, quæ cum Xerxe adversus Græcos bellum gessit. Postremo Pythodori quam supra in Ponto regnasse memoravimus, non possumus non Asiaticam dicere: ejus pater Pythodorus apud Trallianorum urbem, ex privato civemagnus evasit, & opes regias cumulavit. Nec nos latet plurimas Asiæ foeminas clarum nomen assecutas esse: sed inter eas, quæ regnaverunt, has præferimus.

### CAP. C.

#### *De Turcarum origine & moribus. Item de Ottomanorum progenie.*

**V**erum quia de Turcis superius mentionem fecimus, ad quos ultimo loco imperium Asiæ delatum est, haud absurdum fuerit ejusce gentis originem recensere, ut eorum confutetur error, qui gentem Trojanam Turcas esse affirmant, ac Teucros vocant. Turcæ (ut Æthicus philosophus tradit) in Asiatica Scythia ultra Birricheos montes, & Taracontas insulas, contra Aquilonis



nis ubera sedes patrias habuere. Gens truculenta & ignominiosa, in cunctis stupris ac lupanaribus fornicaria, comedit, quæ cæteri abominantur, jumentorum, luporum, ac vulturum carnes, & quod magis horreas, hominum abortiva. Diem festum nullum colunt, nisi mense Augusto Saturnalia. Romanorum imperium audivit magis quam sensit, quamvis Octaviano Augusto in auro littoreo census dedit, & id quidem sponte. Nam cum vicinas undique regiones annua illi tributa reddere animadvertisset, novum dierum ac temporum exortum esse Deum arbitrata, munera illi quorannis misit. Hæc gens (ut Otho historicus tradit) imperantibus Græcis, & regnante apud Francos Pipino annis ab hinc supra sexcentis, non Caspias (ut ille ait) sed Caucasæas egressa portas, cum Auaribus ferocissima pugna, multis utrobique desideratis conflixit. Exin Pontum Cappadociamque transgressa, ad reliquas finitimas gentes sensim illapsa est, nec multo post (quemadmodum Nicolaus Saguntinus ad nos scripsit græcis ac latinis literis eruditus) eadem gens more latronum clandestinis quibusdam excursionibus vires sibi vendicans, occupatis montibus, & claustris opportunis, unde per occasiones facile irruptiones fieri possent, usque adeo emerfit, atque sublata est animis, ut palam jam & pari Marte adversum finitimos de agri possessione certaret: & denique procedenti tempore non solum Pontum & Cappadociam, verum Galatiam, Bithyniam, Lycaoniam, Pisidiam, utramque Phrygiam, Pamphyliam, Ciliciam, Cariam & omnem Asiam quæ minor vocatur, ultra citraque Taurum, ad oras usque Ionie & littora Græci maris occuparet. Nec unum quendam principem, sed alios alii duces, & varia auspicia, per factiones secuti. Ex hac gente trigésimum abhinc & centésimum circiter annum, Ottomannus quidam exigui tum census, & obscuri inter privatos nominis, ex collectio milite mox ingenti manu per seditionem conflata, grassari passim, ac non solum reliquias Christianas vexare, verum etiam homines suæ gentis armis infestis petere, & sibi subdere coepit: cujus conatibus orta inter principes gravi discordia, felicem cursum præbuit. Ottomanus enim dum illi sese invicem laniant, accitis undique omnibus, qui pro ingenio præda rapinarumque cupidi essent, auctoritatem brevi & nomen adeptus, oppida non pauca, partim vi, partim seditione in potesta-



tem accepit. Huic successit Orcanes, qui rem inchoatam à patre, commodè prosecutus, longè lateqve propagavit: quem secutus Amurates filius, duobus de Græcorum imperio disceptantibus, ab altero qui superari timebat, in auxilium accersitus, cum ex Asia transisset in Græciam, consulto bellum protrahens, ubi ambos consumptis enervatisqve viribus fractos ac defessos animadvertit, versis (ut ajunt) proris, arma in eos sine ullo discrimine per occasionem convertit, & plurimum Græciæ sibi subjecit. Is vita functus duos reliquit filios Solimanum & Pazaitem, quem superius à Tamerlane captum retulimus. Solimano extincto res universa ad Pazaitem deducta est, qui, priusquam caperetur, res magnas in Græcia gessit, dimissus verò nihil memoria dignum egit, mortemqve in Asia inglorius obiit, cujus filii qui complures erant, in potestatem Græcorum venire, cum capto patre periculum evasuri, ex Asia in Thraciam navigare contenderent. Calapinus tamen natu major emissus à Græcis regnum obtinuit, quo vita functo Orcani filio tenella ætate adolescentulo quorundam principum ductu regnum occupare conanti, Moyses patruus, & ipse à Græcis dimissus, infestis armis occurrit, & magis proditione quàm pugna oppressum, extinxit adolescentem. Haud multo post, & ipse nullo superstite filio decessit, quem Mahumetes frater, tertius ex Pazaitæ filius subsequens regnum in sua gente obtinuit: qui magnis rebus in Europa gestis, in Asia quoque complures Turcarum regulos vi atqve armis oppressos, regnis exuit. Huic defuncto successit Amurates filius, qui per tempus in Asia manens, audita patris morte, in Thraciam conatus trajicere, imperatoris Græcorum maritimo apparatu prohibitus est, & Mustaphas natorum Pazaitæ reliquus, ut rerum potiretur à Græcis liberatus, & summa ope adiutus. Sed Mustapha pugna superato & interempto, Amurates victor universum regnum obtinuit. Hic fuit Mahumetis, qui modò regnat pater, utriusque res gestæ memoriam exposcunt, quas, cum de Græcis agemus, haud quaquam reticebimus. Hæc est Ottomanorum progenies, & Turcarum origo, qui quanquam ea loca possident quæ olim Teuceri tenere, non tamen Teuceri appellandi sunt: alioqui & Dardanos, & Myfos, & Phryges, & multarum gentium quas vel in Asia vel Græcia subjecerunt nominibus appellare possemus. Sive enim ex Attica,

sive



sive ex Creta, quod ad mare probare videtur, Teucrorum origo fuit, nihil ad Turcas pertinet, quos Scytharum genus esse docuimus, barbaram & tetram progeniem: quamvis pluribus seculis in Asia Græciaque commorati vitam mitiorem induerint, & imperium utriusque terræ consecuti sint. Adeò Turcarum nomen auctum est, ut quæ olim Asia vocabatur, nunc Turciam vocitent. A Turcis enim universa possidetur, præter oram Trapezuntiam, quæ suo imperatori pareret Christianæ religionis cultori, quamvis Græco & nonnullis erroribus imbuta, adversus quem profectus hoc anno Mahumetes ejus imperium labefacturus existimatur. Habent & Armenii aliqui suum, ducem in Asia, qui Christum sequitur (ut antè diximus) reliqui omnes Turcarum potestati subjecli sunt: sed non omnes Turcæ Ottomanorum imperio subsunt: nam & Caramanus Ciliciæ dominus, qui magnam Cappadociæ partem possidet, & Asambecus qui prope Euphratem dominatur, & alii nonnulli reguli ab origine Turcæ, cum Ottomanni progenie diu de regni possessione certarunt. Caramanus inter Mahumetem Turcarum imperatorem, & Soldanum Ægypti dominum medius, multa per nostram ætatem, modò cum hoc, modò cum illo prælia gessit, locorum difficultatibus, & Ciliciæ gentis, cui dominatur virtute confusus, & odio Mahumetis Christianorum amicus. Nec Asambecus Ottomanorum prosapiam quiescere permisit, Christianæ conjunctus uxori, imperatoris Trapezuntii filix: quamvis parvi momenti est apud Turcas matrimonii nomen, quævis conjuges sunt, quot ducere voluerunt, impiam Mahumetis legem sequentibus, cum qua nobilem & pulcherrimam Asiam fecdaverunt. Eadem ab initio idola coluit, deorumque variis superstitionibus dedita, quamvis nonnullos admiserit Judæos veri Dei cultores: non tamen legem eorum accepit, sed quemadmodum hodie Judæi inter nos vivere permittuntur, ita & inter gentiles per Asiam sub tributo vitam agebant. Damnatissimus ille idolorum cultus usque ad Romanorum imperium perduravit, quibus ad Christum conversis, & in Asiam, & in omnem fere terram prædicatum per apostolos intonuit evangelium, & benigne auditum est. Credidit Asia Christo, & pulcherrimas erexit ecclesias, nec ulla ejus portio fuit Christianis non initiata sacris. Fatemur, plurima ibi & per Romanos, & per alios judices Christianorum persecutio acta est, sed victa gloriosa



gloriosa martyrum constantia, vicerunt & sanctissimi verbi Dei prædicatores. Erecta sunt monasteria virginum, & sanctorum patrum cœnobita, laudatus est in canticis dominus, & in odorem suavitatis sacrificatum est ei, cuncta populi ora, & omnes linguæ Christum insonuere, cui nulla non villa altaria dedicavit, & dona in ejus nomine consecravit. Cessavit omnis spurcitia veteris cultus, diruta sunt daemonibus sacrata templa, exusta simulacra, contritæ deorum imagines, omnis turpitudine, omnis blasphemia procul acta, evangelica vita recepta, sancti & pudici mores admissi, laudata virginitas, probata nuptiarum castitas, innocentia in honore habita, sobrietas & mansuetudo ore omnium commendata, nulla consuetudo admissa, quæ adversa sacrosancto evangelio videretur. verum Turcarum adventu cuncta immutata sunt. Mahumetea lex, quæ sub Heraclio imperatore cœperat, evangelium Christi repulit Christianorum desidia, qui petentibus opem Asianis neque consilio neque auxilio fuerunt. Rediit sceditas & pristina turpitudine. Nam quamvis simulacra horrent Turcæ, & unum se colere Deum dicunt: indigna tamen de Christo sentiunt, nec trinitatem adorant, haud intelligentes, quomodo possit Deus unus & trinus esse, & scripturam sacram depravarunt, voluptatis ac libidinis servi. Perierunt sacræ literæ, & omnia bonarum artium studia defecerunt, apud servos paucos Christi nomen auditur, neque illi, qui se Christianos appellant in Asia, veri Christiani sunt, non ambulantes ad veritatem evangelii: etli enim plurimi adsunt Græci Christianis imbuti sacris, multum tamen ab antiquorum sanctorumque patrum regulis abierunt, nec Romanam ecclesiam audire dignantur omnium fidelium matrem. Nimis multum est, quod in Asia perdidit Christus, nobilissima provincia à nostra religione est alienata. Et quot populos, quot præclarissimas urbes, quot insulas fama celebres, quot inelyta regna cum Asia perdidimus? in oratione qua dissuadet rex Agrippa Judæis apud Josephum, ne cum Romanis bellum susciperent, quingentas civitates in Asia minori ac propria fuisse comperimus. Et quæ unquam terra viros doctrina excellentes plures quam Asia protulit? Dum singulas percurrimus urbes, commemoravimus illustres viros: è septem, sapientibus, quos admiratur antiquitas, tres vel quatuor Asiaticos fuisse constat, quando ex ipsa continenti, aut ex insulis sibi adjacentibus



bus orti sunt. Homerus ipse inter poëtas præcellentissimus, haud dubiè Asiaticus fuit, quamvis eum apud se natum plures civitates decerent: & Hippocrates medicorum princeps ex Coö natus, Asiam honorat, & Aratus astrologus Solensis. Inter Philosophos sive stoicos sive peripateticos multi Asiatici claruerunt. Oratorum quoque & historicorum maximus numerus, sicut in particularibus relatum est. Theologi quoque nostræ religionis non pauci in Asia floruerunt. Sed unum omnium & primum & maximum satis fuerit commemorasse, Paulum Tarsensem, cujus epistolæ post evangelia primum sibi locum in ecclesia vendicarunt. Omittimus aliarum artium studia, architecturam, picturam, statuariamque, in quibus Asianorum ingenia facile principatum obtinere. Longum esset singula recensere, quæ apud Asiaticos præcipua extiterunt, & è septem miraculis orbis duo vel tria in Asia referuntur. Mausolei sepulchrum apud Cares, & Jovis sive Solis Colossus apud Rhodios, quos inter Asiaticos computavimus. Hæc longius fortasse quam par fuerat, recensuimus, ut intelligant, qui hæc legerint, quantum Christiana res publica perdiderit: atque hæc potissimum causa fuit, cur Asiam & ejus partes distinctè usque ad ad minutissimas describeremus. Dicit fortasse aliquis non minoris damni fuisse, vel Græciam amisisse, quæ omnium doctrinarum mater judicata est, & armorum gloria plurimum excelluit, vel Syriam, in qua primus homo visus, & in qua Christus natus & altus, humanum genus per crucem redemit, & viam qua cælum peteremus, aperuit. Utilius igitur fuisse has provincias descripsisse quam Asiam: sed neque nos illas negligemus, si vita comes fuerit, qui & orbis universi situm, & gentes percurrere decrevimus. Nunc de Europa dicemus.

## ASIE MINORIS ELEGANTISSIMÆ DESCRIPTIONIS FINIS.

Ee

ÆNEÆ





# ÆNEÆ SYLVII

## PII II.

### Pontificis Maximi,

in Europam sui temporis  
varias continentem historias

### PRÆFATIO.

**Q**ua sub Frederico tertio ejus nominis Impe-  
ratore apud Europæos, aut qui nomine  
Christiano censentur, insulares homines, ge-  
sta feruntur memoratis digna, mihiq; cognat, trade-  
re posteris quàm brevissimè libet: commiscebimus,  
aliqua interdum altius repetita, quemadmodum  
locorum, rerumq; ratio exposulare videbitur.

CAP.



CAP. I.

*De Hungaria, sive ut nonnulli volunt, Pannonia, de Sigismundo Imperatore catholica fidei ad unitatem insigni redactore, de Alberto rege Bohemo in Imperatorem Romanorum à Germanis electo, de Jacobo Marchiano ad tumultum sedandum crucifigero, de multis aliis & ducibus & regibus, inter quos de Matthia, qui ex carcere ad regnum est vocatus.*

**H**ungaria, quæ Austriæ Frederici patriæ contermina est, & in orientem vergit, principium narrationis præstabit. Hanc provinciam nonnulli Pannoniam vocant, tanquam Hungari Pannoniorum loco successerint: verum neque Hungaria Pannoniæ terminos implet, neque illa tam lata olim fuit, quàm nostra ætate Hungaria. Intra Danubium enim & Alpes, qui ad Italiam & Adriaticum respiciunt mare, Pannonia continebatur; ab occasu Noricum Oenumque amnem, ab ortu Mysos ac Triballos & flumen Savum contingens, intra quos limites Austriæ magna portio clauditur, & Teutonibus incolitur. Stiria quoque iisdem terminis continetur, Valeria quondam appellata. Hungaria verò, quamvis inferiorem Pannoniam à fluvio Leycha usque Savum complexa est, Danubium tamen transgressa ad Polonos usque protenditur, & quæ quondam arva tenuere Gepidæ Daci que possident. Imperium gentis Hungariæ multò latius est quàm ipsa Hungaria. Nam & Dalmatæ, quos Sclavos, & Illyrii quos Bosnenses, Triballi seu Myllii, quos tum Servios, tum Rascianos appellant, & Getæ, quos partim Valachos, partim Transylvanos nominant, Hungarorum imperium subierunt: etsi nonnulli ævo nostro Turcarum armis devicti defecerunt. Hanc provinciam, quatenus citra Istrum extenditur, sub Octaviano Cesare Romani primum obtinuerunt, Bacchone Pannoniorum rege subactis & Amantinis inter Savum & Dravum prostratis.



Daciam verò trans Danubium, quæ nunc Hungariæ portio est, Trajanus imperator edomuit, & in solo Barbarico provinciam fecit: sed amissa sub Galieno per Aurelianum recuperata est. Post Romanos aliquando Huni Scythica gens, aliquando Gothi ex insulis Balthici maris populi, deinde Longobardi ex Germania profecti Pannoniam occupare. Postremo Hungarorum natio ex ultimis Scytharum finibus inundavit, quæ usque in hanc diem regno potitur, & ultra citraque Istrum latè dominatur. Extat adhuc non longe ab ortu Tanais altera Hungaria, nostræ hujus de qua sermo est mater, lingua & moribus pene similis: quamvis nostræ civilior est Christi cultrix, illa ritu barbarico vivens serviat idolis. In Hungaria, quam Danubius interlabitur tempestate nostræ Sigismundus, Caroli quarti Romanorum imperatoris filius, natione Bohemus, origine Teutonicus, varia fortuna annos supra quinquaginta regnavit, princeps singulari prudentia, magnitudine animi, beneficentia & liberalitate insignis, corporis quoque majestate ac decore illustris, ceterum bello prorsus infelix: quem non Turcæ duntaxat, sed Bohemi quoque sæpe acie fuderunt. Uxor ei prima fuit Maria Ludovici regis filia, cum qua regnum accepit. Illius causa duos & triginta regulos in Hungaria primarios, qui aliquando rebellassent, gladio percussit. Ob quam rem ipse paulò post, regina factis functæ, in vincula conjectus est, mulierique viduæ, cujus virum interfecerat, in custodiam traditus, donec regni procures supplicium decernerent. Sed non defuit capto in extremis rebus providentia, qui ut erat facundia potens, mulieri longè melius esse ostendit regium sanguinem conservare quàm fundere. Dimissus ab ea Barbaram Hermannii comitis Ciliæ filiam duxit uxorem, nec diu postea comparatis auxiliis regnum vendicavit, de proditoribus supplicium sumsit. Mulieris viduæ filios & honoribus & opibus inter primos regni procures cumulavit: quorum adhuc alterius vivit filius Ladislaus Garus comes regni Palatinus. Multa hujus Sigismundi egregia facinora memoriæ prodita sunt, inter quæ illud præclarissimum, quod ecclesiam catholicam in tres partes divisam, coacto apud Constantiam generali concilio, ad unitatem redegit: Italiam, Galliam, Hispaniam, Angliam, hujus rei causa peragrans: Vitoldo Lituaniæ duci, ut se regem appellaret, missa corona indulxit. Prius tamen ille vita decessit, quàm solennia coronationis expleret. Prussiam, quàm rex Poloniæ Fratribus beatæ



beatæ Mariæ Teutonicorum armis ademerat, restitui jussit. Cum Venetis duce Pipone Florentino gravia bella gessit. Venceslaum Bohemiam germanum suum, quod regno inutilis esset, conjecit in vincula: quamvis negligenter custoditum magno reipublicæ malo quidam Bohemi è carceribus surripuerint. Coronam imperii ab Eugenio quarto pontifice maximo, Romæ accepit. Bohemia post multas calamitates vix tandem potitus est. Marchiam Brandenburgensem Frederico Burgraffio Nürenbergensi dono dedit, filiam Elisabeth ex Barbara natam Alberto duci Austriæ in matrimonium copulavit, illiqve demum apud Znoymam Moraviæ civitatem moriens, regna quibus præfuerat ultima voluntate reliquit, ossa ejus in Veradino jacent. Albertus apud Albam regalem cum conjuge coronatus, Bohemiæ quoque diadema suscepit. Cujus felicitatem admirati Germaniæ principes, & ipsi suum sanguinem extollere decreverunt, Romanum ei committentés imperium. Id Alberto suscipere non licebat, nisi primores Hungariæ indulgerent, quibus haud ex usu videbatur suum regnum Teutonibus imperare, atqve ob eam causam jurejurando Albertum obligaverunt, ne suo injussu imperium acceptaret. Vocati tamen ad regem, qui tum Viennæ fuit, victi precibus præbuere consensum. Ille imperio auctus, ad Hungariam rediit, adversus Turcas, qui tunc Rasciam invaserant, arma moturus. Sed dum Budæ moram facit (ea est regum sedes) jūdex civitatis natione Teutonicus, Hungarum, quempiam ob delictum fluvio demersit. Id Hungari molestissimè tulerunt, quibus Teutonicum nomen exosum est. Excitatur è vestigio tumultus, Hungari arma capeffunt, obvios Teutones passim trucidant, fit fuga in arcem, qua rex se continebat, diripiuntur negotiatorum domus, quorum pars major teutonica fuit. Evangelizabat eo tempore Budenlibus Jacobus Marchianus, ordinis minorum professor, doctrina literarum & vitæ sanctimonia clarus, qui sedaturus tumultum, simulacrum Salvatoris crucifixi manu gestans, furenti armatoqve populo obviam factus, ut cædi parcant, ut rapinis abstineant, ut arma deponant, supplex orat. Illi verba ejus minimè intelligentes (neq; enim tempus ferebat interpretem) bene sibi futurum autumant, qui Christum suis cœptis ducem habeant, sublimemq; Jacobum, simulq; Crucifixum in ulnis attollunt, ac bacchati per urbem, nunc istam, nunc illam domum compilant. Fiunt tamen aliquanto minora spolia, & à



cardibus temperatum est ob præsentiam Jacobi, qui modo precibus,  
 modo lachrymis furorem incensæ plebis lenire conatus est. Sedato tu-  
 multu Georgius Palocius Strigonienſis eccleſiæ pontifex moritur,  
 apud quem prætioſa regni ſuppellex in cuſtodia fuit. Rex Strigonium  
 petit, & regina cum eo, aperiuntur arcæ in quibus theſaurus obſer-  
 vabatur coram regina, & ſelectis regni baronibus. Illa clam ſubtra-  
 cta corona ( quam ſacram appellant ) ſidelique anui tradita, arcas  
 claudit atque obſignat. Albertus paulo poſt Drauum uſque fluvium  
 proficiſcitur, ibique caſtrametatus majores copias expectat, cum qui-  
 bus Turcas invadere poſſit Sindronium obſidentes, prius tamen ex-  
 pugnatum eſt oppidum quam auxilia venirent. Ipſe Budam rever-  
 ſus, cum dyſenteria laboraret, Viennam repetere ſtatuit, ſive moritu-  
 rus inter ſuos, ſive quod aërem, in quo fuerat enutritus, conferre  
 aliquid ad ſanitatē ſperabat. Sed in itinere magis ac magis morbo  
 affectus, relicta uxore prægnante, obſignatoque teſtamento, in villa  
 quæ Longa dicitur, ſexto Calendis Novembris è vita deceſſit: Reli-  
 gioſus princeps, & qui liberalitate ſimul juſtitiaque præſtaret. Fuit  
 quoque in bellis audax & manu promptus, Moravos ac Bohemos ar-  
 mis ſubegit, Polonos late vagantes intra regnum ſuum coërcuit.  
 Magna de ſe Chriſtiana reipublica promittere videbatur, nec minora  
 populi de ſua virtute conceperant, pulcherrimæ ſpei ſatiſfieri brevi-  
 tas vitæ non ſivit. Repente occidit, quæ brevi ad ſummum potentia  
 creverat: neque enim biennio toto imperavit. Statura ejus procera  
 fuit, nervoſum & validum corpus, facies terrificæ, more gentis eræſa  
 barba, ſuperius labium intenſum, veſtem haud ſplendidam balteus  
 auro gravis cinxit, nec unquam lateri deſuit enſis. Corpus ejus in Al-  
 ba reconditum eſt. Cognita regis morte, convenientes Hungari in-  
 dignum ac periculoſum exiſtimantes, tantum regnum unius ſceminæ  
 judicio ſubjacere, reginam magnis precibus hortantur, Uladiſlaum  
 Poloniae regem, qui populum armis tueretur, ſibi ut virum adſciſcat.  
 Conſentit mulier, ea conditione adjecta, ne quod filio præjudiciū  
 fiat, ſi maſculum pariat. Legantur in Poloniam prælati eccleſiarum, &  
 principes regni nati & authoritate majores, quibus iter agentibus, La-  
 diſlaus poſthumus naſcitur, qui mox ut in lucem prodiit, apud Albam  
 regalem, & baptiſmum Chriſtiana fidei ſignaculum, & militiæ cin-  
 gulum, & ſacram Hungariæ coronam, quam mater penes ſe habuit,  
 eandem



eadem die accepit. Inde sublatus in tutela Frederici Caesaris, duodecim ferme annis fuit, cui mater & ipsum & coronam commendavit. Legati quamvis prohibente regina Uladislaum adire, quem magnis pollicitis oneratum in Hungariam traxerunt, & imposito diademate, regem salutavere, quo cum diu Ladislai mater vario eventu armis contendit, Hungaris in duas partes divisis. Ulricus comes Ciliæ, dum consobrinæ studet, Ladislaoqve regnum defendit, captus à Polonis diu in carcere maceratus est. Dionysius archiepiscopus Strigoniensis, qui postea Cardinalatus honore donatus est, genere ac moribus illustris, utriqve regi diadema imposuit: alteri volens, alteri coactus. Vocatus enim ad Polonum, quamvis publica fide accepta Budam petivisset, non prius libertati suæ redditus est, quam Uladislaum in Alba coronavit. Ipse quàm primum potuit domum reversus, Polonorum conatibus summo studio adversatus est. Julianus cardinalis sancti angeli ab Eugenio pontifice maximo in Hungariam missus, vir summo ingenio, singulari facundia, excellenti doctrina, quamvis inducias belli inter Uladislaum & Elisabeth ad certum tempus composuerit, pacem tamen efficere non valuit. Regina mortua, omnes pene Hungariæ optimates ad Polonos descere, solus Gischra Bohemus rei bellicæ peritissimus, & manu promptus, Ladislai partes in Hungaria tutatus est, qui sæpe cum parva militum manu, ingentes Hungarorum Polonorumqve copias vicit, fudit, delevit, bisq; Joannem Huniadem magnis exercitibus cinctum castris exiit. Hic Joannes natione Valachus fuit, haud altis natalibus ortus, sed ingenio dextro, & animo sublimi, & virtutis amator, multa cum Turcis secunda prælia fecit, & hostium spoliis Hungarica templa ditavit, primusqve omnium apud Hungaros Turcarum acies & frangi, & vinci posse monstravit. Quibus ex rebus excitatus Uladislaus, & prælium cum Amurate Turcarum imperatore committere non dubitavit, de quo postea suo loco dicemus. Fœdus inter Fredericum & Uladislaum, qui se regem Hungariæ appellavit, Julianus Cardinalis ea lege composuit, ut liceret imperatori Hungaros coercere, si quod in Austria, Stiria, & damnum inferrent. Idem permissum Uladislao est in Frederici subditos Hungariam infestantes. Guncium oppidum in Hungaria est, Stiria atqve Austria proximum, hoc latrones occupavere, & pleraqve circumjecta castella, ex quibus in Austriam profecti, magnam

vim



vim pecorum atque hominum abegerunt. Motus ea re Fredericus comparatoraptim exercitu in Hungariam trajecit, munimenta expugnavit, ex latronibus octoginta furca suspendit. Cum cecidisset in bello Uladislaus, conventus Hungarorum apud Pestam habitus est: locus hic trans Danubium Budæ opponitur, neque muris cinctus, neque magnificis domibus exædificatus, villæ speciem gerit. Hic Ladislaus Alberti filius communi procerum consensu rex designatur, suisque deinceps auspiciis in Turcis pugnare cœpit, nec tamen felicitiora ejus prælia, quam Poloni fuerunt. Joannes Huniades regni gubernator assumptus, absente rege provinciam (ut ajunt) in virga ferrea gubernavit. Nec, dum rex affuit, minor eo habitus est. Hic prostratis apud Albam Turcis (quemadmodum in rebus Rascianis referemus) brevi tempore supervivens, morbo extinctus est. Ferunt eum cum ægrotaret, noluisse dominicum ad se corpus deferri, indignum esse dicentem servi domum intrare regem, jussisse sese, quamvis deficientibus viribus, in templum vehi, ibique de more Christiano confessum, divinam Eucharistiam suscepisse, atque inter sacerdotum manus Deo animam reddidisse. Felix spiritus, qui tantæ rei, quanta gesta est apud Albam, nuntius atque author migravit in cœlum. Ladislaus qui ex tutela jam pridem imperatoris emissus, & in paterna regna receptus, Turcarum metu ex Hungaria in Austriam se contulerat, audita Turcarum strage, & gubernatoris morte, quo cum Ciliæ comes apertum gerebat odium, impellente ipso comite, qui veluti sublato æmulo latabundus id nuntii audiverat, rursus in Hungariam rediit: sed dum apud Albam spolia Turcarum, & interemptorum, hostium cadavera respicit, comes ipse, cujus caput erat à rege secundum, & qui jam solus tanquam regis avunculus leges Hungaris præscribebat, à Ladislao Huniadis filio in Castro regio obtruncatur, inde necem consecutus, unde speravit imperium. Offensus ea remirum in modum regius animus, dolorem tamen suppressit, nec dubitavit avunculum jure casum sateri. Cadaver defuncti in Ciliam missum est. Rex Budam se contulit, ubi secutus curiam Huniadis filios in carcerem rapi jussit, percussoremque comitis Ladislaum natu majorem capite plecti. Matthiam captivum duxit in Austriam, & profectus in Bohemiam eum pone sequi mandavit. Ipse paucos dies Pragæ moratus, sive morbo pestifero, ut plerique tradiderunt, seu veneno, ut alii

assumant,



affirmant, obiit diem, nobilissimus sanguis paterna origine ac materna ex imperatoribus ortus. Matthias, quæ die rex clausit oculos, eadem Pragæ applicuit, quem Georgius gubernator in custodiam suam recepit. Corpus Ladislai apud proavum Carolum IV. Romanorum imperatorem in arce Pragenſi atque in æde sancti Viti reconditum est. Defuncto Ladislao rege Hungari ad eligendum successorem ad Calend. Januariæ diem constituunt. Proceres apud Budam frequenter conveniunt: inter quos Michaël Rylagus magna militum stipatus caterva præsto adest: XIII. millia equitum, peditum VII. millia eum secuta feruntur, quibus stativa in Pesta fuerunt. Michaël frater, conjugis Huniadis & Matthiæ avunculus fuit, cui propter necem Ladislai nepotis, cum plerisque regni baronibus acerrimæ similitudines erant. His potentia ejus haud parvum ingessit terrorem: nec jam, perculsa metu concio, liberam regis electionem futuram arbitrabatur. Michaël verò conventum adiens, non se idcirco armatos adduxisse, ait, ut vim congregatis inferat, sed ut eos deterreat, si qui sint, qui libertatem principum ac popularium in assumendo rege perturbare, conentur. Illud tantum se veluti unum ex regni accolis monere, ut Joannis Huniadis beneficia meminerint, qui unus omnium Turcarum arma ab Hungarico regno depulerit, clarasque genti victorias pepererit, indigna suis meritis præmia reddita. Ex filiis ejus alterum crudeliter occisum, alterum in Bohemia captum servari, posse Barones memoriam Joannis extollere, Matthiam ex captivitate redimere, atque in ejus regni fastigio collocare, quod pater sua virtute servasset: neque ferendum, ut ad externos ea potestas deferatur. Parcere se omnibus, qui nepoti fuissent insidiati: regni salutem ante oculos ponere: si quem provinciæ utiliore esse arbitrentur, nihil obstare, quo minus melior eligatur. Fuit res aliquamdiu anceps, cum Baronum sibi quisque timeret. Postremo reconciliatione inter proceres facta, cujus autorem Joannem sancti Angeli cardinalem, virum doctrina & moribus excellentem, qui tum legatum agebat Apostolicum, tradidere, Matthias octo & decem natus annos, nono Calend. Februarii, inter quadraginta millia virorum, qui medio in Danubio tum glacie constricto, impatientes magni frigoris, secreti electionis exitum expectabant, rex acclamatus. Nunc quisquis hæc legis & futura prædicito: singulare prorsus humanæ inconstantiae documentum, ex duobus adolescentulis



ætate moribusque pene paribus, alter ex regio solio dum novæ nuptæ thalamum exornat, defertur ad tumulum: alter dum capitale iudicium trepidus manet, ex carcere vocatur ad regnum. Libertas ejus ex gubernatore Bohemiæ sponsalitiis atque aliis pactionibus emptarefertur. Mirabile quod matrem repentina læticia non exanimaverat, cum cladibus afflicta prius regem appellatum audierit, quam vinculis exemptum. In parte Hungariæ, quæ trans Danubium in Septentrionem porrigitur, & nunc Sepusium vocant, olim Gepidæ confedere. Insignis latro Examites, natione Bohemus, Hussitarum pestifera labe infectus, milites prædandi cupidos undecunque ad se venientes benignè collegit, eosque fratres appellavit, & universam religionem illam tributariam sibi reddidit, exædificatis munitionibus locis opportunis, ex quibus modò in unam, modò in alteram partem discurrere posset, prædas in fine cujusque mensis viritim divisit. Ex quibus non plus accepit, qui totum mensem, quam qui diem unam ante divisionem in castris fuit, numero fratrum ascriptus. Id sibi ex Evangelio præceptum affirmavit, quod in vinea domini laborantibus, & qui prima, hora, & qui undecima venerant, æquam mercedem promittit. Hæc societas tum longè lateque rapinas agere, & jam quinque millia pugnatorum in armis habere, indiesque crescere, non aliter dissipari potuit, quam duce ipso Examite ad stipendia Ladislai regis vocato.

## CAP. II.

*De Transsylvania regione, Teutonibus, Siculis & Valachis populis eam incolentibus.*

**T**Ranssylvania regio est ultra Danubium sita, quam Daci quondam incoluere, feroces populi, & multis Romanorum cladibus insignes: nostra ætate tres incolunt gentes, Teutones, Siculi, & Valachi. Teutones è Saxonia originem habent, viri fortes & bello exercitati, à septem civitatibus quas inhabitant Sibenburghenses patrio sermone appellati. Siculi Hungarorum vetustissimi creduntur, primi omnium qui ex Hungaria veteri in hanc provinciam venerint. Eam ob causam quamvis agros suis colunt manibus,



ac rure viventes, greges pecorum pascunt, nobiles tamen appellantur, & concurrentes invicem, alter alterum generosum dominum salutant, nec tributa pendunt, nisi quo anno rex Hungariæ coronatur. Tunc enim quot sunt patresfamilias, tot boves regi tradunt, quorum numerum supra sexaginta millia esse ferunt. Jussi verò in bellum exire nisi pareant, capitali poena plectuntur, bona fisco applicantur. Valachi genus Italicum sunt, quemadmodum paulò post referemus, paucos tamen apud Transsylvanos invenias viros exercitatos Hungariæ linguæ nescios. In hac provincia oppidum fuit, quod Bistricum vocare regiae coronæ subiectum. Id Ladislaus rex cum Viennæ ageret, Joanni Huniadi dono dedit. Tulerunt id ægrè oppidani, diuque resistere, coacti tamen imperata fecerunt. At mortuo Joanne, ejusque filio Ladislao Budæ occiso, Michaëlem Rylagum, qui pro Matthia altero Johannis filio regnum petebat, turpiter rejecerunt. Ille indignatus quàm primum Ladislai regis mortem accepit, eò cum exercitu rediit, vi oppidum expugnavit, rebellium civium aliis oculos eruit, aliis manus amputavit, aliis necem intulit, oppidum incendio delevit, ingressi sunt paulò post Transsylvaniam Turcarum circiter tria millia, prædamque magnam abegerunt pecorum atque hominum: quos insecuti Sibinenses & ipsi Teutones ad interfectionem usque deleverunt, victoresque præda recuperata domum rediere. Vix civitatem introierant, cum Michaël ex alia parte haud parvas ducens copias affuit, civitati exitium parans, quæ Bistricensibus adversum se opem tulisset. Sed cum Sibinenses intra munitissimam urbem se continerent, frustratus desiderio suo, minitabundus recessit. Apud Hungaros obiit ætate nostra Paulus Vergerius Justinopolitanus, Græcis ac latinis literis apprimè instructus: cujus plura extant opera ab eruditis probata. Arrianus, qui Alexandri magni gesta Græco sermone conscripsit, Latinus ab eo redditus est, hortatu Sigismundi Cæsaris. Scripsit de ingenuis moribus, græcas ac barbaras amicitias comparavit, adversus Malatestam, qui Maronis statuam in foro Mantuano dejici jusserat, nobilem invektivam edidit. Ex Hungaris, qui studia humanitatis secuti ævo nostro claruerunt, duos novimus, Joannem episcopum Varadiensem, qui regni cancellariam obtinuit, & alterum Joannem ejus ex sorore nepotem, qui sub Gvarino Veronensi Græcas ac Latinas literas didicit, nec minus versu quam soluta valet ora-



tione: horum tamen originem Sclavonicam ferunt. Scientiam juris plurimi professi sunt, inter quos Dionysius excelluit gente Canysianatus, qui Strigoniensem sortitus ecclesiam, honorem quoque cardinalatus (ut antè diximus) emeruit. In re militari Nicolaus Vayuoda Transsylvanus, Michaël Ursatius, & qui Calisium invasit, Pancratius, nomen adepti sunt. Nunc clarus habetur Michaël Rilagi ex aliena ruina magnus. Joannes Huniades, cujus nomen ceteros obnubilat, non tam Hungaris quàm Valachis, ex quibus natus erat, gloriam auxit. Valachia perquam lata regio est, à Transsylvanis incipiens, usque in Euxinum protensa pelagus, plana fere tota, & aquarum indiga, cujus meridiem Ister fluvius excipit, septentrionem Roxani occupant, quos nostra ætas Ruthenos appellat, & versus fluvium Thiram Nomades Scytharum genus, quos Tartaros hodie vocitamus. Hanc terram incoluerunt quondam Getæ, qui Darium Histaspis filium turpi fuga repulerunt, & Lysimachum regem vivum in potestatem pertraxerunt, & Thraciam pluribus cladibus affecerunt. Postremo Romanis armis subacti ac deleti sunt. Et colonia Romanorum, quæ Dacos coerceret, eo deducta duce quondam Flacco, à quo Flaccia nuncupata. Exin longo temporis tractu, corrupto ut fit vocabulo, Valachia dicta, & pro Flacciis Valachi appellati. Sermo adhuc genti Romanus est, quamvis magna ex parte mutatus, & homini Italico vix intelligibilis. Inter Valachos tempestate nostra duæ factiones fuere, altera Danorum, altera Dragularum: sed ii cum Danis impares essent, atque ab illis multifariam opprimerentur, Turcas in auxilium vocavere, quorum armis adjuti, Danos pene ad internecionem deleverunt. Danis verò Joannes Huniades Hungarorum imperio fretus opem ferens, non tam illos restituit quàm sibi ipsi claritatem & opes acquisivit. Quippe qui Danorum agros ex potestate Turcarum ereptos, & sibi & posteris perpetua possessione retinendos occupavit. Valachi & insulas Istri accolunt, inter quas Peucen apud veteres fama notam, & in Thracia quoque sedes habent. Valachorum pars Turcarum imperio, pars Hungaris subjacet. Non me latet difficillimam esse provinciarum descriptionem, quando & authores ipsi quos imitari oportet, non solum varii, verum & inter se contrarii ac magnopere dissidentibus inveniuntur, & ipsarum provinciarum limites pro dominantium authoritate ac potentia saepenumero commutati. Nam quæ



quæ provincia latissima quondam fuit, ætate nostra, aut extincta est, aut permodica. Contra verò quæ nulla vel minima extitit, nunc latissimam florentissimamque videmus. Longobardiam ac Romandiolam non cognovere majores, nostra tempora Insubriam, Æmiliam, ac Flaminiam prorsus ignorant. Macedoniam Æmathione Rege, à quo Æmathia cognominata, perangusti clauserunt termini: virtus postea regum, & gentis industria, subtractis finitimis populis, longè ac latè protendit. Dent igitur veniam, æquum censeo, si qui mea scripta legentes non eos locorum terminos offenderunt, quos ipsi vel mente sua conceperunt, vel apud alios invenerunt, quæ ab aliis accepimus, seu antiquis seu novis autoribus, incorrupta referimus, quamvis non est propositi nostri geographiam edere, licet aliquando historiam quam scribimus, locorum aliquam significationem requirat: sic enim clarius redditur.

## CAP. III.

*De Thracia & populo in ea, quomodo Byzantium, quod & Constantinopolis dicitur, à Constantino imperatore Romanorum jñt muris & pulcherrimis edificiis auctum. Idem de Synodo facta super sancti spiritus processione.*

**P**ost Valachos igitur & Hungaros, de quibus sermo habitus est, Thraciensium res gestæ sese offerunt. Thracia verò (ut plerique authores tradunt, ipsique præstantiores) amplissima provincia est, longè latèque patens. Cui ab oriente Euxinum pelagus ac Propontis occurrit. A meridie Ægæum mare, & Strymon fluvius, simulque Macedonicus ager. Septentrionem Ister claudit. Occidentis oram tum Pœoniæ montes, tum Pannonia, & Sava excipit amnis. In qua sententia & Plinium Veronensem fuisse video, & Strabonem ipsum, qui juga montis Hæmi, Thraciam dividere mediam affirmat, idemque Dardanos, Triballos, Mysos incolere Thraciam non ambigit. Triballos autem eos coluisse campos, in quis vel Rasciani modo, vel



Servii sedes habent, nemo negabit, qui scripta veterum præsentium statui coaptaverint. Mysii verò post Triballos ad orientem usque in Euxinum protenduntur, inter Istrum & Æmum montem habitacula sortiti: hos hodie Bulgaros appellant. Post quos maritima loca versus meridiem ad Hellespontum usque Romania est, natio Græca, quamvis olim Barbara fuerit, & iterum nostro tempore deleta Græcorum imperio, dominantibus Turcis in Barbariam redit. Hujus provinciæ Metropolis est Byzantium, Agios prius appellata. Lacedæmonii eam condidere duce Pausania, quibus Apollinem consulentibus, ubinam sedes quærerent, mandasse oraculum memoriæ proditum est, ut contra cæcos habitationem locarent. Cæcos autem Megarenses appellavit Chalcedonis conditores. Qui cum prius in Thraciam navigassent, situmque ubi postea Byzantium ædificatum est, conspexissent, omiſsa tam locuplete ripa, tenuiorem è regione in Asia delegissent. Hæc Strabo. Constantium verò imperatorem cognomine Magnum, cum statuisſet imperii sedem ex urbe Roma in orientem transferre, quo facilius Parthorum excursions compesceret, tradunt ecclesiastici authores in Troadem profectum, ibi regie urbis fundamenta jecisse, ubi quondam Agamemnon ceterique Græcorum principes adversus Priamum regem fixere tentoria. Sed admonitum in somnis, Christo salvatore locum alium designante, coeptum opus, cujus diu mansere vestigia, infectum reliquisse, atque in Thraciam navigantem Byzantium petivisse, eumque sibi locum divinitus ostensum dixisse, mox urbem ampliassè, nova mœnia erexisse, sublimes excitasse turres, magnificentissimis tum privatis tum publicis operibus exornasse, tantumque illi decoris adjecisse, ut altera Roma non immerito dici posset. Scriptores vetusti qui florentem videre, decorum potius in terris habitaculum quam imperatorum putaverunt. Nomen urbi novam Romam imperator indidit. Sed vicit obstinatio vulgi, ut à conditore potius Constantinopolis vocaretur. In hac urbe multa sub imperatoribus Episcoporum concilia celebrata, multæ suppressæ in Christiana religione surgentes hæreses, multæ inventæ, inter quas ea diutius mansit, quæ de processione Sancti spiritus, quamvis in pluribus agitata ac rejecta conciliis, ad nostram ætatem usque perveniens, denique sub Eugenio quarto pontifice maximo in Florentina Synodo (quemadmodum suo loco dicetur) non solum à Latinis



tinis, sed ab ipsis etiam Græcis damnata explosaque est. Verum, quanquam Joseph patriarcha, & Johannes imperator gentis ejusce cum Latina ecclesia concordibus animis fidei symbolum decantaverint, Constantinopolitana tamen ecclesia credere, quod Romana sentiret, velut nefas duxit. Obierat in Florentia Patriarcha, qui unioni consenserat. Nec imperator domum reversus diu supervixerat. Constantinus, qui ei successit, sive deceptus, sive sponte sua infaniens, haud quaquam unioni consentiens videbatur. Et jam Gregorium Patriarcham priori suspectum, quod ad veritatem fidei ambularet, domo pepulerat, ecclesiastica bona invadens. Miserat eo Nicolaus Pontifex Romanus Isidorum episcopum Sabinensem, universalis ecclesiae cardinalem, virum industrium, & qui Ruthenorum ecclesiam jamdudum rexerat, percontatum, quam ratione græcanica natio legatorum suorum conventa rejiceret, cum Latinis Florentiae habita? Jam ille imperatorem ejusque senatum in rectam viam pellexerat, cum Turcarum bellum, duce & authore Mahumete, veluti repentina tempestas in Constantinopolitanos emerfit, de quo paulò post suo loco dicetur.

## CAP. IV.

*De Turcarum origine, & propagatione, victu,  
& moribus eorum.*

**V**ideo complures ætatis nostræ non authores aut poëtas duntaxat, verum etiam historicos eo errore teneri, ut Teucrorum nomine Turcas appellent. Credo eos idcirco motos, quoniam Turcæ Trojam possident, quam Teuceri coluere: sed illi originem ex Creta atque Italia sumpserunt. Turcarum gens Scythica & Barbara est, de cujus origine atque progressu, quamvis propositum egredi videar, dicere haud alienum existimo: quando sub ævo nostro in tantum hoc genus hominum auctum est, ut Asiam Græciamque tenens, Latinum Christianumque nomen latè perterreat. Et narratio res quoque Thracienses aperiet, de quibus institutus est sermo. Turcæ ( ut Æthicus philosophus tradit ) ultra Piricheos montes & Taracon-



Taracontas insulas contra aqvilonis ubera, id est, ad septentrionalem oceanum sedes patrias habuere: gens truculenta, ignominiosa, & in cunctis stupris ac lupanaribus fornicaria. Comedit, quæ cæteri abominantur, jumentorum, luporum, & vulturum carnes, nec abortivis hominum abstinet. Diem festum nullum colit, nisi mense Augusto Saturnalia. Romanorum imperium audivit magis quam sensit, quamvis Octaviano Augusto in auro littorio censum dedit, & id quidem sponte. Nam tum vicinas undique regiones annua illi tributa reddere animadvertit, novum dierum ac temporum Deum exortum esse arbitrata, munera ei quotannis transmisit. Hæc gens teste Othone historico & Imperatoris Frederici patruo, regnante apud Francos Pipino, à Caspiis portis egressa, cum Avaribus (quos Hungaros nostra vocat ætas) seroci pugna, multis utroque desideratis conflavit. Exin Pontum, Cappadociamque transgressa, ad reliquas inde finitimas gentes sensim dilapsa, more latronum clandestinis quibusdam excursionibus vires sibi vendicans, occupatis quibusdam montibus, & claustris opportunis, unde per occasiones facile irruptiones fieri possent, usque adeò emerfit ac sublata est animis, ut palam jam & pari Marte adversum finitimos de agri possessione certaret: & denique procedenti tempore non solum Pontum & Cappadociam, verum Galatiam, & Bithyniam, Pamphyliam, Pisidiam, utramque Phrygiam, Cilices, Cares, & eam Asiam quæ minor vocatur, ad oras usque Ionii & littora Græci maris occupaverit, non unum quendam principem, sed alios alii duces & varia auspicia quasi per factiones secuti. Ex hac gente (quemadmodum Nicolaus Sagundinus vir Græcæ ac Latinæ historiæ peritissimus ad nos scripsit) vigesimum ab hinc & centesimum circiter annum Ottomanus exigui tum census & obscuri inter privatos nominis, ex collectitia milite non parva manu per seditionem conflata, grassari passim, ac non solum reliquias Christianas vexare, verum etiam homines suæ gentis armis infestis petere, & sibi subdere cœpit. Cujus conatibus orta inter Turcarum principes seditio, facilem cursum præbuit. Nam illi dum sese invicem laniant, accitis undique omnibus, qui pro ingenio prædæ rapinæque percipidi essent, auctoritatem brevi & nomen adeptus est, oppida non pauca partim vi, partim seditione in potestatem accepit. Ottomano filius successit Orcanes, qui rem inchoatam à patre commodè persecutus,



cutus, admodum propagavit. Eum Amurates filius subsecutus est, qui duobus de Græcorum imperio disceptantibus, ab altero qui superari timebat, in auxilium accersitus, Turcarum primus transivit in Græciam, ubi consulto bellum protrahens, postquam ambos enervatis consumptisque viribus, fractos ac defessos animadvertit, versis (ut ajunt) prorsus, arma in eos sine ullo discrimine per occasionem, convertit. Et occupato Callipoli oppido, peropportunè in Chersoneso ad Hellepontis fretum sito, cetera græca oppida apertè petere bello, palamque sibi & posteris Græcorum polliceri imperium non dubitavit, magnamque Thraciæ partem, nullis ferme obsistere audentibus, ditioni suæ subjecit. Is vita functus duos reliquit filios, Solmanem & Pazaiten. Solmane brevi è vita subtrahito, res universa ad Pazaiten deducta est. Qui prosperos fortunæ adeptus afflatus, usque adeo novelli regni fines extulit, ut Thraciam pene universam, excepta Constantinopoli ac Pera, Thessaliam, Macedoniam, Phocidem, Bœotiam, Atticam, majori ex parte occupaverit: Mylos quoque, Illyrios, Triballos crebris excursionibus infirmaverit. Constantinopolim verò tum omni agro, suburbanisque ac delitiis spoliavit: tum longa & perdifficili obsidione vexavit, ut cives desperata salute de ditione agere cœperint, petissentque procul dubio, & in hostis sævissimi potentatem venissent, ni Tamerlanes ille Scytharum præpotens rex, instar torrentis ipso incurso atque impetu cuncta prosternendo ac vastando, Pazaiten ipsum occurrere ac reluctari conantem, magno prælio & ingenti strage superatum in Asia cepisset. Hic est ille Tamerlanes terror gentium, in cujus exercitu duodecies centena millia hominum fuisse traduntur, Xerxe ac Dario major, quorum copiis siccata flumina prodiderunt. Iram ipse se Dei vocitavit, nec nomini crudelitas defuit. Multas ac præclaras Asiæ urbes delevit, homines tanquam pecora trucidavit, non ætati, non sexui pepercit. Damascum nobilissimam Syriæ urbem diripuit atque incendit. Pazaiten catena vinctum prandens, quasi canem sub mensa sua comedere jussit, ascensus equum, eo tanquam scabello usus est. Post cladem Pazaitæ, filii ejus, qui complures erant, in potentatem venerunt Græcorum, cum periculum evasuri in Thraciam trajicere contenderent. Calapinus autem natus major emissus à Græcis, tandem patrium regnum obtinuit. Adversus quem Sigismundus rex Hungariæ collatis signis



prælium iniens, tumultuose susus, castra & impedimenta reliquit, Christianorum ingens occisio facta. Joannes dux Burgundiæ in eo prælio captus, multo auro libertatem redemit. Calapino mortuo Orcani ejus filio tenella ætate adolescentulo Moyse patruus & regnum & vitam eripuit, qui paulopost sine filio decedens Mahumetem fratrem reliquit heredem. Is Valachis fortissimis & bellicosissimis nationibus trans Danubium (ut antè diximus) late dominantibus, bello attritis tributa gravia imperavit. Nonnullos in Asia Turcarum regulos armis oppressos regnis penitus spoliavit, Christianos sub imperio suo degentes quàm durissimè afflixit. Mahumete mortuo Amuratenus ejus filium, qui per id tempus in Asia morabatur, audita patris morte, in Thraciam trajicere conantem, imperator Græcorum diu prohibuit, Mustaphamqve reliquum ex Pazaitæ filiis, ut rerum potiretur, emisit & summa ope persecutus est: sed Mustapha pugna superato & interempto, Amurates victor universum regnum consecutus, Thessalonicam illustrem Græciæ urbem, quàm tum Veneti possidebant, vi captam, expugnatamq; penitus diripuit, eaq; victoria auctus, Epirum atqve Ætoliæ non obscuras provincias reliquo regno adjecit. Illyriorum agros vastans, oppida multa vi cepit, diripuit, atqve incendit. Uxoribus more gentis quamplurimis junctus est, inter quas Georgii Servie Despoti filiam duxit. Nec diu post immemor affinitatis, adversus eum duxit exercitum. Georgius impar generi potentiæ, furentem veritus hostem, relicto uno ex filiis, qui cum præsidio Synderoniam tueretur, cum conjuge cæterisque liberis ac gentis suæ sacerdotibus in Hungariam profugit. Expugnata est tamen Synderonia ac direpta. Despoti filio lumen ademptum, Georgius patria expulsus, diu apud Hungaros exulavit. Joannes Huniades jam per arma clarus, sæpe cum exercitu Serviam ingressus, plurimis cladibus Turcas affecit, eorumqve duces acie conflixit. Verum quamvis Servie magnam partem recuperavit, non tamen Georgio cuncta restituit, multa dedit amicis. Neque injuria, cum & ipse sua virtute repulisset hostes, & Georgii suspecta fides esset, qui medius inter Hungaros ac Turcas nunc hos, nunc illos sefellisset. In his verò quæ religionis essent, neque Romanæ ecclesiæ auscultaret, neque Mahumetis legem sequeretur.



## CAP. V.

*De bello contra Turcas ab Hungaris duce Johanne Huniade commisso. Item de altero ab iisdem contra eosdem magno Christianorum detrimento facto.*

**L**ibet, quoniam huc ventum est, hujus opera ad finem prosequi. Cum malè pugnatum esset in prælio Varnensi, de quo paulò post dicemus, fugiens Huniades in Serviam se recepit. Sensit adventum ejus Georgius, atque obviam factus venientem interceptit, & quasi hostem conjecit in vincula. Nec prius dimisit, quàm oppida suæ ditionis ab eo pridem occupata recepit. Nec multo postea cum Joannes versus Sophiam copias duceret, videreturque non parva Turcis illaturus damna, Amurata omnia Hungarorum consilia patefecit. Unde ille admonitus maximam Christianis intulit cladem, quemadmodum suo loco referetur. Cum verò Turcæ Constantinopolim evicissent, atque in Serviam ducere exercitum minarentur, secundo auxilia petens ad Hungaros transiit, & in Austriam usque profectus Ladislaum adiit regem, grandævus jam senex dignus veneratu, si recta de religione sensisset: ea in eo sermonis autoritas, ea corporis majestas fuit. Accessit hunc Joannes Capistranus ordinis minorum professor, vitæ munditia & inter prædicatores Evangelii nostro tempore insignis, quæsit, an audire se vellet? Annuenti, quod Romana ecclesia credit & docet exposuit, diu secum per interpretem de sacris eloquiis disputavit, ut errorem suæ gentis relinqueret, magno pere cohortatus est. Ille hoc denique responsum dedit. *Annis nonaginta vitam produxi, nec aliam religionem quam suscepi à patribus novi, sapientem me civis mei, quamvis infelicem hactenus putavere, tu nunc, quod sæpe agitant, senem delirum efficere cupis, laqueo vitam finire malim, quam patrum traditiones relinquere: atque his dictis è conspectu abiit: tam periculosum est religionem imbuisse damnatam.* Reversus domum, cum accepisset Michaëlem Zilagum, qui cum Albæ cum præsidio præerat, fratremque ejus Ladislaum quadrigis



drigis veſlos urbem exiſſe, milites miſit, qui eos vel comprehenderent, vel occiderent. Michael ubi adeſſe hoſtes animadvertit, curru deſiliens, equum quem pone ducebant aſcendens veloci fuga ſalvatus eſt. Ladislaus in quadrigis repertus, multis vulneribus conſoſſus ac diſcerptus interiit: ſed non impune id Georgio ceſſit. Cognovit & Michael paucis poſt diebus illum prope Danubii ripam iter habere, aggreſſusqve cum armatis captivum abduxit, cui dextræ manus duos digitos amputavit, cum ſe gladio defenderet. Redemptus eſt Georgius magno auri pondere, non tamen diu ſupervixit, cum truncæ manus fluore liſti non poſſet, atqve hic perfidi hominis exitus fuit. Lazarus filius poſt eum, gubernationem ſuſcepit, excluſo fratre, nomine Georgio, quem qvondam Amurates excæcaverat. Is cum ſore (quam nupſiſſe Amurati diximus) ad opem Mahumetis confugiens, fruſtra ejus auxilium imploravit. Obiit deinde Lazarus, de cujus hæreditate non parva contentio exorta eſt. Georgius Turcarum auxilio paternum regnum vindicare nititur. Uxor Lazari relicta Hungaricas opes implorat, nec Cateçuzina Ulrici comitis Ciliæ qvondam uxor ac Georgii filia portionem hæreditatis deſperat. Joannes Cardinalis Sancti Angeli ab Hungaris inuitatus, eò proſectus, ut arces Raſcianas, quæ Turcis in Hungariam aditum præcludunt, aut Apoſtolicæ ſedis nomine recipiat, aut Hungaris tradi curret: rebus inſectis non ſine gravi periculo (vix enim Turcarum manus evaſit) Budam rediit. Nos Amuratis opera, quæ medio curſu reliquimus, proſequamur. Magnus hic vir fuit, domibelliqve tam ſuis amatus quam noſtris odioſus, cum centum millibus pugnatorum intravit Hungariam late populatus provinciam, ſterilis annus impedimento fuit, ne regno potiretur. Commeatus penuria compulſus rediit. Julianus cardinalis ſancti Angeli ab Eugenio pontifice maximo adverſus eum miſſus, Hungarorum extulit animos, & arma ſumere perſuaſit. Exercitus Chriſtianus uſqve Sophiam ad Arcum magnum proſectus eſt. Sæpe cum Turcis proſperè dimicatum non ſine Joannis Huniadis ingenti laude, qui cum copias ducitavit. Cujus nomen apud hoſtes adeo terrificum fuit, ut plorantibus pueris matres familias taciturnitatem non aliter imperarent, quam Joannis præ-



præsentiam minitantes. Congregati tamen non parvo numero Turca, cum Christianis configere non dubitarunt. Sed non tam felix eis pugna, quam fortis animus fuit: superati virtute Hungarica, multis caësis, terga dedere. Hungari, qui bello interfuere, cupiditate gloriæ res suas ampliantes, ac de magnis majora tradentes, Imperatori Frederico, superatos bello Turcas scripsere, triginta millia hostium caësa, captaque multò plura. Cardinalis sancti Angeli sex millia duntaxat hostium in eo prælio cecidisse suis litteris affirmavit. Signa militaria novem capta. Joannem Huniadem non ducis tantum, sed militis quoque singulari virtute usum, ei que fides habita. Turcis his Christianorum victoria plus pavoris quam damni attulit, non Hungaricas tantum vires, sed Germanicas quoque in se commotas arbitrantibus. Consternati ergo ac perculsi metu, perinde ac totus occidens conjurasset, pacem petiere. Hungari qui suas vires non ignorarent, nec tam potentia suæ quam casui victoriam imputarent, periculosum existimantes sæpius tentare fortunam, oblatas ultro condiciones pacis non recusarunt. Inducia belli in decem annos dictæ, iusiurandum per sua sacra ambæ partes præstiterunt, Despoto Servia quæ bello amiserat, reddita. Molesta ea res Juliano Cardinali fuit, cui prosequenda victoria videbatur. Eugenio quoque Romano pontifici nihil molestius nuntiari potuit, cuius menti nulla major cura insedit, quam Christianæ fidei propagandæ. Scripsit igitur Cardinali, nullum valere tædus, quod se inconsulto cum hostibus religionis percussum esset. Vladislao regi Polonia, qui eo tempore Hungariam occupabat, uti conventa dissolueret, imperavit: juraamenta remisit: novum instaurari bellum tum precibus tum minis extorsit. Ex Christianis principibus auxilia petiit, præter Philippum tamen Burgundia ducem, neminem Christiana religionis zelus commovit: hic solus classem instruxit, quæ usque in Hellespontum profecta, Turcis ex Asia transitum prohibere in Europam conata est. Franciscus Cardinalis Venetiarum, Eugeni nepos, cum pluribus eò missus classi præfuit. Vladislao qui alienum regnum invalisset, è re sua visum est, sollicitudinem belli provincialibus non deesse. Accersitis igitur ex Polonia ac Bohemia, cæterisque vicinis gentibus auxiliis, coactis ex Hungaria copiis, Turcarum agros invadere statuit,



Joanni Huniadi castrorum cura commissa quadraginta circiter equitum millia fuisse traduntur, plerique dimidio minorem numerum prodidere, reguli Hungariæ pontificesque quamplurimi interfuere. Julianus sancti Angeli cardinalis, milites cruce signatos non paucos secum duxit. Iter per Valachiam receptum, deinde transito Danubio in Mysiam ventum, ut per plana & campestris loca in Romaniam transirent. Amurates hostium cognito adventu, cum Græcis ac Turcis in Europa manentibus non satis confideret, exercitum ex Asianis militibus comparavit. Sed angebat animum trajiciendi freti non mediocris cura, qui classem apostolicam obtinere pelagus non ignorabat. Anxio (ut ajunt) & multa volventi animo, Genuenses quidam curas ademere, qui suis navibus accepta pecunia transportare copias promiserunt. Locus est ubi non amplius quam stadia quinque latitudo freti continet, inter Propontidem & Euxinum pelagus: tantum est spatium quod Europam Asiamque determinat. Bosphorum Thracium dixerunt majores, à Bizantiorum cornu sexaginta ferme stadiis distantem. Hic Amuratis exercitus transvectus est, aureo nummo vectoribus per capita tradito, quæ si vera est fama, centum millia fuisse ferunt. Nam Christiani locum attigerant, cui Varna est nomen, cum adventare innumerabiles hostium copias nunciatum est. Cedendum Uladislao Cardinalique videbatur, & ne circumveniri ab hoste possent, munitum montanumque locum petendum. Huniades adversari ac resistere, Turcarum se nosse vires dicere, famam semper majorem esse, quod si Turcæ omnes adsint, Hungaris tamen impares fore. Illos aurea & discolori veste, Hungaros ferro atque are fulgere, Christianum agmen & stare paratum & æqui, nec turba nec sarcinis prgrave intentum, quod dux non modò signet, sed etiam innuat. Contra si Turcarum mores inspiciantur, foeminas magis existimari debere quam viros, si fugiat exercitus Christianus, quem rex Hungariæ ducit, in quo legatus Apostolicus adest, in quo tot nobilissimi proceres militant, nunquam deinceps Hungaris contra Turcas futurum animum. Vicit Huniadis sententia, expectati hostes, postera die, sive majoris exercitus speciem præbuere quam fama ipsa vulgaverat, sive quod metuentibus omnia vero majora videntur, sive quod Amurates in cogendo milite, vulgatæ opinioni haud quaquam defuerat, territus Huniades eo conspectu tum primum periculi



riculi magnitudinem animo volvens, de fuga regem admonuit. Ille serum consilium arguens, perniciosam magis fugam quam pugnam dixit. Commisso praelio sperari victoriam posse, sepe minoribus exercitibus cessisse majores, nec tam multitudinem bellatorum, quam audaciam & ordinem præstare victoriam. Deum quoque respicere meliorem causam, præstantioremque se paucis (si modo audeant) exhibere, fugientes victoriam hosti tradere, feriendaque terga, & multam suorum cædem. Magnifica quoque verba Joannis pridie dicta, plenus irarum rex exprobravit, jussisque omnibus arma capere, praelium expectavit. Amurates in proximo colle confederat, ex quo suos pariter atque hostes spectare potuit, dato belli signo quindecim millia equitum qui pugnam provocarent, facto globo in Christianos impetum fecere. Singulis albæ super loricas vestes fuere, quæ vento agitatae instar alarum præ se ferebant: totidem viridibus induti sagulis sequebantur. Aurea equorum siena multorum visa, & multis galearum argenti atque gemmarum nitor, ipsas quoque gladiatorum vaginas prægrandes uniones ornabant. Non detrectavere Christiani certamen. Itum est ferocibus in pugnam animis: Superior acies nostra Turcas in fugam vertit, quamplurimis primo impetu prostratis. Perculit ea res magno metu Amuratem, nihil tale verentem, fugisset protinus prodito exercitu, ni circumstantes Satrapæ comprehenso ejus equi freno, ignaviam ejus increpassent, fugientque comminati necem fuissent. Perstitit ergo vel invitus, jussisque fortissimis arma sumere, praelium instauravit. Pugnatum est summa contentione pluribus horis, nunc Turcis nunc Christianis propinquiore victoria sese præbente. Cadebant hinc atque inde quamplurimi, plures ex Turcis, quorum corpora parum tecta, facile sagittæ ensesque penetrabant. Postremo cum novus in hora hostis incederet & sauciorum loca integri occuparent, non tam virtute quam numero superati Hungari, paulatim referre pedem cœpere. Tum Vladislaus cum globo suorum, quos erga se non minus fortes quam fidos habuit ex Polonia, ut hostes ex acie victores diverteret, Christianisque animum redderet, in tumultum quem teneri ab Amurate diximus, circumjectosque undique currus impetum fecit. Ibi nova pugna commissa, novus injectus Amurati pavor, trepidatum totis callis, nec jam consistendi animus aderat. Quod si Hunyadi par animus ac regi fuisset, & arridenti fortunæ dedisset manus, haud dubium

quoniam



quin ea dies & Amurati vitam & posteris ejus imperium Græciæ abstulisset. Verum ipse, ut primum cedere Christiana signa conspexit, cum militibus Hungaris ac Valachis ex acie se subtraxit, atq; insalutato rege nutante adhuc victoria fugam arripuit. Fortasse rei militaris perito nulla in pugna salus visa, & salvare aliquos quàm perire omnes maluit. Poloni acceptam eo prælio cladem, Huniadis vecordia, atque ignavia tribuerunt, ipse sua consilia spreta conquestus est. Ulladislauus suæ sorti dimissus, dum fortiter circa munimenta hostium pugnât, eqvo dejectus & obtruncatus est. Caput ejus hasta infixum per Græciam atque Asiam in signum victoriæ populis ostentatum. Poloni ad unum cæsi omnes, direpta castra, & quæ munitiones curruumuebantur: necati episcopi, & proceres Hungariæ qui aderant eadem calamitate oppressi. Julianus Cardinalis, dum fugit amisso prælio, cum jam hostes evasisset, Hungarorum perfidiam evadere non potuit. Potum eqvo dantem apud stagnum forte repertum latrunculi quidam novere, & arbitrati pecuniam apud eum esse, dejectum eqvo necaverunt, & ablatis vestimentis nudum cadaver feris ac volucris dimisere. Hic exitus viri fuit magni certè & admirabilis, in quo ne scias doctrina major an eloquentia fuerit. Grata hominis præsentia, blandi mores, vita in omni ætate nitida, religionis zelus, qui omnia pro Christo & mortem ipsam ferre suserit. Huniadem (ut antè diximus) fugientem, Despotus Serviaë cœpit. Poloni regem suum jam peracto bello pluribus annis vivere crediderunt, captum non interfecitum arbitrati. Cardinali Venetiarum ejus culpa cladis magna in parte imputata est, qui neque fretum (uti par fuerat) custodivit, neque transvectos hostes Christianis ducibus (quod secundum fuerat, ejus officium) nunciavit. De numero cælorum minimè constat: illud exploratum est, longe plures ex Turcarum acie cecidisse, cæterum pro numero copiarum longè majus damnum Christianis illatum. Victor Amurates neque fugientes hostes insecutus est, neque gloriabundis inter suos magnifica verba jactavit, neque ut antè asseverat, hilarem vultum ostendit. Interrogatus quidnam tristior esset, & cur non victis hostibus exultaret: *Nollem (inquit) hoc modo sapius vincere, jubensq; vasa colligi, copias quæ superfluerant, domum remisit.* Ipse Adrianopolim reversus, Deo suo, quæ pro victoria fecerat, vota persolvit. Exin volvens animo, regni curas veræ felicitatis expertes esse, inconstan-  
tiam



tiam quoque fortunæ veritus, quæ nulli perpetuo bona est, accersitis provinciarum majoribus, Mahumetem ex liberis suis natu majorem pro se regem constituit. Ipse privatam deligens vitam, in Asiam profectus, cum paucis otii sui comitibus, religioni cuidam solitariae sese addixit. Calibassa inter Satrapas Turcarum opibus & autoritate major, Mahumeti, qui nondum per ætatem aptus esset imperio, gubernator datus. Reliqui regis filii, ne quas regno turbas excitarent, more gentis necati sint. Felicius apud Turcas priyatis quam regibus liberi nascuntur.

## CAP. VI.

*De alio bello per Huniadem, qui ignominiam apud Varnam acceptam abolere cupiebat, celeriter apparato, & quod Amurates à vita privata ad bellum ducendum sit revocatus.*

**E**ffluxit deinde non parvum tempus, in quo nec Hungari Turcas, nec Turcæ Hungaros armis laceffere præsumperunt. Sua, quemque calamitas domi attonitum tenuit, cruentissima Varnensis pugna vires utriusque partis eliserat. Nec Turcis, neque Hungaris Rex bello idoneus erat, hos Huniades, illos Calibassa alieno nomine gubernavit: ferocior Huniades, rei que militaris peritior, ignominiam Varnæ acceptam oblivisci non poterat. Unde dies noctesque meditabatur, quonam pacto abolere infamiam, & resarcire damna maximè posset. Spem bene gerendæ rei Turcarum quies præbuit, qui jam pridem nullum belli apparatus ostenderant. Vires illis atque animos defuisse ratus, tempus idoneum existimavit, in quo pristinam recuperare gloriam posset, Turcasque pessundare, quibus si adsint exercitus, imperatorem tamen prorsus defuturum arbitrat, nec magis existimandum exercitum sine duce, quam ducem exercitu carentem. Coactis ita repente copiis ex Hungaria, accersitis Bohemorum auxiliis, mercenariorum quoque militum, non parva manu coacta, ducere exercitum in Turcas statuit, quos prius aggredi ac conficere credidit, quam novissimè ex Hungaria nunciaretur.



Eam rebus gerendis solertiam ac celeritatem adhibuit. Consilium ejus Gregorius Despotus Serviae (ut ante diximus) Turcarum ducibus patefecit, magnumque genti periculum imminens majus ostendit. Perculsi con nuncio Turcæ, quid agerent, non satis intelligebant. Amurates jam senior religioni addictus, regni curas abjecerat, Mahumetes ætate minor tantam belli molem ferre posse non credebatur, Calibassæ de futuram obedientiam putabant, quæ nihil est in bello magis necessarium. Trepidare igitur, æstare, modò huc, modò illuc mentem convertere, nullum consilium satis placere. Hærentibus in deliberatione satrapis, nil tandem salubrius visum, quam revocare ab otio Amuratem. Neque enim veterani militaturi sub alio credebantur, nec fortunam belli tentandam arbitrabantur, quam sub eo, qui vincere consuevisset. Calibassa ejus sententiæ fuit. In qua re Mahumetis animum vehementer offendit, cupientis in ea expeditione sese virum ostendere, verentisque ne imperium amitteret, si pater iterum regnum assumeret: ut sunt hominum mutabiles voluntates. Missi ergo legati Amuratem revocare, qui comparato mox exercitu in hostem profectus, non aliter quam si ad prædam pergerent, alacres milites duxit. Jam Huniades cum copiis Sophiam transierat, prostratisque qui occurrerant locorum præfectis, hostiles agros latè populatus, loco qui Basilia vocatur, castra posuerat. Cum adventare Amuratis copiae nuntiantur, non expectavit Huniades provocari, prior ipse pugnam iniit. Commisso prælio anceps diu certamen manlit. Quæ parte pugnavit Huniades, fusi hostes terga dedere, nec parva strages edita: parimodo & Amurates in cornu suo victor, Hungaros fudit. Postremo cum victor victorem incurreret, non tulerunt Christiani Turcarum impetum, qui quanquam virtute præstarent, numero tamen superati, non tam victi quam fessi compulsi sunt cedere. Huniades postquam suos neque minis neque precibus sistere potest, cum paucis ex bello profugit. Multi Hungariæ procures, & nonnulli ecclesiarum episcopi in eo prælio cecidere: gregarius miles ad internecionem caesus, nec tamen pauciores ex Turcis interiere, emptam multo sanguine victoriam, Amurates domum retulit. Nec diu postea relicto Mahumeti regno, quemadmodum prius destinaverat, mortem obiit. Corpus ejus more majorum in Prusa sepultum. Ea est Bithyniæ civitas, & Asiatici regni caput. Paulo antequam obiisset, Amurates uxorem



rem duxerat, filiam Sponderbei nobilis in Penderacia satrapis, ex qua natum filium nomine Chialapium sextum agentem mensem, Calibassæ moriens commendavit. Ille Mahumetis gratiam initurus, & matrem & puerum ei prodit. Mahumetes accersitis triginta (ut ajunt) matronis, quæ puerum cognoscerent, postquam certam Amuratis sobolem esse constitit, strangulatum matri filium reddidit, funusque regio more fratrum duxit, auspicia regni parricidio consecrans. Sunt qui Calibassam alienum puerum Chilapini nomine supposuisse, ferunt, illumque pro filio Amuratis necatum, Chilapinum verò apud Constantinopolim clam educatum. Post capturam verò urbis inde, subtractum, ac Venetias ductum, & hunc esse quem Calixtus Pontifex maximus pro fratre Mahumetis in palatio custodiri jubet. Nos veri periculum ad Græcos remittimus, quamvis multa in hisce rebus figmenta intervenire non ignoramus, & sæpe tonsoris filios, regio defungi honore viderimus.

## CAP. VII.

*De Mahumete fidei Christiana ferali inimico, & quod Constantinopolim Thraciæ urbem excellentissimam armis & Christiana fide spoliaverit.*

**M**Ahumetes igitur defuncto Amurate gubernacula regni ex voto adeptus, instituta majorum pro ingenio correxit. Leges ipse suas domi forisque tulit, ararium locupletavit, nova vectigalia excogitavit, copias auxit, in proceres aut, aulicos sævire contumeliarive cœpit. Hic est ille Mahumetes, qui Constantinopolitanis (ut supra innuimus) bellum intulit, de quo nunc referre, ut accepimus, haud alienum fuerit. Volverat jam pridem animo Mahumetes, quonam modo Constantinopolim sibi subigere posset, neque ad suam gloriam pertinere arbitratur, urbem in medio Turearum sitam esse, quæ suo imperio non pareret, tantoque majus inde nomini suo deus accedere, si eam urbem expugnaret, quanto progenitores sui idem conati, turpius à cœptis desitissent.



Cum paucis igitur participato consilio, castellum juxta litus ad ostium Bosphori paulò ab urbe remotius, aliud dissimulans incredibili celeritate extruxit, atque munivit, bellum deinde urbi non modo indixit, sed contra multa foedera, contra jusjurandum intulit, simul & gerere coepit. Senferant ejus animum Græci, dissidentesque suis viribus ad Latinorum opes confugerant, lachrymis auxilia expetentes. Surdæ (proh pudor) nostrorum principum aures fuere, cæci oculi, qui cadente Græcia, ruituram Christianæ religionis reliquam partem non viderunt: quamvis privatis quemque aut odiis aut commoditatibus occupatum, salutem publicam neglexisse magis crediderim. Mahumetes interea coactis undique copiis, mirabili apparatu, formidando animo & impetu, terra marique regiam urbem aggressus, cuniculis ac latentibus fossis altissimis actis, aggere latè edito, ponte, qua Peram oppidum versus mare muros alluit urbis, longitudinis ad duo milia passuum raptim extructo, turribus ligneis eo usque erectis, ut muros quamvis altissimos excederent, machinamentorum tormentorumque multiplici adhibito genere oppugnata est urbs, defensaque summis utrinque viribus. Non paucis diebus ad extremum voce præconis totis castris inclamatum est; *quinto Calend. Maji milites omnes jejunium sanctificent, sequente die in armis adsint, urbem extremis viribus oppugnaturi: triduo civitatem militum direptioni futuram.* Constituta die jejunium ad noctem usque servatum. Exin lucentibus stellis invitationes ac convivia passim habita, ut quisque amicum propinquum notumque habuit, cum eo hilaris epulatus est: atque ubi satis est bibitum, tanquam se deinceps nunquam visuri essent, amplexati, exosculatiqve simul ultimum vale dixerunt. In urbe autem sacerdotes sacras ferentes imagines, sequente populo, urbem lustrare, auxilium de cælo petere, affligere corpora jejuniis, atque orationibus universi cives intendere. Subsecuta nocte, ad sua quisque loca descendenda redire. Erant muri urbis & altitudine & crassitudine toto orbe celebres, sed ob vetustatem & Græcorum injuriam pinnis ac propugnaculis nudi, antemuralia verò opportune communita. In his Græci salutem posuere. Armati milites inter muros & antemuralia pugnam sustinere decreverunt. Triangularem penè urbis formam fuisse tradunt. Duas partes alluit mare. Nec muri desunt ad pullandos navales impetus idonei. Quod reliquum est, ad terram vergens post alta mœ-

nia



nia & antemuralia (quæ annotavimus) ingenti clauditur fossa. Cœptum est prælium paululum antè lucem, cum miles Turca periculum quam moræ patientior esset, ac vulnera & sanguinem prædarum dulcedine pensaret, pugnatum est in tenebris majore Turcarum perniciæ, in quos tela superne librabantur. At postquam illuxit, dato signo undique, non solum Constantinopolis, sed etiam ipsa quoque Pera, ne quid auxilii Græcis præstaret, oppugnari cœpta est. Sua cuique legioni murorum pars, ac portarum attributa, ut discretus labor fortes atque ignavos distingueret, & ipsa contentione decoris militum virtus magis ac magis accenderetur: pari modo & navales socii attributas partes invadere jussi. Admoventur urbi lignæ turres. Convehunt milites dolabras, falces, scalasque. Etiam elatis super capita scutis, densa testudine succedunt. Græci saxorum pondera provolvunt, disiectam fluitantem testudinem lanceis contisque perscrutantur, donec soluta compage scutorum exangues lacerosque prostraverunt: fit strages, & jam Turcæ deficientibus animis, languidius pugnant. Sed adest Mahumetes fortissimum quemque nominatim vocitans, utque in prælium redeant adhortatur: hos præmiis allicit, illos minis deterret. Instauratur ex integro certamen. Turcæ rursus subruere murum, portas quaterere innixi humeris, & super iteratam testudinem scandentes, præhensare hostium tela brachiaque nituntur. Iterum integri cum sauciis, semianimes cum expirantibus evolvuntur. Cernitur varia pereuntium forma, & plurima mortis imago: Joannes Justinianus apud Genuam Ligurum Metropolim nobili loco natus, qui superioribus diebus solus urbem defendisse videbatur, in hoc certamine vulneratus, ubi fluitare sanguinem suum animadvertit, ne cæteros deterreret, medicum quærens, clam sese pugnae subtrahit. Sed imperator, ut abesse Justinianum cognovit, quo ierit, percontatur, inventumque rogat, ne pugnam deserat. Ille nihilo magis flexus, aperiri portam jubet, qua curaturus vulnus in urbem redeat. Erant enim obseratae utrisque januæ, quibus ad antemuralia patebat iter, ne qua fugiendi facultas militi esset, ac propterea fortius hosti resisteret: fit interea remissior defensio, quod Turcæ animadvertentes, acrius incumbunt. Et quoniam pars muri jam tormentis æneis disiecta, fossam magna ex parte oppleverat, per ruinas ipsas scandentes, antemurale conscendunt, Græcosque loco deturbant. Porta quæ



Joanni patuerat, omnibus aperta, fugam profusio-  
 rem reddit. Tunc imperator non ut regem decuit pugnando, sed fugiens in ipsis portæ  
 angustiis cum cecidisset, oppressus calcatusque obiit. In tanta multi-  
 tudine pugnatorum duo tantum reperti sunt, qui se viros ostende-  
 rint, alter Græcus, alter Dalmata, Theophilus Palæologus, & Joan-  
 nes Sclavus, qui fugere turpe putantes, cum diu Turcarum impe-  
 tum sustinuissent, multosque obruncassent, denique non tam victi  
 quam vincendo fatigati, inter cadavera hostium occubuerunt. Justi-  
 nianus in Peram cum divertisset, inde Chium navigavit, ibique seu  
 vulnere seu mœstitia in morbum incidens, inglorius vitam finivit. Fe-  
 lix si in ipsis Bizantii mœnibus animam exhalasset. In ingressu portæ  
 occingenti circiter milites ex Latinis Græcisque periere, partim vulne-  
 ribus à tergo confossi, partim concursione oppressi. Et jam hostis  
 superiorem murum tenebat, saxaque in cives devolvens, ingredien-  
 tibus suis auxilio erat. Tum subito capta urbe, cæsis omnibus qui resi-  
 stere ausi sunt, in rapinas est itum. Erat victorum infinitus numerus,  
 in libidinem, in sævitiam corruptior, non dignitas, non ætas, non se-  
 xus quæquam protegebat. Stupra cædibus, cædes stupris miscebantur.  
 Senes exacta ætate, scæminas viles ad prædam in ludibrium tra-  
 hebant: ubi adulta virgo, aut quis forma conspicuus incidisset in ma-  
 nus rapier tium, divulsus ipsos postremo direptores in mutuam per-  
 niciem agebat. Dum pecuniam vel gravia templorum dona sibi quis-  
 que traheret, majore aliorum vi truncabatur. Cumque in exercitu  
 maximo ac diffuso, ex civibus sociis atque externis conflato, diver-  
 sæ linguæ, varii mores, atque cupidines essent, & aliud cuique fas, ni-  
 hil illicitum toto triduo in Constantinopoli fuit. Templum Sophiæ  
 Justiniani Cæsaris opus toto orbe famatum, & cui comparari alterum  
 nequeat, nudatum sacra suppellectile, ad omnes spurcicias patuit: ossa  
 martyrum, quæ fuerant in illa urbe pretiosissima, canibus objecta &  
 suis. Sanctorum imagines aut luto scædata, aut ferro deletæ. Alta-  
 ria diruta. In templis ipsis aut lupanaria meretricum facta, aut eqvo-  
 rum stabula. Coacti sunt servi verberibus ac tormentis dominorum,  
 abdita scrutari ac eruiere. Inventi non pauci thesauri, quos in ipso bel-  
 li principio infelices suffoderunt cives. Quibus si pro defensione urbis  
 usi fuissent, suam fortasse vitam, & patriæ libertatem servassent. Sed  
 avaro in aurum nulla potestas: captivi omnes in castra deducti, pudet  
 dicere



dicere Christianorum dedecus, dicam tamen & posteritati tradere non verebor, quando persuasum mihi est futuros aliquando & fortasse antequam moriar, qui tantam Salvatori nostro illatam ignominiam ulciscantur. Simulacrum Crucifixi, quem colimus, & verum Deum esse fatemur, tubis ac tympanis præeuntibus raptum ex urbe, hostes ad tentoria deferunt, spuito, lutoque fœdant, & ad nostræ religionis irrisionem iterum cruci affigunt. Exin pileo, quem sarculum vocant, capiti ejus imposito, corona undique facta, *hic est* (inquiunt) *Christianorum Deus*. Tum lapides, lutumque jactantes, miris dehonestant modis. Sed nihil hæc obsunt Deo nostro cœlum tenenti. Nec majestatem ejus quoquo modo imminuere possunt, cujus ea gloria, ea sublimitas est, ea beatitudinis perfectio, ut nec laudibus humanis extolli, nec humiliari vituperiis ullis possit. Nos ista lædunt, atque confundunt, qui per ignaviam atque desidiam, dum veri dei cultum perire sinimus, & in hoc sæculo bonum nomen & in altero spem salutis amittimus. Post hæc convivatus Mahumetes, cum forte plus solito adbibisset, ut sanguinem mero adderet, principes optimatesque civitatis captos, crudelis & sanguinarius carnifex fœdè miscereque jugulari jussit. Rirelucas, qui apud imperatorem plurimum poterat, cæso ante oculos majori filio, altero ad illicitos usus reservato, securi percussus est: duo ejus alii filii occiderant in bello. Isidorus Cardinalis in eo tumultu captus, cum veste mutata non fuisset cognitus, trecentis asperis sese redemit, id est genus pecuniæ admodum levis. Multi & Veneri, & Genuenses, & Latinorum alii gladio cæsi sunt, quidam, multo redempti auro. Insignis hic annus fuit expugnatione Constantinopolitana, tam Christiano populo fœdus ac lugubris, quam Turcarum genti faustus lætusque, qui ab ortu Salvatoris Christi secundus & quingagesimus supra millenum quadringentesimus cucurrit. Perennes vetus colonia Genuensium, qui & Galatæ nuncupantur, cognita Byzantium clade, priusquam rogarentur, Mahumeti deditionem fecere. Muri urbis diruti, multorum bona contra fœdus direpta, læmina puerique ludibrio habiti,



## CAP. VIII.

*De Mahumete in Hungaria ad Savum usque flumen exercitum ducente, & ab Alba vulnere sub papillam accepto turpiter refugiente.*

**C**Alibassæ, qui ad eum diem non sine Mahumetis displicentia vixerat, tanquam Constantino imperatori Turcarum consilia prodidisset, per miseros cruciatus vita erepta: ingentes quas cumulaverat opes, exitio ei fuisse traduntur, & quod Amuratem dimisso imperio ex privata vita revocavit ad regnum. Auctus ejus pecunia Mahumetes, tanto rerum successu tumens, in Hungaros expeditionem parare cœpit, qua per triennium circiter instructa, accersitis ex omni regno proceribus, penetratis Thraciæ montibus cum maximis atque infestissimis copiis ad Savum usque flumen pervenit: centum quinquaginta millia hominum in ejus exercitu fuisse traduntur. Plerique tertiam partem huic numero subtraxere. Calixtus tertius, qui per idem tempus Romanam cathedram sortitus erat, Joannem Cardinalem sancti angeli, ejus supra meminimus præstanti virtute virum, qui Germanos in arma conciret, Turcarumque compeceret impetum, ad eas partes legatum misit. Is promissa peccatorum indulgentia, cunctis qui contra Turcas militare vellent, adjuvante Joanne Capistrano, qui per idem tempus Hungaris evangelizabat, cruce signatorum haud parvum congregavit exercitum, non divitum, ac nobilium, sed inopis atque incompoliti vulgi. Surda opulentum aures evangelio, nec divinus sermo principibus auditus. Contenti præsentis rerum statu potentes, futurum Christi regnum non nisi morientes inquirunt: credula paupertas faciliè prædicatoribus obedit. Supra quadraginta millia, signum crucis acceperunt. Tecta magis fide, quam ferro acies. Huniades quoque non parvas copias in armis habuit. Appropinquabat spe plenus, & incredibili superbia tumens Mahumetes, nec jam sibi vel montes, vel flumina obstare putabat, gloriari inter suos, Hungariam jam pene victam asserere, Latinorum imperatorem in propinquo esse dicere, deletum Græcorum imperio, Latinorum instare finem, Turcis omnia paritura, spolia ingentia promittere,



mittere, Germaniam atque Italiam militum direptioni offerre, pervia cuncta Turcarum armis jactare. Sed quam gloriosus ejus adventus, tam turpis atque infamis recessus fuit. Albam ad confluentes Danubii Saviqve sitam parvam urbem oppugnare adorsus, obtinere nequam potuit. Perfregit machinis priores muros, irrupere in urbem, ejus acies, pugnatum est interdum noctuqve: nunc victi, nunc victores visi hostes, ad extremum vulneratus sub papilla Mahumetes, reliquis impedimentis, per noctem trepidus aufugit. Hujus pugnae seriem in historia Bohemica comprehendimus: non est, cur hoc loco latius insistamus. Autores victoriae tres Joannes habiti, Legatus Cardinalis, cujus auspicio res gesta est, Huniades & Capistranus, qui praelio interfuere. Verum neque Capistranus Huniades, neque item, Capistrani Huniades mentionem fecere, in eis literis, quas de obtenta victoria, sive ad Romanum pontificem, sive ad amicos scripsere: per suum quisque ministerium Deum dedisse Christianis victoriam affirmavit. Avarissima honoris humana mens, facilius regnum & opes quam gloriam partitur. Potuit Capistranus patrimonium contemnere, voluptates calcare, libidinem subigere, gloriam verò spernere non potuit. Dicat forsitan aliquis, non suum illi honorem curae fuisse, sed Dei, qui per pauperes & inermes rem Christianam salvare voluerit. Cedimus huic assertioni, quamvis & Huniades ministrum se victoriae, non autorem dixerit. Ferunt Mahumetem ab eo tempore nunquam postea ejus cladis meminisse, quin mentum barbarumque manu demulcens, quassans caput, ei diei maledixerit, quae pugnam ad Albam conferuit.

## CAP. IX.

*De Macedonia, urbibus, fluminibus, montibus,  
& aliis in ea rebus.*

**P**roxima Thraciae ad occidentem ac meridiem conjungitur Macedonia, terrarum imperio quondam potita, quae inter duo maria protenditur, Aegaeum & Adriaticum. Latus ejus meridionale Thessaliae atque Magnesia terga protegunt, partem septentrionalem Praonia & Paphlagonia excipit, quamvis & ipsae regiones in-



Macedonum postea jura concesserint, Macedonia addita. Epirus quoque Macedonia attingit, ex Illyrica terra, altera meridiem, septentrionem altera excipiens. In Adriatico littore Dyrrachium vetus civitas jacet, ab Chersoneso ubi sita est, nacta vocabulum, Epidamnus antea dicta, & à Corcyreis olim condita. Nec procul infra Apollonia fuit optimis instituta legibus, Augusti Cæsaris, qui Græcas ibi literas didicit, studio memorabilis. In altero littore Thessalonica est, potens quondam civitas, quam cum epistolæ Pauli apostoli, tum magni Theodosii præceps atque implacabilis ira famatam reddidere. Indignatus enim ob cæsos in eo judices, alioque clementissimus imperator, universum urbis populum trucidari mandavit, undecim millia virorum, cæsa traduntur. Non tulit Ambrosius Mediolanensium pontifex tam immane facinus incorruptum. Imperatorem ab ingressu templi prohibitum, subire poenitentiam compulit. Nec maximus princeps pastoris subire judicium recusavit. Hinc lex promulgata, ut lata super morte hominis sententia, ante dies triginta non exequatur. Hanc urbem liberæ conditionis fuisse Plinius tradit. Strabo conditorem ejus Philippum Alexandri patrem affirmat, ambo eam attribuunt Macedonia. Andronicus Emanuelis imperatoris Constantinopolitani filius, hac in parte hæreditatem accepit, demumque Joannis fratris odio, qui patri successit in imperio, Venetis tradidit. Amurates Turcarum (ut antè diximus) imperator eripuit, hic reliquam Macedonia usque ad montes Pæoniæ, & quam modò Albaniam vocant, imperio suo subjecit. Mira rerum mutatio & fluxa humani imperii gloria. Hæc est Macedonia, quæ duobus inclyta regibus, Græcia Thraciaque subacta imperium protendit in Asiam, Armeniam, Iberiam, Albaniam, Cappadociam, Syriam, Ægyptum, Taurum, Caucasum, subjugavit. Hæc in Bactris, Medis, Persis dominata, toto oriente possessa, Indiæ quoque victrix, per vestigia Liberi patris atque Herculis signa circumtulit. Hæc eadem nostra ætate spurcissimæ Turcarum genti subiecta, tributum pendere, jugum ferre miserrimum cogitur. Magnesiæ quoque ac Thessaliæ nostro tempore Turcarum arma invaserunt. Nobilissimi montes Olympus, Pieris & Ossa: Pindus insuper & Othrys, Lapitharum quondam sedes, Turcarum imperio parent, penes quos quinque & septuaginta urbes fuisse olim Plinius assumat. Totum Peneum Turcæ possident, inter flumina, Thessaliæ



Theſſaliæ clariffimum, juxta Gomphos hic fluvius oritur, interq̃ve Oſſan & Olympum, nemoroſa convalle defluens, q̃vingenta ferme ſtadia percurrit, dimidio ejus ſpatii navigabilis. In eo curſu Tempe vocantur, q̃vinque millium paſſuum longitudine, ultra viſum hominis attollentibus ſe dextera lævaq̃ve leniter convexis jugis. Intus ſua luce viridante allabitur Peneus, viridis calculo, amœnus circa ripas gramine, canorus avium concentu. Arripit amnem Euroton, nec recipit, ſed olei modo ſupernatantem (ut dictum eſt ab Homero) brevi ſpatio portatum abdicat: pœnales aq̃vas, dirisq̃ve genitas, argenteis ſuis miſceri recuſans. Hæc Plinius de Peneo. Tot Chriſtianis bona Turcarum arma eripuerẽ, q̃vamvis noſtram magis deſidiam incuſaverim. In Theſſalia regem fuiſſe tradunt nomine Græcum, à q̃vo Græcia dicta ſit. Helenum q̃voq̃ve in eodem loco regnaſſe, à q̃vo Helena nuncupata eſt. Homerus tribus nominibus Theſſalos appellavit: Myrmidonas, Helenas, & Achæos. Hic Thermopylarum anguſtiæ Perſarum cæde inſignes. Quæ licet olim Xerxis impetum tenuere, Turcarum tamen armis claudere tranſitum minimè potuerẽ.

## CAP. X.

*De Bœotia, Thebis montibus & fontibus  
ſacri in ea.*

**P**oſt Theſſaliam Bœotia ſuccedit ab ortu in occaſum porrecta, Euboicum mare Criſſeumq̃ve ſinum contingens, Thebarum claritate apud omnes ferme hiſtoricos nominata. Hæc muſis natale in Heliconis nemore, hic ſaltus Cithæron, & Iſmenus amnis, & fontes Dirce, Arethuſa, & Aganippe. Quæ patria q̃vondam Liberi patris atq̃ve Herculis fuit, quæ fortem produxit Epaminondam. Non cedens Athenis claritate civitas, ea noſtra ætate exiguum caſtellum. Thebarum eſt, & à Turcis proximis annis cum reliq̃va Bœotia occupatum.



## CAP. XI.

*De Hellade, quæ & Græcia & Attica  
est dicta.*

**S**eqvitur Hellas, quæ à nostris appellata Græcia: ἡλλήν, id est, lit-  
tus prisci vocavere. Mutato deinde nomine Atticam dixere. Ho-  
merus cunctos Atticam incolentes appellavit Athenienses, cum  
non ædificata forent Megara. Protenditur autem Attica & Bœotia  
usque Isthmum, ubi columna fuit, in qua hic inerat titulus, in parte  
Peloponnesum spectante: *Hæc Peloponnesus, & non Ionia.* In par-  
te verò Megara intuite: *hæc non Peloponnesus est, sed Ionia.* Idem  
enim Attici & Iones fuere, qui cum de finibus cum Peloponnesiacis  
sæpissimè disceptassent, hanc tandem Romano consensu columnam,  
erigi obtinuerunt. Atticam quamvis saxosam & sterilem, plerique  
tamen mirificis laudibus extulerunt, deorumque domicilium esse di-  
xerunt loca ipsa possidentium & parentum heroum. In hac civitas  
Atheniensis quondam nobilissima fuit, nullius indiga præconii: tan-  
ta ejus superfuit claritas. Eadem nostro tempore parvi oppidi spe-  
ciem gerit. In eo tamen saxo quo vetustum Minervæ templum fuit,  
arx est per omnem Græciam nominata, cum operis magnitudine, tum  
difficultate oppugnationis: hanc Florentinus quidam Mahumeti tra-  
didit, cum imploratis Latinorum auxiliis nullius opem inveniret. Ru-  
ra ei ob eam rem tradita, in quæis ævum ignobile ducat.

## CAP. XII.

*De Peloponneso & ejus forma, de Isthmo, Exami-  
lii muro ab Amurate diruto.*

**P**eloponnesus Atticæ jungitur, totius Græciæ arx quondam di-  
cta. Nam præter habitantium in ea gentium nobilitatem atque  
potentiam, ipse locorum situs principatum designat & impe-  
rium. Multi sinus insunt, & promontoria multa: insignes etiam  
& permagnæ urbes, Chersonesus ipsa locorum varietate jocunda.  
Formam ejus platani folio simillimam dixere, longitudine ac latitudi-  
ne



ne fermè parem. Ab occasu in ortum stadiorum mille & quadringenta perimetros sive ambitus omiſſis finibus (ut Polybio placet) stadia quatuor millia continet; Artemidorus quadringenta super addit, cui & Plinius consentire videtur, Isidorum autorem secutus. Idem duo maria terram ambire dicit, Ionium & Ægæum. Angustia, unde procedit, Isthmos appellantur, quinque millia passuum latitudinis continentes. Has angustias perfodere Demetrius Rex, Dictator Cæsar, Cæjus Princeps, Domitius Nero infausſo (ut omnium exitu patuit) incepto tentarunt. Hic Corinthus nobilis colonia fuit. Græci principes, postquam Turcarum potentia in Europam penetravit, ex mari ad mare producto per angustias muro, Peloponnesum à reliqua Græcia distinxerunt, murum Examilium appellavere. Hanc provinciam hodie Moream Latini vocant. In ea Achaja continetur, Messenia, Laconica, Argolis, & Arcadia, quæ medium peninsulae obtinet. Amurates expugnata Thessalonica, subacta Boeotia, & Attica, præter Athenas ad Examilium usque profectus, perterritis Græcis, diruit murum, tributumque annuum exegit, deditibus se Peloponnesibus imperavit. At cum Hungari instante Juliano Cardinali sancti Angeli, adversus Turcas arma sumpsissent, confectisque nonnullis feliciter præliis, amplius instarent, urgerentque hostes: Constantinus qui postea apud Constantinopolim imperavit, ibique necatus est (ut antè diximus) hujus provinciae Despotus, animo auctus, & negare Turcis tributum, & Examilium instaurare non dubitavit. Ob quam rem magna deinde pecunia multatus est, & Examilium denuo destructum, cum victor, Amurates apud Varnam Hungaros delevisset. devicta Constantinopoli, Albani, qui plures Peloponnesum incolebant, sumptis armis, Demetrium & Thomam Constantini fratres regno deicere annixi sunt, nobilem quendam græculum ad regium fastigium assumptes. Ultraque pars Mahumetis auxilium imploravit. Illi nobilior pars visa justior. Auxilia adversus Albanos Demetrio fratrique tradita, Albani subacti prioribus Dominis parvere. Mahumeti XVII. millium aureorum tributum pensum. Thomas quamvis hæreditario jure imperatorem se dicere posset, cujus majores longa serie Græcorum nomini imperaverant, metu tamen Mahumetis eo titulo abstinuit. Cum Calixtus pontifex max. Christianos principes, in sui pontificatus initio, adversus Turcas invitaret, existimavit Thomas Turcarum imperium



proculdubio ruiturum, Mahumetiꝑve tributum negavit. Cum verò non tam magnifica facta quam verba esse animadvertit, persoluto tributo & adjectis donis Mahumeti reconciliatus est. Nunc verò (si vera est fama, quæ per hos dies allata est) violatæ fidei majorem subire pœnam compulsus, Mahumeti prorsus subiectus est, Peloponnesus tota Turcarum imperio adjecta. Egredienti Peloponnesum per angustias Isthmi ad reliquam Græciam, Strabo & Plinius occurrere Atticam tradunt, Ptolomæus Achajam, cujus fines hoc modo describit: ab occasu Epirum, à septentrione Macedoniam, & partem Ægæi pelagi collocat. Ad orientem ejusdem maris terminos ponit, usque ad Sunium promontorium. Ad meridiem Adriaticum pelagus juxta littus, quod Achelous amnis irrumpit, in Corinthiaco sinu. Quod si ita est, Atticam, Bœotiam, Phocidem, Thessaliam, Magnesium, Ætoliam, Acarnaniam Achaja ipsa complectitur. Idem tamen Ptolomæus alio loco mediterraneas Peloponnesi civitates enumerans, Elicem, Buram, Helenam, Pheream in Achaja esse dicit, & propriam esse Achajam intra Peloponnesum affirmat. Nobis qui pro nostri operis instituto res Peloponnesiacas & Atticas breviter absolvimus, & ad occidentem Isestinamus:

## CAP. XIII.

*De Acarnania, & strage memoratu digna à Jo.  
Vintimilio in ea facta.*

**A** Carnania prior occurrit, inter Epirum Bœotiamꝑve protensa, cui Ætolia vel conjuncta vel commista esse videtur. Hæc hodie Ducatus appellatur. Joannes Vintimilius natione Siculus, filiam suam Despoto Acarnaniæ in matrimonium dedit. Exin vexantibus Acarnaniam Turcis, ac generum obsidentibus, cum parvo equitatu mare trajecit, obsessores invasit, stragemꝑve memoratu dignam edidit. Nam parva manu ingentes fugavit copias, salutemꝑve genero peperit. Qui tamen paulopost per insidias captus à Turcis, regnum amisit: Epirum tamen adhuc ejus nomine teneri ferunt.



## CAP. XIV.

*De Epiro XIV. gentes autore Theopompo continente, quod apud eam Paulus Æmilius imperator Romanorum urbes LXX. funditus evertit, quodq; in sinu Ambracio Caesar Augustus Antonium & Cleopatram bello Attico devicit.*

**E**pirus in occidua parte ab Acrocerauniis montibus incipit, protenditurq; versus orientem usque ad Ambracium sinum, perstadia mille trecenta. Septentrionalem ejus partem Ptolemæus Macedonia conjungi tradit: orientale Achajæ, usque ad ostia fluminis Acheloi: occidentale latus Ionico excipi pelago asserit. Strabo Ausonium hoc idem mare appellavit. In Epiro XIV. fuisse gentes Theopompus tradidit, quarum celebratissimæ Chaones & Molossi. Regnum enim quandoque tenuere prius quidam Chaones, posterius Molossi, qui propter regum cognationem ex Æacidarum sanguine, prognati, mirum in modum amplificati fuerunt, penes quos Dodonæ vetus oraculum ac nobile vigit. Oram hujus terræ marinam felicem atque uberem tradidere. Multaq; olim urbes & oppida munitissima in Epiro fuere. Sed propter populorum rebelliones, qui cum Romanis contenderunt, provincia vastata est. LXX. enim Epirotarum urbes à Paulo Æmilio Imperatore funditus everfas esse autor est Polybius, victis Macedonibus & Perseo rege superato. Ex quibus maximum numerum urbes Molossorum extitisse, & mortalium centum quinquaginta millia in servitutem redacta. Plinius Veronensis hanc cladem Macedonibus attribuit, duasq; urbes ruinæ adjecit. Credo quia Macedones in Epirotas imperium obtinebant, utramq; gentem uno nomine Plinium comprehendisse. Apud Epirum Acliaca pugna late memorabilis commissa est, in qua Cæsar Augustus Marcum Antonium navali prælio vicit, & simul Ægypti reginam Cleopatram. Nam & ipsa huic certamini præsens interfuit: ob quam rem victor Augustus in Ambracio sinu urbem condidit, eiq; vocabulum indidit Nicopolim, id est, victoriæ civitatem. Ambracii sinus ostium, paulò  
quam



quàm stadia quatuor majus est. Circuitus stadia trecenta amplectitur, optima omni ex ejus parte statio. Ingredientibus occurrebant olim à dextra habitantes Græci Acarnanes, & Apollinis Aëtii templum, quodam in tumulo ad ostium eminens, cui campus subjacuit, lucumq; habens & navalia, in quibus Cæsar undeviginti naves decimarum nomine reposuit, ab uno remorum ordine usque triremes adjungens. Sinistra verò Nicopolis est, & Epirotarum colonia Cassiope, nostra ætas Epirum Artam appellat. Circa littus ejus paucis ante annis præfectus regiae classis nomine Villamarina triremes Venetorum insectus comprehendit, atq; incendit. In eodem littore apud Acroceraunios montes finiri Adriæ vel Adriatici maris navigationem, & Ionium incipere pelagus, Straboni visum est, apud quem mare Ausonium, idem quod Ionium esse apparet, cum Epiri oram Ausonio abluere pelago assermet.

## CAP. XV.

*De Albania, inter Dyrrhachium & Apolloniam, regione.*

**Q**UÆ nunc Albania dicitur, olim Macedonia portio fuit, ad occidentem versa, in qua Dyrrhachium & Apolloniam fuisse prodidimus, non incelebres prisco seculo civitates. Sermo genti neque Græcis, neque Illyricis notus. Credimus hoc genus hominum ex Albania quondam venisse, quæ vicina Colchidi in Asiatica Scythia memoratur: ut sæpe barbarorum inundatio nationum, Græciæ atque Italiæ provincias occupavit. In hac terra potens Camusa fuit, qui Christianis parentibus ortus, parum tenax catholice fidei, ad Mahumetis insaniam declinavit. Sed quam leviter Christum deseruit, tam facile Mahumetis sacra contempsit. Rediit enim ad paternam legem, & quamvis utramq; religionem contempserit, neutri fidus, Christianus tamen mori quam Turca maluit, paulò post Constantinopolitanam cladem morbo extinctus. Georgius Scanderbecus ejus hæreditatem accepit, nobili loco natus, qui ætatem penè omnem in armis pro Christi nomine pugnando consumpsit, multas & magnas



magnas Turcarum turmas bello vicit atque delevit, solusque quodammodo regionem illam in Evangelio Christi continuit, quamvis hodie toties hostili ferro petita, magna ex parte deserta feratur. Rex Alphonsus saepe milites in Albaniam misit, & Trojam urbem in potestatem receptam à Turcis defendit. Nepos Scanderbechii ex fratre, cum Turcarum parti favens, insidias patruo moliretur, ab eo captus, & ad Alphonsum missus, in carcerem conjectus est. Calixtus quoque Romanus pontifex auxilia pecuniaria Scanderbechio non pauca misit. Valona in Albania non magna civitas est, in portu maris sita, quae brevissimus in Italiam trajetus. Hanc Pazaites primus ex Turcis occupavit. Rebellantem Amurates recuperavit. Nescio quod malum minatur Italiae.

## CAP. XVI.

*De Illyricis gentibus, de Manichaeis haereticis, de quibus  
Matronis certo tempore post infirmitatem  
cum monachis promiscue manentibus.*

**P**OST Albaniam Illyricae sequuntur gentes, ad occidentem septentrionemque versae. Hoc genus hominum nostra aetas Sclavos appellat, & alii Bosnenses, alii Dalmatae, alii Croacii, Istri, Carnique nuncupantur. Bosnenses introrsus ad Pannoniam vergunt septentrioni expositi, reliqui adjacentes mari ad Timavi usque fontes protenduntur, hinc Aufoniam, illinc Pannoniam intuentes. Timavus autem in intimum Adriatici maris sinum excurrit, cujus fontem matrem appellari maris Strabo predidit. In Bosna rex gentis Despotus Stephanus nomine (sic enim reges appellare suos consuevere) quamvis Christi religionem sectaretur, diu tamen Baptismi sacramento abstinuit. Sed anno superiore vocato ad se Joanne Cardinali sancti Angeli, cujus saepe meminimus, ab eo baptismatis unda persusus, & sacris nostris rite initiatus, Turcis (quibus cum scedere junctus erat) bellum indixit. Nunc paululum nutare affirmatur. In hac regione quamplurimum haeretici possunt, quos vocant Manichaeos, pessimum genus hominum, qui duo principia rerum produnt, alte-



rum malorum, alterum bonorum. Nec primatum Romanæ ecclesiæ tenent, neque Christum æqualem consubstantialemque patri esse fatentur. Horum cœnobia in abditis montium convallibus sita feruntur, in quibus ægrotantes matronæ servituras sanctis viris, si evaserint, ad certum tempus Deo vovent. Redditæ sanitati permittentibus viris vota persolvunt, promiscuè inter monachos præfinito tempore viventes: hanc labem nulla sedis Apostolicæ decreta, nulla Christianorum arma delere potuerunt. Sinit ad nostram exercitationem regnare hæreticos Deus.

## CAP. XVII.

*De Dalmatia & Croatia, & ubi nam Liburnia.*

**I**N Dalmatia Raguseos magnis affecit cladibus Stephanus, inter Bosnenses & Dalmatas ducatum possidens, & Manichæorum veneno infectus, qui, etsi Christianos per insidias captos, sæpe Turcis venundaverit, mittere tamen Oratores Romam, & auxilia sedis Apostolicæ petere non erubuit: ejus belli sumptus ex Christianis petens, quod gesserat in Christianos, Nec desuere qui tam impiis verbis aures accommodarent.

In Croatia mulier Australis, quæ nuptias Comitis, cum esset inferior sanguine, morum præstantia & formæ elegantia meruit: dum laxandi animi gratia ex castello in castellum obequivat, subito Turcarum interventu capta, & apud eos aliquandiu detenta. Impatientia tandem mariti non parvo auro redempta est.

Quærat fortasse aliquis: ubinam Liburniam dimiserimus, quàm permeasse Antenorem Italiam petentem insignis poëta commemorat. Confusi sunt admodum provinciarum fines, nec expedire nova facile est, nedum quis vetustissima possit absolvere. Plinius Liburniæ finem initium esse Dalmatiæ dixit, & Tragurium marmore notum in ea esse. Salonam quoque coloniam, quæ ab Jadera CCXXII millibus passuum absuit. Jaderam verò CLX. à Pola distare. Ex quo fit, ut inter Croatinos & Dalmatas Liburni sedes habuerint, forsitan & Croatini



Croatini novam gentis nomē Liburnorum loca invaserunt. Nobis hæc indicasse sufficiat. Si quis certiora desiderat, priscos evolvat autores. Ptolemæus Liburniam & Dalmatiam atque Illyridem simul confudit. Et Illyridi quidem à septentrionali plaga Pannoniam occurrere dixit, ab ortu superiorem Mysiam, ab occasu Istriam, à meridie Macedoniam & Adriaticum litus.

## CAP. XIIIX.

*De Istria hodie Sclavonia dicta, & quod Pomp. Mela & Nepos Istrum amnem à Danubio in Adriam fluere falso crediderunt.*

**I**striam veteres Italiae partem tradiderunt, in qua Paretium & Pola est, & Justinopolis, quam caput Istri vocant. Inconvenienter Italiae ramē jungitur Adriatico sinu disjuncta, & in peninsulae modum circumdata mari. Qua continenti applicatur à tergo, lapidea est & montana regio, quam prisci Albiam vocaverunt. Plinius Istriam adharere Liburniae dixit, ex quo palam fit, Croatinos Liburnorum loco succedere. Istriam ab Istro amne dictam ferunt, quem à Danubio in Adriam fluere falso credidere. Cui errori & Pomponius Mela, & Nepos Padi accola aures adhibuit. Nullus enim ex Danubio amnis in Adriaticum effunditur mare. Argonautarum eos fabula decepit, quos per Istrum ex mari Pontico in Istriam vectos memoriae proditum est. Sed constat eos ex Istro in Savum adverso flumine navigasse, deinde Nauportum, quem Labacum hodie appellari putaverim, cujus paludem Lugeum Strabo appellat. Ex Nauporto verò per montes humeris vecta navis in Adriaticum provenit. Istri hodie Sclavi sunt, quamvis maritimae urbes Italico sermone utuntur, utriusque linguae peritiam habentes: pars provinciae melior ea, Venetorum quae maritima imperio subiecta est. Mediterraneam domus Austriae possidet. Oppidum sancti Viti, quod ad flumen Titum situm est, Valenses habent, ex quo loco ad Aquilejam mille stadia esse Tuditanus, qui domuit Istros, tradidit finem Italiae Musiae fluvium tradidere. In hac terra nihil atate nostra memoria dignum gestum esse accepimus,



quam quod australes & Venetos magna de finibus contentio agitaverit, & utriusque partis subditi armis contenderint: ad quas lites componendas, nos aliquando ab imperatore missi, quamvis inducias belli fecimus, & novos terminos constituimus, universam tamen litem amputare nequivimus.

## CAP. XIX.

*De Carnis & Japidibus.*

**C**Arni inter quos Japides enumerantur, Istros sequuntur. Sclaviamen, quorum sermo regionem obtinet, Carnos bifariam dividunt, duplicem Carniolam esse dicentes: Alteram siccam & aquarum indigam, in qua Istros ponunt, & Tarsos qui medios inter Labacum & Tergestum incolunt montes, & ad Timavum usque proferuntur: Alteram irriguam, in qua flumen Savus ortum habet & Nauportus, qui Labacus hodie appellatur, & alii plures fluvii. In hac provincia, dum Fredericus imperator coronam regni Teutonici apud Aqvensem civitatem peteret, Ulricus comes Cilia, & Albertus imperatoris frater conjunctis viribus, Labacum insigne oppidum ex flumine cui adjacet dictum, obsidione cinxere, diuque machinis omnis generis oppugnare: sed à Frederici militibus non sine clade repulsi, & castris exuti, divitem suppellectilem perdidere: hoc oppidum Sclavi & Itali Lublanam vocant, ex Lugea palude sumto vocabulo.

## CAP. XX.

*De Carinthia, ritu apud eam novi principis creandi, quomodo nobiles ex Ingonis principis convivio ad Christi fidem fuerunt inclinati, de consuetudine in fures, & de comite Henrico viro corruptissimo.*

**C**arinhia montana & ipsa regio Carnis applicatur ad ortum ac septentrionem, Stiria juncta ad occasum ac meridiem, Alpes Italas & forum Julii contingit. Multa in ea valles collesque feraces tritici, multi



multi lacus, multi amnes, quorum præcipuus Dravus. Qui per Stiriam ac Pannoniam in Danubium fertur, haud inferior Savo. Imperium provinciæ Australes obtinent, & Archiducem appellant, cui ea *paret*. Quoties novus princeps reipublicæ gubernationem init, solennitatem nusquam alibi auditam observant. Non longè ab oppido sancti Viti, in valle spatiosa, vetustæ civitatis reliquiæ visuntur, cujus nomen temporis abolevit antiquitas. Juxta in pratis latè patentibus, marmoreus lapis erectus est, hunc rusticus ascendit, cui per successionem stirpis id officium hæreditario jure debetur. Ad dexteram bos macer nigri coloris extat, ad sinistram pari macie deformis equa, frequens circa eum populus & omnis rustica turba. Tum princeps ex adversa prætorum parte procedit, purpurati circum proceres ambiunt. Vexillum ante ipsum, & insignia principatus. Comes Goritiæ, qui palatii curam gerit, inter duodecim minora vexilla præcurrit. Reliqui magistratus sequuntur. Nemo in eo comitatu non dignus honore videtur: nisi princeps ipse præ se rustici speciem ferens. Agrestis ei vestis, agrestis ei pileus, calceusque & baculus in manu gestantis pastorem ostendit: quem postquam rusticus ex lapide venientem conspicatus est, sermone Sclavonico (sunt enim & ipsi Carinthiani Sclavi) *Quis hic est, inclamat, cujus tam superbum incessum video?* Respondent circumstantes: *principem terra adventare.* Tum ille: *Iustus ne iudex est, saltem patriæ quærens? libera conditione dignum honore? est ne Christiana cultor fidei & defensor ac propagator?* Respondent omnes: *est, & erit.* Rursus ille: *Quæro igitur quo me jure ab hac sede dimoveat?* Ait Goritiæ comes: *LX. denariis abs te hic locus emitur. Jumenta hac tua erunt, bovem atque equam ostendens. Vestimenta quoque principis, quæ paulò ante exiit, accipies, erit domus tua libera & absque tributo.* Quibus dictis rusticus levi alapa principi data, bonum judicem esse jubet: & surgens, jumentaque secum ducens, loco cedit. Princeps verò consensu lapide nudum gladium manu vibrans, se ad omnem partem convertit, æquum judicium populo promittens: ferunt & aquam frigidam rustico allatam pileo bibere, tanquam vini usum damnet: deinde ad templum solenne pergit, quod in propinquo tumulo situm est, sanctæ Mariæ vocabulum habens, & pontificale fuisse traditur: ubi peractis sacrificiis, princeps rustica indumenta deponit, paludamentumque induit, convivatusque splendide cum proceribus, in prata revertitur,



ibiqve pro tribunali sedens, jus petentibus dicit, & fundos consert. Fama est anno D CCXC. post Christi salvatoris ortum, imperante Carolo Magno, ducem gentis Ingonem nomine, ingens convivium provincialibus præparasse, & agrestibus quidem ad conspectum suum intromissis, in vasis aureis atqve argenteis, nobilibus verò ac magistratibus procul ab oculis collocatis, fictilibus ministrare jussisse: interrogatum cur ita faceret, respondisse, *non tam mundos esse, qui urbes & alta palatia, quàm qui agros & humiles casus colerent. Rusticis qui Christi evangelium acceperant, baptismatis unda purificatis, candidas & nitidas esse animas: nobiles ac potentes, qui spurcitiis idolorum sequerentur, sordidas ac nigerrimas: sic verò pro animarum qualitatibus instruxisse convivium.* Castigatosqve ea re nobiles catervatim sacri baptismatis undam quærentes, brevi tempore sub Vergilio & Annone Juvaviensibus episcopis, universos Christi fidem acceperant. Hinc honos investiendi principis rusticitati datus. Fuit autem dux Carinthiæ venator imperii, ad quem lites venatorum omnium deferrebantur, vocatus in judicio coram imperatore, querelantibus non nisi Sclavonica lingua respondere tenebatur. Multa hujus provinciæ ornamenta fuisse commemorant, multa privilegia, facile id creditum est, quando imperatorem Ludovicum hujus terræ ducatum filio suo Arnolpho primogenito contulisse non est ambiguum. Est & alia provinciæ hujus consuetudo, in oppido, quod Clagesurnum appellant, contra fures durissima. Si quis in furti suspicionem inciderit, mox captus laqueo suspensus vitam finit. Sumpto supplicio, post triduum de suspicionem judicant, si reum jure fuisse necatum inveniunt, pendere cadaver infame sinunt, donec sua sponte consumptum decidat: sin verò, depositum in cœmiterio condunt, justumqve funus è publico faciunt, & animæ gratas exequias. In hac provincia Comes Goritiæ Henricus vir muliere corruptior, impuberes filios media nocte ad potum surgere compulit, increpitans qui sine siti somnum agerent, cum pastoribus ac rusticis sæpius, quàm cum nobilibus diversatus est, senex super glacie cum pueris lusit. Inter vulgata scorta frequentissimè latuit, raro in aula pransus est, solus coquum adiens, osculas in ipsa popina voravit. Vestes induit viles ac perunctas, pectus nudum & apertum ostendit. Oculi semper lachrymantibus fuere, quem cum aliquando ad se venientem Fredericus imperator ex fenestra intuitus esset, me vocitans: *age* (inquit) *Ænea, princi-*



*pem, qui ad nos properat, contemplare, si quem mundio rem pulchrioremq, videris aliquando, effare. Mihi, cum satis principem Comitesqve considerassem, fœda rusticitas visa est, quæ dominatum assecuta, egregiam nobilitatem servitio premeret. Huic uxor natione Hungara forma præstanti, & audacia plusquam viri, cui vincula indidit, mox Ulrici comitis Ciliæ auxilio liberatus, uxorem domo pepulit. Nec diu post vita functus, filios bonæ indolis adolescentes & matri quam sibi similes reliquit hæredes.*

## CAP. XXI.

*De Stiria olim Valeria dicta, quæd Fredericus Comes uxorem suam amore concubina propria manu interfecit. Item quod nobilis quispiam qui seipsum laqueo suspendere sæpe cogitabat, optimo in missa audienda est usus remedio.*

**S***tiria, quam quondam Valeriam invenio nuncupatam, ad orientem Pannoniæ jungitur, latus ejus septentrionale Austriam respicit. Ad occidentem & meridiem Carnis & Carinthianis occurrit, eadem quoque montana provincia est, quamvis in orientem porrecta, planicies non parvas habeat. Dravus ac Mura insignes fluvii terram irrigant. Mura in Dravum exoneratur, ille in Danubium. Urbium populi plerumque Teutones, Sclavi, qui citra Dravum rura colunt: imperium Australis familiæ. Est in ea vetus oppidum, quod Ciliam vocant, nonnulli Syllacem appellatum existimant, & opus fuisse L. Syllæ, de qua re nihil nobis exploratum est. Multæ ibi vetustatis reliquæ visuntur, & Romanorum nomina, principum sepulchralia, marmora referunt. In eo præfuit ætate nostra Fredericus comes, qui cum esset in libidinem pronissimus, & olim Veronicæ concubinae incensus amore, legitimam conjugem ex comitibus Croatiae natam, sua manu interemisset, concubinam verò pater ejus Hermannus (ut est potentum justitia) in profluentem demersisset, uxores passim maritis*



riticis abstulit, puellarum greges in palatium rapuit, provinciales pro mancipiis habuit, ecclesiarum bona diripuit, monetarum falsatores, veneficos, ariolos, nigromantes undique ad se conscivit, & quamvis anno jubilei jam nonogenarius, indulgentiarum causa Romam petisset, reversus tamen nihilo melior visus, interrogatus quid sibi Roma profuisset in pristinos mores relapso, & *calceator meus*, inquit, *a consuetudine ocreas post visam Romam rediit*. Huic vita functo Ulricus filius successit per cetera similis, ingenio tantum & eloquentia major. Quo (sicut dictum est) interfecto quatuor & viginti competitorum fuere, ut qui vivens undique bella consciverat, moriens quoque seditiones excitaret. Sed optimates terræ possessionem Frederico imperatori tradendam censuerunt ea lege, ut competitoribus secundum provinciae consuetudinem in iudicio responderet. Relicta Ulrici armis defendere quæ possidebat, decrevit. *Fredericus* manu potenti quum plura castella obtinuisset, in Cilia tandem receptus est, arces loci tradente Joanne Viconitione Bohemo, qui cum fuisset magister militiae Comitum, accepta Caesaris pecunia, à conjugē ejus defecit. Sed mox poenitentia ductus grande scelus ausus, & inextinguibile facinus tanquam scelus scelere redempturus, Imperatorem jam sibi securum, & cum paucis Cilie morantem nocte concubia intercipere aggressus est. Corruptis namque oppidanorum plerisque, qui sibi advenienti partem oppidi traderent, hora constituta cum octingentis equitibus intromissus cuncta miscere armis coepit. Affuit divina pietas Frederico, quæ illi præter consuetudinem in arce superiori à natura & humana ope munitissima, ea nocte dormiendum iussu erat. Proceres qui remanserant in oppido capti omnes, inter quos & Joannes Ungnadius cunctis Stirienſibus opulentior, cum Georgio fratre abductus est. Nec Ulrico Austriae cancellario, quamvis esset episcopus, & ad templum confugisset, parsum est. Usque adeo apud homines nostri seculi divina & humana perierunt. Fama est, eaque celebris, inter Stirienſes nobilem quempiam fuisse, cui sæpe in animum ceciderit, seipsum laqueo suspendere. Id agrè ferentem ex docto quodam viro remedium petivisse adversus eam tentationem. Consilium datum, proprium uti sacerdotem conduceret, qui sibi manenti in arce quadam solitaria singulis diebus rem divinam faceret. Paruisse nobilem, atque annum ferme continuasse, nulla suspendii cogitatione interveniente.

Postremo



Postremo rogatum à sacerdote, ut presbytero vicino, qui templi dedicat onem in proximo monte habiturus esset, auxilio esse posset, licentiam dedisse, proponentem in animo paulopost sequi & sacris interesse. Stetisse diu postea, nunc una, nunc altera causa retentum. Denique circa meridiem profectum agresti cuidam in nemore occurrissè, qui rem divinam in monte peractam esse, & populum omnem abiisse diceret. Contristatum eo nuntio, ignobilem infelicemque se esse dicentem, qui eo die sacratum Christi corpus non vidisset, agrestem consolari cœpissè: *Venditurum, si vellet nobilis emere pramium, quod inter existendum divinis meruisset*, sagumque nobilis petivisse pretii nomine. Venditione facta, nobilem nihilominus montem ascendisse, atque orasse in templo. Reversum autem, in proxima arbore suspensum agrestem invenisse, sed postea diris cogitationibus haud quaquam vexatum fuisse. In provincia decoctum sal ad vicinas regiones importatur. Ea & ferri mineras locupletes habet, & argentifodinas non ignobiles, quamvis incuria principum argentum haud multum eludatur.

## CAP. XXII.

*De Austria, & aliquot rebus gestis in ea.*

**A**ustriam describere hoc loco haud necessarium existimamus, de qua propriam historiam edidimus. In ea provinciales post obitum Alberti Cæsaris Frederico se commiserunt, ea lege, ut si masculum pragnans regina pareret, tutor ejus esset. Si foeminam, terræ dominus. Nato ( ut prædictum est ) Ladislao, tutelam ejus Fredericus accepit. Milites qui sub Alberto meruerant, cum stipendio se fraudatos dicerent, provinciam latrociniiis ac incendiis vastare. Eorum vexatio LXX. millibus aureis à Frederico redempta est, cum Bohemi & Hungari excursions in Austriam facerent. Ex sororibus Ladislai major natu Gvilelmo duci Saxoniae nupsit. Joannes Huniades cum regni Hungariae coronam à Frederico frustra repetisset, cum duodecim millibus equitum ingressus Austriam, omnem agrum inter Viennam & Stiriae montes diripuit atque incendit. Petentem Italiam Cæsarem rogaverunt Australes, uti Ladislaum, qui



jam propemodum adolevisset, in paterna hæreditate apud se dimitteret. Rejecta petitione, autoribus duobus Ulricis, altero Ciliæ comite altero Eyzingero, sumptis armis rebellavere. Redeuntem ex Italia Fredericum apud novam civitatem obsidione cinxere, quibus & Henricus Rosenfis natione Bohemus cum ducentis equitibus & mille peditibus sese adjunxit. Et quamvis à Nicolao Pontifice maximo jussi essent, ne tutelam Cæsaris impedirent, contemptis apostolicæ sedis mandatis, & tantæ majestatis autoritate derisa, sceleratum propositum tenuere. Docta eo tempore Viennensis schola indoctam sententiam protulit, *quæ per appellationem ad futurum concilium interponendam suscipiendi posse Romani præsulis mandata rescripsit.* Civitas Viennensis & omnis Austria ex eo tempore semper in armis fuit, temeratæ religionis pœnas pendens. Cessit furenti populo Fredericus, pupillumque adhuc tenerum ea lege in manus comitis Ciliæ tradidit, ut convocatis ad urbem Viennam utriusque partis consanguineis & amicis, de tutela, de oppidis, deque cæteris contentionibus principum, qui vocati convenissent, arbitrium diffiniret. Ladislaus summa populorum alacritate apud Viennenses exceptus, cuncta ex voluntate comitis administravit. Ad constitutum diem concilii Ludovicus Bavariæ & Gvilelmus Saxoniae duces, Albertus quoque Brandenburgensis, Carolus Badensis Marchiones convenere. Tum multi ex Bohemia, plures ex Hungaria Barones. Imperator legatos misit, quibus & nos adjuncti fuimus, diu de jure partium disceptatum. Sed cum omnia ex arbitrio victoris agerentur, nec leges defenderent, quem arma non protexissent, infectis rebus discessum est. Negata sunt omnia, quæ promiserant Australes imperatori, dictum omne indictum fuit, neque literis neque sigillis autoritas habita, barbara fide actum. In eo conventu Ladislaus Joannem Huniadem, qui sibi regnum à Turcarum invasione servasset, ad principatus honorem evexit, qui suggesto in magno foro apud Carmelitas erecto, sede sedens aurea, regali paludemento ac diademate ornatus, comitatum ei Bistricensem commisit, quod eo in loco minimè licuit. Neque enim regni Ungariæ sub imperio Romano majestatem gerere jus est: sed tanta reverentia legum, quanta eis per arma sive datur sive relinquitur. Comes Ciliæ, cum regem quolibet impellit, & ad se cuncta rapiens Eyzingerum Viennensesque contemnit, concubinam, quam viro interfecto sustulerat, reginali



reginali penè honore dignatur. Ex favore tandem regio cadit, & an-  
 nitente Eyzingero è curia pellitur: quem in exilium proficiscentem,  
 quatuor tantum equites comitati sunt, Alberto marchione Branden-  
 burgensi, ne per contemptum à populo lapidaretur, ad portam usque  
 urbis securitatem præbente. Sed quàm fœda & miserabilis ejus fu-  
 ga, tam superbus & favorabilis reditus fuit. Nam post annum cum-  
 jam ex Bohemia rediisset, svadentibus primoribus Austriæ baronibus,  
 revocatus, cum mille equitibus argento & auro fulgentibus Viennam  
 repetiit, cui ad portas urbis & rex ad mille fermè passus exiit, & omnis  
 nobilitas redeunti gratulata est. Plebs quoque, quæ paulo ante lutum  
 ac lapides in fugientem jactare tentavit, sternere viam floribus, quæ  
 redeunti transitus fuit, minimè dubitavit; ut est in utramque par-  
 tem immodica, sive amaverit, sive oderit. Mirarum mutatio, & lu-  
 dentis fortunæ jocus. Eyzingerus extra gratiam regis factus, in-  
 castella sua recedens, imperatori quem graviter offenderat, reconci-  
 liatus est, nec diu postea adeò superbi erant, qui Ladislai regis partes  
 sequebantur, ut novæ civitatis suburbia, in qua Cæsare absente ja-  
 cebat puerpera Imperatrix, intrare præsumpserint, & urbem expu-  
 gnare contenderint. Quod ubi non successit, exustis quæ obtinue-  
 rant locis abierunt. Fuit sæpe inter Cæsarem & regem incassum tra-  
 ctata concordia, neque enim comes Ciliæ dum vixit, ex re sua existi-  
 mavit, unanimes esse Austriæ principes: at eo mortuo, cum Eyzin-  
 gerus è Bohemia missus ad Cæsarem, leges pacis utrique parti gratas  
 dixisset, & jam quietura propediem Austria videretur, interitus regis  
 subito nuntiatus, non solum concordiam perturbavit, sed magnarum  
 rerum & reipublicæ Christianæ salutarium exorientem spem, pror-  
 sus abruptit: Australes & à Cæsare & ab Alberto fratre de tradenda gu-  
 bernatione requisiti, provincialium conventum habuere, in quo lega-  
 ri Cæsaris seniori Austriæ principi (is erat Imperator) debere provin-  
 ciam dixere. Albertus suo & Sigismundi patruelis nomine regiæ  
 partem hereditatis exposcens, suasque calamitates & inopiam tanto  
 sanguini alienam referens, commiserationem inducere conatus est.  
 Conventus responsum fuit: *facturos provinciales quod jus equitave dicta-*  
*ret, postquam fratres inter se convenissent.* Interea latrones trans Danu-  
 bium in Austriam ad Moravæ fluminis ripam, munitum locum occu-  
 pavere, omnemque circa regionem rapinis atque incendiis vexare



coeperunt. Adversus quos profectus Albertus latrones vi cepit, interfectisque pugnando compluribus, quingentos & quinquaginta captivos abduxit, ex quibus LXXX. furca suspendit. Quæ res magnum ei apud Australes & nomen peperit & favorem. Illicus verò Eyzingerus cum visitato apud novam civitatem Frederico imperatore, cujus parti studebat, Viennam repetisset, vocatus ab Alberto, nihil mali suspicans fidenter cum adiit, à quo mox captus in vincula coniectus est, & in privato carcere clausus. Indigna res visa civibus, murmurare, damnare omnes factum, nemo tamen auxilium misero afferre, Imperator saepè rogatus, Viennam petere aliquandiu distulit, veritus ne quæ fraus inesset. Interim Sigismundus ex Atheli ad Viennam descendit, deinde ad novam civitatem profectus, principatus insignia ab imperatore accipiens, pro veteri consuetudine in ejus verba juravit. In qua solennitate & Albertus affuit, qui paulopost cum Sigismundo Viennam repetiit. Et ambo adversus imperatorem conspirantes, Austriam sibi subigere conati sunt. Quorum studia sentiens Imperator, Viennam petere statuit. Et accersito Ludovico Bavarie duce, magni nominis principe, eò se contulit, imperatrice sequente. Appropinquanti, urbanus populus obviam perrexerit. Albertus quoque & Sigismundus nobili comitatu extra urbem imperatorem salutare. Habebat Albertus tria circiter equitum millia in armis expedita, quæ non longè à Vienna in quodam tumultu imperatori se ostentaverunt, magnumque metum venienti incussere. Suspicionem auxit Albertus, qui sæpe ad eos profectus ac seorsum locutus, insidias apparasse Cæsari videbatur. Ferunt ejus militiae ducem Alberto dixisse: *facile si libet hodie Vienna te dominum atque Austria facio. Nam quis prohibet quo minus Fredericum imperatorem ejusque comites intercipiam? Inne tantum, soluta deinceps hereditatis questio erit. Victori leges atque homines favent.* Subdubitasse Albertum aliquantisper, demumque respondisse: *Poteram ignoscere, si, quod ais, me ignorante fecisses, ac mandare turpia non possum.* Postquam introgressi urbem sunt Albertus & Sigismundus in domo quæ Pragensis appellatur, simul habitavere: Imperator privatas civium ædes incoluit. Arx Provincialium nomine custodiebatur. Conspiravere Sigismundus & Albertus eam noctu aggredi, atque irrumpere, armataque militum manu ingressi, jurejurando se astrinxere, *non redituros domum, nisi arcem intrassent.* Sentere

cives,



cives, moxqve arma sumentes, præsidium in arce majus collocavere. Instabat civile bellum, & atrox pugna pro arce. Nec dubium videbatur quin magno suo malo principes commissuri prælium essent: stetit diu res in ancipite. Civibus tueri arcem stabile propositum erat, ducibus (qui arcem intrare jurassent) turpe videbatur infecta re domum reverti. Et vim inferre, plenum periculi erat. Postremo conventum est, ut ingressi principes, arcem paululum immorati, potato vino exirent: atqve ita delusa magis quàm impleta religio est. Postridie arx consensu Provincialium, in tres partes divisa, duas accepere, Albertus & Sigismundus, reliquam Imperator: delectiqve Provinciales sunt, qui lites fraternas dirimant: & summa illis potestas data, sed grave judicium contra potentes est. Nobilitas & ecclesiarum principes imperatori faventiores sunt, plebs Albertum præfert. *Magno se judice quisque tuetur.* Multa sunt in hoc Cæsare, quæ laudare possis: Corpus egregium, & species imperatore digna, animus sedatus & tranquillus, ingenium perspicax, memoria tenacior, religionis ardens zelus, ingens cupiditas pacis & otii. Singularem virtutem, in quovis homine diligit, dignamq; præmio ducit, ædificat splendide, hortos tamen ac gemmas plus æquo admirat & amat, & in rebus gerendis tardior ac remissior est. Tenacem pleriqve accusaverunt, & ad rem nimis attentum. Id fecere proximi antecessores Sigismundus atqve Albertus Cæsares, quorum prodigalitati cujusvis comparata liberalitas videri avaritia potest. Cæterum Fredericus nec sua profundit, nec aliena diripit, verbis factisvè temperans. Albertus frater, ejus longè dissimilis, celer in aggrediendis rebus, belli ac gloriæ appetens, periculi contemptor, audax, laboris patiens, manu atqve ingenio promptus, pecunias inter amicos partitur ac profundit. Inter opes pauper, in paupertate dives, nullius rei magis quàm famæ avarus.



*De Moravia, per quam nulli, propter latro-  
num insidias, transitus patet.*

**P**rocedenti per Austriam in aqvilonem Moravi occurrunt, gens ferox, & rapinarum avida, inter Hungaros Bohemosque trans Danubium sita: hanc provinciam ævo nostro Sigismundus imperator Alberto genero suo, qui postea imperavit, dono dedit. Rebellantem & imperata facere recusantem, Albertus magnis affecit cladibus. Nam supra quingentas villas excursionem combussit, mortales multos neci dedit, pecus penè omne abegit, jugumque ferre perfidam gentem coëgit. In hac provincia civitates & oppida Romanæ ecclesiæ ritum tenent, & catholicæ fidei consentiunt. Barones ferè omnes Hussitarum labe infecti sunt. Hic cum verbum Dei prædicaret Joannes Capistranus, & in errores Hussitarum vehementius inveheretur, Baronis non parvi nominis, quem Ezerahorani vocant, secuta conversio est, qui relicta priore perfidia, cum duobus millibus subditorum veritatem Romanæ sedis amplexus est: filius ejus doctrina & moribus clarus, non diu postea Olomucensis ecclesiæ pontificatum obtinuit. Ea est unica civitas Moravorum Episcopalis. Regnum inter Moravos aliquando fuit latissimum ac potentissimum, quod usque ad filium Suatocopii duravit, cujus fortunam in Bohemica conscripsimus historia. At cum filius Suatocopi ecclesiam Dei sperneret, regnum genti ademptum est. Quod postea Romani Cæsares in Bohemiam transtulerunt. In hac provincia complura sunt oppida plena populo, & opibus abundantia. Inter quæ Pruina principatum obtinet, & Znoyma, Sigismundi obitu memorabilis. Hac nulli transitus patet, nisi armato potentiori, latronibus omnes aditus obfidentibus: sermo genti mistus est Teutonicus ac Bohemicus, superant tamen Bohemi, quorum est regionis imperium. Quæ gentes olim Moraviam incoluerint, non facile dixerim. Quantum verò ex lectione Ptolemæi accipere licet, Marcomanni & Sudini, Quadique Moraviam & Austriam, quæ trans Danubium jacet, incoluisse videntur.



## CAP. XXIV.

*De Silesia provincia, de mira apud Uratislaviam urbem seditione, deq; Bulcone Opoliensi, viro neque inferos neque superos esse dicente, animamq; cum corpore interire putante.*

**S**ilesia post Moraviam sequitur, haud ignobilis provincia, quam fluvius Oderaperlabitur, inter amnes Germaniae late cognitus: fontes ejus in Hungaria, quae Silesiae ad orientem jungitur. Mare Baltheum cui sum terminat: longitudo regionis CC, ferme passuum millia continet, latitudo circiter LXXX. Caput gentis Uratislavia est amplissima civitas ad ripam Oderae sita, privatis ac publicis aedificiis magnifice ornata. Cujus episcopatum majores nostri aureum vocavere, Hussitarum bella luteum reddidere. In hac urbe (regnante apud Bohemos Venceslao) orta seditione, consules quorum prima potestas, per fenestras ex praetorio in forum praecipitati, gladiis ac lanceis iratae plebis excepti, dirum spectaculum praebuere. Cujus rei autores Sigismundus imperator paucos post annos securi percussit. Duces Silesiae multi admodum numero, inter quos paternae hereditas per capita dividitur: hinc scissa multas in partes provincia frequentes calamitates incurrit, crebris exposita latrociniiis. Inter hos duces unum esse ferunt nomine Bulconem, Opoliensem appellant, qui Glogoviae residens deliciis ac voluptatibus deditus, usque adeo insanivit, ut neque inferos, neque superos esse diceret, animasq; cum corporibus simul prorsus interire putaret. Ecclesiam vel nunquam, vel raro ingressus est, sacramentis Christianis prorsus abstinuit, nisi quod abusus matrimonio, uxore, quae sibi ingrata esset, relicta, alteram superduxit. Quae ne pellex appellari possit, non nisi per solennia matrimonii conjungi voluit. Silesii sub imperio Bohemorum constituti sunt, nunc tamen imperata facere detrectant, Georgium novam regem admittere recusantes, Gulielmum Saxoniae ducem secuti, qui regnum Bohemiae ad se pertinere affirmat propter conjugem, quae Ladislai Hungariae atque Bohemiae regis soror



ror fuit. Gladius ejus litis arbiter erat. Sermo gentis majori ex parte Teutonicus est, quamvis trans Oderam Polonica lingua prævalet; ob quam rem non immerito quidam hoc in loco Germaniæ terminum esse Oderam putavere, quamvis idem fluvius in septentrionem vergens, germanicas gentes ripis ambabus alluit. Libet in hac parte Germaniæ linquere fines, & ad orientem ac septentrionem Sarmaticas invisere gentes.

## CAP. XXV.

*De Polonia regione vasta, quod in ea domus luto & macerie componantur, equi sylvestres & viri invaniantur, de Ulladislaō cum regno baptismum suscipiente, deq; Frederico Brandeburgensi, & Alberto Bavario regnum quodlibet pro se recusante.*

**P**Olonia vasta regio est, quæ Silesiæ ad occidentem proximat, Hungaris, Lituanis, ac Prutenis contermina: hic Cracovia est præcipua regni civitas, in qua liberalium artium schola floret. Sbigneus huic urbi præfuit episcopus, literarum doctrina & morum s̄vavitate insignis, à quo plurimas accepimus epistolas, multo s̄ale & Romana elegantia conditas, cui ob singulares virtutes Romana ecclesia insigne cardinalatus honoris, rubentem pileum misit. Civitates Poloniæ præter Cracoviam parum nitidæ. Ex maceria domos firmè omnes componunt, plerasqve luto linunt: plaga regionis nemorosa est, potus genti cerevisia, ex tritico atqve humulo factus. Vini rarissimus usus, nec vineæ cultura cognita, ager Cereris ferax, multa genti armenta, multa ferarum venatio, equum sylvestrem præter cornua cervo similem edunt, feros boves venantur, quos præsci Vros vocavere. Pisce ac volucris abundans, argenti atq; auri inops terra. Vectigalia regi parva. Regnum in quatuor partes divisere majores: has cum per circulum anni rex ambivit, quælibet pars tribus mensi-



mensibus regem ac curiam pascit: quibus exactis ad alteram partem fit transitus. Statuta sunt, quæ præstare provinciales oportet. Si manserit ultra præfinitum tempus rex, suo vivere sumptu cogitur. Cum rex gentis patrum nostrorum tempestate obiisset, relictam filiam Guilielmus dux Austriæ in matrimonium accepit, illiqve regno præfectus est. Non placuit Polonis rex Teutonicus, Uladislaum ex Lituania vocare, ejectoqve Gulielmo, coniugem ejus & regnum novo regi tradidere. Gentilis fuerat Uladislaus, & idola coluerat, sed baptismum cum regno suscipere non recusavit. Conversus ad Christum, religiosum principem gessit. Multos ex Lituaniis ad Evangelium traxit, Pontificales ecclesias nonnullas erexit, Episcopos magno honore prosecutus est. Inter equitandum quotiescunqve turres templorum inspexit, detracto pileo caput inclinavit, Deum, qui coleretur in ecclesia, veneratus. Cum Tartaris regni limites infestantibus feliciter dimicavit, Prutenos maximo bello vicit, de quo inter res Prutenicas memorabimus. Ex priori conjuge prolem non sustulit, cum qua matrimonium haud legitimum fuit. Ex secunda jam fermè nonagenario duo nati sunt filii, Uladislaus & Casimirus, is Lituaniæ ducatum consecutus est, prior patri in regno Polonia succedens, ad Hungariæ quoque regnum accersitus, in bello Turcarum (ut antea narratum est) cecidit. Quare cognita, solliciti Poloniae procures de successore, Fredericum marchionem Brandenburgensem, qui pueritiam in regno transegerat, linguamqve gentis & mores tenebat, ut regnum acciperet, rogaverunt. Responsum datum est: *Casimirum Lituania ducem, qui frater esset defuncti, heredem extare. Sciscitari ejus animum oportere, cui fraternum paternumq, regnum cupienti, impedimentum asferre è dignitate sua Fredericus non duceret*: pari moderatione & Albertus Baviaræ dux erga Ladislaum Alberti filium usus est, qui Bohemiæ regnum sibi oblatum recusavit. Fredericus quoque imperator, & ab Hungaris, & à Bohemis ad hereditatem Ladislai vocatus, nunquam adire sustinuit, quod patrueli præjudicium faceret. Ingens laus nostræ ætatis, & magnum decus Germanici nominis, quamvis non ambigo esse aliquos, qui non tam justitiæ, quam ignaviæ tribuunt, alienis regnis quempiam abstinere. Ego quod boni speciem habet, non laudare non possum. Casimirus autem, etsi difficile à Lituaniis dimitteretur, qui suum apud se principem retinere cupiebant, in Poloniam veniens paci-



ficam regni gubernationem accepit: nec diu postea sororem Ladislai regis duxit uxorem. Multa ei adversus fratres Teutonicos, qui sanctæ Mariæ appellantur bella fuere, de quibus in rebus Prutenis referemus.

## CAP. XXVI.

*De Lituania regione, Vitoldo viro facile sanguinario in ea regnante, de soli ad transitum æstivo tempore difficultate, gentis in moribus qualitate, Et quæ super sacrorum diversitatibus Hieronymus Pragensis eremita denarravit.*

**L**ituania & ipsa late patens regio Polonis ad orientem connexa est, palustris fermè omnis ac nemorosa. Vitoldus huic præfuit Uladislai frater, qui relicto deorum cultu, cum regno Poloniæ Christi sacramentum accepit. Magnum Vitoldi nomen sua tempestate fuit, quem subditi adeo timuerunt, ut iussi laqueo se suspendere, parere potius, quam in principis indignationem incidere voverint. Detrectantes imperium, insutos ursina pelle, viventibus ursis (quos eam ob causam nutriebat) dilaniandos objectavit, crudelibusque aliis affecit suppliciis. Equitans, arcum semper tensum gestavit. Si quem conspicatus est aliter incedere quam voluit, confestim sagitta confodit, multos quoque per ludum interemit. Sanguinarius carnifex, ut esset inter populares & ipsum principem certum faciei discrimen, radere barbam omnibus imperavit. Id ubi non successit (facilius enim cervicis quam barbæ jacturam Litواني ferebant) tonsus ipse mentum & caput prodiit, capitale interminatus, si quis provinciarum pilos faciei capiti suo deponeret. Rex à Sigismundo Casare, Lituanorum appellatus, prius obiit quam legati diadema ferentes se convenirent. Successor Suidrigal ursam nutrit, quæ sœva ex manibus ejus panem accipere, sæpe in sylvas vagabatur. Redeunti usque ad thalamum principis, ostia quæque patebant. Ibi conficere ac pulsare pedibus ostium, cum fames affuit, consuevit, cui princeps aperiens cibum præbuit. Conspiravere nobiles aliquot adolescentes adversus princi-



principem, atqve ursæ modum secuti, sumptis armis cubiculi principis januam confricavere. Credit Suidrigal ursam adesse, ostiumqve aperuit, ibiqve mox ab insidiantibus confossus interiit. Provinciæ deinde gubernatio ad Casimirum pervenit. Ad Lituanos æstivo tempore difficilis transitus est, palustribus aquis cuncta sermè obsidentibus, hyems præbet aditum astrictis gelu lacunis. Mercatores super glaciem ac nivem iter faciunt, plurium dierum cibaria in vehiculo ferentes, nulla certa via: meatus (sicut in mari) siderum cursus ostendit. Rara inter Lituanos oppida, neqve frequentes villæ. Opes apud eos, præcipuæ animalis pelles, quibus nostra ætas Zibellinis Armellinisqve nomina indidit. Ullus pecuniæ ignotus, locum ejus pelles obtinent: viliores cupri atqve argenti vices implent, pro auro signato pretiosiores. Matronæ nobiles publicè concubinos habent, permittentibus viris, quos *matrimonii adjuutores* vocant. Viris turpe est ad legitimam conjugem pellicem adjicere. Solvuntur tamen facile matrimonia mutuo consensu, & iterum atqve iterum nubunt. Multum his ceræ ac mellis est, quod sylvestres in sylvis apes conficiunt. Vini rarissimus usus, & panis nigerrimus. Aimenta victum præbent multo lacte utentibus. Sermo gentis Slavonicus est, latissima est enim hæc lingua, & in varias divisa sectas. Ex Slavici enim alii Romanam ecclesiam sequuntur, ut Dalmatæ, Croatini, Carni ac Poloni. Alii Græcorum sequuntur errores, ut Bulgari, Rutheni, & multi ex Lituanis. Alii proprias hæreses invenerunt, ut Bohemi, Moravi, & Bosnenses, quorum magna pars Manichæorum imitatur insaniam. Alii gentili adhuc cæcitate tenentur, quemadmodum multi ex Lituanis idola colentes. Horum magna pars ævo nostro ad Christum conversi est, postquam Ulladislaus ex ea gente Poloniæ regnum accepit. Novigo Hieronymum Pragensem sacris literis apprime eruditum, vitæ munditia & facundia singulari clarum, qui annos supra viginti in eremo Camalduensi, in Apennino Hetrusco pœnitentiam egit, hic (oriente apud Bohemos Hussitarum hæresi) fugiens pestiferum virus, in Poloniam transivit. Ubi acceptis literis ab Ulladislao rege commendatitiis, prædicaturus Evangelium Christi ad Vitoldum principem in Lituaniam penetravit, multosqve populos Vitoldi favore fretus, ad salutiferam Dei Christi fidem convertit, venitqve tandem ad synodum Basileensem, vocatus à Juliano sancti Angeli Cardinali,



cum de rebus Bohemicis ageretur. Narrabat hic multa de Lituanis, quæ pene incredibilia videbantur. Audiebam ego ex aliis ejus dicta, nec movebar ut crederem: libuit adire hominem, atque ab ejus ore lata cognoscere. Comites mei fuerunt Nicolaus Castellanus, qui tum Cardinalis Juliani domum regebat, Bartholomæus Lutimanus Archiepiscopi Mediolanensis scriba, & Petrus Noxeranus Cardinalis Firmiani secretarius, viri graves & docti. Hominem in cella sua trans Rhenum apud Carthusienses convenimus, cujus hæc narratio fuit. Primi quos adiit ex Lituanis, serpentes colebant, paterfamilias suum quisque in angulo domus serpentem habuit, cui cibum dedit, ac sacrificium fecit in fœno jacenti. Hos Hieronymus jussit omnes interfici, in foro adductos publicè cremari. Inter quos unus inventus est major cæteris, quem sæpe admotus ignis consumere nullo pacto valuit. Post hos gentem reperit, quæ sacrum colebat ignem, eumque perpetuum appellabat. Sacerdotes templi materiam, ne deficeret, ministrabant, hos super vita ægrotantium amici consulabant. Illi noctu ad ignem accedebant, mane verò consulentibus responsa dantes, umbram ægroti apud ignem sacrum se vidisse ajebant. Quæ cum se calefaceret, signa vel mortis vel vitæ ostentasset: victurum ægrotum facies ostensa igni, contra si dorsum ostentasset, moriturum portendit. Testari igitur & rebus suis consulere sivebant. Delusionem hanc esse Hieronymus ostendit. Persuaso populo, deleto templo, ignem dissipavit, Christianos mores induxit. Profectus introrsus aliam gentem reperit, quæ Solem colebat, & malleum ferreum raræ magnitudinis singulari cultu venerabatur. Interrogati sacerdotes, quid ea sibi veneratio vellet? Responderunt olim pluribus mensibus non fuisse visum Solem, quem rex potentissimus captum reclusisset, in carcere munitissimæ turris. Signa zodiaci deinde opem tulisse Soli, ingentiqve malleo perfregisse turrim, Solemque liberatum hominibus restituisse. Dignum itaque veneratu instrumentum esse, quo mortales lucem recepissent. Risit eorum simplicitatem Hieronymus, inanemque fabulam esse monstravit. Solem verò & Lunam & stellas creatas esse ostendit, quibus maxime Deus ornavit cœlos, & ad utilitatem hominum perpetuo jussit igne lucere. Postremo alios populos adiit, qui sylvas dæmonibus consecratas venerabantur, & inter alias unam cultu digniorem putavere. Prædicavit huic genti pluribus diebus



diebus fidei nostræ aperiens sacramenta, denique ut sylvam succideret imperavit, ubi populus cum securibus affuit, nemo erat qui sacrum lignum ferro contingere auderet. Prior itaque Hieronymus assumpta bipenni excellentem quandam arborem detruncavit. Tum secuta multitudo alacri certamine, alii ferris, alii dolabris, alii securibus sylvam deiciebant. Ventum erat ad medium nemoris, ubi quercum vetustissimam, & ante omnes arbores religione sacram, & quam potissimè Dei sedem esse putabant, percutere aliquandiu nullus præsumsit. Postremo ut est alter altero audacior, increpans quidam socios, qui lignum rem insensatam percutere formidarent, elevata bipenni magno ictu cum arborem cedere arbitraretur, tibiam suam percussit, atque in terram semianimis cecidit. Attonita circum turba flere, conqveri, Hieronymum accusare, qui sacram Dei domum violari svasisset, neque jam quisquam erat qui ferrum exercere auderet. Tum Hieronymus illusiones dæmonum asse affirmans, quæ deceptæ plebis oculos fascinarent, surgere, quem cecidisse vulneratum diximus, imperavit, & nulla in parte læsum ostendit, & mox ad arborem adacto ferro adjuvante multitudine ingens onus cum magno fragore prostravit, totumque nemus succidit. Erant in ea religione plures sylvæ pari religione sacræ ad quas dū Hieronymus amputandas pergit, mulierum ingens numerus plorans atque ejulans Vitoldum adit, sacrum lucum succisum queritur, & domum Dei ademptam, in qua divinam opem petere consueverant, inde pluvias, inde soles obtinuisse, nescire jam quo in loco Deum quærant, cui domicilium abstulerint. Esse aliquos minores lucos, in quibus dii coli soleant, eos quoque delere Hieronymum velle, qui nova quædam sacra introducens, patrium morem extirpet. Rogare igitur atque obtestari, ne majorum religionum loca & ceremonias auferri sinat. Sequuntur & viri mulieres, nec se ferre posse novum cultum asserunt. Relinquere potius terram & patrios lares, quam religionem à majoribus acceptam dicunt. Motus care Vitoldus, veritusque populorum tumultum, Christo potius, quam sibi deesse plebem voluit. Revocatisque literis, quas præsidiibus provinciarum dederat, jubens parere Hieronymo, hominem ex provincia decedere iussit. Hæc nobis Hieronymus constanti vultu nihil hæsitans, ac per juramentum affirmavit: dignum fide & gravitas sermonis, & doctrina ostendit, & viri religio. Nos quæ acce-



pimus immutata retulimus, veri periculum non assumimus, persuasi tamen & nos & comites ab eo recessimus.

## CAP. XXVII.

*De Ruthenis, & quomodo principatus apud eos soleat assequi.*

**R**utheni, quos appellare Rosanos Strabo videtur, Lituanis contermini sunt, gens barbara, incompta, apud quam opulentam ecclesiam obtinuit Isidorus Cardinalis Sabinensis, cujus supra mentionem fecimus. In hac gente civitatem permaximam esse tradunt Nogardiam appellatam, ad quam Teutonici mercatores magno labore perveniunt. Magnas ibi esse opes fama est & multum argenti, pellesque pretiosas, vendentesque atque ementes ponderato argento, non signato utuntur. Lapis in medio fori quadratus est, quem qui ascendere potuerit, neque dejectus fuerit, principatum urbis assequitur. Pro ea re in armis dimicant, saepeque una die plures conscendisse ferunt, unde saepe seditiones in populo emergere.

## CAP. XXVIII.

*De Livonia semiferos homines in una sui parte continente.*

**L**ivonia deinde Christianarum ultima provinciarum ad septentrionem Ruthenis jungitur. Tartaricam saepe incurrunt, in qua nostra aetate magnas acceperunt strages. Fratres Teutonici, qui beatæ Mariæ vocantur, hanc armis quæsiwere, & Christi sacra suscipere cogerunt, cum esset antea gentilis & idola coleret. Eam alluit ab occidenti mare Balthicum, quod plerique veterum oceanum esse putaverunt. Nondum septentrio (ut hodie) cognitus Græcis atque Italis fuit. Christiana religio hanc orbis partem nostro generi aperuit, quæ fortissimis gentibus deterfa barbarie mitioris vitæ cultum ostendit. Balthicus sinus aded late patet, ut incomptæ magnitudinis apud aliquos esse



esse videatur. Origo ejus ex Britannico mari ducitur, quod Germanicum appellari potest. Nam & Germaniæ magnam partem alluit. Ostium ejus in occidenti est, non longè à Cherfoneſo Cimbrica, quam Daciam hodie vocant. Excurrens autem in orientem, in ſeptentrionem panditur, inſulasqve magnas ambit: occidentale littus Norvegi occupant. Ad Septentrinem ſemiſeros homines eſſe tradunt, cum quibus nullum linguæ commercium, navigantes habent, ſignis tantum & nutibus commutare merces ſeruntur. Meridionale littus Saxonibus ac Prutenis traditur. Orientale (ut diximus) Livones tenent. Inter Livoniam & Prusiā parvam terram eſſe ſerunt, unius ſermè diei latam itinere, quam Maſſageta colunt, gens neqve gentilis, neqve verè Chriſtiana, Polonorum imperio parens, atqve hinc regnum Poloniae ad mare protenditur, & Baltheum quem diximus ſinum.

CAP. XXIX.

*De Prutenis, & quomodo fidem Chriſtianam à Teutonicis fratribus ſanctæ Mariæ ſumpſerint.*

**R**Edeunt à Livonia in Germaniā, per littus Balthei maris poſt Maſſagetas Pruteni ſeſe objiciunt, qui ripas utraſqve Viſtulæ amnis accolunt. Is eſt Sarmatiæ ac Germaniæ terminus, qui exorienz in montibus, qui Poloniam Hungariamqve dirimunt, partem Poloniae irrigat. Prusiā verò quam longa eſt percurrit, ab oppido Torni uſq; Gedanum, quo in loco Baltheum inſluit. Hunc fluvium alii Viſtulam, ut diximus, quibus ætatis noſtræ ſermo congruit, alii Juſtulam, quidam Iſtulam vocavere. Quod ultra fluvium eſt, Sarmatici juris ſuit: quod citra, Germanici: ad orientem ac meridiem, Maſoviciæ Poloniqve rura colunt. Occidentem Saxones occupant, aqvilonem Balthei maris excipit littus. Frumenti ferax regio eſt, aquis irrigua & plena colonis, multa ambitioſa oppida, multi maris ſinuoſi reflexus amœnam efficiunt. Pecorum ingens vis, multa venatio, piſcatio dives. Ullmerigos olim hanc terram incoluiſſe Jordanus tradidit, quo tempore Gothi ab inſula Scandavia in continentem deſcendere, qui (ut ille ait) Ullmerigorū terras invaſere. Ptolemæus autem



tem Amaxobios, & Alaunos, Venedes, ac Githones penes Istulam, fluvium habitare affirmat. Barbara hæc gens & idolorum cultrix, usque ad Fredericum imperatorem ejus nominis secundum fuit. Sub ejus verò imperio, cum amisissent Christiani Ptolemaidem Syriæ civitatem, fratres Teutones, quos sanctæ Mariæ diximus appellari, inde fugati in Germaniam rediere, viri nobiles & rei militaris periti, qui ne per otium marcerent, Fredericum accedentes, Prussiam Germaniæ conterminam Christi cultum spernere dixerunt: sæpe illius gentis homines in Saxones cæterosque vicinos excurrere, ingentem vim pecorum atque hominum abigere, esse in animo sibi compescere Barbaram gentem: annuat tantum imperator, provinciamque fratribus perpetuo jure possidendam tradat, si eam armis acquirant. Jam enim Masoviæ duces, qui ejus se terræ dominos affirmabant, jus suum fratribus concesserant. Grata oblatio Frederico fuit, qui collaudato proposito, quas voluere fratres, sub aurca bulla literas concessit. Illi sumptis armis brevi tempore quicquid Prutenici juris citra Vistulam fuit occupavere. Exin tranato fluvio, vetustam & late patulam quercum in castelli modum erectis propugnaculis juxta ripam munierunt, ibi collocato præsidio ulteriores Prutenos vexare cœperunt. Pugnatum est sæpe pro quercu, & ingentes Paganorum copię fugatæ ac deletæ sunt: bellum pluribus annis productum est. Ad extremum fortuna Fratrum imperio arridens, omnem eis Prussiam subjecit. Victæ Barbaræ nationes, jugum subiere. Ex illo tempore lingua Teutonica introducta est, & cultus Christi gentibus imperatus. Ecclesiæ quoque Pontificales erectæ, trans Vistulam Pomelanienfis, Culmenfis, Sambienfis, & Varmienfis, ad quam defuncto Francisco episcopo, parvitatem nostram postulavere Canonici. Calixtus Pont. Max. eam nobis annuente senatu Apostolico commendavit. Quæ una est illis in partibus jure suo utens, nec subjecta Fratribus: reliquos episcopos religionis habitum gestare oportet. Quo in loco munitam quercum diximus fuisse, nobile oppidum ædificatum est, quod Mariæburgum vocant, & arx nobilis atque amplissima: hic sedes magni Magistri, qui cunctis fratribus præest Prussiam incolentibus. Sunt & alii duo in eadem religione Magistri, alter Livoniam regit, alter conventus Alamanniæ gubernat. Teutones hujus religionis inventores fuere, ac propterea nemo recipitur ad eam, nisi Teutonicus nobili.



nobilibus ortus parentibus, & cui propositum sit protuendo Christi Evangelio, adversus salutiferæ crucis inimicos armis depugnare: ob eam rem vestimentis albis utuntur, nigra cruce insuta. Barbam omnes nutriunt, exceptis qui sacris altaribus serviunt. Pro Canonicis horis dominicam orationem usurpant, neque literas discunt. Magnæ his opes, nec minor potentia quàm regibus: sæpe cum Polonis de regni limitibus, acceptis atque illatis cladibus contendere, nec totis viribus belli fortunam experiri recusarunt cum Uladislao Casimiri qui modo regnat, patre. Contraxerant ambæ partes validissimas atque ingentes copias. Polonis Lituani & Tartari adjuncti erant, quos duxerat Vitoldus. Teutonici fratres ex tota Germania vires conciverant. Postquam prope ad viginti ferme stadia uterque consedit exercitus, spe plenus & impatiens moræ: Prutenorum magister caduceatorem, qui bellum regi denunciaret, & duos enses, in quibus staret victoria militis, facta potestate, ut quem vellet hostis eligeret, alterum sibi remitti iussit. Accepit Uladislauus alacer nuncium, donatoque caduceatore, uno retento gladio, remisit alterum. Mox iussi milites arma induere, belli que signum datum, quadraginta millia equitum in ambobus castris fuisse proditum invenio. Uladislauus Tartaros ac Lituanos primum inire certamen iussit: ex Polonis subsidarias acies elegit. Contra Prutenus auxilia in postremis habuit: florentem ordinis sui militiam in exercitus fronte collocavit. Commisso prælio inermes quodammodo Tartari ac Lituani magna strage cæsi sunt. Urgebat tamen multitudo, nec terga dare Polonos metuens audebat, atrox pugna supra cadavera occisorum edebatur. Nec tam vulnerare Prutenus alacer, quàm vulnera recipere Tartarus videbatur: protractum est diu certamen, peracta ingens occisio. Lituani Tartarique veluti pecudes mactabantur. At cum novus semper hostis emergeret, defessi tanta cæde peracta Teutones, versare ferrum vix poterant & jam remissius pugnabant. Quod ubi Uladislauus animadvertit, tum primum Polonorum aciem validam ac ferro rigentem immittit: fit subita irruptio, instauraturque prælium: non tulere Teutones recentis agminis impetum, impar pugna recentis ac fatigati militis fuit: oritur mox fuga ex parte fratrum, ferit terga Polonus. Magister ordinis ubi suos cedere videt, nec jam ullam in auxiliis spem esse animadvertit, cum lecta militum manu hosti sese



objectans occiditur: fit foedior fuga, nec prius Teutonicus fugere,  
 quam Polonus persequi destitit. Perierunt in eo bello ex parte fra-  
 trum multa hominum millia, inter quos viri primarii, quos vocant,  
 Commendatores, equestri dignitate insignes, cum ipso Magistro  
 circiter DC. Nec Polonis incruenta victoria cessit, Tartaris ac Litua-  
 nis magna ex parte caesis. Bellum hoc, anno trecentesimo decimo su-  
 pra millesimum gestum est post Christi salvatoris ortum. Prussia, fortu-  
 nam regis secuta, omnis excepto Burgo Mariæ ad victorem defecit. Sed  
 interveniente Sigismundo Cæsare, pax inter fratres & Polonum con-  
 stituta est: percussum foedus, pecunia Polono data. Prussia reddita  
 fratribus, nec deinde usque ad Frederici tempora, qui modo impe-  
 rat, in possessione agri sui turbata religio est. Sub ejus verò imperio  
 cum populares grave sibi jugum fratrum existimarent, foedus inter  
 se iniere in hunc ferme modum: ut quindecim viri singulis certis in-  
 locis convenirent, qui provincialium querelas adversus fratres audi-  
 rent, nec sinerent quempiam indigne vexari. Ex his quatuor ex reli-  
 gione viros assumi voluere, quatuor ex praelatis ecclesiarum, pari-  
 que numero ex nobilibus ac civitatibus, hisque parere omnes voluere.  
 Per idem tempus divisa inter se religio fuit: alii magnum Magistrum  
 sequebantur, alii quosdam Commendatores, qui Magistri regimen  
 improbabant. Magister, ut populares sibi alliceret, foedus ipsum in-  
 consulto fratrum conventu approbavit. Fredericus quoque impera-  
 tor eidem foederi robur adjecit, cautione tamen inserta, ne per suas  
 literas jus religionis laederetur. Mortuo deinde Magistro, qui foedus  
 acceperat, & altero in ejus locum successio, Nicolaus Pont. Max. le-  
 gatum misit, qui provinciam Prussiae inspiceret, cognitoque rerum  
 statu, quantum legatus retulit, popularium foedus damnavit: utque  
 ab eo discederent, anathema interminatus, acriter imperavit: qui-  
 bus pertinacius in eorum sententia perseverantibus, ex consensu par-  
 tium, lis ad Fredericum imperatorem deducta est. Apud quem rursus  
 causa cognita, damnato eorum foedere, jussi Pruteni sunt ad obedi-  
 tiam fratrum redire: qui eam provinciam è manibus infidelium suis  
 armis vindicassent, multoque sanguine commissent. Qua re civitati-  
 bus nuntiata, mox arma in fratres populariter recepta sunt. Ex qui-  
 bus plures capti atque occisi, castella eorum everfa, arces à funda-  
 mentis ejectæ, quinquaginta & quinque oppida in eam rebellionem  
 conspira-



conspiravere. Sed cum non satis rem suam contra religionem sine externa ope tutam putarent, Casimirum Poloniae regem sibi dominum ascrivere, devotum fratribus sanguinem, qui fortunam patris ejus experti fuissent. Ille cum exercitu provinciam ingressus, dedentes sese civitates in potestatem accepit, cum quo fratres diu varia victoria dimicarunt. Plures fuere congressus, inter quos memorabilior, qui apud Coninitium oppidum habitus est. Duodeviginti millia Polonorum obsidionem in eo loco tenebant, in quis & rex ipse Casimirus fuit. Oppugnabant oppidum dies noctesque machinis admotis. Rudolphus princeps Sagoniae, ex Silesiae ducibus, tum religionis ductabat exercitum, qui laturus obsessis opem, cum septem millibus militum, aggredi regem non dubitavit. Commissum est praelium in conspectu oppidanorum summa utrinque contentione atque ardore, caesis hinc atque inde compluribus. Cum suos referre pedem Rudolphus animadvertit, increpans ignaviam fugientium interminatusque necem, aciem sistit. Et progressus in medium cum recenti pugnatorum manu, acre certamen instaurat: hos sternit, illos confodit: fit subita rerum mutatio. Urgente Rudolpho, cedit Polonus. Rursusque Casimirus suos retinet, pugnaeque seipsum miscet, & tanquam ex integro pertinaci contentione certatur. Occiditur in pugna Rudolphus, rex vero equo dejicitur, meliores ex utraque parte occumbunt. Postremo caelum credentes Poloni suum regem, desperata victoria, fugam arripiunt. Rex ab amicis adjutus, vix ex clade creptus est. Rudolphus morte sua, victoriam religioni peperit. Ex Polonis supra sex millia cecidisse feruntur, ex Teutonibus quoque non pauci periere. Post eam cladem, res Polonica nutare apud Prutenos coepit, eo inclinantibus populis, quo belli fortuna quaeritur. Stat tamen adhuc anceps exitus, & alterius Martis judicium moratur. Ferunt inter hos fratres olim mortuo Magistro, cum de successione ageretur, unum fuisse, qui rogatus eligere, quem putaret religioni utiliore, seipsum elegisse dicentem: *nolle degerare, scire se cogitationes suas, aliorum corda ignorare. Si magistratus sibi committatur, non dubitare quin reipublica bene consultum eat.* Motos ejus verbis reliquos administrationem illi credidisse, quae saluberrima deinde fuerit, multum sanon de m...



## CAP. XXX.

*De Saxonia, fluminibus, gentibus & oppidis in ea.*

**P**OST *Prutenos* Saxonicum nomen incipit, gens valida & latissima, cui ab occidenti *Visera* fluvius terminum facit, plerique usque ad *Rhenum* protendi Saxones arbitrati sunt. *Aquilonarem* plagam *Dani* obtinent & mare *Balthicum*: ad meridiem, *Francos* *Bajoarii* & *Bohemi* siti sunt: orientalem plagam, *Silesia* simul ac *Pruteni* obtinent. In his terminis inclusi sunt *Turingi*, *Brandeburgenses*, *Mixnenses*, *Lusatii*, *Pomerani*que, quos omnes Saxonici juris esse volunt. Priores tamen *Turingos* in ea terra consedisse quam Saxones ajunt. Hos enim *græcam* sobolem esse affirmant, ex *Macedonia* classibus advectam, quæ *Turingos* multis bellis defatigatos paternis agris ejecerit. Quod mihi non fit verisimile. Est enim vetustissimum in *Germania* terra Saxonicum nomen, cujus omnes veteres meminere. *Turingos* nemo antiquorum nominat, qui *Germanicas* gentes enumerant. In adventu primo *Francorum*, qui tempore *Valentiniani* *Cæsaris* *Germaniam* intravere, *Turingos* nominari reperio: ob quam rem malè quadrat historia veritati, quæ *Turingos* priores *Saxonibus* in *Germania* fuisse contendit: fatebor tamen *Saxoniarum* limites aliquando minores fuisse, aliquando majores. Nam sicut imperia, ita provinciarum limites ex tempore variantur. *Carolus Magnus* imperator, multa cum *Saxonibus* bella gessit, priusquam *Christi* cultum reciperent, eosque magnis afflixit cladibus: postquam verò deficiente apud *Francos* *Caroli Magni* genealogia, *Romanum* imperium ad *Teutones* orientales rediit, *Saxonum* aucta dignitas est: inter quos plures imperatores fuisse, singulari providentia, & rerum gestarum magnitudine clari: maximè verò tres *Othones*, qui sibi invicem succedere, de *Romana* ecclesia optimè meriti, quorum virtute prolatos *Saxoniarum* fines minimè dubitarim. Inter *Pomeraneos*, qui orientem *Saxoniarum* incolunt, oppida sunt digna nomine: *Vismaria*, & *Sundis*, *Gripsvoldia*, *Stetinum*, *Rostochium*, in quo schola liberalium artium haud contemnenda, & hæc quidem mari proxima, multis



multis ac divitibus negotiatoribus habitata est: & in mediterraneis Caminum pontificalis civitas, cujus diœcesis latissima est, nec minor Maguntina creditur. Episcopus loci Romano duntaxat præfuli subest. Brandenburgenses in duas marchias dividuntur, quarum altera vetus, altera nova vocatur. Veterem Marchiam perlabitur Albi fluvius, in cujus litore Stendalum est oppidum, & Gardelevum, & Soldvedelum, & Osterburgium. Novam Marchiam intersecat fluvius Odera, haud multo inferior Albi, in cujus litore Francfordia est dives emporium, & Lubecensis civitas. Spreva quoque fluvius eandem provinciam irrigat, æqvandus Tyberi, Berlinum in ejus litore oppidum jacet. Est & aliud flumen Havela nuncupatum, quod Brandenburgum, ex quo Marchia nomen habet, in duas partes dividit, veterem ac novam civitatem efficiens. Ibi episcopalis sedes est, & Marchionum tribunal. Ad ejusdem fluminis ripam Havelbergium quoque situm est, Pontificalis civitas: circum nobile territorium, cui Prigeniza est nomen, multis refertum oppidis, & Martiali populo plenum. Caput Mixnensium civitas Mixna est, unde nomen regioni datum, hanc quoque Albi alluit fluvius, hic valida arx, & in ea cathedralis ecclesia, in qua quoque provincia multa sunt oppida Martiali populo plena, & Martinopolis in honorem Martis à veteribus condita, Merseburgium hodie vocant.

## CAP. XXXI.

*De Turingia oppidis, & nobilibus templis in ea, de ritu mirabili super homine gravioribus vitis inquinato.*

**I**N Turingia nobile oppidum & caput gentis Herfordia, Maguntino subiecta pontifici, studiis liberalium artium insignis. Nuenburgensis quoque parva civitas, duci Saxoniae parens: hæc omnia jure Saxonum utuntur, & lingua & iisdem moribus freti. Caterum veri Saxones Magdeburgenses nullo dubitante habentur, Bremenses quoque Halberstattenenses, Hildesienenses, Verdenenses, Brunsvicenses, Luneburgenses, & Lubecenses. In Magdeburga Archiepiscopalis se-



des habetur, & in honore sancti Mauricii ex quadrato lapide dives templum, Othonum nobile opus, & in eo sancti Florentini corpus. Credunt quoque unam esse sex hydriis ibi esse, in quibus vinum ex aqua factum à domino Salvatore Evangelistarum tradit historia, hanc plebibus ostendunt, materia marmorea est ac pellucida, vini capax, quantum equus ferre possit. Alteram ac minorem apud Hildesienses affirmant, vexillum quoque sancti Mauricii hic quotannis ostenditur. Magistratus urbis jus civile Romanorum abbreviatum, & Saxonica lingua conscriptum, non sine reverentia custodit, quod Magni Caroli auctoritate firmatum tradunt, eoque in decisione causarum circumvicinæ gentes recurrunt: magna & venerabilis earum legum auctoritas habetur. Bremenses gloriam suam ducunt, Danorum gentem ad Christum esse conversam. Non est omittendum, quod de Halberstadio traditur: hanc civitatem Oltemia perlabitur fluvius, in medio ferme tumulus assurgit, in cacumine planities est, duorum ferme stadiorum contingens longitudinem, in cujus extremis angulis duo templa sita sunt, alterum pontificale, alterum quod beatæ virginis appellant. In medio, late patet forum magnificis canonicorum ædibus undique circumdatum. Urbs hæc vocatur, quod sub tumulo jacet, Suburbium appellant. In monte nulla laicorum habitatio. Carolus Magnus hujus templi fundator habetur, cujus festivitas quotannis celebratur. XII. hic dignitates, XXIV. præbendæ, Archidiaconatus supra vigesimum primum feruntur. In hoc templo singulis annis unus ex populo deligitur, quem peccatis gravioribus inquinatum putant, hunc veste lugubri induunt, & obvoluto capite prima jejunii die ad templum ducunt, indeque per ædis divinis officiis ejiciunt. Is quadraginta diebus nudis pedibus perambulat urbem, & ædes sacras circuit, neque ingreditur, neque quenvquam alloquitur. Invitatus à canonicis per vices, quod apponitur, comedit. Somnus ei post medium noctis in plateis permittitur, die Jovis sancta post consecrationem olei, rursus ad templum introducit, & oratione facta à peccatis absolvitur, pecuniasque ei populus offert, quæ tamen templo dimittuntur. Hunc Adam vocant, & omni crimine liberum putant. Circa Halberstadium ager optimus ferax tritici, maturescantibus frugibus, culmorum altitudinem equo insidentem hominem ferunt excedere.



## CAP. XXXII.

*De aliquot aliis in Saxonia oppidis, & rebus  
in ea gestis scitu dignissimis.*

**B***runsvica* oppidum tota Germania memorabile, magnum & populosum, munitum moenibus ac fossatis, turres quoque & propugnacula excellunt, magnificæ domus, perpolitæ plateæ, ampla & ornatissima templa. Qvinque hic fora, quinqve prætoria, & totidem consulatus jura civibus dicunt. Hinc appellati duces Brunsvicenses tota Germania nobilissimi, Othonum soboles, quorum claritas cum potentia labente tempore defluit. *Lubeccensium* civitas potentissima est, sine cujus auxilio vix unquam Daciæ reges continere suos subditos valent. Duodecim viri reipublicæ præsunt, quos consules appellant. Quorum perpetua potestas est, in equestri dignitate constituti sunt. Popularibus nisi vocentur, nulla de regimine, urbis consulendi facultas, nec tamen servire plebs videtur. Sua cuique substantia tuta est, & libertas, salvis legibus, ut velint vivere. Æquum judicium consules agunt, ab his Cæsar, si excesserint, appellatur. Saxoniam nostram ætate duces habentur Fredericus & Gvilielmus, quorum alter electorem imperii gerit, alter regnum Bohemiam sibi asserit, ut supra retulimus. Fuit cum Brunsvicensibus de electoratu dissensio. Sigismundus imperator litem diremit. Sententia ut sæpe fit, potentiori allusit. Alter horum natu senior, robustissimus venator fuit. Junior alter, belli appetens & in armis exercitatus. Crudelia inter eos diu bella exarserunt, hæreditatis paternæ causâ. Et quamvis de pace sæpe mentio fieret, impediens tamen Apollonio, quem Vicedominum appellant, & aliis plerisque potentibus, quibus eadem discordia quæstui erat, frustra omnis tractatus abiit. Sed cum vastatis jam agris, tota provincia pessum iret, Apollonius verò fraternalium incensor discordiarum, per annum Jubileum Romam petisset, rogavit Fredericus germanum suum, uti ad se Lipsiam veniret, secum de pace acturus. Annuuit Gvilielmus, iter ingressus dixere consiliarii paratos sibi & qui cum eo irent infidias esse, caveret ne se perditum ireret, neve suos ad necem traderet. Quibus ille: *At ego, inquit, libens mor-*  
riam,



*riar, si vos prius necatos videro, qui fraternas contentiones alitis.* Atque ita locutus, sequi iussis qui se amarent, urgentesque calcaribus equum, festino cursu fratrem adiit. Quo cum semotis arbitris evestigio pacem composuit, foedusque pepigit. Magnus vir qui se tam liberaliter in potestatem dederit hostis. Magnus & alter, qui hostem ex fratre factum, rursus fratrem atque amicum reddidit. Apollonius interim Roma reversus & qui cum eo sentiebant, ex Turingia, ubi plurima oppida possidebant, exterminati sunt. Apollonius in Coburga, quod est Franconiae oppidum, se defendit. Sed cum salutem in eo loco desperaret, nullius auxilio fretus, cum thesauris suis clam fugiens, ad Bohemos migravit. Ex illo tempore quietem habuere Saxones, quamvis Bohemi castella quaedam ab eis repetentes, saepe bellum minati fuerint. Induciae in hanc usque diem arma partium tenuere. Lis major nunc oritura videtur. Quando Gvilielmus regiae sororis maritus ad Bohemiae regnum aspirare fertur, quamvis terrae procures alium sibi regem assumpserint. Libet hoc loco audax privati hominis inferre facinus. Conradus Kauses nobili loco apud Saxones natus, bellicae reiperitus, manu promptus, & animo imperterritus, cum se patria pulsum, & paterna hereditate privatum per injuriam Frederici ducis existimaret, scelus incredibile nostra aetate perpetravit. Arx est in Mixna in alto monte & abruptis undique rupibus sita, Altumburgum provinciales vocant, ad radices montis oppidum egregie munitum & populo plenum jacer. In arce duo Frederici adolescentes Ernestus & Albertus educabantur. Huc Conradus intempesta nocte magnis itineribus cum paucis comitibus contendit, & ad motis scalis prodente pedagogo arcem ingressus, dormientes adolescentulos in cubili comprehendit. Interminatusque mortem, si vocem emitterent, funibus colligatos extraxit, haud dubius, quin productos in Bohemiam magno precio venderet, suasque contumelias eo pacto magnifice ultus videretur. Jam Sylvam Herciniam (quae Bohemiam à Saxonia dividit) ingressus erat, jamque periculum omne transmissum putabat, cum junior captivorum labore ac fame deficiens, & quietem simul & cibum poposcit. Cujus precibus commotus praedo ad carbonarium divertit quendam, afferrique panem ac cerevisiam iussit. Interea apud Altumburgum cognita tanta rei novitate clamor exoritur. Attoniti oppidani raptim arma capeunt, & pretiosam



pretiosam vendicaturi prædam præcipiti cursu prædonis vestigia insectantur. Sylvam ingressis fortuna blanditur, quæ inter multos trames eum teneri svasit, qui recta duxit ad carbonarium. Ibi Conradus dum puero cibum ministrat, ex improvise capitur, & oblatus principi, audacissimi sceleris capite pœnas solvit. Fredericus eodem penè nuntio, quo captos atque abductos filios audiverat, recuperatos & domum reductos didicit. Saxoniam ducibus parva veræ Saxoniam portio paret. Sunt enim in ea provincia multi alii principes, multæ civitates imperiales, multi episcopi proprium territorium habentes. Mixna verò & Turingiæ major pars, Lusatia & Franconia pleraque oppida his ducibus parent. Jus autem eligendi Romanorum imperatorem Saxoniam ducibus ex parvo quodam principatu competere asserunt, inter Mixnam Silesiamque jacente, cujus caput oppidum est, Wittenberg appellatum, Mons Albus. In Saxonia argentifodinas apud Goslariam Otho primus imperator invenit, quarum magni fuerunt redditus, ibi & palatium nobilis operis ædificatum. Habet & fontes amaros Saxonia, ex quibus sal coquitur album, quod ad vicinas gentes defertur. Salina uberrima atque ditissima apud Luneburgium habentur, ex quibus multi monasteriorum abbates, & multi ecclesiarum prælati vitam ducere consueverunt. Fuit enim vastus salis uberrimus. Has salinas Luneburgenses violenter usurpavere, ob quam rem & à Nicolao Pont. Max. & à Frederico imperatore Augusto damnati sunt, consulatus, qui ejus rei autor habebatur, autoritate Apostolica dejectus est, sed favore Bernardi ducis Brunsvicensis paulò postea in pristinum statum rediit. Et qui noviter consulatum adierant, in carcerem conjiciuntur, civitati rebeli & ecclesiasticorum bonorum rapaci, sacris interdictum est, non tamen desunt, qui rem divinam apud eos faciant. Tantus est ævo nostro, & in populo & in clero, auctoritatis ecclesiasticæ contemptus. Est in Marchia Brandeburgensi non magni momenti civitas aquis circumdata, Habelbergam vocant, in ejus diocesi loco aspero ac deserto, parvum oppidum est nomine *Vilsnacum*, hic tres hostiæ habentur, ex quibus cruorem sua sponte manasse tradunt. Ob eam rem magnus populorum huc concursus, & nautarum vota huc solvuntur, vulgo locum *ad sanctum cruorem* vocant. Excessivus scribendi modum Saxoniam civitates nominatim commemorantes. Id fecimus, quia veteres scriptores parum de Ger-



mania locuti sunt, & tanquam extra orbem ea natio jaceret, somniantes quodam modo res Germanicas attingunt. Ob eam rem dabitur mihi venia, fortasse & aliquis gratias habebit, si Germanicas describentes provincias, ut res oculis subjiciamus, paulò prolixiores fuerimus, propositi nostri metas egressi.

## CAP. XXXIII.

*De Dania sive Dacia sive Svetia, & Norvegia,  
de Margarita trium regnorum insigni do-  
mina, deq; varia trium regum  
fortuna.*

**H**oc loco quoniam Saxoniam Daniam jungitur, priusquam Germaniam reliquas partes absolvo, de ipso Daniam regno vicinisq; in Aquilonem versus aliqua referre institui, non indigna cognitu. Tria sunt in Septentrionem vergentia regna, sibi invicem coherentia, Danorum, quod hodie Dacum appellant, Svetiorum ac Norvegorum. Daniam sive Daciam dicere volumus, consuetudini servientes, Germaniam portio est Chersonesi habens formam, hanc quondam Cimbri tenuere. Unde illa inundatio barbarorum emerit, quam Marius Arpinas Italiam petentem, & res Romanas evertere minantem, ad internecionem delevit. Possidonius (ut Strabo refert) conjecturam facit, quod Cimbri latrocinando incertis errabundi sedibus ad paludem usque Maotim militiam agitarint: ab eis enim Cimmericum vocari Bosphorum arbitratur, quasi Cimbrium, cum Græcorum lingua Cimmericos Cimbros nominet. Svetia cincta undique mari plures insulas habet, in quis Scandavia est apud veteres latè memorabilis. Hinc quoque populorum innumerabilis multitudo egressa, omnem olim Europam armorum turbine ac procella involvit. Nam Gothorum, qui Hunnos bello vicere, Pannoniam, Mysiam, Macedoniam, & omnem Illyridem occupavere, Germaniam, Italiam, ac Galliam vastavere, & demum in Hispania confedere, hinc fuit origo. Norvegia, quæ de ipso Septentrione sortita est nomen, continenti per Ruthenos jungitur, & in Arcton protensa, in-

cognita



cognita terræ, seu stricto glacie Oceano (ut pleriq; fabulantur) contermina est. Ad orientis partem ac meridiem Baltheo mari alluitur, ad occidentem Britannici finit Oceanus. Daciam Teutones hodie Danorum appellant Marchiam, cujus lingua Germanis incognita est. Ex Norvegia venisse putant, qui Cimbrorum occuparint loca. In hac terra patrum nostrorum memoria, Voldimarus regnavit, in Svetia Magnus, Aquinus in Norvegia, quem ferunt divinum fuisse hominem, miro provincialium amore atqve obsequio cultum. Huic conjunx Margarita fuit Voldimari filia, ex qua natus Olaus patri succedens, brevi tempore vita functus, regnum matri reliquit. Ea & paternum adeptæ est, extincto Voldimaro. At Magno in Svetia hominem exuente, Albertus dux Megapolensis vocatū populi diadema suscepit. Qui dominatum vicinæ scæminæ contemnens, bello Daciam Norvegiamqve laceßere cœpit. Occurrit ei Margarita coactis copiis. In campis latè patentibus pugnatum est, tanquam ipsa viri, hostis scæminæ animum induisset, victus Albertus captusqve & in triumphum ductus, regnum amisit. Dimissus tandem, infame senium in paterna domo finivit. Margarita clarissima mulier tribus imperans regnis ad senectutem usqve magnificè ac religiose subditos gubernavit, demum senio confecta, cum tantum per se ferre nequiret imperium, Ericum Pomeraniæ ducem quatuor & decem aÑos natum, filium sibi adoptavit, regnaq; illi commisit, & Philippam regis Angliæ filiam dedit uxorem. Is cum, conjuge sine prole defuncta, ducere uxorem ulterius nollet, jamqve 55. regnasset annos, ad extremam sub imperio Frederici populari tumultu ex regio solio deturbatus est. Et Christophorus dux Bajoariæ sibi ex sorore nepos in ejus locum successus, qui avunculum suum decem annis, quibus ipse imperavit, in insula Gothica regnare permisit. Christophoro autem ex hoc seculo abeunte, Daciæ ac Norvegiæ coronam Christiernus accepit. Sveci verò in electione regis discordantes, alii Carolum equestri dignitate insignem, alii Canutum ejus fratrem natu minorem, regno præficiunt. Pendente adhuc electionis negotio, Carolus immixtis militibus, Stocholmum oppidum clam occupat, in quo regia sedes habetur. Canutus per, amicos arcem invadit, hinc bellum inter fratres de regno ortum, & pugna diu anceps, occisis utrinqve pluribus, ea demum lege induciæ pactæ, ut potestas eligendi regem, exclusa nobilitate, plebi fieret. In



qua cum Carolus gratiosior esset, majestas regni ad eum defertur, Canutus privatam vitam degit. Carolus verò novo regno tumidus atq; insolens, armatis navibus Ericum ætate confectum, nulli noxium, sibi ipsi viventem, è Gothia propulsavit. Qui etiam hodie in humanis apud Pomeraneos, unde illi origo fuit, parvo contentus vitam agere fertur, quam sint incerta mortalia, & quàm inania suo exemplo docens, qui tribus potentissimis regnis exutus, nec parvam insulam, in qua decem annis delituerat, usque ad mortem retinere potuit, ætate plenissimus. Sed neque Carolo scelera sua impunita fuere, qui dum Christi ecclesias persequitur, religionem contemnit, sacerdotes dispoliat, festos dies observari prohibet, jura divina & humana confundit, à Joanne Benedicti filio Upsalensium præfule viro cordato & impigro, à quo nobilitas regni excitata est, magno prælio superatus est, ac regno pulsus, in parva insula non longe ab ostio Vistulæ exilium agit. Christiernus in locum ejus assumptus, pietate ac justitia melior, iterum tria regna nostro tempore in unum redegit, cui & Gothia paret Gothorum quondam sedes ac patria.

## CAP. XXIV.

*De Bohemia succinctè.*

**B**ohemorum modo res gestas attingere, ac situm referre locorum ratio exigeret, qui Saxonibus ad meridiem juncti sunt. Multa apud eos ætate nostra memoratu digna emeruerunt, multa prælia gesta sunt, multus ibi sanguis effusus, deletæ funditus civitates, spreta & conculcata religio. Exorta est Hussitarum hæresis, Adamitarum pullulavit insania, debacchati sunt Thaboritarum & Orphanorum exercitus, duo fulmina belli, Zysca & Procopius provinciam ex arbitrio suo diripere. Joannes ac Hieronymus populum decepere, in Constantiensi magna Synodo demum combusti. Jacobellus, Coradus Rocazana, & Petrus Anglicus evangelii corruptores, tanquam magistri veritatis habiti. Quatuor reges extirpare pestiferum virus non potuere, Venceslaus, Sigismundus, Albertus & Ladislaus, qui apud eos veneno extinctus creditus est. Postremo Georgius rex creatus, qui Hussitarum labe infectus putatur, magnus vir,  
alioqui,



alioqui, & rebus bellicis clarus. Sed omnia hæc in historia, quam de Bohemis his diebus edidimus, conscripta sunt. Ibi quoque de situ regionis, & gentis moribus, pro captu nostro mentionem fecimus, inde igitur assumendum erit, quicquid huic operi de rebus Bohemicis deesse videbitur. Nos cœptum sequentes iter, inferioris Germaniæ provincias absolvemus, deinde ad superiores revertemur partes.

## CAP. XXXV.

*De Phrisia, moribus gentis ejus, &  
soli qualitate.*

**P***hrisones* ad oceanum siti, ab oriente Saxoniam contingunt, ad meridiem Westphalos, ad occidentem Trajectensium terræ junguntur, quamquam & ipsos Trajectenses plerique Phrisones esse volunt. Inter quos Othonem invenio Phrisingensis ecclesiæ præfulem, qui res Germanicas haud imperitè conscripsit. Albertus episcopus Maguntinus, qui Fuldense monasterium erexit, cum religionem Christi persuadere Phrisiis niteretur, ab eis interfectus & martyrio coronatus est. Gens eadem ferox & armis exercitata, robusti & proceri corporis, securi atque intrepidi animi, liberam se esse gloriatur, quamvis Philippus Burgundiæ princeps ejus se terræ dominum vocet. Revera libera Phrisia est, suis utens moribus, exteris nec parere sustinet, neque dominari cupit: haud invitus Phriso pro libertate mortem appetit. Dignitas in hac gente militaris invisa. Sublimem virum, qui se cæteris efferat, non ferunt. Magistratus annuos eligunt, qui rempub. æquo jure disponant. Fœminarum impudicitiam severius puniunt. Sacerdotes ne aliena cubilia polluant, sine conjugē non facile admittunt. Vix enim, continere hominem posse, & super naturam arbitrantur. In pecoribus omnis eorum substantia est, ager planus ac palustris, multo gramine fœcundus, ligno caret. Bituminoso cespite, & sicco stercore boum, ignes sovent. Ex hac gente tradit Cornelius Tacitus imperante Nerone, duos legatos Romam venisse, Veritum ac Malorigem, qui Pompeji theatrum intrantes, cum vidissent quosdam cultu externo inter senatores sedere, & intellexissent id



honoris earum gentium legatis dari, quæ virtute & amicitia Romana præcellerent, *nullos mortalium aut armis, aut fide ante Germanos esse exclamaverunt*, ac digredientes inter patres confedere: ob quam rem ambos Nero civitate donavit.

## CAP. XX XVI.

*De Holandia & Trajectensibus, & Selandia, quomodo Friburgium in jus Sabaudensium sit conversum.*

**H**olandia quoque provincia Germaniæ à septentrione Oceano alluitur mari, quod reliquum est, Rheni fluminis brachia intercipiunt, insulamque conficiunt, palustris, pascuosa, pluribus stagnis ac maris interfusa sinibus. Nec desunt, qui Trajectum nobilem urbem in Holandia sitam dicant, nobis haud alienum esse videtur, aliquando Phrisiæ Trajectenses, aliquando Holandiæ traditos esse, ut sæpe regionum terminos dominantium imperia mutant. Nostra quidem ætate neque Phrisiæ neque Holandiæ dantur. Principatus ecclesiæ Trajectensis imperatori tantum subicitur, latamque possidet terram, diversis Rheni meatibus interclusam, cui ab oriente Phrisii, à meridie Westphali junguntur, Holandia septentrionem excipit, ab occidente ducatus Gelriæ, de quo suo loco dicemus, Rhe-  
no flumine disjungitur. Imperitissime verò, ne dicam fallacissime, nonnulli ætate nostra Trajectum Gallicæ nationis civitatem esse dixerunt, cum de pontificis ageretur electione. Nam quo pacto Trajectum Galliæ dabimus trans duo Rheni brachia situm, quando & qui cis Rhenum habitant Colonienfes, Clivenfesque constat esset Germanos? Trajectensium quippe situs mos sermoque germanicus est. Trajectum dives & populosa civitas est. Episcopus urbis XL. millia pugnatorum, si quando necessitas ingruit, educit ad bellum: forma viris ac mulieribus egregia. Ab exterorum incurfu, & aquarum inundatione, & propria virtute defenduntur: potus genti cerevisia, vinum mercatores afferunt. In ea civitate memoria nostra multæ seditiones fuisse, cum episcopum uni parti acceptum, altera recusaret.

Deside-



Desiderius aliquando quietum episcopatum tenuit, deinde à civibus eiectus, Romani pontificis & vicinorum principum adversus subditos auxilia imploravit. Illi Diesoldium quendam contra jus fasque sibi præfulem assumpsere. Martinus Pont. Max. anathema in eos promulgavit. Contempnere ecclesiasticum gladium obstinati homines, experiri arma oportuit, ingentes Burgundorum ducis vicinorumque principum copiarum adversus Traiectenses ductarum infeliciter pugnare. Victor contumax populus, septem annis ecclesiarum mandata contempsit, Desiderius in exilio obiit. Canonici qui propter eum patria pulsi fuerant, Valramum Morsensem archiepiscopi Colonienfis germanum successorem elegerunt. Agitata est in Concilio Basiliensi causa, confirmata electio. Interim damnata in Synodo Traiectensium rebellio. Iterum frustra pugnatum. Postremo missus ab Eugenio legatus Johannes Cosoronensis episcopus, qui postea ad Cardinalatus honorem vocatus, Morinensis appellatus est. Cum retulisset unicam pacandæ provinciarum viam esse, Diesoldio ignosci, ei que gentis præfulatum, committi, excluso Valramo: rebelli populo satisfactum est. Pulchre sane: nullæ victis leges favent, sacrosque canones potentia vincit. Voluerunt Calixti quoque imperium eludere Traiectenses, qui mortuo Diesoldio episcopum ab eo datum recipere recusarunt. Sed apparatibus Philippi Burgundiæ ducis ac potentia territi, & primis conatibus infeliciter usi, furore deposito paruerunt. In Helvetia nobile oppidum (Friburgium vocant) in potestate domus Austriæ multis seculis fuit. Sed cum Ludovico Sabaudiarum duci tantam pecuniam deberet, quantam nec privatim, nec publicè dissolvere cives possent, nostra demum ætate, & dum Fredericus imperat, in jus Sabaudienfium factum est, quo in loco & sermo germanicus terminatur.

Ultimi Germanorum ad septentrionem & occidentem versi Scandini sunt, insulares populi, Rheni ostiis objecti, inter quos præcipui Dordracenses habentur. Ea civitas est egregiè munita, dives opum, negotiationique maximè accommodata, cujus haud parvam partem anno superiore incendium absumpsisse relatum est. Incuria civium id evenisse constat, quanquam pleraque miracula referuntur, quæ præterea, quia non satis digno testimonio comprobantur. Est & Brielum oppidum non ignobile, aquis circumdatum, in quod etiam mercatores multi navibus applicant.



*De Westphalia.*

**N**on transibo nunc Rhenum, germanicas quæ ibi habitant gentes commemoraturus. Dabitur suo loco de his quoque dicendi facultas, prosequar veteris ac veræ Germaniæ populos, & qui junguntur vel Traiectensibus vel Phrisiis ad meridiem, expediam. Westphalia Rheno fluvio ab occidenti clauditur, Visurgi ab oriente, quem Visera hodie vocant, à septentrione Phrisiam habet, & Traiectensium terram, meridiem Hassiæ montes excipiunt, quos Abriobios Ptolemæus appellare videtur, ex quibus Amasis fluvius oritur, qui Paderburnam & Monasterium non ignobiles civitates alluens, mediam ferme provinciam interfecat, & per Phrisiam defluens fertur in mare. Sala quoque fluvius Westphaliæ irrigat, inter quem & Rhenum cum Drusus germanicus belligeraret, domitis hostibus victor oppetiit. Quomodo autem cultores hujus terræ vocaverit antiquitas, difficile dictu est, discordantibus autoribus. Strabo vicinos Rheni accolæ hoc loco Sicambros appellare videtur, qui duce Milone cum Romanis bella gessere, vicique datis obsidibus pacem obtinuerunt, quamvis calcata fide ac proditis obsidibus rebellaverunt. Ptolemæus quoque à parte primum septentrionali Germaniæ, circa Rhenum fluvium Bufactores habitare tradit, Parvos appellatos, Sicambros, Oqvenos & Longobardos. Invenio apud Strabonem circa Amasim fluvium Bructeros habitasse, quos Drusus navali prælio superavit. Bructeros autem bello victos ab Austro in Aquilonem & Oceanum dilapsos: ob quam rem conjecturam capere possumus, hos esse, qui hodie Pruteni appellantur, aquilonares populi, de quibus supra diximus: facile namque Bructeros in Prutenos sermo convertit. Carolus Magnus multa cum Westphalis prælia gessit, eosque magnis affecit cladibus, coegitque Christi religionem amplecti, relicto idolorum cultu: quamquam sæpius abnegassent, nec jusjurandum adverterent, ut metu poenæ rebellionem compesceret, occultos instituit judices, quibus potestatem dedit, ut quamprimum dejerasse aliquem comperissent, aut fregisse fidem, aut aliquod aliud flagitium commisisse, mox illum supplicio afficerent, ubi primum comprehendi posset, nulla citatione prævia, aut defensione præmissa. Elegit viros graves, & recti aman-

tes,



res, quos plectere innocentes haud verisimile fuit. Terruit ea res Westphalos, ac demum in fide continuit, cum sæpe in nemoribus & procures & mediocres viri laqueo suspensi invenirentur, nulla accusatione prius audita. Quærentibus tamen causam, constabat fregisse fiden, aut magnum aliquod scelus commisisse, qui necati reperiebantur. Id iudicium usque ad nostram perdurat ætatem, vocaturq; Veritum. Qui ei præsent, Scabini appellantur, quorum ea præsumptio est, ut per totam Germaniam jurisdictionem extendere velint. Secretos habent ritus, & arcana quædam, quibus malefactores judicant. Ea nondum quisquam repertus est, qui vel pretio vel metu revelavit. Ipsorum quoque Scabinorum magna pars occulta est, qui per provincias discurrentes criminosos notant, & inferentes iudicio accusant, probantque, ut eis mos est: damnati describuntur in libro, & minoribus Scabinis committitur executio. Reus ignarus suæ damnationis, ubicunque repertus fuerit, supplicio afficitur. Degeneravit autem hoc iudicium. Nam & viles aliquæ personæ admittuntur, quæ civilia negotia tractare audent, quibus erat solum de criminalibus permissa potestas. In hac provincia nostro tempore Susatenses ab ecclesia Colonienſi descivere, nec diutino vexati bello, multisque cladibus affecti & obsidione pertinacissima oppugnati, ad obedientiam rediere. Cujus rei causa & Theodoricus Colonienſis antistes, qui Westphalorum princeps habetur, & Joannes dux Clivenſis, non parvis inter se odiis contendere. Cum Susatenses ad Clivenſium opem confuſſent, cumque Colonienſis Saxonie duces & non parvam Bohemorum manum in auxilium accerſiſſet, apud Monasterium quoque ejusdem provincie civitatem, propter ecclesiam, quam Valramus Theodori frater sibi debitam exiſtimabat, acriter dimicatum est, in quo bello multis caſis, unus ex principibus, qui dux copiarum fuit, interceptus est, & in potestate Colonienſis antiſtitis factus. Est autem Westphalia regio admodum frigida, neque frumenti abundans, pane utuntur nigro, cereviſia potus est. Vinum, quod Rheno vehitur, magno emitur pretio. Opulenti tantum eo utuntur, idque raro. Populus Martialis est, & ingenioſus, de quo proverbium eſſe dicunt: *Vitiosos ac fallaces Westphaliam facilius, quam stultos gignere.* Hic quoniam Theodorici mentio incidit, non ab re pauca de eo referre, cui inter viros illustres nostri seculi nemo locum negaverit. Origo ejus



ex familia Morsensi apud Germanos principes non oratissima fuit. tres Fratres habuit, qui omnes supra LX. annum vivere: Henricus natus major paternum principatum gubernavit: Joannes Monasteriensem ecclesiam, multis annis usque ad exitum vitæ suæ summa cum laude administravit: Valramus & ad Trajectensem ecclesiam & ad Monasteriensem, defuncto fratre nequicquam aspiravit, quamvis ad Trajectum concilii Basiliensis favore, & ad Monasteriensem Nicolai pontificis institutione uteretur. Theodoricus ipse cum Bononiæ juri pontificio operam daret, à Joanne XXIII. summo sacerdote, Coloniensem ecclesiam obtinuit, cui jam XVII. annos, non sine plebis ac nobilitatis magno favore præfuit. Qui et si plurima pro defensione ecclesiæ suæ vario eventu bella gessit, in quovis modo strenui militis, modo fortissimi ducis officium implevit, nunquam tamen domi sacerdotalia munia, aut civilem administrationem neglexit. Corpore pulchro, & supra communem staturam eminenti, animo magno & perliberali, cujus palatium illustribus semper hospitibus patuit.

## CAP. XXXVIII.

*De Hassia & aliquot rebus gestis in ea.*

**I**Nter Westphalos ac Francones Hassia jacet, montana regio, quæ à Rheno in septentrionem porrecta, Turingiæ jungitur. Princeps gentis Ludovicus Landgravius ætate nostra ad imperium vocatus, imparem se esse dixit, qui tantæ rei molem sustinere posset. Maluitque parvo imperio à parentibus sibi relicto utiliter præesse, quam magnum accipiens dissipare. Id quoque sibi obstare ad rem Christianam gerendam dixit, quod literas ignoraret: fuit tamen legum cultor, quas sibi patrio sermone exponi jussit, quoties coram eo causa ventilata est, nec unquam compertus est tulisse iniquam sententiam. Hic dum reformatur monasterium quoddam suæ ditionis ingreditur, & invitatus cum monachis edit, venenum pro cibo inter edendum sumpsisse creditus est. Nam & ipse & abbas, qui reformationem petierat, paulò post extincti seruntur.



## CAP. XXXIX.

*De Francia nobili provincia, origine Francorum, & qui primum duces & reges in ea fuerunt.*

**F**Rancia huic succedit, nobilis sanè provincia, & admodum potens, ab incolatu Francorum sic appellata. Franci quidem Trojani ab origine fuerunt. Qui deletò Illo duce Priamo, Priami ex sorore nepote, per Pontum Euxinum in Mæotidas paludes in Scythiam pervenere, ibique civitatem ædificarunt, quam vocavere Sicambriam, ex qua dicti Sicambri. Constat enim post evictam incensamque Trojam, qui superfuerunt excidio, in tres turmas divisos in exilium profugisse, & alios quidem Ænea duce Italiam petivisse, à quibus Albani prodierunt, & deinde Romani qui orbis imperio potiti sunt. Alii sub Antenore per medios Achivos elapsi, Illyricos penetrare sinus, & regna Liburnorum ad intimum Adriaticum pelagus accessere, urbemque condidere Patavium, ubi sepultum Antenorem tradunt, qui Henetum fugiens secum duxit, à quibus postea dicti Veneti, quorum est hodie ingens potestas terra marique. Tertiū (ut diximus) in Scythiam penetrarunt, quo in loco in magnam gentem coaluerunt. Cumque Scytharum multi Romano imperio subiecti essent, & ipsi quoque tributa penderunt, manseruntque vectigales usque ad tempora Valentiniani Cæsaris. Quo imperante Alanī imperium vexare cœperunt. Imperator quidem proposito edicto libertatem in decennium eis promisit, qui Alanorum ferocitatem compescerent: Allecti eo præmio Sicambri arma sumpserunt, Alanosque bello victos delevere. Ob quam rem libertate in decennium ab imperatore donati sunt, & mutato nomine Franci appellati, quod Attica lingua sive feroces sive nobiles sonat, Itali Francos liberos vocant. Exacto decennio cum Romani solita tributa repeterent, Franci ipsa libertate effrenes facti, parere recusaverunt. Principes eo tempore Francis suere Priamus & Antenor; antiqui nominis ac virtutis, quibus copias ductantibus prælium cum Romanis confertum est, in quo Priamus ipse cum fortissimis suæ gentis cecidit. Qui cladi superfue-



runt ex Scythia digressi sunt, & in Germaniam profecti, in partibus Turingiæ confederunt, cum principibus suis Priami & Antenoris filiis Marcomede & Sunone. Suno sine liberis decessit, Marcomedi filius fuit Faramundus, quem sibi Franci regem creaverunt, & hic primus inter Francos regnavit. Huic filius Clodoveus Crinitus, à quo Francorum reges Criniti sunt appellati. Per idem tempus Gothi, qui jam urbem Romanam irruerant, ultra Ligerim fluvium in Gallia sedes invaserunt. Burgundiones quoque juxta Rhodanum habitabant, qui & ipsi paulò post reges habere cœperunt. Franci verò transmissò Rheno Romanos qui ea loca tenebant, fugaverunt, paulatimque auctipotentia Maguntiam, Treverim, Agrippinam, Tornacum, Cameracum, Remos, Svesonam, Aurelianum invasere. Ita ut ab Aquitania usque in Bajoariam imperium extenderent. Clodoveo autem mortuo Meroveus successit filius, à quo Franci Merovingi dicti sunt. Post Meroveum Hildericus regnum adeptus, dum luxuriosè viveret, à suis pulsus est, Romano Ægidio in ejus locum suscepto. Hildericus regno privatus, ad Bisinum Turingiæ regem confugit, cujus conjugem per adulterium polluit. Post octo autem annos revocatus Agrippinam invadens, ejectis deinde Romanis magnam regni sui partem recuperavit. Mortuo autem Ægidio, filius ejus Syagrius in civitate Svesona regnavit. Bisina autem regina cum accepisset Hildericum regnum recuperasse, relicto viro ad eum confugit, à quo recepta, & pro conjugē habita, Clodoveum ei peperit, qui postea regnum adeptus, primus Francorum regum Christi religionem accepit, à beato Remigio Episcopo baptizatus. Illud autem veritate caret, quod plerique tradunt, Agrippinam ab incolatu Francorum vocatam Coloniam. Nam priusquam Franci Germaniam intrarent, Colonia Romanorum appellata est, à Claudio Cæsare condita, & ab ejus conjugē Agrippina nuncupata. Fuerunt inter Clodoveum ac Syagrium aliquot bella, postremo victus Syagrius, ad Alaricum Gothorum regem confugit, qui nonus à magno Alarico regnabat. Reposcitur à Clodoveo Syagrius, atque obtentus occiditur. Romani quoque reliqui per Galliam habitantes exterminantur. Clodoveus Alemanos sibi subjecit. Gothis quoque & Aquitanis bellum indixit, eosque superavit, occisò Alarico rege. Fertur cum ad bellum progrediretur, si victor evaderet equum beato Martino vovisse, qui XII. & C. annis ante id tempus



tempus vita excefferat. Victoria potitus, eqvum tradidisse, eumqve centum solidis redimere voluisse, stetit eqvum immobilem, donec pretium duplicaretur. Qua ex re dixisse regem ferunt: *Martinum bonum auxiliatorem esse, & negotiatorem carum.* Hic Clodoveus uxorem duxit Glodosindam filiam regis Burgundionum, quæ cum esset Christiana adhuc ei pagano juncta est, magnisque precibus virum orabat, ut baptizaretur, natosqve filios clanculum baptizabat. Causa autem quæ Clodoveum Christianum fecit, hæc esse fertur: Quia cum pugnaret contra Svevos, & pene victus esset, votum vovit Christianum se facturum, si ex prælio evaderet. Ob quam rem mutata fortuna, ex victo victor factus, subactis Svevis Christianæ religioni se credit, cujus posterum in Francia usque ad Pipinum nonum, patrem Caroli Magni regnaverunt. Tunc verò Hilderico secundo per ignaviam regnum ademptum est. Detonso enim eo, & in Monasterium recluso, Pipinus regnum accepit. Erant tunc in Francia Majores domus, qui regnum gubernabant. Anno enim septingentesimo decimo, mortuo Dagoberto minore Francorum rege, filius ejus parvulus in tutela Pipini Grossi, quem alii Ansgisi filium dicunt, in tutela fuit, & per insidias periit. Tunc Grimoaldus filius legitimus Pipini Grossi, regnum usurpans Dagoberti regis defuncti, captus in custodia obiit. Per idem tempus Galli, qui intra Seqvanam & Ligerim fluvium habitabant, adversus Francos bella movere, & usque Maguntiam excurrentes, eam civitatem obsederunt. Franci rege carentes, Carolum Martellum ad regnum sublimare voluerunt. Qui regnum renuens, Ducatum accepit, Gallosqve bello repressit. Provinciam verò inter Ligerim & Seqvanam, quæ tunc Gaudina vocabatur, à se Carlingam vocari jussit. Quod postea apud Teutonicos diu servatum. Hic Carolus ex Adelhaida nobili concubina Pipini Grossi filius fuit, inclytus vir & bello potens, qui multa Saracenorum millia gladio interemit. Et pater fuit Pipini Nani, qui Carolum Magnum genuit imperatorem toti orbi cognitum, ex conjuge Berta, quam duxit ex Græcia. Hoc ergo Francorum genus, cum è Scythia in Germaniam venisset, ibiqve diu consederisset, germanicum effectum est: adedò ut tota ferme Gallia, & magna Germaniæ pars, à montibus Pyrenæis, usque ad Pannoniæ terminos, Francia diceretur. Nam quicquid Francis suberat, Francia vocabatur. Ea in duas partes divisa fuit. Nam quod est



Galliæ, occidentalis Francia dicebatur. Quod est Germaniæ, orientalis. Et Germaniam quidem eatenus extenderunt, quantum sermo germanicus protenditur. Hæc gens sub Carolo Magno Romanum imperium meruit, qui afflictam Longobardico bello sedem apostolicam consolatus est. Carolus enim quamvis Galliæ potiretur imperio, Germanus tamen fuit, in Germania natus alitusque. Cujus sedes plerumque in Aquisgrano fuit, quæ civitas Teutonica est, ibi palatium ejus & caput ostenditur. Ejus posterii imperium tenentes, in Galliæ & in Germania regnaverunt. Deficiente autem masculina linea imperium ad Germanos, id est Francos orientales rediit, inter quos primus habitus est Otho. Est autem imperium apud Germanos non eo modo, ut nemo imperare possit nisi Germanus: sed quoniam eligendi imperatorem autoritas Germanis tradita est, plerumque Germanus eligitur. Eam ob causam cum vacasset imperium, post obitum Ludovici Bosonis filii, Germani (quorum ea potestas erat) Germanum elegerunt, & Francum ex orientali Francia. Hæc præmisisse volumus, quoniam de Franconia sermo incidit. Sunt enim multi qui Francos eos solummodo esse volunt, qui circa Parisios habitant, & illis datum imperium esse voluit, quos rectius Francigenas quis appellaverit.

## CAP. XL.

*De Franconia, ubi de Alberto viro in armis dexterrimo, & quod suis egregiis factis Achilles Teutonicus sit cognominatus.*

**F**RANCONIA verò (ut nostra ætate recipitur) à meridie Svevis & Bajoariis jungitur, ab occasu Rheno, ob ortu Bohemis ac Turingis. Septentrionem iidem Turingi Hassique excipiunt. Provinciam perlabitur haud ignobilis amnis, quem Moganum vocant. Ptolemæus hunc fluvium Obrincam appellare videtur, qui superiores Germanos ab inferioribus eundem dividere affirmat, neque enim alius fluvius est, qui eam divisionem aptius quam Moganus efficere possit, & hodie quidem inferiores Germani usque ad Maguntium procedunt, abinde superiores vocantur. Moganus verò ex montibus Bohemiæ



Bohemiæ ortus, è regione Maguntii in Rhenum exoneratur. Ob quam rem non desuerunt, qui Maguntium Moguntium à Mogano fluvio dicerent. Perlabitur idem fluvius non paucas civitates, quarum illustriores sunt Herbipolis, Francfordia. In Herbipoli nobilis episcopi sedes est, qui & Francorum dux habetur, & cum rem divinam facit, gladium in altari nudum ante se habet. Francfordia nobile emporium est, in quo superi cum inferis Germani conveniunt, bis singulis annis. Ibi quoque imperator eligitur ex veteri consuetudine, ob quam rem palam est imperium datum esse Germanis, quando inter eos eligitur & coronatur, etsi demum ad culmen gloriæ Romæ quoque diadema suscipitur. Et in Franconia nobile templum Bambergense ad Pognitium amnem situm, quod fundavit Henricus secundus imperator, quem accolæ religiose colunt, & sanctum habent. Ibi quoque Berengarius sepultus est, qui regnum Italiæ usurpavit, & ab Othone primo captus, in Germaniam ductus, illic exulans obiit. Supra civitatem in edito monte arx est, & natura & arte munita, in qua nos aliquando cum episcopo loci, prandium fecimus. Albertus nobilissimus Francorum Comes, & Othonis Saxonie ducis ex filia nepos, cum Conradum comitem occidisset, qui Ludovici regis fuisse filius dicebatur, in hanc se arcem contulit, & aliquandiu regis obsequium pertulit. Difficilis expugnatio loci videbatur, ob quam rem ad dolos recursum est. Otho Episcopus Maguntinus minister sceleris inventus est, qui profectus ad Albertum litis arbitrum se dixit, rogavitque Albertum, ut ad imperatorem in castra descenderet, quia vel pacem ei daret, vel in arcem reduceret incolumem. Credidit Albertus, & accepta jurisjurandi religione Othonem secutus est. Vix arcem egressi erant, cum Otho: *vereor, inquit, ne diu apud imperatorem morari oporteat. Utilius fortasse consilium erat, prius sumpsisse cibum*: laudavit Albertus verba præsulis, & in castellum rediens Othoni prandium dedit. Quo sumpto ad imperatorem cum eo perrexit, ubi mox captus est, & capitali sententia damnatus: cui archiepiscopi fidem imploranti, respondit parum religiosus Pontifex: *se fidei suæ fecisse, qui semel reduxisset incolumem cum ad prandium introivit, bis reducere non promississe*. Infelix Albertus gladio obtruncatus est. Melius Romani, qui pari fraude usum unum ex captivis ab Hannibale Romanam missis vincitum remisere: fraus enim (ut inquit maximus orator) astringit perjurium, non solvit. Prædia quæ Albertus habuit, ecclesiæ Bamber-



Bambergensi postea cesserunt. Est autem Franconia partim plana, partim montosa, montes ipsi haud difficiles sunt, ager non admodum pinguis. Nam plerumque arenosus est, multis in locis confiti colles vineis, gratum produciunt vinum, maximè verò apud Herbipolim: multæ sylvæ & multa venatio est, terra in multos partita est Dominos, quamvis episcopum Herbipolensem ducem Franconiæ dicant, ut ante relatum est. Maguntina ecclesia & Bambergensis plurima obtinent loca. Palatinus quoque Comes haud parvam occupat partem. Marchiones potentes in ea sunt, multæ præterea civitates imperiales apud Francones florent. De Norimberga dubium est, Franconiæ an Bajoariæ cedat, ipsum nomen indicat ad Bajoarios urbem pertinere. Norimberga enim Noricum montem significat, ob quam rem patet Noricorum civitatem fuisse. Noricis autem Bajoarii succedere, & nunc ea portio terræ Bajoariæ quæ inter Danubium & Norimbergam jacet, Noricum appellatur. Civitas tamen in parœcia Bambergensi est, quæ ad Francones pertinet. Ipsi Norimbergenses nec Bajoarios, nec Francones videri volunt, sed tertium quoddam separatum genus. Urbs ea nobilis magnificis operibus publicis ac privatis ornata est, amne Pegnitio interlabitur, in agro sterili & arenoso condita, atque ob eam rem industrioso populo: omnes enim aut opifices sunt, aut negotiatores: hinc multæ illis divitiæ, & magnum in Germania nomen. Aptissima imperatorum sedes, libera urbs, & in medio fermè Germaniæ sita. Inter Bambergam Forchem jacet, famosum niveo pane oppidum, incolæ patriam fuisse Pilati falso putant. In hac provincia Fredericus Marchio Brandenburgensis fuit, imperatori Sigismundo inter charos amicos habitus, & quatuor filii fuerunt, Joannes, Fredericus, Albertus, & alter Fredericus. Joanni qui primogenitus esset, electoratus imperii debebatur. Sed judicium patris Fredericum prætulit, qui secundo genitus erat, & aptior ad obeunda imperii munera videbatur. Prius itaque quam moreretur, hæreditatem suam inter filios divisit, Fredericum electorem instituit, neque malè judicavit. Nam Fredericus inter principes Germaniæ sapientia clarus habitus est, cujus consilio multæ sæpe provinciæ pacatæ sunt, justique quoque a honesti tenax habetur, qui cum posset regnum Poloniæ consequi per electionem Baronum, recusavit (ut antè diximus) ne vero hæredi injuriam faceret. Albertus verò germanus ejus cum Norimbergensibus



gensibus bellum intulisset, omnes ferme Teutoniæ principes ad se traxit, civitates verò Norimbergensibus suppetias misere: grave & atrox bellum fuit, in quo tot potentiae concurrentes infensissimis odiis biennio certavere. Novem praelia commissa feruntur, ex quibus octo victor Albertus confecit, in uno tantum victus succubuit, nec de pace convenit, nisi postquam exustis agris, attritis villis, abactis pecoribus, ruricolis interfectis, commeatus ac pecuniae contendentibus defuere, tum quoque pax ex Alberti sententia magis dicta. Hic Albertus ab ipsa pueritia ac teneris, ut ajunt, ungviculis educatus in armis, pluribus interfuit praeliis, quam alii sui temporis duces aut viderint aut legerint: militavit in Polonia, pugnavit in Silesia, castra posuit in Prussia, hostes in Bohemia sudit, nullus in Germania terrae angulus, quem non calcarit armatus, duxit exercitus innumerabiles, prostravit ferocissimos hostes, expugnavit munitissimas urbes. In congressibus pugnam prior iniit, victor à praelio excessit ultimus, in oppugnationibus oppidorum saepe murum primus ascendit. Ad singulare certamen crebrius à vicinis invitatus, nunquam detrectavit, nec unquam non stravit hostem. In militaribus ludis (quibus hasta contenditur) unus omnium repertus est, qui nunquam eqvo dejectus sit, & omnes in se currentes dejecerit. Ex torneamentis nunquam non victor exivit. Septies ac decies, solo tectus clypeo ac galea, cetera nudus (ut est apud Teutonicos duelli quaedam species) in provocatores pariter, armatos, acuta lancea cucurrit, nullo unquam damno affectus, cum adversarios nunquam ipse non eqvo deturbaverit. Quibus ex rebus non injuria Teutonicus Achilles appellatus est. In quo non solum, militares artes & Imperatoriae virtutes singulari quadam gratia reluxere, sed nobilitas quoque generis, proceritas corporis, ac venustas, & virium robur, ac facundia linguae, admirabilem eum ac penitus divinum reddidere.



*De Bajoaria, & unde gens ipsa secundum  
Strabonem sit deducta.*

**B**Ajoaria ad ortum æstivum ac meridiei partem Franconia proximat. Ea quoque perlata & dives terra est, cui ad meridiem Alpes Italiae junguntur, Svevi decidentem ejus solem recipiunt, Australes orientem, ac Bohemi septentrionem. Danubius mediam ferme perlabitur inter Austriam ac Bajoariam. Alii Anasum, alii Oenum terminum posuere. Svevos à Bajoariis Lycus determinat amnis. Hanc olim regionem Norici tenuere, cujus adhuc portio trans Danubium sita (ut ante diximus) Noricum appellatur. Bajoarii autem unde dicti sint, & unde originem traxerint, non facile dixerim. Verum cum reperiam vetustissimos codices Bajoariam appellare, quam moderni Bavariam dicunt, non difficile trahor, ut Bajoarios à Bojis dictos, gallicam fuisse olim gentem credam. Huic opinioni Strabo quinto commentario fidem adhibet, ita inq̃uens: *Priscis igitur* (ut dixi) *temporibus, plurimæ Gallorum gentes fluvium incolebant* (de Pado loquitur) *ex quibus amplissimi fuerunt Boji, Insubres, & qui olim cum Gæsaribus, Senones, Romana per impetum potiti sunt urbe.* Hos Romani posterioribus annis funditus deletos perdiderunt, Bojos verò ex finibus ejecerunt. Inde migrantes, circum adjacentes Istro locos cum Tauriscis habitarunt, bellum assidue contra Dacos gerentes. Constat igitur, Bojos in Pannonia consedisse. Quo ex loco facile successu temporis in Noricum conterminam regionem migrare potuerunt. Idem quoque Strabo lactum, qui modo Constantiensis appellatur, designans, paululum ab eo distare Rhatios ait, amplius Helvetios & Vindelicos, desertam autem Bojorum regionem esse affirmat, usque Pannonios: ob quam rem satis indicat Bajoariorum terram à Bojis cultam fuisse. Idem Strabo Germaniam describens, Bojos prius Hercyniam habitasse sylvam asserit, & Cimbro agmine facto eorum invasisse locum, atque à Bojis rejectos fuisse. Itaque satis persuasum esse potest, Bajoaricum nomen ex Bojis descendere. Ager enim eorum trans Danubium, Hercyniam sylvam non parva ex parte occupat. Ea nunc Germanica gens est,



est, sermone utens Teutonico: neque deserta regio, ut Strabo tradit, quod suo fortasse tempore fuit, nunc cultissima est, magnas ac ambitiosas civitates habens & oppida nobilissima, quorum splendorem, nescimus tota Europa, quæ vincere possint. Pontificales urbes V. in ea sunt, quarum una Metropolitica est (Saltzburgam vocant) ex flumine cui adjacet. Veteres Juvaviam vocavere. In Bajoaria Ludovicus Ludovici filius gibbo & struma deformis, impia contra patrem bella suscepit, venerandumque senem, & auctoritate insignem, qui quondam regnum Franciæ gubernasset, in arce munitissima obsedit: sed superis ultionem tanti sceleris petentibus, prius febre percussus, quam patris animum in suam traheret sententiam. Ille in potestatem Henrici ejusdem familiæ ducis postea factus, brevi tempore vitam finivit. Nec Henricus diu supervixit. Qui cum prohibuisset subditos in anno jubileo Romam petere, veritus ne provincia pecuniis exauriretur, eodem anno ad patres suos additus est. Successit ei Ludovicus filius ex sorore Alberti Cæsaris natus, magni animi adolescens, gloriæ cupidus, & pecuniarum contemptor: qui Judæos omnes, publicè politis edictis, & suis dominiis exterminavit: uxorem de Saxonia duxit, neptem Frederici Cæsaris. Multas Germaniæ lites auctoritate sua composuit, quamvis sæpe & multum conatus, reconciliare Cæsari Ladislaum regem nequiverit. Albertus ejus terræ ac familiæ princeps, postquam pater ejus Ernestus puellam balnei custodem ab eo perditæ amatam, & in spem matrimonii susceptam, apud Straubingam Danubii fluentis demersit; cum diu vitam in mœrore peregisset, tandem luctu peractio, uxorem de domo Brunsvicensi duxit ex qua sobolem pulcherrimam sustulit. Sub imperio Frederici podagra laborans, sepositis cæteris curis, sectatus musicam, assiduis cantibus ac sonis animam oblectavit, interdum & venationi operam dedit. In Saltzburga, quam Metropolitica in Bajoaria sedem obtinere diximus, tres archiepiscopi fuere, quorum ultimus Sigismundus nomine, dum schismatis procella defavit, cum esset adhuc præpositus, Romanam ecclesiam magnificè juvit. Sed archiepiscopus à Nicolao pontifice creatus, literas apostolicas, quibus censura in Austriales imperatori rebelles fulminabatur, in ecclesia sua publicari non sivit, siye metu potentia illorum, siye quod anathemate suspensio, pa-



cem melius inveniri putavit. Ad quam componendam & ipse descendens in Austriam, non parvam operam impendit.

Circa Rhenum, quæ flos Germaniæ nostro tempore visitur, inter Theodoricum Maguntinensis ecclesiæ præfulem, & Ludovicum Comitem Palatinum Rheni crebræ dissensiones fuere, & sæpius ad arma ventum est, totaqve circum regio rapinis atqve incendiis vastata, cum Maguntino Marchiones Badenses ac Brandeburgenses opem ferrent, Palatino Jacobus Treverensis antistes, & nonnullæ civitates assisterent. Mortuo Ludovico Palatino, qui relictam Ludovici regis Cypri uxorem duxerat, filium ex ea natum infantem adhuc Fredericus frater ejus, consentientibus terræ optimatibus, adoptavit. Gubernationem provinciæ tanquam Dominus accepit, electorem imperii se dixit, coelibatum perpetuum promisit, ne arrogato filio uxorem ducens præjudicium faceret. Rogatus Nicolaus Pontifex quintus id genus adoptionis confirmavit, recusavit Fredericus imperator sæpe multumqve requisitus.

In Svevia Albertus Frederici frater imperatoris, cum pluribus civitatibus variante victoria bellum gessit. Ab Ulmensibus civitatem Rotenburgensem litigando per sententiam obtinuit.

## CAP. XLII.

*De in Marchionatu Badensi nonnullis rebus gestis. Ubi de Svitenium in hostes devictos mira crudelitate.*

**I**N Marchionatu Badensi princeps Jacobus justitiæ ac prudentiæ fama inter Germanos clarissimus, cum sibi ad humanam felicitatem sola literaturæ peritia deesse videretur, quos ex conjugæ legitima liberos sustulit, ediscere literas compulit: inter quos diviso patrimonio, cum Carolo primogenito singularis industriæ juveni imperatoris sororem matrimonio collocasset, plenus annis haud invitus è vita decessit. Tirolenses, qui valles Oeni & Athesis incolunt, cum Sigismundum principem suum in tutela Frederici Cæsaris existentem, jam grandiusculum ad se remitti frustra petivissent, sumptis armis præse-

ctos



Etos provinciæ, quos Cæsar instituerat, dejecerunt. Et cum Tridentini episcopi, cujus erant subditi, in fide Cæsaris perseverarent, cum exercitu eò pervenere, civitatemqve metu perculsam proditione cœperunt, & arcem oppugnatione fatigatam ad deditionem compulerunt. Exin pactionibus cum Cæsare convenientes, minori quam crediderant felicitate suum dominum obtinuerunt. Svitenfes montani & feroces populi, cum Thuricenses ex fœdere, quod cum eis pepigerant, descivissent, comparato exercitu in eorum agrum cuncta vastantes exiere: Quibus cum Thuricenses prælio congredi præsumpsissent, usque ad internecionem cæsi sunt, tantaqve Svitenfium in victos hostes crudelitas ac rabies fuit, ut eo ipso loco partæ victoriæ epulantes, congestis necatorum corporibus, & mensalia & sedilia ex illis apparaverint, & aperientes hostium cadavera cruorem biberint, corda dentibus laniaverint.

## CAP. XLIII.

*De Ludovico Delphino Viennensi bellum in Basilienses movente, de Amedeo Sabaudia duce, ex ducatu eremum, ex eremo summum Pontificatum, & ex summo Pont. Cardinalatum subeunte. Item de Bolomero in lacum demerso, & Joan. Segobiensi Alcoranum Mahumetis traducente.*

**I**N Alsatia cui quondam Helvetia nomen fuit, tum Gallici nunc Germanici juris provincia, cum Ludovicus Delphinus Viennensis in agrum Basiliensem omnem fermè militiam Gallicam eduxisset, ingentemqve metum Basiliensibus incussisset, Svitenfes ex fœdere sociæ civitati quatuor millia militum lectissimæ juventutis auxilio misere. Quos cum Delphinus appropinquare animadvertisset, medium inter Basileam & Svitenfes cum toto exercitu se opposuit, nec detrectare illi certamen, quamvis pedibus pugnaturi triginta millia equorum stare contra se in aciem cernerent. Pugnatum est summis utrinque viribus, ad extremum non tam victi quam vincendo fessi, Svitenfes



nimis audaces præsumpti facinoris poenas dedere. Nam paucis fuga dilapsis obruncati omnes in campo jacuere. Rarus tamen ex Sviten-  
sibus inultus interiit, ex quibus plures reperti sunt, qui lanceis perfor-  
rati ad obruncandum hostem per medias hastas dilapsi, vindictam  
accepti vulneris expetiere.

Amedeus in Sabaudia dux primus ejus gentis, cum annis ferme XL. post patris obitum provinciæ gubernacula tenuisset, & admi-  
randus adaucto paterno imperio, parta undique pace formidandus, cu-  
mulatis opibus, sapientia plenus vicinis populis ac principibus vide-  
retur, ac demum relictis principum & gloriæ fastibus in eremum se re-  
cepisset, & sumpta penula, ac retorto baculo, cum sex viris equestribus  
ordinis ætate proVectis, mundo & pompis ejus renuntiasset, ad extre-  
mum summi Pontificatus honorem ex Basiliensi congregatione sibi de-  
latum, in ecclesiæ divisione superis parum faventibus accepit. Bar-  
bam totondit, quam promissam nutriverat, ducatum primogenito suo  
tradidit, ecclesiasticas ceremonias & orandi morem repente didicit,  
Stipatusque magna nobilium caterva, & illustri comitatu circumda-  
tus, Basileam perrexit, ubi ab iis, qui generale concilium facere arbi-  
trantur, in maxima populi multitudine, quæ undique ad spectaculum  
tantæ rei confluerat, inter duos filios egregia facie adolescentes, al-  
terum Sabaudia ducem, alterum Gebennarum comitem, solennibus  
pro more servatis, Pontifex Romanæ ecclesiæ coronatus est. Cele-  
bravit sæpe divina: Benedixit plebibus: Officia curiæ ordinavit: Car-  
dinales doctrina & autoritate præstantes assumpsit. Fuerunt ei cum  
rege Franciæ Carolo, cum Alfonso rege Aragonum, qui tum hostis Eu-  
genii Papæ fuit, cum Philippo duce Mediolani, cum pluribus aliis de  
recipienda ejus autoritate tractatus, qui omnes incassum abiire. Fuit  
& Fredericus imperator apud eum in Basilea, sed clam nocte intem-  
pesta, ne adorasse idolum videretur, abiit. Reverentiam ei tanquam  
vicario Jesu Christi, subditi ejus tantum & Svitenſes populi, & Basi-  
lienses, & Argentinenses, & qui Alberto parebant Bajoaria duci  
præbuerunt. Fuit enim magna spes obtinendæ Germaniæ. Cum sex  
principes Electores in eam sententiam fœdus iniissent, ut nisi Euge-  
nius postulatis eorum annueret (postulabant autem res prorsus ne-  
gandas) in Amedei (quem Felicem quintum appellaverunt) obedi-  
entiam transirent. Sed cum illorum consilia Fredericus pervertisset, &  
qui



qui sub nomine Synodi Basileæ debebant, abire jussisset, desperato meliori successu, interveniente per legatos suos Carolo Franciæ rege, ecclesiæ pacem dedit. Nicolao Pontifici Maximo reconciliatus, relicto nomine Papæ, Cardinalatus honorem retinuit. In quo paulò postea non sine boni viri opinione decessit felix princeps, & nimium, si senium suum ecclesiasticis titulis non fœdasset. Bolomerus qui ejus quondam & primus & dilectissimus consiliorum particeps fuerat, ingentesq; opes apud eum cumulerat, cum in nobilitatis odium incidisset, proditoris reus factus mortis sententiam tulit, & in lacum Lemani præcipitatus, magno saxo ad collum suspensò demersus est. Nobilitas exinde novi ducis indignationem subiens, ad regem Franciæ confugit, cujus opibus adjuta in patriam rediit. Joannes Segobiensis homo Hispanus, moribus ac doctrina illustris, qui cum summos theologiæ præceptores doctrina æquaret, ab Amedeo dum se Papam dixit, Cardinalatus eminentiam acceperat, & deinde unioni consentiens Nicolao Pontifice Max. Cardinalatus dimisso titulo, Cæsariensi ecclesiæ præfectus fuerat, in altissimis reconditus montibus, parvo monasterio contentus, vocatis ex Hispania legis Arabicæ magistris, librum quem vocant Alchoranum, & in quo Mahumetis *Ἰουδοπροφήτης* non tam mysteria quam deliramenta continentur, in nostram linguam de novo convertit & ineptias ejus veris ac vivis rationibus & argumentis explosit.

In Arelate ad sepulchrum Ludovici Cardinalis sanctæ Cecilie, ejus urbis episcopi, quem Basileæ in confessu patrum præsentem, vidimus, magna miraculorum opinio orta est, & invalidorum frequentens undiqve concursus spe sanitatis factus.



*De Joanna virgine Lotharingensi, Anglorum copias à Francia fugante, de Flocheto pontem arcis novocommento invadente, deq; Thalboto Anglo duce cum filiis ad Burdegalam in bello cadente.*

**J**Oannes comes Armeniaci incesto Germanæ sororis amore percussus, nuptias ejus tentare conatus, haud indignus existimatus est, quæ paterna hæreditate Carolus rex Franciæ armis ejiceret. In regno ipso Franciæ, quod nostra ætate Joanna virgo Lotharingensis divinitus (ut credunt) admonita virilibus indumentis & armis induta, Gallicas ducens acies, ex Anglorum manibus magna ex parte (mirabile dictu) prima inter primos pugnans eripuit. Cum jam Philippus Burgundiæ dux paternæ necis injuria remissa, relictis Anglis ad Francos defecisset, ingentes inter Carolum regem & filium ejus Ludovicum Delphinum Viennensem, contentiones atque inimicitia succreverunt. Carolus Andegavensis eo tempore Delphini avunculus apud regem plurimum poterat, cujus potentiam cum Johannes Alenconii dux ferre non posset. Borbonii quoque princeps, & frater ejus spurius, Andegavensem gubernationem agris animis intuerentur, Delphino ut à patre discederet, suaserunt. Sic enim fieri posse, ut rex desiderio filii Carolum à se rejiceret, regnumque quod in ejus manibus pessum ire videbatur, meliori consilio regeretur. Quibus permotus Delphinus, insalutato patre ad Nivernenses discessit, quæ re comperta rex comparato raptim exercitu in Alenconium duxit, & expugnatis non magno negotio plerisque munitionibus, ducem in deditionem accepit. Exin contra filium profectus, cum civitates Niverniæ Delphinum adversus patris imperium tueri non auderent: eum ut à se abiret, rogaverunt. Ille in Borbonium se recepit, nec diu post metuens dux Borbonii Regis iram, filium patri reconciliavit, quæ res fratri suo spurio haud bene cessit. Nam is parvo post tempore captus, in profluentem demersus, violati paterni juris in filium poenas



pœnas dedit. Interjecta deinde non longa temporis mora, Renatus è regno Siciliae propulsatus, filiam suam Henrico regi Angliæ in matrimonium collocavit, haud abnuente Francorum rege, qui eo conjugio inducias belli, sibi ac regno suo salutare, cum Anglis plurium annorum obtinuit. Quibus conclusis, securus jam domi Rex, ut Franciam militaribus spoliis atque incendiis diu agitatam, tantisper sine-  
ret requiescere, Delphinum cum magna parte copiarum ad Helvetios (ut est supra relatum) dimisit, ipse cum reliquo exercitu in Lotharingos profectus, Metensem, Tulensemque agrum vexavit, oppidumque non parvi momenti, quod Spinale vocant, dedentibus oppidanis ab ecclesia Metensi abstulit. Exin Franciscus Aragonensis capto surtim oppido Fofersi, quod in Normannia situm, in potestate ducis Britannia fuit, duorum potentissimorum Franciæ ac Angliæ regum interrupisse pacem visus est. De qua re dum missis ultro citroque legationibus contenditur, Flochetus cum non paucis equitibus à rege Franciæ profectus, quadrigas scæno oneratas, in quo milites armati late-  
rent, pontem arcis, quo Seqvana fluvius jungitur, qui Normannos à Francia dirimit, edoctos rusticos educere jubet, atque in medio pontis portæ arcis subsistere. Ipse in insidiis cum cohortibus signum expectavit, quo recepto cum milites è scæno dilapsi portam invasis-  
sent, trucidatis custodibus tam diu locum tenuere, donec Flochetus advolans, & pontem & arcem in potestatem recepit. Cujus rei per-  
cepto nuncio, & rex ipse per eundem pontem in Normanniam copias trajecit, & ex alia parte Franciscus Britannia princeps exercitum duxit. Dux Summerseti eam provinciam pro rege Angliæ cum imperio tenebat. Qui postquam tanti belli molem in se verti cognovit, Talbotum copiarum ducem fama clarum, & rebus gestis insignem, Rothomagi apud se esse iussit, sperans ejus consilio, atque amicis civi-  
tatem, cujus nutare animos animadverterat, in fide continere. Sed frustra ejus consilium fuit. Nam Rothomageneses postquam regem appropinquare didicerunt, missis ad eum legatis suam ac fortunarum suarum pacti salutem, exercitum intra urbem recipere & imperata facere promiserunt. Quibus à rege collaudatis, & domum cum praesidio militum remissis, urbs regiis dedita est. Talbotus cum duce suisque omnibus in arcem sese recepit. Quæ cum oppugnari coepisset, interventu Renati regis ea compositio facta est, ut Angli



quæ in Normannia retinebant oppidis excederent, Dux ac Talbotus, cum suis liberi essent. Sed cum præfecti oppidorum non parerent, Dux Semerfeti dimissis in arce Talboto & duobus privignis suis clam recessit in Angliam. Arx postea dedita est, & privigni Ducis cum Talboto in potestatem Regis facti sunt. Talbotus verò cum esset clara apud omnes fama, quam non malis artibus, sed robore corporis & ingenii dexteritate in aperto Marte quæsiuisset, data fide, quod adversus Francos deinceps arma non gereret, libere dimissus est. Hic anno jubilei indulgentiæ causa Romam venit, ut quidam putant, absolutionem quæsiturus ejus promissi, quod regi Franciæ fecerat, mihi hoc minimè compertum est. Illud constat, Talbotum cum in Angliam redisset, jamque rex Franciæ victa omni Normannia, Burdegalam quoque armis subegisset, à rege suo non sine magnis copiis in Gasconiam cum imperio missum, & Burdegalam recuperasse, & alia pleraque castella, quæ ab imperio Anglicano desciverant, partim vi expugnasse, partim deditone voluntaria recepisse. Quæ cum Rex Franciæ rescivisset, è vestigio duos exercitus instruxit, quorum alterum, cujus præfectus gener suus comes Clarimontis, ac ducis Borbonii filius, cum quindecim millibus pugnatorum, in quis totius militiæ robur fuit, ad urbem Burdegalam recto itinere contendere jussit: Alterum quem ipse duxit, ex purpuratis suis conscripsit, quibus & comes de Stampis annumeratus est, quem lecti juvenes D. equites CCC. ex Britannia sequebantur. Jussit & hunc exercitum retento apud se comite Rex præire, qui cum septem, ut ajunt, leucis à Burdegala constitissent, parvum quoddam castellum oppugnare cœperunt, turri quadam inter Burdegalam & castellum ipsum occupata, ac sagittariorum præsidio munita. Talbotus verò, postquam sibi cum duobus exercitibus pugnandum esse intellexit, eum prius aggrediendum censuit, quem minori negotio superari posse confidebat. Egressus igitur cum robore sui exercitus, jam vespere ad turrin quam diximus occupatam pervenit, qua primo impetu expugnata, sagittarios omnes ibi captos circiter quinquaginta interemit. Exin mane profectus, cum accepisset regium exercitum pugnam parare, veritus tanquam sibi è manibus præda dilaberetur, jussis aliis seqvi, cum quingentis galeatis militibus, octingentis sagittariis prope hostes advolans, tumultuarium prælium iniit.



iniit. Consultaverant aliquandiu inter se hostes, an retro pedem sugiendo referrent, sed pudore propinqui Regis experiri belli fortunam decreverant. Erant eis trecenta circiter tormenta aenea, id est bombardæ quæ curribus adduxerant, ea via, per quam Talbotus adventurus erat, opposuerunt, multas præterea machinas hinc atque inde collocaverunt, quibus ignari hostes confici possent. Ut ergo furentes Talboti milites, itinere, quod unum patebat in castra hostium, nescii machinarum procurrun, dato tormentis igne, primo congressu trecenti ferme milites ictu lapidum ex Anglis periere. Quod ubi Talbotus animadvertit, filium qui se sequebatur ut abiret, & ad meliora tempora se reservaret, admonuit. At cum filius diceret non esse sibi ex eo prælio fugiendum, in quo pater periclitaturus esset. *Ego, inquit, fili, multis rebus clarissime gestis, nec mori sine gloria, nec fugere sine dedecore possum, te nunc militare incipientem, nec fuga infamem, nec mors clarum faciet.* Sed cum filium plus pietas quam comonitio paterna moveret, cohortatis sociis ut forti animo pugnam redintegrarent, testudine suorum facta in hostes, qui nunquam munitiones castrorum exire præsumperant, audacibus inVectus animis haud parvam illorum stragem edidit. Sed cum hostes partim loco, partim tormentis ac numero militum superiores essent, etiam crus Talboto lapis è tormento missus abripuisset, cæsis majori ex parte suis, & ipse tandem cum duobus filiis, altero legitimo, altero extra matrimonium nato, & uno genero procumbens cecidit. Hic post sumptas ex hoste victorias clarissimi viri exitus fuit, quem Britonum potissimum constantia & audacia prostravit. Burdegala iterum in potestate regis facta est. Britannia Ducem, ejus germanum, qui nunc rerum potitur, cum diu sobole caruisset, votum voluisse ferunt, liberos si superi darent, priores duos alterum Minorum, alterum Prædicatorum religione consecraturum, ex in voti compositionem, primum qui sibi natus est Franciscum appellavit, secundum Dominicum. Natus est ei & tertius filius quem in Angliam nutriendum misit. Is cum mortuo patre in Britanniam Francisco regnante rediisset, ab eo captus & in carcere necatus est. Fama est eum, cum neci traderetur, impietatem fratris accusando, qui non contentus regnum sibi debitum occupasse, sed animam quoque sibi nefarius auferret, Franciscum coram divino judicio de parricidio responsurum, infra annum citasse. Ob quam rem cum intra præfinitum tempus Franciscus



hydropisi laborans obiisset, ut est religiosa Gallorum natio, correptum eum divina censura vulgo creditum est. Dominicus ei successit, qui cum hoc anno sine liberis decessisset, Arturum Francorum militiae principem patrum suum successorem habuit, non minus prudentia quam annis gravem. Carolus dux Aurelianensis, qui magno quondam prælio ab Anglis captus fuerat, jam senex in patriam dimissus, defuncto Philippo Maria Mediolanensis ducatus, tanquam sibi ex successione debiti, sese titulis adornavit.

## CAP. XLV.

*Quod Gandavenses supra viginti millia civium  
amittentes, Philippo duci Burgundiae se submisere,  
quodq; Delphinus Viennensis Agnetem  
occidere tentaverit.*

**I**N Flandria Gandavenses adversus Philippum Burgundiae Ducem, rebellantes, pluribus præliis victi, ad extremum supra viginti millibus civium una pugna amissis, confessi errorem Philippo manus dedere, legesq; victoris acceperunt. Idem Philippus & oppidum Lucenburgense maximum ac munitissimum, quod in Saxonum potestatem dotis nomine venerat, non sine indignatione Ladislai regis armis accepit. Delphinus Viennensis, cum mulierem quandam nomine Agnetem forma præstantem ac patri dilectam occidere tentasset, iterum regis odium incurrit: cumq; nusquam alibi se tutum arbitretur, ad florentes Philippi opes confugiens, ut primum eum convenit: *Miserto mei consanguinee* (inquit) *qui sine terra sum filius regis.* Ad quem Philippus: *Dum terra mihi est* (ait) *cave te sine terra dixeris. Nam quæ mihi provincia parent, eadem tua sunt, nec minus tibi quam mihi obediunt volo.* Post hæc ei & Brabantiae florentissima oppida, & ambitiosas Flandriae civitates ostendit, Dominum eum & principem in conspectu suo nuncupari iubens.



## CAP. XLVI.

*De Anglia insula, & quod olim Britannia, quodq;  
Albion fuerit dicta. De rege Henrico, Solfu-  
so, Eboracensi & Somerseto ducibus.*

**V**Entum modò est in eum locum, de quo brevissimus est in Angliam trajetibus, neq; enim plusquam triginta millibus passuum id mare latum est, quod Flandriam atqve Angliam interluit. Absolutis Galliae rebus, haud inconueniens fuerit transmissio pelago, Angliae (cui quondam Britanniae nomen fuit) quam brevissimè mutationes sub Frederico factas, commemorare. In Anglia quam tum Albion, tum Britanniam veteres vocavere, rex Henricus solitudinis & otii cupidus, alieno magis quam suo iudicio regnum gubernavit. Potens apud eum, & in primis auditus dux Solfus fuit, qui leges pro suo arbitratu, & populis & principibus dixit. Supressit quos odivit, & iterum quos amavit, crexit. Sed cum res Anglica apud Francos imminui cœpisset, & jam imperium Gallicum in pristinam gloriam emergeret, dux Eboracensis coactis non parvis copiis, nec paucis stipatus Baronibus, Lundonias venit regis consilium mutaturus, atqve (ut ipse dicebat) regis & regni salutis consulturus. Non expectavit ejus adventum dux Solfus, sed navigio raptim correpto, per Themisiam fluvium salutis suae fuga consulere adorsus est. Sed destinatam quis mortem fugiat? Missi qui eum comprehenderent, per compendia itinerum cursum ejus praevenere, ipsumqve mox interceptum, in prora navis qua vehabatur obruncaverunt. Dux quoque Somerseti, qui perditam Normanniam Angliam remeaverat, potensqve apud regem credebatur, in carcerem conjectus est. Nobiles viri quam plures necati, nec sacerdotio praeditis passum est: inter quos & amicus noster Adam Molines secreti regii signaculi custos & literarum cultor, amisso capite truncus jacuit: nec diu postea cum dux Eboracensis domum redisset, Somerseti princeps e carcere missus, permittente rege, gubernare regnum incepit, quae supremæ sibi cladis causa fuit. Irritatus enim ob eam causam princeps Eboracensis, cum majoribus copiis quam prius Lundonias properavit: cui



cum rex obviam cum duce Somerseti exivisset, putans illum aut verborum lenocinio placare, aut regiae majestatis autoritate deterrere, nihil profecit. Eboracensis enim cum esset longe potentior, iusso rege ut in partem se reciperet, in Somersesum ac ejus equitatum irrupit, cumque mox captum, detruncato capite interfecit.

## CAP. XLVII.

*De Scotia & mirandis apud Orcades arboribus, suos fructus in aves mutantibus.*

*Item de Hibernia.*

**S**Cotia ejus insula, in qua est Anglia, suprema portio est, in Aquilonem versa, fluminibus haud magnis, & monte quodam ab Anglia discreta: hic nos brumali tempore fuimus, cum Sol paulo amplius quam tres horas terram illuminaret. Jacobus eo tempore regnabat quadratus & multa pingvedine gravis, qui cum olim in Anglia captus, undecim annis in custodia fuisset, ac dimissus tandem suscepta ex Anglis conjuge domum reversus, complures regios gladio percussit, & ipse tandem à suis domesticis interfectus. In quos ultione peracta, filius ejus regnum suscepit. Audiveramus nos olim arborem esse in Scotia, quæ supra ripam fluminis enata, fructus produceret anetarum formam habentes, & eos quidem, cum maturitati proximi essent, sponte sua decidere, alios in terram, alios in aquam, in terram dejectos putrescere, in aquam vero demersos, mox animatos enare sub aquis, & in aëre plumis pennisque evolare. De qua re cum avidius investigaremus, didicimus miracula semper remotius fugere, famosamque arborem non in Scotia sed apud Orcades insulas inveniri. Illud tamen nobis in Scotia miraculum representatum est. Nam pauperes penè nudos ad templa mendicantes, acceptis lapidibus elemosynæ gratia datis, lantos abiisse conspeximus. Id genus lapidis sive sulphurea alia pingui materia præditum, pro ligno, quo regio nuda est, comburitur.

Hibernia nunc nobis absolvenda esset, quæ parvo à Britannia disjuncta freto, partim libera Scotorum amicitia & societate gaudet, partim Anglicano paret imperio. Sed quoniam nihil dignum memo-

ria



ria per hoc tempus, de quo scriptio est, gestum accepimus, ad res Hispanicas festinamus.

## CAP. XLVIII.

*Quod Hispania sit in quinque regna divisa,  
& quod apud ipsam nonnulla scitu  
digna sint gesta.*

**L**Atissima regio Hispania & terra optimis comparanda, viris armisque potens, hoc anno nostro in quinque reges divisa est. Primum ac maximum Castellæ Regem appellant. Proximum ei Aragonum. Tertio Portugalensem. Quarto Navarra: Grana-  
tæ, quod ab Evangelio Christi alienum est, ultimum ponunt. In Castellæ prænobili ac late dominante regno, cujus reges Gothorum sanguine creti, nunquam genus variarunt, Alvarus de Luna, natione Aragonensis nobili genere, quamvis extra matrimonium natus, cum olim Joanni regi ad eum se insinuasset, ut unus omnium regni regisque potens videretur, Johannemque Navarra regem & Henricum magistrum militiæ sancti Jacobi, potentia sua opprimere, ac regnum gubernare conatos armis deturbasset, postea tamen adversante sibi regina redeuntibus illis, ac regem in potestatem suam recipientibus, è curia pulsus, in possessionibus suis aliquandiu privatus vixit: felix si concessio frui otio novisset: sed nulla est regno dejectis quies. Dum ergo sublimem locum, de quo rursus majori cum ruina præcipitetur, vindicare conatur, regi clam sùadet, uti per speciem venationis in saltus sibi propinquos egrediatur, se cum potenti manu futurum obviam. Nec dubium, quin regni optimates libertatem regi afferant. Non fuit difficilis persuasio. Rex cum paucis egressus parum custoditus, (nam Alvari jam pene nomen extinctum erat) ubi ad insidiarum locum pervenit, mox clamore edito, Alvarus inter lectos exultans milites, *liberum regem salvere* dixit, eumque secum adduxit. Quare vulgata confestim mira inclinatio regni facta est, & iterum ad Alvarum regni gubernatio devoluta nec diu post cum eisdem Joanne atque Henrico atrox prælium commissum est, in quo plures utrinque cecidere, victoria



ria penes Alvarum fuit. Henricus non multis post diebus ex vulnere manus, quod in ea pugna receperat, mortem obiit. Magistratum ejus Alvarus obtinuit, & aliquandiu postea regis pariter & regni moderator est habitus, ad extremum tamen potenti invidiæ succubuit. Nam cum nobilem quempiam jussu regis ingrata sibi quædam renuntiantem, e fenestra suæ domus præcipitari jussisset, mox captus, & in medio foro capitali sententia damnatus est: non tamen ut ignavus occubuit, sed numeratis suis in regem regnumque meritis, non lachrymans aut ejulans, sed alacri vultu & quasi ad epulas invitatus, cervicem gladio præbuit: vir alti spiritus, non minus domi quam belli clarus, & cui magna semper in mente sederint. Joannes deinde aliquot annos per se regnum administravit, quo vita functo, filius ejus Henricus regnum accepit. Adolescens animo plenus, & recti cupidus, qui relictæ priori conjugæ velut incecunda, alteram ex Portugallia duxit Imperatricis sororem, & in regnum Granatæ cum exercitu profectus, magnam hostilis terræ partem diripuit atque pertrivit. Joannes Cardinalis Ostiensis, summa vir integritate, & scientia juris eminens, cui juvenis in dictandis epistolis servivi senio confectus, in eo regno, unde illi origo erat, animam Deo dedit. In regno Navarra & filius in patrem & pater in filium arma suscepit, filiusque tandem regno pulsus ad Alphonsum patrum Arragonum Siciliaeque regem peragrata prius Gallia, confugit. Nunc Ludovicus Montefie Magister, & Joannes Deseritanus viri præstabiles, ab Alphonso missi, reconciliare patri filium student. Joanna Alphonsi & soror & conjunx, absente viro multis annis Arragonum & Valentia regnis tot potentia civitatibus, tot nobilissimis principibus jura dixit, casta & sancta mulier, & digna, quæ prolem peperisset Alphonso. In Portugallia Petrus cognomine infans (sic enim filii regis antequam regnent appellantur) magni nominis princeps, qui totam ferme Europam peragraverat, suæ virtutis documenta demonstrans, cum regnum tutorio nomine aliquandiu summa cum laude administrasset, nec minori fide Alphonso ex fratre nepoti simul & genero suo restituisset, tandem subortis utrinque dissensionibus, cum odio crescente ad prælium ventum esset, sagitta in incertum missa transossus interiit, vir magnorum operum, & qui olim sub Cæsare Sigismundo stipendia faciens, non parvam sui gloriam in Turcas pugnando paraverat.

Alphonsus



Alphonſus exinde manſuetiſſimus princeps, alti cordis & prudentia ſingulari præditus (neq; enim in ſultos unquam regius Portugallia ſanguis derivatus eſt) poſt regnū quiete tenuit, cui cum obiſſet dilectiſſima conjunx, eademq; ſoror patruelis, hortatu ut aliam ſuperduceret, non fraderi potuit, ſed omnis ejus cura converſa eſt, ut aliquid agat, quod ſibi laudem & Chriſtiana religioni fructum pariat. Quapropter invitatis regni proceribus, ſuſcepto publice crucis ſigno, claſſem in Turcas & expeditionem promiſit.

CAP. XLIX.

*De Genuenſibus, & eorum crebris in principatu reipublica mutationibus.*

**U**Ltimis Europæ finibus peragrat, & quantum propoſiti noſtri fuit, ſeprentrione decurſo, in patriam tandem reverſus, novitates Italiae cum jam referendæ occurrant, ab ea nimirum urbe incipiendum eſſe arbitror, cujus creberrimas mutationes & oriens ſimul & occidens admiratur. Ea eſt Genua Ligurum domina ac regina, quæ civilibus agitata diſcordiis, memoria noſtra imperium maris amiſit. In ea cum excluſo Philippo Mediolanenſium Duce, ejusq; prætor Opicino Olgate necato, autore Franciſco Spinula VIII. libertatis capitanei creati eſſent, eiſq; paulò poſt ſublata libertate exactis, Ignardus Gvarro ducatum accepiſſet, annos ſupra ſeptuaginta natus, autore Thoma Fregoſo, qui & ipſe olim ante Philippi dominium ducali honore ſunctus fuerat, cum homo grandævus ad gubernationem inutilis videretur, vix ſeptem diebus regnare permiſſus eſt, Thoma ejus honorem ſurripiente. Qvem cum quatuor gubernaviſſet annis, Germanus ejus Baptiſta ad ſedecim circiter horas regno expulit. Nam Thomas reſumptis viribus conſeſtim fratrem palatio deturbavit, tres annos poſtea & nonnullis menſibus urbem regens, donec autore Joanne Antonio Flisco iterum civitas libertatem aſſeruit, delectis VIII. capitaneis, priori ex more rempublicam adminiſtraturis, qui Thomam Fregoſum in carcerem conjecerunt, cum jam ter patriæ ſuæ ducem geſiſſet. Horum principes fuere Joannes



Antonius, quem prænominavimus, miles equestris ordinis, & Raphaël Advanus juris interpres. Sed hæc quoque paucorum mensium libertas fuit, cum Raphaëli non tam capitanei quàm ducis nomen placeret. Is enim gentilibus suis ac Spinularum primoribus in suam sententiam tractis, collegas suos magistratu abdicavit, ducalesque fasces assumpsit, quibus paulò supra duos annos est usus, à Barbana gentili & patruele suo è republica dejectus. Barbanam verò nondum mense toto principatu positum, Janus Fregosius Joanne Antonio Flisco & Aurianis faventibus regno pepulit. Qui paulò post Antonio pro suscepto beneficio necem paravit: interposito Joanne Philippo ejus gentili, qui eum percuteret, cui & castella defuncti condonavit. Jano verò cum rexisset annis paulò amplius duobus, in magistratu satis functo, frater ejus Ludovicus successit, qui à Petro patruele suo è dignitatis culmine dejectus est. Is est Petrus Fregosius, qui modò regnat, multa vi animi & corporis, sed optimatibus civitatis & omni fermè nobilitati odio habitus, qui & gentilem & patruelem suum Nicolaum Fregosium honestis moribus præditum, & philosophiæ studiis insignem, ob suspicionem affectati dominii, vocatum à se in palatium paratis percussoribus interemit, hunc, cum regnasset annis quatuor, tam suæ quàm aliarum nobilium familiarum principes, ex urbe dejecerunt, Ludovico patruele suo, quæ ipse ante deposuerat, in ejus locum successit. Qui cum se parum gratum magnatibus esse intellexisset, eundem Petrum, quem regno deturbaverat, in auxilium accersivit, illè tertia post exilium die reversus, & patruelem ducatu amovit, & omnes adversarios urbe pepulit. Quorum principes ad florentes Alphonsi Aragonum & Siciliae regis opes conversi, magnam & formidabilem classem ab eo impetraverunt, cum qua jam fermè duobus annis terra marique Genuam opprefferunt. Ventum est sæpe ad mœnia civitatis, & aliquando intra suburbia pugnatum. Hoc autem anno, cum signo dato & in ipso portu, & promœnibus urbis undique pugnaretur, ingressi sunt Aragonenses, ducisque milites ad magnam urbis partem fugaverunt, passim cædibus, passim rapinis civitatem fœdantes, sed adsuit præsto cum delecta juventute Petrus, qui fugientes suos sistere compulit, & in Aragonenses dilapsus, ingenti edita strage, urbem penè captam recuperavit. Actum tamen de eo fuerat, si portam, quàm ceperant hostes, ita communissent,



ne concludi superna potuisset, & aditum sequentibus navalibus sociis patentem retinuisent. Nunc ambæ partes quasi ex integro ad bellum se parant, quamvis fama est Petrum animo fractum, Gallorum implorare auxilia, eorum regi patriæ suæ principatum, quem retinere non potest, pecunia venditurum.

## CAP. L.

*De Mediolanensibus, & variis apud eos rebus  
gestis, Philippo Maria, & Francisco  
Sfortia, ducibus.*

**A** Pud Insubres urbemque toto famatam orbe Mediolanum, Philippus Maria Dux gentis, qui Genuam ditioni suæ quondam subegerat, Amedei Sabaudia ducis filiam matrimonio sibi conjunxerat, Alphonsum potentissimum regem cum duobus fratribus, altero rege Navarra, altero militia Compostellanæ magistro, multisque regulis navali prælio victum, captum, & ad se usque deductum, insolita usus libertate, magnificentissimè donatum, libertati dimiserat, Sigismundum Cæsarem Romam petentem, cum Mediolani ageret, visitare contempserat, Bononiam, Forolivium, Imolam à manibus tyrannorum armis ereptas, sacrosanctæ Romanæ ecclesiæ restituerat, atrocem Svitenium gentem bello domuerat; de Florentinis ac Venetis per suos duces sæpius triumphaverat, totamque quondam Italiam tremore affecerat: jam recedente fortuna, perdita Genua, Nicolao Picinnino, in quo maximè fidebat, defuncto, exercitu suo ad Casale majus juxta flumen Padum duce Micheletto Carimio-  
la ab hostibus prælio fuso, & castris exuto, magno numero equitum peditumque capto, eò deductus erat, ut non modo Venetis, sed omnibus per circuitum populis ac principibus contemptui esset. Et Veneti quidem Abdua flumine transmissi, in agro Mediolanensi castra metati, tantum ei terrorem incussere, ut de relinquendo imperio cogitaverit, quæ sunt ultra & citra montes, auxilia regni deposcens. Sed quem fortunatum atque hostibus insultantem, omnes honore ac favore dignum existimavere, idem in calamitate constitutus, ab omnibus



tanquam odio dignus relictus est. Unus tamen omnium Alphonsus accepti beneficii memor, ad opem ferendam sese accinxit, sed cum serius iter agit, interim Philippus primum ob adversam valetudinem oculis captus, deinde ex ipsa arce hostilium armorum fragore audito vehementer commotus, vitæ tædio simul & languore mortem obiit, ipso Alphonso hærede instituto. Fuit autem Philippus ingenti corpore, in juventute macer, in senectute pingvissimus, deformi facie ac terribili, instabilibus ac prægrandibus oculis, ingenio peracri & callido, in largiendo profusus, in parcendo facilis, in audiendo difficilis, at ubi in colloquium venisset, mitis ac placidus, cultus corporis ac munditiarum, omnisque lenocinii negligens, venandi cupidus, eorum studiosus. Caterum quietis impatiens, atque imperitandi avidus, in pace bellum, in bello pacem quæsit, simulandi atque dissimulandi egregius artifex, in milites quam in cives indulgentior, raro in publicum prodiit, delatoribus facile credidit, in suspiciones adeo pronus, ut sæpe fidissimos à se amicos levissimis de causis alienaverit. Pulchris indutos vestibus ægrè ad se venire permisit. Sermonem de morte audivit invitus. Tonitrua ac fulmina mirum in modum expavit. Tabifica lue percussos ex urbibus migrare in agros iussit, eorumque domos incendio tolli, quæ cura innumerabilem illum Mediolani populum multis annis intactum, quodammodo ab ea peste servavit. Huic cum vita decessisset, funus nec tanto principe dignum, nec suis majoribus ductum est, nec sepulchri decus additum. Populus cognita ducis morte in libertatem sese proclamavit, duodecim viris electis, qui rempublicam administrarent. Castrum portæ Jovis instar excellentissimæ regię captum ac dirutum est, & testamentum Philippi dilaniatum. Ad dominium Mediolanense multi aspiravere, sed qui coloratis uterentur titulis, quatuor tantum fuere. Fredericus imperator devolutum ad se principatum, Philippo sine liberis legitimis vita subtrahendo, contendebat. Alphonsus ex testamento hereditatem petebat. Carolus dux Aurelianensis ex sanguine Vicecomitum natus, ab intestato sibi deberi ducatum agebat. Franciscus Sfortia Vicecomes conjugem suam, quæ Philippi filia fuerat, heredem patri suscipiendam affirmabat. Auditæ sunt legationes omnium in senatu Mediolanensi. Quarum aliquæ sermone directo dominium petiere, aliquæ per simulationem oblatis contra Venetos auxilii insinuare se populo,



pulo, atque inde paulatim vindicare dominium satagebant. Sed civitati, quæ jam libertate gauderet, & imperandi cupiditate demortui principis militiam conduxisset, nulla conditio placuit, quæ jugum quovis pacto in capita civium videretur inferre. Obtulit tamen imperatori censum quorannis, aureum poculum, si libera suis legibus dimitteretur. Dilaniabatur interea undique Philippi hæreditas. Veneti Placentiam, Cremam, Laudam occupavere, & multa præterea minora oppida. Dux Sabaudie Ludovicus Valentiam & Confluentiam, invalit. Astenses ad ducem Aurelianensem Carolum defecere, qui susceptis à rege Franciæ non parvis auxiliis, Alexandrinorum agros vexare cœperunt. Papienses intestinis agitati discordiis diu ancipites fuere, quibus se potissimum partibus jungerent. Novarienses, Comenses, Alexandrini, ac Terdonenses Mediolanensium imperium subiere, Parmenses in societatem quodammodo recepti sunt. Franciscus Sfortia per idem tempus in Piceno agebat, quamvis majorem ejus provinciæ partem jam amisisset, quem Philippus non multò ante, quam moreretur, sibi per communes amicos reconciliatum, ut ad se rediret, in Venetos pugnaturus, accersiverat, rogato Alphonso rege, sibi ut septuaginta millia auri nummum suo nomine numeraret, quo facto jam paratis atque instructis copiis, itineri se accinxerat, cum mors Philippi enunciata eum, qui longo tempore ad Mediolanenses inhiasset, magis ac magis properare compulit: quem ut Lombardiam primum ingressus est, Mediolanenses incerti, quo mens ejus inclinaret, ne vel per seipsum vel conjunctus Venetis suis cœptis obviam iret, missis oratoribus, & oblatis non parvis stipendiis conduxere, moxque duce sui exercitus facto, ut Placentiam omnibus copiis obsideret, imperaverunt. Ipse dicto parens, dum ad Placentiam in obsidione sedet, Papienses quia jam Mediolanense imperium tanquam fastidiosum & insolens detrectarent, sese sibi dedentes accepit: quæ res Mediolanensium animos haud mediocriter conturbavit, qui per conventiones inhibitu Francisco dicebant, quempiam ex urbibus, quam olim Philippus tenuisset, occupare. Franciscus verò non se occupasse, sed dedentem, & ultro se offerentem civitatem recepisse agebat. At Mediolanenses, cum ejus potentiam vererentur, dissimulandum potius statuere. Ille continuata apud Placentiam obsidione, tandem summa vi oppugnare adorsus urbem, quamvis magna & forti



militum manu munitam, armis tamen expugnavit ac diripuit. Mediolanense regimen per id tempus penes nobiles fuit, & apud eos qui Philippi quondam consilium direxere. Itaque res prosperæ sapientium ductu cedebant, jam non parva Gallorum manus. \* Nam circiter tria millia equitum delecti roboris, quæ Alpes transierant, apud Alexandriam profligata deletaque fuerant, & Veneti apud Caravagium magno prælio superati, omnes penè copias amiserant, & Lauda ab eorum imperio erepta in potestatem Mediolanensium redierat. Cum Franciscus Sfortia ad infestandum Brixienfes missus, sive quod principatum Mediolanensem, cujus sibi opinionem jampridem finxerat, alio modo consequi non posse sperabat, sive quod Mediolanenses cum Venetis amicitiam societatemque clam sequentes, ne solus utriusque populi præda relinqueretur, præveniendos censuit, prior cum Venetis lœdus iniit: in quo cum multa hinc atque inde promissa essent, illud inter cætera, convenit, ut ad urbem Mediolani ditionemque ejus obtinendam, Francisco cum copiis proficiscenti senatus Venetus & pecuniis & armis auxilio esset. Qua re firmata mox in Mediolanensem duxit. Militabant eo tempore apud Mediolanenses Bracciani, qui cum Ludovicum de Verme, ac nonnullas alias Francisci copias apud Modœtiam fudissent, tandem relictis Mediolanensibus ad eum defecere. Franciscus filiam suam Jacobo Picinino uxorem despondit. Carolus verò Gonzaga haud ignotus copiarum ductor, qui paulò ante à Mediolanensibus deficiens ad Franciscum venerat, postquam desertos eosdem Mediolanenses, & sine ullo duce relictos animadvertit, iterum ad Mediolanenses relicto Francisco transivit. Erat hic vasto corpore, formaque pene gigantea: viribus verò, qui magnitudini responderunt, dicendi copia clarus, literis græcis ac Latinis instructus, sed animo inconstanti, & ingenio ad omne facinus sive honestum sive necessarium parato, cui non parva spes fuit oppressa in Mediolano libertate dominium urbis arripere: sed fortuna jam Mediolanensibus novercante, Placentini, Therdonenses, Novariensesque populi ab eis deficientes, Francisci præsidia receperunt. Alexandrini cum nullam in eis spem sitam esse contuerentur, Gulielmi Montisferrati principis fratris imperio se commiserunt. Respublica medio tempore ex nobilitate in plebem defluerat, lectique viri duodecim, qui urbi de more præessent, ex sece populi ignobiles atque incogniti magistratum gerebant.



gerebant. Hi cum nobilitatem, quàm multis modis offenderant, suspectam haberent, neve cum Francisco sentiant, svadente Gonzaga, qui eam viam ad principatum urbis arripiendum commodissimam existimavit, septem primarios cives, genere nobiles, & opibus abundantes, raptim interceptos per noctem obtruncavere, ac deinde in foro plebi spectaculum objecerunt, inter quos Jacobinus Bossius egregius adolescens, placidus moribus, & literis eruditus, & nobis amicitia junctus, prorsus innocens, supinus truncusqve jacuit. Nec diu post Joannem Caynum venerabilem senem, & filium ejus Franciscum egregia forma juvenem, non alio crimine irretitos, nisi quod illustrissimæ Blancae Mariae Francisci conjugii sanguine juncti erant, crudelibus affectos cruciatibus necavere. Exin Georgius Lampugnanius juris interpres, sub specie legationis tanquam ad imperatorem mitteretur, in Modoetia captus atqve interfectus est, magnus libertatis assertor, & qui testamentum olim Philippi (populari favens regimini) laniasset. Nec Theodoro Bossio admodum in civitate gratioso pepercerunt, quem cum diu in vinculis tenuissent, tandem interemerunt. Galeottus quoque Thuscianus, & ipse natus nobilis atqve opulentus civis intercisus occubuit. Quibus ex rebus cum jam nulla libertatis forma relicta esset, & duodecim viri ausu tyrannico urbem cadibus ac rapinis scedarent, successorumqve comitia prohibentes, invito populo sibiipsis imperium prorogarent: commota denique atqve incensa civitas correptis armis, novo magistratu ex nobilitate creato, tyrannos è repub. dejectos in carcerem conjecit. At cum neque hoc modo respirare populus posset (nam perditis omnibus, excepta civitate Comensi ac Parmensi, quæ in officio ad ultimum perstaret, Franciscus dura obsidione civitatem premebat) iterum plebs incensa nobilitatem è palatio pepulit, tyrannos demptis vinculis, tanquam libertatis amatores, & optimè de rep. meritos in priorem locum restituit. Illi ad priores artes reversi, cum satellites magno numero sibi assumpsissent, multaqve svadente Carolo spolia perpetrarent, nobilitatemqve prorsus opprimerent, non tamen ei viam ad invadendum principatum permisere. Quod cum ipse animadvertisset, etiam periculosam apud Mediolanenses moram intellexisset, per internuncios Francisco reconciliatus, ac magnis allectus præmiis, Laudam illi prodidit, tertioqve jam fidem fallens, non sine magno Mediolanensium damno



damno, ac plebis consternatione, ad eum transiuit. Non tamen defuit tyrannis animus, quin postulatis undiqve subsidiis Francisci iugum jam propè cervicibus imminens, excutere conarentur. Sed cum alios frustra rogassent, Venetos tandem ne se derelinquerent, peruicerunt. Nam neque illis ex usu videbatur Franciscum ætate florentem rei bellicæ peritissimum, cuius jam vires atqve arma non sine gravi jactura sensissent, eo imperio potiri, quod suo par tandem videretur. Percusserunt igitur scædus Veneti cum Mediolanensibus, legesqve, quas tota citerior Gallia sequi deberet, præscripserunt, mandantes Sfortiæ, ut certis contentus viribus ac terminis, Mediolanenses in pace dimitteret. Ille haud ignarus se brevi periturum, ubi Venetis paruisset, imperium eorum contempsit, & quamvis desertus ab omnibus videretur (nam soli Florentini, & hi quidem parce opem secebant) in obsidione tamen perseverare decrevit. Jam mortuo Francisco Picinino, frater ejus Jacobus cum Brachianis ad Venetos transierat, jam Leonardus Venerius à senatu Veneto missus, Mediolanum ingressus, auxilia & commeatus magnam copiam, quibus civitas indigebat, propediem asserre pollicebatur: erat & in exercitu & in civitate summa omnium rerum indigentia, ita ut dubium videri posset an obsidens Franciscus, an obsessus dici deberet. Vix ei bis mille equi supererant, qui ferre infessorem possent, & milites stipendio fraudati, pro cibis sese armis exuerant. Neque enim Francisco argentum erat, quo stipendiari militi posset. Sed inter spem metumqve dubius, obsidionem de die in diem verba pro factis ostentans, producebat. In civitate verò, cum jam frumentum omne absumptum esset, nec aliud genus edulii restaret, & jam canes, equi, cæteraqve id genus animalia manducarentur, nec ferre amplius famem multitudo posset, collecti in unum apud portam Vercillinam, correptis armis, in forum prorumpunt, obviumqve Leonardum Venetorum legatum gladiis confodiunt ac discerpunt: exin palatium fufis tyrannorum satellitibus aggrediuntur, quo sine resistantia occupato, quos invenerunt, tyrannis vincula indidere. Exin missis ad Franciscum legatis, principatum ei civitatis obtulerunt, qui mox ingressus dominium urbis accepit: & deinde non multis interjectis diebus, cum liberis ac conjuge reversus, ducalibus insignibus exornatus, in triumphantis modum urbem intravit: quicum jam Comum Parmamqve in deditio-

nem



nem accepisset, Gulielmoque Monteferratenſi Alexandriam ademisset, non parvum deinde bellum Florentinis sociis cum Venetis & Alphonso rege diutius gessit: in quo cum acrius premeretur, (neque enim tantæ potentiae par esse poterat) Renatum regem fortissimis equitum cohortibus cinctum, ex ulteriori Gallia magnis stipendiis ac promissis allectum in auxilium accersivit, qui cum superatis montibus in Italiam descendisset, ac Gulielmum à Monteferrato arnia ponere per amicitiam ac necessitudinem compulisset, etiam castra sua Francisci castris jungens, in hostilem agrum descendisset, expugnatisque raptim nonnullis castellis, more Gallico mortales omnes in eis comprehensos trucidasset, tantus mox terror Venetos invasit, ut jam castra castris conferre amplius nullo pacto præsumerent, nec jam retinere posse, vel Brixiam vel Bergomum agris amissis confiderent. Cumque Turcarum bellum res eorum maritimas infestaret, repente præter omnium opinionem pax, quæ diu in senatu apostolico frustra fuerat agitata, denique apud Laudam interventu cujusdam (sed probatæ & integræ vitæ) monachi inter Venetos & ipsum Franciscum, clam rege facta est: quæ res ut regimolesta, ita Francisco utilis, Venetis necessaria fuit. Arcem deinde insanientis populi favore dirutam, Franciscus brevi restauravit, mira fortunæ sive cuncta regentis dei providentia nobile ac magnificum opus iisdem manibus subito reffectum est, quibus fuerat paulò ante rejectum. Franciscus Philelphus nobilis Satyrarum scriptor, per idem tempus ad Heroicum carmen conversus, res Sfortiæ scribere cœpit, Leodrisius Cribellus soluta oratione ac metro clarus haberi cœpit.



## CAP. LI.

*De Venetis, & quod Franciscus Foscarius dux  
ab imperio depositus, animam indignatus  
statim emisit.*

**A** Pud Venetos terra mariqve potentissimos, qui nomen Italicum apud Barbaras nationes longè latèq; clarum fecere, filius Francisci Foscari ducis veluti quippiam in rempub. molitus esset, in exilium actus, deinde revocatus, & iterum in suspicionem criminis adductus, & crudelissimè tortus, cum nihil mali confiteretur, relegatus in Peloponnesum, miseram ibi vitam finivit. Gener ejusdem ducis Andreas Donatus, dum Cretam insulam pro Veneto imperio gubernat, dux insulæ appellatus, revocatus domum, honore privatur, & magna mulctatus pecunia, in exilium mittitur. Armilaus inter Venetos dignitate & autoritate potens, dum ex concilio ad multam noctem domum revertitur, jaculo transfossus occiditur, nec qui tantum scelus patrauerit, inventus est, quamvis id filio ducis crimini dederint. Franciscus Barbarus studiis humanitatis excellens, editis non paucis, neqve illaudatis opusculis senio confectus, non sine celebri nomine vita decessit. Imperator Fredericus cum Roma rediens, eò se cum conjugè & rege Hungariæ Ladislao, totoqve comitatu recepisset, libenter & amicè visus incredibilibus honoribus cumulatus est. Franciscus dux gentis, qui annos XXXV. summa cum laude civitatem rexerat, Philippo Mediolanensium duci Brixiam Bergomumqve ademerat, copias ejus pluribus in locis fuderat, Franciscum Carminiolam clarum ducem copiarum de proditione suspectum securi percusserat, Marsilium Cararium, cujus majores diu Patavium per tyrannidem tenuissent, dum paternam hereditatem vendicare conatur, interceptum necaverat, pacem cum Turcis non tam honestam quam necessariam fecerat, Imperiumqve Venetum terra mariqve longe ampliaverat, gubernationi tandem cedere compulsus est, tanquam præ senio reipub. videretur inutilis. Ille veluti contumelia affectus, ingrata patriæ aspectum non ferens, camqve vitam recusans quæ careret imperio, è publico palatio in privatam domum se recipit, ubi  
cum



cum principatum suis civibus reddidisset, agram quoque confestim animam naturæ restituit. Cujus casum tanquam prævidisset Baptista Blasius Cremonensis Astronomus pluribus ante mensibus prædixerat. Erat autem Franciscus cum moreretur non longè ab anno suæ vitæ nonagesimo, venerabilis senex, præcipua corporis majestate decorus, memor omnium quæ post infantiam aut vidisset, aut audivisset, facundia copiosus, & ingenio prompto ac dexterrimo, & qui moderari frena senatus optimè nosset, ejus pater in Ægypto negotiatus cum prophetam regionis illius quempiam de futuris interrogaret, responsum ab illo accepit, *filium sibi esse, qui aliquando suæ civitatis principatum assequeretur.* Francisco susceptus Paschalis, vir singulari prudentia, & moribus humanissimis, cujus ducatum nulla putant bella suscepturum, nisi vel necessaria, vel admodum gloriosa.

## CAP. LII.

*De Mantuanis.*

**L**udovicus Marchio Mantuanus inter principes nostri seculi famæ non mediocris, literis eruditus, & rebus militaribus exercitatus, in eo bello, quod Veneti cum Francisco Sfortia post dominium Mediolani ab eo captum gessere, partes illius secutus, magnum monumentum rebus ejus accessit. Carolus frater ejus qui fidem Francisco fefellerat in vincula conjectus, sub ejus fidejussione dimissus, cum neque sic promissioni suæ satisfaceret, omnibus, quæ in Mantuano agro tenebat, oppidis privatus est. Sed cum stipendia Venetis faceret, non parvas eorum copias in Mantuanum duxit, ubi vastatis late atque incensis agris, cum fortuna principium ejus belli secundum fecisset, & cum jam Mantuani metu perculsi rebus suis diffidere viderentur, Ludovicus accessit ex Mediolano auxiliis, milites suos in aciem producens, fratri copiam pugnae fecit, nec ille certamen detrectavit. Commisum est atrox prælium, in quo duo fratres ambo ætate florentes, ambo rei militaris periti, ambo corporis atque animi viribus præstantes, de gloria, de imperio, de vita summis conatibus contendere. Denique victor Ludovicus fuso sugatoque



Carolo, omnes ejus copiarum duces ac primores equitum, caesis plurimis intercepti. Ille deinde patria extorris atque egenus morbo confectus interiit.

## CAP. LIII.

*De Ferrariensibus, & disputatione apud eos inter Græcos & Latinos facta.*

**A**Pud Ferrariam mortuo Nicolao Estensi principe, omnium nostri seculi fortunatissimo, nisi conjugis adulterium & in ea & filio dilectissimo vindicare olim coactus fuisset, Leonellus dominatum suscepit, princeps pacificus, literarum peritus, & Musicæ cultor. Quo decedente, Borsius frater ejus & ipse Nicolai filius ex concubina Ptolemæa Senensi ad principatum vocatus est. Egregia forma juvenis, & in armis cum laude versatus, dicendi & agendi peritus, qui cum Cæsarem Fredericum Romam petentem, & inde reversum magnificentissimè accepisset, super Mutinam & Regium civitates Ducatus honorem accepit, primusque omnium in Estensi familia Dux appellatus est. Eugenius Pontifex dum Ferrariæ cum Græcis concilium ageret, Hugo Senensis qui per id tempus medicorum princeps habitus est, omnes qui ex Græcis studiosi philosophiæ eò convenisse crediti sunt, apud se invitavit, quos cum opipare magnificeque pavisset, finito prandio epulis mensisque remotis, eos in disputationem pedetentim placideque pellexit. Cum jam Marchio Nicolaus adesset, & multi in synodo excellentes philosophi adventassent, cunctos in medium Philosophiæ locos adduxit, de quibus inter se Plato & Aristoteles in suis operibus contendere ac magnopere dissentire videntur, dicens eam se partem defensurum quam Græci oppugnandam ducerent, sive Platonem illi, sive Aristotelem sequendum arbitrarentur: cum Græci certamen minimè recusassent, protracta est ad multas horas disputatio. Postremo cum rex convivii Hugo Græcorum philosophos, alterum post alterum argumentis & dicendi copia victos tacere compulisset, palam factum est Latinos homines, qui jam pridem bellicis artibus & armorum gloria Græcos superaverant, ætate nostra etiam literis & omnium doctrinarum genere anteire,



anteire. Fuit autem domus Estensis viris semper doctis amica, nostra ætate non solum Hugonem ( de quo præfati sumus ) magnis ad se præmiis traxit, sed multos in jure civili, plures in cæteris facultatibus honoravit. In studiis verò eloquentiæ Joannem Aurispam Siculum Græcis ac Latinis literis edoctum, & qui versu prosa quæ claruit, inter familiares habitum, ditem beatum quæ facit. Gvarinus autem Veronensis omnium quæ fermè pater ac magister, qui nostra ætate, Græcas literas didicere, admirabilis, & omni honore dignus senex, qui omnem ætatem suam legendo, docendo, scribendo percurrisset, unicum senectutis suæ refugium, & illud quidem honestum, dignum quæ suis exercitiis ac virtutibus invenit.

## CAP. LIV.

*De Bononiensibus, & factione inter Baptistam Connetulum & Hannibalem Bentivolum.*

**I**N agro Bononiensi pirum quandam aridam ex minoribus formicis pastus causa complures ascenderant, supervenere majores non parvo numero, quæ illas partim occiderunt, partim dejecerunt. Post duas fermè horas tanta minorum formicarum vis exorta est, ut totus ager nigro tectus agmine videretur. Accessere stipatæ omnes, & arboris undique stipitem circumdantes paulatim ascendere cœperunt. Majores formicæ ubi hostes adesse animadverterunt, conglobatæ supernè pugnam expectaverunt. Postquam simul acies convenire, commissio prælio majores morsu rabido, modò illas, modo istas è minoribus interemere, toto quæ brevi spatio confecerunt, ut cadentium morientium quæ cumulus ad piri radices non parvus in terra succreverit. Sed cum pertinacius instarent minores, semper quæ acies aciem premeret, viginti aut plures unam ex hostibus circumdarent, & à tergo & à fronte pugnantes, undequaque latera confoderent, victæ tandem majusculæ & ad unum omnes necatæ, illati prius temerè prælii pœnas dedere. Hæc acta sunt, spectantibus Romanæ ecclesiæ copiis, cum Petri cathedram Eugenius quartus teneret, ea nobis



qui se vidisse ait, vir fide dignus & autoritate retulit Nicolaus Pisto-  
 tiensis utroq; jureconsultus, qui tum in castris apostolicis Nerii Senen-  
 sis episcopi vices agebat. Simile hoc illi est, quod in Gallia Belgica non  
 longe ab urbe Leodio constanti fama gestum ferunt, nidum sive in rupe  
 sive in arbore falco sibi paraverat, ovaq; fovens pullos avidus expecta-  
 bat. Hunc Corvi supervenientes loco deturbavere, ovis ejus effractis ac  
 voratis. Spectaverunt id è proximo bubulci, fugientemqve trepidum  
 Falconem annotavere. Postridie (mirabile dictu) Falcones Corviq, quasi  
 ex toto orbe ad pugnam vocati, isti septentrionalem, illi meridionalem  
 partem tenentes, ordinatis aciebus & tanquam rationis capaces essent,  
 aliis qui cornua observarent, aliis qui media ducerent agmina dispositis,  
 atrox ac ferocissimum praelium in aëre commiserunt. In quo cum modo  
 Corvi, modo Falcones cederent, & iterum resumptis viribus, certamen  
 instaurarent, totus undiqve subjectus ager & pennis & cadaveribus  
 obiectus est. Ad extremum victoria penes Falcones fuit, qui non  
 solum rostris, sed etiam ungvibus accerrimè decertantes, corvos o-  
 mnes ad internecionem delevere. Exin parvo tempore interjecto,  
 cum duo de Leodiensi ecclesia contendentes, alter à Gregorio tertio-  
 decimo, alter à Benedicto duodecimo in episcopum electus, (erat e-  
 nim inter illos de Romano Pontificio disceptatio) ambo cum copiis  
 in eundem locum pugnaturi venerunt. Joannes dux Burgundiae al-  
 terum armis juvit, alterum Leodiensis populus seqvebatur. Pugna-  
 tum est collatis signis summa utrinque contentione, horrendum  
 cruentumqve praelium factum. In quo tandem victor Joannes dux  
 triginta millia hostium cecidit. Memorabile ejus rei sanum conditum  
 est, quod nos illac postea transeuntes caërorum ossibus plenum vidi-  
 mus. Sed de illo Falconum atqve Corvorum suam cuique opinionem  
 relinquimus, veri periculo penes famam dimisso. Bononia quæ  
 non tam studiorum mater, quam seditionum altrix appellari potest,  
 soror & ipsa civitatis Genuæ, ac solius inconstantiae constans, cum fa-  
 ctionem Lambecariam non sine caede multosq; cives domo pepulisset,  
 comuni Conetulorum ac Bentivolorum consilio regi cœpit. Principes fa-  
 ctionum Baptista Conetulus & Hannibal Bentivolus fuere, ambo san-  
 gvinarii, ambo paratis cordibus insignes, qui licet simul compatratus sa-  
 cramento juncti essent, nihil tamen inter se meliores fuere. Nam  
 Hannibal levato de sacro fonte Baptistæ filio, visurus puerperam,  
 compa-



compatrem sequitur, eiꝛve manu preſo pro novo nato congratulatur, ab irruentibus ex improviſo Baptiſtæ ſatellibus obtruncatur, ut manifeſtè apparuerit, Baptiſmi ſacramentum non tam fœderis retinendi, quàm cædis patrandaꝝ cauſa à Baptiſta quaſitum fuiſſe. Sed non inulta mors Hannibalis fuit. Nam qṽi partes ejus ſeqvebantur, ſumptis paulòpoſt armis lugatis adverſariis, plateam obtinuerunt. Baptiſta indicio tandem puerili in ſpecu qṽodam ſubterraneo, cum plerisqve complicitibus ſuis latitans, repertus, & fumo compulſus exire, mox pluribus vulneribus conſoſſus eſt. Cadaver ejus in ſorum tractum, & diu ludibrio habitum, cum pleriqve more ſerarum cor ejus dentibus laniaſſent, cruoremqve bibere non horruiffent, tandem exuſtum eſt. Apud Florentiam per id tempus Xanthus latebat, Herculis Bentivoli, qvem qṽondam Eugenius Pontifex Max. interfici ſive juſſerat ſive permiſerat, filius extra matrimonium natus, pauperem vitam in lanificii exercitio ducens, nec ſatis gnarus qvo patre genitus eſſet: hunc Bononienſes è veſtigio vocant, recuſantem, & qṽodammodo invitum in patriam ducunt, eqvitem ex lanifice faciunt, tutorem Hannibalis filio reipub. principem tradunt. Cujus ea in rebus adverſis fortitudo, ea in ſecundis moderatio hæcenus oſtenſa eſt, ut Herculis filium omnes norint, qṽi cum exules per prodicionem nocte qṽadam urbem intraſſent, ac exercitus rumore qṽaſi victores inſultaſſent, haud qṽaquam deſtitutus animo, excitis amicis, correptis armis, in eos proſiliit, nec mora, victos cæſis captiſqve pluribus ex civitate deturbavit. Beſſarion eo tempore Cardinalis Nicenus, natione Græcus, prudentia ſingulari, & noſtra ſuaqꝫ lingua peritiſſimus, Nicolai qvinti Pontificis Max. in ea urbe vices gerebat, qṽi uſqve ad ipſius pontificis obitum legatione functus, nobilitati plebiqve juxta charus fuit, qṽamvis eò deducta civitas eſt, ut legati Papæ rogare magis quàm imperare qveant, qṽod planè nunc experitur. Ludovicus ſanctorum qvatuor coronatorum Cardinalis legatus, qṽi qṽamvis ingenio valet, & ea præditus eſt autoritate, quæ ſummi ſacerdotis nepoti deberetur, non plus tamen in urbe poteſt quàm ſenatui placet & Xantho.



*De Florentinis, & diversis apud eos  
rebus gestis.*

**F**lorentiam urbem in Fesulanis ruinis ad ripas Arni fluvii conditam prisci homines Fluentiam vocavere, quæ cum auspiciis fundata felicibus, vicinas per circuitum civitates excellere, mirisque modis imperium propugnare cœpisset, Florentia longè melius quàm Fluentia dicta est. In hac urbe Pontifex Max. Eugenius quartus, id concilium, quod Ferrariæ cum Græcis cœperat, magnificè consummavit. Erant plures inter Græcos ac Latinos super arcanis orthodoxæ fidei contentiones, quarum maxima ac difficillima fuit de sancti spiritus processione, cum Græci paracletum ex patre duntaxat, nostri ex patre filioque procedentem assererent. Post multas ac diversas disputationes, in quibus tanquam interpretes Nicolaus Saguntinus utraque lingua disertissimus ingenio facundiaque juxta promptus illustre nomen adeptus est, tandem cum Latina ecclesia in uno fidei symbolo consensere. Civitas in imperatorem Græcorum, & Patriarcham Constantinopolitanum, & omnes eorum comites abundè lateque paruit. Patriarcha illic senio confectus decessit, & apud prædicatores in templo humatus est, cui Masseus Vegius poeta Laudensis non ignobilis epitaphium versibus imparibus edidit. Nicolaus Picininus illustris copiarum ductor, ab exulibus Florentinis invitatus, Fesulanum ingressus agrum, qui Florentia decem millibus passuum abest, hostiliter cuncta diripuit, nec diu postea in agro Aretino cum Eugenio simul & Florentinis bellum intulisset, apud Angleriam magno prælio victus & profligatus est. Ludovicus Archiepiscopus Florentinus apostolicis tunc copiis præerat, qui ea victoria nobilitatus, ad Cardinalatum paulo postea profectus est. Eugenius enim, & unione Græcorum facta, & Picinini metu deposito, mente atque animo auctus septendecim Cardinales creavit, viros aut genere illustres, aut virtute præstantes, aut vitæ sanctitate conspicuos. Inter quos & duo Græci assumpti sunt, Isidorus Archiepiscopus Ruthenorum, Bessarion Nicenorum pontifex, quorum supra meminimus. Alphonsus Rex Aragonum



num rogatus à Philippo Maria ( ut antea dictum est ) sibi adversus Venetorum potentiam opem ferret, coacto non parvo exercitu, profecturus in Galliam iter ingressus est. Sed ante Philippus obiit, quam ipse Tiburi, quo jam appulerat, digrederetur, audita verò amici morte, & quod ab eo nuncupatus hæres esset, in Sabinos profectus magnificentissimo illi funere iusta persolvit. Deinde transmissio Tiberi, recta via in Florentinum duxit, eo ut ajebat animo, ut Florentinos revocare suas copias ex Gallia cogeret, atque ita per Tusciam pacatam & sibi amicam ad opem Mediolanensibus ferendam, quos Veneti bello premebant, proficisceretur. Noluerant Florentini ab Alphonsò rogati Rege, Venetorum societatem deferere. Quapropter Alphonsus in agrum Volaterranum profectus, Pomaratium haud ignobile oppidum portas claudere ausum, eo ipso, quo venerat, die copiis circumpositis vi cepit ac diripuit. Deinde ad castrum novum in agro movit, cujus incolæ audita Pomaratii clade, confestim absque certamine in deditionem venerunt. Idem fecere aliquot castella circumjecta. Exin Montecastellum natura & opere munitum obsedit, quo tempore ea imbrium magnitudo, eaque vis ventorum exorta est, ut neque extra tentoria quiescere milites possent, multis eorum discerptis ac per inane raptatis, quibus ex rebus, & quod annonæ inopia laborabat, movens inde Alphonsus Campiliam duxit. Sed quoniam Florentini id oppidum præsidio & annona firmaverant, frustra ibi contendit. Castella tamen aliquot finitima in Gerardisca (idei regioni nomen est) recepit, atque illis restituit, quibus Florentini prius ademerant. Erat in comitatu regis Simonetus mille ducens equites, qui finito Florentinorum stipendio ad eum transiverat. Sigismundus autem Malatesta, quem Rex antequam Tusciam ingrederetur, cum equitibus mille & octingentis, peditibus verò sexcentis conduxerat, cum ab eo indies expectaretur, ad Florentinos transivit. Fredericus quoque Urbinate princeps notus & clarus in armis, Florentinorum stipendia faciebat, qui cum essent equitatu peditatuque haud inferiores rege, omnemque illi expugnandorum oppidorum facultatem præriperent, non fuit regi consilium in obsidione Campiliæ perseverare, & præsertim quod in montibus comæatus penuria premebatur. Divertitur igitur ad loca maritima, & apud Populoniam olim fama celebrem, nunc dirutam urbem confedit, quo in loco facile sibi ex regno Neapolitano



& frumenta & bellica tormenta navibus afferri poterant. Abest inde tribus fermè millibus passuum Plumbinum nobile oppidum, in cujus obsidione (de qua postea dicemus) laboranti Regi, Castilionum & ipsum non parvi momenti oppidum, prodente Florentinorum præsidio traditum est, præter arcem, quam cum Simonetus obsedisset, paucis post diebus per deditiorem accepit. Dum verò Rex paulo ante apud Aquam vivam hiberna ageret, à legatis Mediolanensibus aditus est, qui opem ejus implorantes in eo loco decerni bellum adversus Venetum senatum obtinuerunt. Jam enim Franciscus Sfortia Mediolanensi populo indignatus, Venetorum auxilio fretus, eos subigere sibi summis conatibus nitebatur, quorum paulò ante fines & arma promoverat. Cum verò Rex soluta Plumbini obsidione Neapolim redisset, & deinde in Pelignos secessisset, Florentini legatos ad eum misere, pacem petentes. Quibus accepta fide in castra profectis, postquam mandata exposuerunt, bellumque excusarunt, Antonii Cardinalis Hilerdensis, nominati inter primos theologi opera, qui id negotii de Pontificis voluntate susceperat, paucis post diebus ea lege pax Florentino populo reddita est, ut Castilionum & insula Gilli, quæ ipsius belli tempore Florentinis erepta fuerant, in potestate Regis remanerent. Sed cum Franciscus Sfortia Mediolano potitus esset, omnesque pontes & arces apud Abduam tanquam Mediolanenses à Venetis repeteret: Alphonsus, qui cum Francisco esset infensus, è re sua esse ratus, illum, ne radices in tanto imperio ageret, impedire, per Leonellum marchionem Estensem reconciliatus Venetis, & cum eis amicitia societateque facta, Florentinis, qui Francisci fortunam secuti & armis & pecunia eum juvabant, secundo bellum indixit, Ferdinandum filium in expeditionem contra eos mittendum duxit. Erat is eo tempore admodum adolescens, ingenio eximio, & ad cunctas optimas artes docili ac parato, liberalibus disciplinis institutus, armorum tractandorum scientia edoctus, gloriæ cupidus, inedia ac laboris patiens, cui pater sex millia equitum, duo millia peditum commisit. Fuerunt & in exercitu ejus comes Eversus & Urbinus Neapoleos haud contemnendi copiarum duces, Fredericus quoque Urbinas, qui superiori bello Florentinorum arma secutus erat, in exercitu militavit. Florentini verò postquam imminere sibi belli tempestatem senserunt, Estorem, Faventinum Simonetum (quem supra nominavimus) ac Sigismun-



gismundum Malatestam, postremo Alexandrum Sfortiam conduxere, qui simul juncti supra decem millia equitum, peditum verò magnum numerum in castris habuerunt. Ferdinandus tamen per agrum Cortonensem in Aretinum copias duxit, ubi castellis aliquibus non magni nominis vi captis atque direptis, Folianum non parvi momenti oppidum cum oppugnare cœpisset, nec hostes auxilium ferrent, post dies octo per deditionem accepit, equitatum Estoris apud montem Politianum pluribus captis, nonnullis occisis, fudit ac fugitavit. Recinium in agro Florentino vi expugnavit, Castellinam verò cum obsedisset, hyberno rigore invalescente recessit, & in maritima loca ad Aquam vivam patris exemplo sese recepit: quo tempore & Antonius Olzina Vadam in littore maris sitam navibus occupavit, & ampliori fossa à terra communivit, quo ex loco Pisenum & Volaterranum agrum infestum reddidit. Cumque interea Florentinorum duces ad Folianum castra movissent, velletque Ferdinandus auxilium obsessis ferre, jamque itineri se commisisset, tanta in castra lues consecuta est, ut præ languentium numero, non modò ad rem gerendam, sed vix ad movenda castra satis esset. Ob quam rem Folianum interea summa vi oppugnatum, nec minori virtute defensum, tandem ab oppidanis clam præsidio traditum est, qui tamen paulò post & ipsi victorum præda fuere, oppidum incensum ac solo æquatam. Per idem quoque tempus Gerardus Gambacurta dum castella quatuor, quæ pater à Florentinis acceperat, intra Apenninum sita, Ferdinando tradere vult, ab uno è suis proditus, castellis amissis diu regem mendicando secutus est. Exin pace apud Laudam (ut diximus) facta, revocatus à patre Ferdinandus in regnum concessit. Florentini quæ amiserant, cuncta receperunt. Baldatus pedestrium copiarum haud ignobilis ductor, manu promptus & audax, cum diu Florentinorum stipendia meruisset, in palatium tandem accersitus, dum magistratui contumaciter respondet, captus ex altissimis fenestris in forum præcipitatur, cui quamvis magno casu jam expirasset, securi tamen cervix abscissa est. Inter Florentinos omnes qui nostra ætate floruerunt, Cosinus cognomine Medicus, & prudentia & autoritate eminuit: is princeps urbis habitus, senatum quo voluit, impulit: civitati leges ex arbitrio dixit, inopes cives complurimos ditavit. Matrimonia, constitutis ex argento suo dotibus, multa conjunxit. Villas magnificentissimè exædificavit.



vit. In sacras ædes ditissima dona contulit. Monasterium sancti Marci & amplum & nitidum à fundamentis crexit. Parochiæ suæ templum, cum sibi parum placeret, prorsus diruit. Exin structuram admirandi operis ex lapide Fesulano suscitavit, ædes suas quamvis ornatissimas erexisset, amplius tamen meditatus opus, palatium & altum & ingens ex quadratis lapidibus, insigni urbis loco adeò pulchrum, adeò amplū construxit, ut ei alterū æquari tota civitate non possit. Commendanda est multis in rebus Florentinorum prudentia, tum maximè quod in legendis Cancellariis non juris scientiam, ut pleræque civitates, sed oratoriam spectant, & quæ vocant humanitatis studia. Norunt enim rectè scribendi dicendique artem non Bartolum aut Innocentium, sed Tullium, Quintilianumque tradere. Nos tres in ea urbe cognovimus, Græcis & Latinis literis & conditorum operum fama illustres, qui Cancellariam alius post alium tenuere, Leonardum & Carolum Aretinos, & Poggium ejusdem reipublicæ civem, qui secretarius apostolicus tribus quondam Romanis pontificibus dictarat epistolas. Illos præcesserat Colucius, cujus ea dicendi vis fuit, ut Galeacius Mediolanensium princeps, qui patrum nostrorum memoria gravissimum Florentinis bellum intulit, crebro auditus sit dicere, *non tam sibi mille Florentinorum equites quam Colucii scripta nocere*. Disceptatum est diu inter Florentinos ob pecuniarum exactiones, quæ tenuiores cives magis quam opulenti urgebantur. His diebus, consentiente Cosmo nova Catastri, id est, fortunarum cujusque civis descriptio cœpta est, quam raro factam sine tumultu motuque populi ferunt. At nunc quiete, tranquilleque transit. Lucenses qui nostra memoria bis Florentinorum obsidionem perpeffi, bis Philippi Mediolanensium ducis auxilio suam libertatem defendere, ad extremum cum vicinis viribus pares esse, non possent, nec facile invenirent, qui quoties hostis premeret, toties ferret opem: foedus in quinquaginta annos cum eis percussere, eas leges subeuntes, quas dixere potentiores. Inter Florentiam & Senam apud oppidum, quod Cassiam appellant, anno post Jubileum sexto visæ sunt nubes, viginti (ut ferunt) cubitis à terra sublimes, inter se mirabili ventorum impetu agitatae depugnare, & alteræ alteras pelleret, & mutatis sæpe vicibus pelli, quæ pepulerant. Interea summa incredibili spiritus violentia domorum tecta per inane jactari, muros dejici, & saxa ingentia loco moveri, vetustissimas olivas & antiquissima quercuum



qverebum robora radicitus convelli atqve confringi, homines ac iumenta non parvis spaciis per cœlum ferri, ac raptari. Hæc nobis, qui se vidisse ajebant retulere. Sed magis nos ut crederemus, epistolæ à gravissimis viris de his rebus Alphonsò regi, cum apud eum ageremus scriptæ, & in præsentia nostra lectæ, commoverunt.

## CAP. LVI.

*De Senensibus & eorum aliquot bellis. Item  
de Hermaphrodito.*

**U**Rbs Sena unde mihi origo est, secundum hodie locum in He-  
truria obtinet, amœnissimo sita loco, & ( si mihi fides habenda est ) populo neqve rudi neqve inurbano. Hujus rectores  
qui nobilitate postposita, quæ fuit in ea civitate tota Italia memorabilis, & parte populi, quam duodecim appellant, prorsus conculcata multis annis in pace quieverant : inter se tandem duas factiones habere cœperunt, quæ prout suæ rei conducere arbitratae sunt, ita se vel populis vel Italiæ principibus conjunxerunt. Cum verò rex Alphonsus in Florentinos ( ut antea relatum est ) exercitum duceret, factiones ipsæ manifestius patefactæ, altera, cum regium bellum contra Florentinos juvandum esse svadere non auderet, dissimulandum esse censuit : vicerunt primo regis amici, & in ejus castra commeatus misere : sed cum Rex ad sextum lapidem urbi proximus castrametatus esset, disseminantibus in plebe, qui Florentinis studebant, Alphonsum non tam Florentiæ quam Senæ dominium quærere, tota urbe trepidatum est, & armati ad portas dispositi, haud aliter Alphonsi milites quam libertati suæ insidiantes observavere. Comminuit aliquanti sper eam populi suspicionem Franciscus Martorellus, præstanti vir ingenio, & quo Rex libenter uteretur, legatus ad eos missus. Sed cum non tam Regis amore aut odio quam privatis civium contentionibus reipub. concilia turbarentur, ad eò tenuiter annona in castra regis deportari permissa est, ut & Florentinis simul & regi videretur illudum. Idem factum, cum Ferdinandus Regis filius alio postea tempore in eosdem Florentinos duxisset. Neqve enim principio ejus adventus satis



ei faventes fuere, sed Veneti cum Senensibus ac regi fœdere juncti essent, usque adeo Senenses legationibus agitarunt, ut & ipsi societatem tandem Regis inierint, bellumque Florentinis publice indixerint, quod brevi sopitum est, Venetis apud Laudam inconsulto rege pacem recipientibus. Post hæc Senensibus aliud è vestigio bellum exortum est adversus Hildebrandum Pitiliani comitem, in quo ducibus usi sunt Sigismundo Malatesta, & Gisberto Corrigiensi, quorum potentia non hostibus tantum, quantum ipsis Senensibus, formidanda fuit. Suborta inter Sigismundum & Senenses discordia, cum sese ille suspectum esse animadverteret, non sine suo & Senensium damno recessit, Gisbertus cum Senensibus perseveravit. Interea comes Jacobus Picininus, qui jam pridem apud Venetos stipendia faciens, non sine laude rerum gestarum eorum copias duxerat, cum pace ubique parta stipendio careret, in Hetruriam properans, Senenses jure paternæ amicitiae, ut sibi auri viginti millia mutuo dent, missis legatis expetit, quod cum frustra fuisset, acies in eos convertit, & ingressus Senensem agrum, pleraque oppida partim vi, partim proditione recepta diripit. Calixtus tertius, qui recens pontificatum inierat, copias suas Senensibus auxilio mittit. Idem Franciscus Stortia, idem Florentini faciunt. Veneti quoque per fœdus requisiti auxilium, quamvis tenue præbent, committitur ex improvviso prælium, ex quo sine magno partium damno discessum est. Jacobus cum exercitu coactus est Castilionum sese recipere, quod regis oppidum esse diximus, Florentinis priori bello receptum, ubi quamvis acriter oppugnaretur, expugnari tamen non valuit. Inter hæc Gisbertus in suspicionem actus tanquam cum Picinino sentiret, cum ejus rei tamen parva extarent indicia, vocatus ad urbem in senatu Senensi trucidatus est, & per fenestram in forum projectus. Picininus paulò post Urbetellum natura loci munitissimum oppidum, per proditionem obtinuit. Una enim tantummodo via, eaque arctissima & arcis oppositione defensa potest adiri, reliquas partes stagnum claudit, parvis duntaxat levibus cymbis navigabile. Ubi cum frumenti vinique copiam Picininus reperisset, tamdiu se continuit, donec pace apud regem Aragonum firmata, in regnum sese receperit: sed ea pax externo Senenses solvit, interno magis implicuit. Nam regis amici tanquam bellorum causa fuissent, Picinini quoque studia fovissent, partim securi percussi sunt, partim in

exilium



exilium relegati. Multi cum sibi periculum in patria imminere cerne-  
rent, sponte in exilium abiere, adeoque in eos qui suspecti habiti sunt,  
severitas exercita est, ut etiam Florentinis videatur esse sævitum: nec  
dum malorum finis, quando in civitate parum pacata novæ indies  
machinationes aut finguntur aut inveniuntur, & sanguis civilis per  
forum dispergitur. Hoc fortasse malum equulus ille prænunciavit, qui  
anno Jubileo ante portam ejus urbis quæ Romam vergit, pragnans  
frequenti astante populo dum pareret, expiravit. Erat enim Herma-  
phroditus, quamvis sceminei sexus nullum in eo vestigium cerneretur.  
Inter alios quos urbe relegatos haud nocentes civitas existimavit, duo  
suere ab ipsa pueritia socii, & studiorum communione conjuncti,  
quamvis alter juris civilis scientiam profiteretur, alter poeticam:   
Gregorius Lollius & Franciscus Patricius, cujus plura extant poëma-  
ta quæ doctissimi petunt, & quæ sibi vitam retinuisse creduntur. Ma-  
rianus Sozinus per idem tempus scientia juris non solum apud Senen-  
ses, sed tota Italia latè clarus habitus est.

## CAP. LVII.

*De Plumbinensibus, Galeatio Baldasino viro  
in armis dexterrimo.*

**P**lumbinum nobile oppidum ex Populoniæ ruinis ædificatum.  
existimatur, nonnulli Populinum appellandum putant. Id est in  
littore Tusci maris situm, Iluæ insulæ oppositum, quæ ferri ve-  
nis inexhausta, magnum quotannis vectigal Plumbini Domino  
præbet. Huic oppido præfuit Jacobus Appianus ex Paula nobilissima  
scemina Martini quinti Romani pontificis sorore natus, pacificus qui-  
dem princeps, & à vicinis amatus: qui cum ex conjugē virilem sobo-  
lem non susceperet, extra matrimonium heredem quærens, concubi-  
nam amare cœpit, cujus cum venter intumuisset, & jam pariendi  
prope tempus adesset, incredibili gaudio gessiens. Florentinos ac Se-  
nenses legatos uti ad se mitterent, ac partum de sacro fonte levarent,  
futuros compadres magnis precibus invitavit. Paritum est. Venere  
ad diem dictam legati, Mulier inter obstetricum manus diu laborans,  
Æthiopem



Æthiopem tandem peperit: quæ res, ut risum in populo cachinnumq;  
 excitavit, ita & compati nitates & lætitiæ principis interruptit. Ti-  
 bicen tum forte Maurus in familia ejus erat, ex quo natum puerum  
 credidere, qui mox ubi detectum flagitium intellexit, salutis suæ fuga  
 consuluit. Mortuo Jacobo Rainaldus Ursinus peracri vir ingenio  
 & rei militaris peritus in ejus locum susceptus est, non suo jure, sed  
 conjugis quæ Jacobi filia fuisset. Hunc Alphonsus, cum in Tuscia  
 Florentinorum bello distineretur, faventem hostibus reperit. Qua-  
 propter castris Plumbino admotis, cum intra mœnia clausum, terra-  
 mariqve summis viribus oppugnavit. Sed non minori virtute ipse ab  
 interiore parte cives suos defendit, quam regis miles ab exteriori mu-  
 ros invasit: pugnatum est diu acri contentione, ita ut multi utrinque  
 ceciderint, complures vulnerati in hostium manus pervenerint. In  
 eo prælio multorum virtus enituit. Inter quos duo Antonii, alter Fu-  
 xanus, alter Condola ad muros pariter videntes, inter ceteros pu-  
 gnare fortiter animadversi sunt. Sed omnibus prælatus est Galea-  
 tius Baldaſinus natione Siculus, qui ter muri fastigio appreſſo, quæ  
 prius tormenta disjecerant, conatus est oppidum irruere: ceterum  
 ferventis aquæ vivæqve calcis, quæ inter arma ingesta, ubi ad corpus  
 penetraverat, peterebat artus, videtur territus, gravisqve saxi ictu, cum  
 revulsa aggeris parte deturbatus est. Fuit autem Galeatius statura  
 quæ mediocrem excederet, robustis ac teretibus membris, corporis  
 magnitudini vires respondebant, lucta, ictu, saltuq; nulli hominum ces-  
 sit, membrorum robori par animus erat, eqvo ac pede juxta bellator  
 acerrimus: armatura gravi armatus galeatusqve humi stans, sinistra  
 sellam, dextra hastam eqvestrem tenens, strenuo saltu, grandi statu-  
 ra eqvum insiliebat. Singulari certamine quater præliatus, bis in Ita-  
 lia, bis in Gallia transalpina, toties victor evasit, à tribus hostium equi-  
 tibus eo ipso Florentino bello petitus, unum ex his gladii capulo semi-  
 necem eqvo decussit, alium citato eqvo medium amplexus è sella ex-  
 tractum, humi stravit, tertium cubito graviter percussam in fugam  
 vertit. Tanta porro modestia, ut nunquam ipse de se, vel roganti-  
 bus amicis diceret: vitæ cultu morumqve elegantia omnibus præterea  
 gratus dilectusqve. Perstitit autem pluribus diebus ad Plumbinum  
 Alphonsus, sed cum oppidi expugnatio difficilis videretur, neque jam  
 commeatus in castris esset, & equi consumptis arborum foliis, fame  
 perirent



perirent, dissoluta obsidione recessit. Nec diu postea Rainaldus morbo interiit. Uxor ejus Catherina verita, ne Rex in se viri delictum puniret, missis ad eum oratoribus tributum ei quotannis, dum viveret, aureum poculum quingentorum aureorum daturam promisit. Ea mortua sollicitis oppidanis, quem sibi potissime dominum legerent, vicini verò potentatus eum variis artibus ad se trahere conarentur, renunciatum est Manuelem Appianum adhuc è principum suorum prosapia superesse, cui se committere possent. Hic multos annos in militia, versatus, nec tamen aut opes congefserat, aut egregio aliquo facinore nomen quæsierat: ob quam rem dimissis jam armis, uxorem Trojæ inter Apulos ceperat, ibique tenuiter vitam agebat, nihil minus quam dominandi sollicitus, cum à Plumbinensibus publicè vocatus est, quod ei primo nuncio velut somnium visum est. Exin fortunæ ludum libenter amplexus, tanquam vitæ reliquum dormisset, in alterum virum mutatus, quamvis senex principatum iniit, rexitque postea plerisque annis civibus suis gratus, & vicinis amicus. Alphonso verò qui ei fautor fuisset, & stipendium fecit, & censum dedit: decessit autem duobus filiis extra legitimum conjugium sibi natis, minore (quod eum civitas seniori præferret) hærede instituto.

## CAP. LVIII.

*De Viterbio.*

**I**N Viterbio verò non parvi motus fuere: sedente namque Nicolao quinto, Princivalles Gattus ejus urbis princeps dum Roma redit, apud lacum Vicenssem ab inimicis invasus obtruncatus est. Exin sedente Calixto tertio Gvilielmus ejus nepos noctu domi necatus, ob quam rem civitas in ultionem sollicita, dum malefactores inquiruntur, dum isti fugiunt, illi plectuntur, magnas calamitates perpeffa est.



## CAP. LIX.

*De Roma, & apud eam Eugenio, Nicolao quinto, & Calixto tertio, summis pontificibus, aliisque viris multis percelebribus,*

**U**Rbis Romæ jam tandem nobis sese res offerunt, quibus suam narrationem petentibus, servato brevitatis instituto, satisfacere pergimus. Hic Joannes Vitellius Alexandrinus Patriarcha & Cardinalis & legatus, & patrimonii B. Petri gubernator, & ductor apostolici exercitus, qui Fulginates, qui Camerinos tyrannos, qui præfectum urbis, qui comitem Antonium Picinimum, qui plures alios ecclesiæ insultantes bello victos neci dederat, dum Pontem Tyberis, quem S. Angelus vocant, transire nititur, in Hetruriam copias traducturus, ab his qui molem Adriani custodiebant, repente invalus, vulneratus captusque in arcem rapitur, ubi paucis post diebus sive hausto veneno, sive ex vulnere vitam finivit. Provinciam deinde suam sortitus est Ludovicus, & ipse Cardinalis, Aquilegiensis patriarcha, jam rebus gestis & amicitia Pontificis latè cognitus, qui pacatis in urbe rebus, Eugenio reditum præparavit. Comprehenderant Romani Eugenum, ac libertatem asserentes, apud S. Mariam in Translybernia regione custodiebant, eumque cum deceptis custodibus per Tyberim navigio fugeret, jaculis ac sagittis petierant. Fremebat enim populus cum externus miles infestis armis Romanos vastaret, agros, homines atque armenta surripiens. Sed cum pluribus annis Eugenus abfuisset, intellexerant & opulenti cives & inopes Romani sine Pontificis cura, non tam urbem quam vastam ac desertam speluncam videri, quibus ex rebus, missis ad eum legatis, ut in urbem suam rediret, magnis precibus rogavere. Rediit ille nono postquam effugerat anno. Nec tam ignominiosè pulsus fuerat, quam exceptus est gloriosè. Fuit cum Francisco Sfortia, & in Piceno, de quo postea dicemus, & in aliis locis periculosum bellum, quod per Ludovicum Cardinalem, & Nicolaum Picinimum jam sibi reconciliatum consecit, Alphonso rege opem ferente. Cogitaverat Franciscus Sfortia Tudertiam



nam urbem sibi amicam, (nam ejus aliquando potius clementi cives imperio rexerat) deinde Romam cum exercitu petere. Erant enim inter Cardinales nonnulli qui Ludovici potentiam indignantes, Franciscum non quasi adversus Eugenium, sed contra ejus consilium invitabant, inter quos Nicolaum Capuensem in urbe gratiosum ac potentem fuisse commemorant. Nam Eugenius per id tempus eum de ipsa re suspectum Roma amovendum curavit, sed cum auxilia ecclesiae propere advenissent, Franciscus irritum proposito retrocessit. Eugenius verò, qui quondam Venetis ac Florentinis studiosissimus fuisset, cum illi hostem suum Franciscum adversus ecclesiam armis pecuniisque juvarent, & ipse ad eorum hostes declinavit Alphonsum regem ac Mediolanensem principem. Et rex quidem ejus svasu usque Tiburem venerat, Philippo, cujus opes jam penè collapsae videbantur, laturus opem, aut in Tusciam contra Florentinos, aut in Galliam contra Venetos profecturus. Sed Eugenius cum quatuor Cardinales creasset, ex quibus successorem suum assumendum esse prädixerat, in lectulo agritudinis jacens, paucis post diebus migravit ad patres, & in Basilica beati Petri apud Eugenium tertium sepultus est. Prius tamen quam obiret, Germani, qui postquam duos de summo pontifice contendere animadverterant, neutralitate quadam utentes, utrique recusaverant obedire, destinatis Romam legatis (inter quos & ego unus eram à Frederico imperatore missus) obedientiam ei jamjam morituro restituerunt. Ipse verò Theodericum Colonensem & Jacobum Treverensem Archiepiscopos, quos pontificali dignitate privaverat, mutata sententia ad pristinos reduxit honores. Magnus profecto & clarus Pontifex fuit Eugenius, contempsit pecunias, virtutem apprimè dilexit, neque secundis rebus intumuit, neque succubuit adversis, neque spes ei gaudium, neque metus tristitiam auxit, sedatus animus, eundem semper ejus vultum ostendit, sermone brevi, eoque gravissimo usus est. Durus & asper in hostes, promptior in fidem receptis. Ad haec proceritas corporis, oris decor, & veneranda in senem majestas. Quibus fidem adhibuit, plus aliquanto credidit, & majus imperium, quam par fuerat, commisit. Hujus pater cum in Ægypto negotiaretur, cum patre Francisci Foscari (de quo jam mentio facta est) ab eremita, quem pariter sciscitandum adorati sunt, non minus lætum vaticinium quam ille accepit. Ille enim filium, quem habebat, futurum patriae



principem, hic suum inter sacerdotes ad summum evasurum didicerat. Eugenio verò Gabrieli nomen in baptismo inditum fuit, qui cum adolevisset, conditis parentibus, Evangelii non surdus auditor, patrimonium quod ab illis non tenuè acceperat, inter Christi pauperes erogavit. Exin Antonio Corario comite ejusdem fervoris adolecente religionem intravit, in qua summa cum laude versatus, tandem cum illo vixit, donec Angelus Corario Gregorius tertiusdecimus appellatus, sedem Petri sortitus, cum alter ab altero separari non posset, ambos ad se vocans: Genuensium, Bononiensium Antonium præfecit ecclesiæ, nec diu moratus, utrumque Cardinalatus honore dignatus est, in quo ambo claruerunt. Sed hic summum pontificatum adeptus, magis enituit, qui etsi oriente schismate in principio sui pontificatus, usque ad obitum cum Basiliensibus contenderit, coronato tamen Sigismundo Cæsare, Græcorum & Armeniorum peracta cum ecclesiâ Latina unione, civitatibus ecclesiæ (quas amiserat) recuperatis, tyrannis per circuitum deletis, contumacia Romanorum edomita, victor inclytus, hominem exiit. Hic me, quamvis aliquando adversus eum, existimans Deo sacrificium facere, cum Basiliensibus sensissem (nam meo tempore tota nutabat ecclesiâ) venientem ad se benignè recepit, inter secretarios collocavit, & apostolici subdiaconatus honore donavit. Ecclesiam quoque Tergestinam paucis diebus antequàm moreretur, cum falso rumore vacantem audisset, multis illam petentibus, mihi uni ex omnibus destinavit, quod postea successor ejus implevit.

Nicolaus quintus natione Tuscanus ex oppido Sarzana, patre medico, theologica doctrina illustris, & omni fere scientiarum genere insignis, post Eugenium in Petri cathedram suffectus est, qui paucis ante mensibus Cardinalatum ab eo, cum felicem apud Germanos legationem obiisset, nec diu prius episcopatum Bononiensem acceperat. Hic urbem Romam multis ac maximis ædificiis mirum in modum exornavit, cujus opera si compleri potuissent, nulli veterum imperatorum magnificentia cessura videbantur, sed jacent adhuc ædificia sicut ruinæ murorum ingentes. Schisma, quod apud Sabaudios adhuc in ecclesiâ vigeat, explosit. Amedeum Papatui renuntiantem, in gratiam recepit, Cardinalatus in paterno dominio legationem reliquit. Cardinalibus aliquot ab eo creatis, dignitatem dimisit.

Roma-



Romanos longa pace ditavit. Jubilæum feliciter gessit, nisi quod in ponte sancti Angeli ex concursione populorum improvide facta, ducentos circiter homines aut conculcatos, aut in flumine ejectos perisse constat. Bernardinum Senensem ordinis minorum professorem, qui paulo ante obierat, in numerum sanctorum retulit. Fredericum tertium imperatorem, & Leonoram Augustam matrimonio junxit, ac de more junctos coronavit, eorum familias abunde & multa cum laude pascens. Bis Cardinales creavit, & primo quidem unum tantum Antonium natione Majoricensem, ad titulum sancti Chrysogoni, quem sibi philosophiæ studiis & arcanorum sacre theologiæ cognitione ex omnibus parem eligeret. Secundo sex creavit, aut doctrina percelebres, aut generis claritate insignes. Inter quos & germanum suum Philippum sanctæ Susannæ Cardinalem assumpsit, placidis moribus & incorruptæ fidei virum. Libros ex tota Græcia perquisitos, ad se jussit asferri, & in latinam converti linguam curavit, magna præmia tralatoribus præbens. Acceptissimi ei fuerunt in transferendis operibus Georgius Trapezuntius, Laurentius Valla, Petrus Candidus Decem-ber, & Georgius Castellanus. Item Demetrius natione Græcus, qui soluta oratione utentes, cum pontificis aures mirifice oblectarent, nihil ex eo quod peterent, non abstulerunt. In Homeri verò poemate, quod Heroico carmine Latinum fieri magnopere cupiebat, cum plurimi morem ei gerere conarentur, unus tantum inventus est, qui acri ejus judicio satisfaceret: Horatius Romanus, qui scribatum apostolicum ea de re consecutus, magnis pollicitationibus illectus, Iliadem aggressus, nonnullos ex ea libros Latinos fecit dignos, quos nostra miraretur, prisca non improbasset ætas. Nicolaus quoque Perottus, Polybio è Græcis commode atque ornate ad nos traducto: Joannes Tortellius Aretinus, libro de orthographia peritissime conscripto: Albertus Florentinus, conditis de architectura egregiis voluminibus, aliiqve pene innumerabiles nova cudentes opera, ejus Pontificis gratiam meruere. Adeo enim ingenia excitavit fovitqve Nicolaus, ut vix ævum inveniri possit, quo magis humanitatis & eloquentiæ, cæterarumqve bonarum artium studia, quam suo tempore flourerint. Illud certe nemo negaverit, tot ei à doctissimis viris inscripta esse volumina, quot neque suorum prædecessorum, neque imperatorum cujuscumque nomini dicata comperimus. Unum tamen



è doctis ab eo neglectum miramur Blondum Flavium Foroliviensem, qui res à declinatione Romani imperii, usque ad aetatem nostram toto orbe patratas, mirabili ordine in tres digessit Decadas. Romam describendo instauravit, Italiam illustravit, deinde triumphantem urbem scribere adorsus, omnem nobis vetustatem aperuit. Sed ita fuerunt hominum mores: nam perraro quemquam extollit pontifex, quem praecessor amavit. Ceterum Nicolaus & veteribus & novis codicibus ornatissimam bibliothecam instruxit, in qua circiter tria millia librorum volumina condidit. Sacrarium apostolicum vasis aureis atque argenteis, sacerdotalibus indumentis mirifice decoravit, altaris ornamenta, aulea quoque ex auro contexta mirandi operis coëmit, suppellectilem toto palatio necessariam magnificentissime comparatam duplicavit triplicavitque. Legationibus, quas publice audivit, ita respondit, ut dubium esset sapientiam ejus aut eloquentiam magis admirere. Si quos esse in urbe peregrinos existimatione dignos accepit, contestim eos missis xeniis honoravit, nobiles domo sua extorres, qui ad se venerant, benigne confovit, pauperibus Christi largas elemosynas dedit. Religiosis mendicantibus nihil ad necessitatem deesse sustinuit, in aedes sacras urbis plurima dona contulit. In patrimonio beati Petri plurimas ac munitissimas arces opportunis locis erexit. Hujus tamen tam admirabilis, tam expetendae pontificis vitae non defuerunt insidiatores. Stephanus enim Romanus familia Porcaria tenui censu eqves, res novas saepe in urbe molitus, ac propterea Bononiae relegatus, clam inde excedens magnis itineribus Romanam rediit, convocatisque mox amicis, mentem suam exposuit, *turpe esse dictitans, eam urbem quae totum sibi subjecerit orbem, nunc sacerdotum imperio subjacere, quos rectius feminas quam viros quisque appellaverit. Venisse se paratum patria jugum excutere, rem factu facilem si viri fuerint. Nicolaum pontificem celebri epiphaniarum die in aede beati Pauli sacra facturum, haud magno negotio comprehendi posse, populum libertatis amore, quam proclamari audierit, mox opem audentibus daturum.* Ad colligandum autem praesulem catenam auream secum attulit, à se jampridem paratam quam congregatis ostendit. Neque enim mox occidendum praesulem ex usu esse dicebat, sed observandum donec arcem sancti Angeli per eum recuperarent, atque ut erat homo facundus, facile in suam sententiam congregatos traxit, atque eò facilius, quod inopes are alieno



alieno gravatos & ob patrata scelera iudicium formidantes, ad se vocaverat, quibus nihil erat in pace sperandum. Sed praesensit insidias Nicolaus, missisque militibus, comprehendi hominem iussit. Illi eum jam animo fractum, & apud sororem in arca latentem invenerunt. Complices ejus in domo, quae convenerant, expugnati captique sunt, & quibus unus Baptista Sciara manu promptus, & animo intrepido, per medias pontificis cohortes viam gladio sibi aperiens effugit. Stephanus in arce sancti Angeli, alii in Capitolio suspensi vitam finire, atque ita Pontifex Max. ingenti periculo liberatus, Romanae sedis dignitatem imperiumque servavit: felix Pontifex & omnium iudicio beatissimus, nisi eo sedente, Turcae (ut antea diximus) Constantinopolim, expugnassent, Christianorum desidia atque ignavia memorabile perpetuum. Accessit & aliud, quod non parum ejus gloriam imminuit. Nam cum pacis Italiae (quae tum vehementer ferro vastabatur & igne) ipse repertor & arbiter concordiae partium voto delectus esset, dum diem ex die in deliberationem ducit, suspectus esse Francisco Sfortiae jam Mediolanensium principi ac Venetis coepit, tanquam eam sententiam promovere nollet, quae aliis pacem, ecclesiae bellum allatura videretur: ob quam rem, intercedente Simoneto monacho ordinis eremitarum sancti Augustini professore, obscuri antea nominis & prorsus ignoti, sed vitae integritate probato, Veneti cum Francisco duce convenientes, inter se concordiae leges dixerunt, praestituta die intra quam bello socii pacem ratam haberent. Visum est id omnibus monstri simile, humilem & incognitum monachum Italiam pacavisse. Sed recusante Alphonso pacem, quae sibi inscio dicta erat, vanam esse Nicolaus, quae de se habita fuerat, suspicionem ostendit, misso ad Alphonsum legato Dominico sanctae Crucis Cardinali, prudentia singulari & vitae integritate conspicuo, qui cum Cajetam deinde Neapolim pervenisset, intervenientibus Venetorum & aliarum partium legatis, differentiisque omnibus tanquam ex integro discussis, Alphonso regi non solum pacem suavit, sed foedus in annos quinque & viginti inter omnes Italiae potentatus percussit, cujus Rom. pontifex & conservator & iudex dictus est. Sed cum doloribus arthriticis per omnem ferme pontificatum suum Nicolaus vehementer laborans, indies magis ac magis opprimeretur, nec jam amplius mortalem pollutumque comitatum candidior anima dignaretur, & vita decessit. Ab eo quae mihi ponti-



pontifex Eugenius munera crediderat, non solum confirmata sunt, sed amplius pontificalis dignitas adjecta, Tei gestinaqve primum ecclesia, deinde Senensis commissa.

Calixtus tertius post eum beati Petri cathedram obtinuit, natione Hlīpanus, ex regno Valentia nobili genere natus, unus omnium qui suo tempore scientiam juris profiterentur, eminentissimus, & qui consilium regis Alphonsi in quo multis annis præsederat, illiusqve artes ac cautiones præ se ferret. Is ut primum pontificatus apicem adeptus est, mox animum ad delendam Turcarum & legem & gentem convertit, votumqve vovit. Ad eam rem solennes misit in Galliam, in Hungariam, in Orientem legatos, primarios sanctæ ecclesiæ Cardinales, è quibus nullus adhuc rediit. Alanum tamen Cardinalem sanctæ Braxedis, magno ingenio virum, & animo securo & potenti, propediem è Gallia reversurum putant. Navaliam, quod antea inauditum fuerat, Romæ constituit: triremes, quas plures ad ripam Tyberis in civitate Leonina paravit, armavit, & in Turcas misit. Comitum Jacobum Picininum Senensibus (ut dictum est) armis insultantem, missio milite suo repressit. Regi Alphonso quærenti ex eo, quo pacto invicem victuri essent, *regna sua respondit ipse regat, mihi summi apostolatus gubernationem relinquat.* Veras eorum multis de rebus dissensiones, magna pars Italiæ simultates confictas esse credidit: qui fidem dedere contentioni, alii Calixtum, alii Alphonsum, alii utrumque accusavere. Quorum alter regem, sub quo natus esset, alter suum sacerdotem, cui tanquam vicario Dei parendum est, ferre non posset. Bis Cardinales à Calixto creati sunt, primo tres, ex quibus duo nepotes ejus fuere, quorum etsi fuit ætas aliquanto minor quam tanta dignitas videretur exposcere, doctrina tamen & circumspectio & morum suavitas id honoris haud injuria consecuta censetur. Tertius fuit Jacobus de Portugallia, regio sanguine natus, in quo ea modestia, ea gravitas, id acumen ingenii, id studium literarum, is amor virtutis emicuit, ut quamvis juvenis adhuc, tardius tamen opinione omnium ad eam dignitatem ascenderit. Secundo loco sex assumpti sunt, haud profecto indignissimi (unum demas) tanto munere. Meo tamen judicio nulli dignius id honoris obvenit, quam Joanni episcopo Zamorensi, civilis sapientiæ cognitione sublimi, qui uno de quadraginta annis Romanam secutus curiam, per omnia ferme officia castus



castus & innoxius transierat, cancellariam verò, quæ à tempore Nicolai vacaverat, Calixtus nepoti suo sancti Nicolai in carcere Tulliano Cardinali ac Marchiæ legato commisit. Germanum ejus Petrum Borgiam egregia specie atque indole juvenem ecclesiasticæ militiæ ducem præfecit, ex in præfecturam urbis ei commisit. Ludovico Cardinali sanctorum quatuor coronatorum, & ipsi quoque nepoti legationem Bononiensem demandavit. Vincentium natione Hispanum, & Osmundum Anglum miraculorum fama illustres inter sanctos redegit. Legatos in Scythiam, Persidem & in Æthiopiam misit, qui Christianos per orientem in fide continerent, & adversus religionis hostes armarent. Scanderbechio in Albania, multisque aliis per Græciam Turcarum bello laborantibus, pecuniaria subsidia largitus est. Transfigurationis dominicæ festum instituit, & celebrari publicè iussit. Assumptionem suam, priusquam Pontifex Max. eligeretur, pluribus annis prædixit: cladem quoque, quam Turcæ apud Albam in Hungaria sustinuerunt, antequam fieret, vaticinatus est: nunc quoque de futuris multa & magna promittit, quæ divina pietas non abnuat velim. Mortuo Joanne comite Taliacorio, qui è prosapia Ursinorum fuit, cum mascula ei soboles nulla esset, Ursini hæreditatem ejus propinquitatis jure ad se traxerunt. Id ægrè tulit comes Eversus, cujus filio nupta esset unica Joannis filia: ventum est ad arma. Columnenses comiti Everso auxilium præbuere: deinde hortante pontifice, Prosper Cardinalis Martini quinti Romani quondam sapientissimi & felicissimi Papæ nepos, ejus gentis honoratissimus, & literarum studio latè clarus, cognationem suam bello subtraxit. Inter Ursinos & Eversum usque impacatæ durant inimiciæ. Latinus sanctorum Joannis & Pauli Cardinalis illustris, Ursinorum familiæ princeps, dexterrimo vir ingenio, juris scientia & animo, qui alta curret, parva despiciat, insignis, ex urbe profectus ad oppida sua concessit, tanquam Romæ non se satis tutum existimaret, sive comitis insidias veritus, sive Pontificis indignatione commotus, nec revocatus in hanc usque diem reverti voluit. Calixto inter omnes Cardinales duo ad hoc usque tempus, imprimis auditi atque accepti fuerunt. Gvilielmus Rothomagensis, amœno ingenio, & affinitate sanguinis clarus, ac Petrus sancti Marci, Eugenii quarti nepos, patritia apud Venetos gente natus, & industria potens, sive quod eorum consiliis multum inesse



crederet, siue quod alterum Franciæ regnum, alterum Venetorum rempublicam ducere arbitratus est. Simonem Romanæ philosophiæ studiis, & arte medica excellentem adeo dilexit, ut fratrem ejus Jacobum episcopum Ferretanum, quancquam virtute præstantem, sua potissimum consideratione rubeo galero donaverit. In audiendis legationibus privatorumque hominum causis, antecessorum suorum facilitatem longe superavit, epistolas & regibus & amicis per seipsum dictavit. In signandis supplicationibus libens & hilaris tempus absumpsit: de jure interrogatus, percupide respondit: leges & canones tam ei fuerunt in promptu, quam si heri aut nudius tertius scholam juris primum exivisset: nihil enim memoria sua excidit, quod retinendum existimavit. Cæterum nulla facultas ei juris cognitione, prior visa est, in qua ipse ita excelluit, ut suorum prædecessorum, qui sibi possit æquari, vix unus & alter inveniatur. Hic postquam ordini Cardinalium se inscripsit, Varmiensē quoque ecclesiam ad mare Baltheum inter Sarmatas sitam postulantibus canonicis commendavit. Cujus possessionem, frementibus ea in regione crudelibus & atrocissimis bellis, nondum assequi potui.

## CAP. LX.

*De Umbria & Piceno & diversis in eis bellis  
à variis ducibus confectis.*

**I**N Umbria, quæ hoc tempore sub ducatu Spoletano continetur, paucae civitates intestinis seditionibus caruerunt. Nursia Quinti Sertorii quondam patria, Gvelforum partium insidiis sæpius agitata, vix tandem respirare potuit. Narnia, quam sulphureo gurgite conditus amnis circuit, ancipiti vix adeunda jugo, Gibellinorum factione depressa Gvelforum consilio & ductu quiescit: non Amerinis, non Reatinis, non Fulginatibus, non Ortanis, non ipsis denique Spoletanis suæ calamitates defuerunt. Sed Asisina civitas omnium miserior inventa est, quæ, dum modò Brachianam, modò Sfortianam factionem admittit, & nunc partem quæ superior, modo alteram quæ inferior amplectitur, se procellis fortunæ quatiendam prostituit. Picentium regionem,



gionem, quam nostra ætas Marchiam vocat, Franciscus vice comes Eugenio quarto Pontifici Maximo tum rebus Basiliensibus occupato, ac non solum Philippi Mariæ, sed Alphonsi quoque regis inimicitiiis implicito, una quodammodo excursionem ademit, nonnullisque post annis continuata possessione retinuit. Interim captus amore puellæ, quæ inter virgines conjugii suæ serviebat, & sibi multarum molestiarum, & illi necis causa fuit. Perpetua ea vocata est, apud Novarienses honestis parentibus orta, forma egregia, & ingenuis moribus, nisi potentis domini decepta blanditiis, virginitatem cum adulterio permittisset. Hæc cum jam paulatim intumesceret uterus, ad tegendum facinus quæsito, qui eam duceret, viro despondetur: constituta nuptiarum die, vocatis amicis, apparato grandi convivio, sponsus in oppido (quod à Francisci curia non longe inhabitabat) lætus adventum novæ nuptiæ præstolabatur: ducitur illa multis comitata nobilibus. Sed ingressa oppidum, cum descendere in domo sponsi crederetur, iussa ulterius pergere, in arcem rapta est, nec ulterius infelici viro videntæ sponsæ copia fuit. Quod cum Blanca Francisci conjunx cordatissima mulier cognovisset, nunquam deinde quievit, donec immixtis percussoribus puellam quamvis diligenter custoditam interfecit. Franciscus ea re valde commotus, uxoris tamen iusto dolori censuit ignoscendum. Exin Pontifex Eugenius jam Philippo Regique conciliatus, Nicolaum Picinum cum exercitu adversus Franciscum misit, regemque ut item in Marchiam duceret, adhortatus est. Annuuit Alphonsus, delectuque militum habito, cum florentissimis equitum pedumque copiis Picinum pervenit, junctisque apud Bisium cum Picinino castris, eoque totius exercitus duce constituto, conterritos oppidanos in deditionem ecclesiæ compulit: quorum exemplum & sancti Severini incolæ secuti, claves portarum misere. Quæ cum Franciscus accepisset, copiis suis per munitiora provinciæ oppida distributis, protrahere bellum è re sua arbitratus est. Exin cum Petrus Brunorus è copiarum suarum ductoribus, cum octingentis equitibus ad regem transisset, Macerateses verò ac Colentinales deditionem ecclesiæ fecissent, consentientibus Venetis ac Florentinis, redire se in gratiam Philippi ducis Mediolani, ut regis impetum evaderet, amicis interpositis simulavit: credidit Philippus, literisque ac nunciis, uti copias in regnum reduceret, Alphonsum frustra rogavit. Turpe enim



regi videbatur invito Eugenio rem infectam relinqui: perseveravit, igitur atque acrius instans, Cingulum oppidum in deditionem ecclesiæ recepit, castrum planum vi captum militi diripiendum dedit, nec territus est, quamvis Philippus ea re commotus, pacem cum Venetis ac Florentinis fecisset. Sed Æsim cum exercitu petens, Troilum copiarum ducem, cui Franciscus maximè fidebat, (nam & multos annos in equitatu suo primos ordines duxerat, & sororem ejus in uxorem receperat) tradita civitate sese dedentem in comitatum suum recepit: deinde Roccham Contratam cum defendente Roberto Francisci nepote pluribus diebus frustra oppugnasset, ad Metaurum amnem supra Fortunæ sanum, quo se Franciscus cum reliquo equitatu receperat, continuato itinere duxit. Ibi ad Alphonsum tubicen quidam à Francisco in castra venit, impetrataque à rege pro sui ordinis more liberius loquendi venia, multa nefaria in Nicolaum præsentem Francisci nomine probra congeffit, *proditorem ac perfidum appellans*, regemque admonens, *ne illi se credat, cui fallere potissimum sit*. Postremo Nicolaum Francisci verbis, ad duellum provocavit. In quo duces ipsi, eorumque quædam copiarum de gloria, de dignitate certarent, apparituram quidem uno prælio ducum simul atque equitum virtutem, simul à rege petiit, ut æquus spectator pugnae adesset. Nicolaus jam inde ab initio ea audiens, commotus, haud levioribus conviciis in Franciscum absentem coniectis, fidem suam multis exemplis comprobans, *agre sibi esse respondit, corpus suum vulnere in cervice recepto debilitatum fuisse, ostensurum se singulari certamine, uter eorum proditoris infamia censendus esset, nisi hanc fortuna sibi facultatem abstulisset, oblatam tamen pugnandi cum exercitibus conditionem, læto se animo cum bona regis venia accipere, postero die cum copiis suis sub ipsam urbem Fanum patenti campo futurum*: quod cum à se postulare Nicolaum decori tuendi causa rex animadverteret, utriusque partis securitati sese consulturum recepit. Sed cum dicta die Nicolaus in campum cum suis processisset, atque insultans urbis mœnibus usque ad portas occurrisset, rex verò procul inde ad mille passus cum exercitu confedisset, liberum utrique parti præstaturus campum: Franciscus sive regi parum fidens, sive gloriam suam, de qua per id tempus haud dubie jactabatur, in discrimen adducere veritus, intra urbem suos continuit. Magna inter Franciscum & Nicolaum non æmulatio modo vixit ob



rei militaris gloriam, cuius primas parteis sibi uterque arrogabat, verum & simulas ingens ob veteres inimicitias, quæ olim inter Brachium & Sfortiam fuerant, quorum alter Francisco pater, alter Nicolao Magister ac dux fuerat: atque idcirco, non tantum ut hostes, sed ut inimici inter se bellum gerebant, nec sub uno eodemque principe ut militarent, adduci poterant. Nicolaus ex corporis brevitatem Picinini nomen accepit, sed quanto mediocritate statura ejus inferior, tanto animi magnitudo superior. Pauca ei verba fuerunt, atque parum compta, sed quæ multarum ac magnarum rerum sententiam comprehenderent. In milites suos indulgens, in amicos liberalis, in hostes durus & asper, dimicandi cupidus, quietis impatiens, gloriæ avidus, & in periculis obeundis promptus ac securus, prælium ex occasione protinus sumpsit: hostem celeritate prævenit, excursionem fatigavit, levis armaturæ equite magis quam pedite utebatur, fortes atque asperos milites amavit, hostium numero deterreri non potuit, diligens & expeditus in exercitu ductando semper visus fuit. Quibus rebus cum plurimos & in Gallia Cisalpina, & in reliqua Italia triumphos ex hoste duxisset, haud dubie rerum gestarum magnitudine, & gloria magistro suo Brachio major evasit. Franciscus autem honesto corpore fuit, & quod mediocritatem non parum excederet, amplo pectore, robustis membris & apte dispositis, facie grata, jocundis oculis, calvitie venerabilis, facundia copiosus, ingenio peracri, animo rerum magnarum cupido. Solers in administrandis rebus, in laboribus perferendis infatigabilis, in occasionibus prospiciendis acutus & sagax, in hostibus fallendis versutus & faver, in prælagiendis evitandisque dolis, ad hostium consilium prævertendum cautus atque providus. Denique ipse in omnibus rebus gerendis adeo aptus, dexter & absolutus extitit, ut ejus veram integritatem sufficienter dicere posse, homini etiam dicendi peritissimo facile videatur minimè. Raro, nisi ex destinato confligit, hostem sæpius obsidendo quam decertando confregit. Peditatum magno in precio habuit. Argento atque auro cultos esse milites voluit. In exequendis consiliis celer ac perseverans, ita ut in rebus quas aggrediebatur, sæpius se virum prudentissimum ostenderit. In omni re novanda præsentia animi, laborum tolerantia, usu, exercitatione, consilio mirificè instructus, quibus artibus brevi adeo magnus effectus est, ut unus ex omnibus copiarum



ducibus inventus sit, qui cum Nicolao de rei militaris principatu concertare possit. Nam cum scientia rei militaris atque auctoritate pares viderentur, diu dubium fuit, uter alteri anteponendus esset. Sed hanc litem, fugatus paulò post Nicolai exercitus, & ingens victoriarum Francisci cursus, & Mediolanensium fortuna in eum pleno cornu tralata, prorsus diremit. Cæterum Fani expugnationem cum Rex difficillimam intelligeret, non Francisci solum magni & peritissimi ducis præsentia defensi, verum quod etiam urbs mari adjacens claudi, ne commeatus intrarent, haud quaquam potuit. Inde abiens in Firmannum duxit, quo in loco cum Alexander Francisci frater eruptione facta, postremum agmen ejus invaderet, conversis in eum signis hostem intra urbem repulit, atroci pugna pro muris facta, & antemurali quod pro vallo stabat, vi capto. Deinde ad turrim palmarum composito agmine pervenienti, Francisci epistola reddita est nuntio intercepta, quæ Troilo ac Petro Brunoro inscripta, inter cætera ea verba continebat, *ne amplius differentes jam tandem cogitata mutarent.* Quapropter ambos de proditione suspectos, armis equisque & omni quantumvis magna suppellectile privatos in vincula conjectos, in Arragoniam misit, & in arce Satabia Valentini agri custodiri mandavit. Nec diu postea, cum Temaritani deditionem fecissent, in regnum suum divertit, duobus millibus equitum ad Picininum, qui ad montem aureum cum exercitu extiterat, transmissis. Sed postquam illi adventassent, Picininus repentino Francisci adventu invasus, prælio susus pulsusque fuerat. Clivus, in quo castra posita erant, & oppidum, proximum dissipatos fuga servavit. Franciscus ea victoria simul & profectioe regis elatus, Picenum undique veluti victor percurrere & infestare cœpit. Rogatus ab Eugenio Alphonsus eò reverti, cum jam se itineri accinxisset, novis regni motibus domi retentus, Lupum Virreum, Ursinum, Carliamque cum non parvis copiis adversus Sfortiam misit. Interea Nicolaus Picininus à Philippo in Galliam revocatus Franciscum filium cum parte copiarum in Piceno dimiserat, quem Sfortia ad montem Ulmum prius pugna superatum interceptit, quam regis auxilia ei advenissent. Post hæc Ludovicus Aquilejensis Patriarcha eam provinciam ab Eugenio sortitus, Joannem Vintimiliū inter belli duces famam præstantem, cum magna equitum pedumque manu à rege missum omnibus copiis suis præfecit. Cujus industria



dustria Aufidum oppidum obsidione clausum, in deditionem accepit. Erant eo tempore non parvæ Philippi copiæ apud Cingulum oppidum contra Franciscum missæ. Nam Philippus cum Francisci reconciliationem jam tandem simulatam intellexisset, Italianum Forlanum in rebus bellicis latè cognitum, qui Pontificis partes adjuvaret, eò transmiserat. Cui cum Patriarcha & Vintimilius per rectam viam, conjungi non possent, nam media loca Franciscus obtinebat, magnis itineribus per montana ad eum pervenere: quo cognito Franciscus è Piceno descendens, in Urbinatem agrum se recepit. Patriarcha, montem Melonem obsedit atque obtinuit. Deinde oppidum sancti Angelii vi expugnans, diripiendum militi dedit. Vintimilius paulò post ab eo in regnum ad hyberna recedens, per agrum Firmianum non procul à Monte sancto constitit. Cujus adventu conterriti oppidani, emissis oratoribus deditionem fecere: similiter circumjecta castella. Deinde ad montem altum profectus, dies aliquot ibi mansit. Interim Firmiani conjuratione facta, spe propinqui auxilii à Francisco defecerunt. Alexandro fratre cum magna equitatus parte in arcem compulso, quibus & Vintimilius & Pontificis copiæ mox auxilium præbuere. Sed cum arx ejuscemodi esset, ut sola fame vinci posset, præmunitis urbis partibus, ne descensus ex arce fieret, Vintimilius uti constituerat, in hyberna concessit. Sequenti anno Alphonfus Remundum Buillum, & cum eo mille equites, & totidem pedites ad Patriarcham in Picenum misit. Qui ubi cum Jacobo Caynano in ecclesiæ castra pervenit, mox Italianus Forlanus mandante Philippo Maria comprehensus est, ac postriduo jussu Patriarchæ apud Roccham Contratam securi percussus. Montem fabrum deinde cepere, & aliquot Castella Frederico Urbinatium principi eripuerunt. Sed cum jam, duo millia equitum à Florentinis ac Venetis missa, Francisci exercitum auxissent, Philippus verò, exercitu suo ad Casale majus juxta flumen Padum à Venetis pugna fuso ac castris exuto, copias suas è Piceno revocasset, & amplius Eugenii ac regis auxilia postulasset, ad quem duo millia & quingenti equites ex castris ecclesiæ jubente Pontifice transferunt, Franciscus jam bello superior, Montem aureum, & alterum ei proximum castellum Sigismundi Malatestæ, (qui jam ab eo defecerat, ecclesiæ fortunam secutus) expugnavit, & ejusdem oppidum Gradariam obsedit. Interim Rex alia Patriarchæ auxilia misit, cum quibus



quibus in Picenum reversus Jacobum Caynanum proditoris suspectum apud Roccham Contratam, ubi Italianum Forlanum interfici jusserat, capitali supplicio affecit. Exin nihil memoria dignum ab eo gestum, donec Franciscus Philippo reconciliatus, illius stipendia facturus, & jam dux contra Venetos designatus, ex Piceno recessit. Nam postea non solum arx Firmiana, sed omnis ferme provincia in ejus potestatem facta est.

## CAP. LXI.

*De Josia duce Asculano.*

**I**N Asculo Josias nobilibus ortus parentibus admodum adolescens, Joannem Francisci Sfortiæ fratrem magno animo juvenem, & qui eam urbem per omne belli tempus egregie defendisset, conspiratione cum paucis inita incautum obruncavit. Sed cum & ipse tyrannum in patria gereret, in exilium actus est. Civitas deinde sub ecclesia quievit, quamvis anno abhinc superiore idem Josias arcem, quandam naturali situ munitam & urbi propinquam, cum plerisque latronibus occupans, non parvas curas illi populo ingesserat: quæ res ei parum prosperè processit. Nam Rodericus sancti Nicolai Cardinalis, ejus provinciæ legatus, obsidionem loco admovens postquam arce potitus est, captum ipsum victumque Romam misit.

## CAP. LXII.

*Quod apud Urbinates Dux Oddo, & protonotarius Carpensius propter suam in fœminas libidinem fuerunt interfecti.*

**I**N Urbino Dux gentis Oddo matre Columnnensi nobilissima natus, cum per libidinem in matronas nobiles debaccharetur, nec modum licentiæ faceret, populari tumultu interfectus est. Incensor nequitiae & adolescentiæ suæ corruptor, Protonotarius Carpensius, nobili genere ortus, sed ingenio pessimo, qui nuptis ac virginibus quamplu-



quamplurimis vim intulerat, qui per omnia scelera ad summam viti-  
 rum pervenerat, eadem nocte cum discipulo suo necatus, inexhausta  
 libidinis pœnas dedit. Cadaver ejus in forum delatum, defecta viri-  
 lia in ore mordicus tenuit. Guido pater Oddonis priusquam conju-  
 gem ex Columnensi familia duceret, cum proles ei nulla virilis esset,  
 anxius quoniam pacto in gente sua imperium propagaret, concubinam  
 ex se prægnantem assimulavit. Exin Bernardini Cardensis agnati sui,  
 præclari copiarum ducis filium, tum forte natum supponi pro suo  
 nutritique jussit, Frederici nomine indito. Sed conjugio deinde con-  
 tracto, cum filium legitimum sustulisset, conversa in eum cura Fre-  
 dericum adhuc puerum militiæ tradidit, in qua ille ad ætatem usque  
 virilem perseveravit. Deinde Oddone mortuo, vocatus à populo,  
 Urbinatum factus est princeps. Clarus vir & castrensibus disciplinis  
 apprime institutus, cui nec in administrandis rebus bellicis consilium,  
 nec in capeffendis periculis animus unquam defuit, nec verò factis  
 quam fide clarius, quæ quidem vel maximè patuit, cum bello Picenti  
 Franciscum Sfortiam, qui ad eum se receperat, fortunæ afflatu jam pe-  
 ne desertum, constantissimè juit ac fovit. Indignus profecto, qui  
 militari ludo dextrum perdiderit oculum.

## CAP. LXIII.

*De Sigismundo Maletesta Duce Ariminensi.*

**A** Pud Ariminum Æmiliæ urbem, Sigismundus Malatesta scele-  
 ribus insignis, imperium tenuit, qui cum Sfortiæ filiam ma-  
 trimonio sibi adjunxisset, partes ejus in Picenti bello aliquandiu  
 secutus est, deinde sub ecclesia stipendia fecit. Militavit in  
 Gallia contra Venetos, & in Tuscia contra regem Aragonum, quæ  
 res postea magno sibi detrimento fuit. Nam cum de pace Italiæ apud  
 Neapolim ageretur, Rex hujus injuriæ memor, cum qui sibi fidem  
 non servasset, extra communem pacem esse voluit. Deinde comi-  
 tem Jacobum Picininum, & Fredericum Urbinatum principem, cum  
 copiis in eum misit, qui aliquot ei non parvi nominis oppida abstule-  
 runt, ejusque agrum ferro & igne vastarunt. Ipse cum auxilia fru-



stra implorasset, ad extremum (quod unum salutis erat remedium) Alphonso, misso ad eum, reconciliari constituit, cujus nondum preces exaudita sunt, quamvis spem concordiae regis clementia non parvam effecit.

## CAP. LXIV.

*De Faventia & Fabriensis.*

**I**N Faventia mortuo Guidone Antonio, principatum frater ejus Nestor arripuit, qui Florentinis contra Regem militans, haud alia ratione quam Sigismundus ab Alphonso declaratus hostis, extra communem pacem factus est. Fabrienses, qui dudum tyrannide oppressi, necatis tandem quindecim ex familia, quæ principatum invaserat, fugientibus reliquis ad ecclesiae imperium redierant, multisque post annis in pace quieverant, hoc anno de rebellionem tentatos, seu suspectos cives aliquos in vincula adjecere. Exin tormentis ac quaestionibus prodito & expresso crimine, ultimo supplicio affecerunt.

## CAP. LXV.

*De Aquila Marforum urbe, ubi de divo Bernardino Senensi.*

**I**N Aquila Marforum urbe, apud quam memoria nostra Brachius Perulinus Dux belli formidatissimus, dum per anni temporis obli-  
dionem tenuisset, Martini quinti Pontificis Maximi ac felicissimi armis victus interiit. Divus Bernardinus Senensis, postquam Italiam omnem Christi nomen prædicando peragrasset, vitæ cursum peregit, eo in loco sepultus clarere miraculis affirmatur. Fuit autem Bernardino clara inter Senenses origo, nec vera est assertio eorum qui patriam illi Massam fuisse tradunt, quamvis pueritiæ suæ ibidem nonnulla rudimenta peregerit. Cæterum pater ac majores sui longa serie inter nobiles Senenses habiti sunt, ubi & ipse natus, & majori ex parte educatus, cum adolevisset, juri pontificio ediscendo operam dedit. Sed

cum



cum sepultis parentibus fallaces hujus mundi blanditias, & inania, ejus esse promissa animadvertisset, distributa inter Christi pauperes substantia, divi Francisci religionem ingressus, traditam sibi regulam exactissimè observavit: declinansqve majores conventus, eorum ductor ac magister effectus est, qvi fratres observantes appellantur. Maximum autem ei studium in edocendis populis fuit. Qvi cum esset facundia copiosus, & doctrina insignis, incredibili omnium attentione audiebatur, & quasi alter Paulus esset, vas electionis, in admiratione ac reverentia habitus. Tres eum populi sibi pontificem elegerunt, Urbinates, Ferrarienses, Senenses. Sed non fuit ei consilium, linguam, quæ toti posset Italiæ consulere, unam intra urbem concludere.

## CAP. LXVI.

*De Neapolitano regno, & multis præliis per Alphonsum Arragoniæ regem, & alios duces non paucos, in ipso regno Neapolitano, & aliis locis factis.*

**R**Egnum jam Neapolitanum ingressi, ad felices Alphonsi mirabilesqve rerum cursus stylum convertimus. Post bellum navale, quod ipse cum Genuensibus infeliciter gessit, tanquam cognovit fortuna suum errorem, quæ tanto principi molesta fuisset, novercale odium in maternum mutavit affectum, & quæ illi adversissima fuerat, secundissima facta est. Nam Philippus Mediolanensium princeps, ubi captivum regem ad se ductum, & se victorem longè minorem victo animadvertit, mox ex hoste factus amicus, liberum esse jussit, societateq; secum æquis conditionibus facta, magnis muneribus donatum à se dimisit. Isabella interea conjunx Renati Lotharingiæ ducis, qvi cum Alphonso de regno contendebat, & per id tempus in captivitate Philippi Burgundiæ ducis detinebatur, cum duobus parvis filiis Cajetam venerat, eaqve præsidio firmata, Neapolim se contulerat. Sed Petrus Arrago frater Alphonsi qvi ex bello navali cum paucis triremibus evaserat, reparata in Sicilia classe, præ-



ter spem invitatus ab altera factione Cajetanorum, nocte profectus ea, Cajetam obtinuit: & expulso hostium præsidio, suum imposuit, missis ad Alphonsum navibus, quæ illum ex portu Veneris adveherent. Appulit paulò post Cajetam in eisdem navibus Alphonso, deinde Capuam petiit, quæ licet medio tempore ab Isabella & Jacobutio Condola acriter oppugnata fuisset, virtute tamen Joannis Vintimilii ejus loci præfecti, in fide perstiterat. Ibi Remundus Nolanus regulus Alphonso reconciliatus est, & mox Scaphatum in insula Sarni situm, Castrumque maris in deditionem acceptum. Isabella, ubi se viribus Alphonso imparem esse cognovit, ab Eugenio Romano Pontifice auxilium petiit, qui Joannem Vitelliscum Patriarcham Alexandrinum cum tribus millibus equitum ac pari numero peditum ad eam misit: profectus in agrum Campanum Patriarcha, aliquot castella vi cepit, obsedissetque Capuam, nisi Joannes Vintimilius octingentos equites quos regina ad eum transmiserat, ex improvise invadens fudisset, cepissetque. Aggressus est tamen idem Patriarcha Joannem Antonium principem Tarentinum ad montem Fusculum, ac eum expugnatis vi castris captivum abduxit, eaque demum lege dimisit, *ut frater ejus quingentis equitibus stipendia Pontifici faceret.* Gerebat Patriarcha & Jacobutius Candola communi consilio, & amicis animis pro regina bellum, sed intervenientibus simultatibus copias separarunt. Interea duorum mensium induciæ inter Patriarcham & Alphonsum factæ, quibus durantibus, Patriarcha Jacobutio reconciliatus, junctis cum eo viribus prius opprimere Alphonsum statuit, quam reconciliationis ad eum notitia perveniret. Erat Alphonso apud vicum Julianum, tribus miliaribus ab Aversa securus in castris, cum sibi nunciatum est hostes rupto induciarum fœdere adventare, sibi que minimè tutum expectare impetum, ob quam rem sublatis signis, mox Capuam se recepit, non tamen absque damno suorum, qui postremum agmen duxere. Exin cum Patriarcha Aversam sibi ad inhabitandum tradi ab Isabella peteret, Jacobutius impediret, rursus inimiciæ inter eos subortæ sunt. Sed cum Tranenses excepta arce Alphonsum dominum appellassent, & arx oppugnari cœpisset, Patriarcha cum exercitu eo profectus obsidionem firmavit, cui & Jacobutius Candola ab Isabella rogatus, & Joannes Antonius Ursinus & multi alii se conjunxerunt, Firmata obsidione, cum Joannes Antonius haud ex ani-



mo bellum gerere crederetur, & naves regis adventare Tranensibus auxilio narraretur, veritus Patriarcha ne intercluderetur, cum parvo navigio ingressus mare tanquam pecunias ab Eugenio petiturus, in Picenum adnavigavit, deinde Romam se contulit. Milites ejus sine duce relictī ad Candolam se contulerunt. Arx deinde Alphonso dedita est, & Joannes Antonius ad eum rediit. Inter hæc Renatus è captivitate dimissus, cum decem triremibus Neapolim venit, & vocato ad se Jacobutio Candola, & ejus consilio Scaphatum petens, in deditionem accepit: deinde in Sulmonensem profectus, cum frustra urbem obsedisset, agrum vastavit incendio. Nec Alphonfus interea quiescebat, sed Albano ac Celano agro subactō ad Castrum vetus pervenerat, in valle Subletia situm, cui Renatus oblata pro militari more chirotheca prælium indixit: accepit Alphonfus, sed quæsit *singularine certamine, an collatis signis cum toto exercitu dimicandum esset, se ad utrumq; paratum esse*, cumqve Renatus respondisset, *universi certaminis cum toto exercitu fortunam se velle subire*, Alphonfus renunciavit placere id quidem. Sed quoniam veteri more ejus fuerit qui provocatur, diem & locum prælii dicere, se cum exercitu inter Acerras ac Nolam proficisci, quē campus lata planitie utrisque idoneus esset, ibiq; cum ad diem octavam præstolaturum. Hinc orta dissensione, cum Renatus locum, in quo Alphonfus esset, constituendum diceret, prælium impeditum est. Alphonfus in Nolanum perrexit. Renatus in eum locum, ubi Alphonfi fuerant castra, duxit exercitum, atqve ita suo satis honori iterum factum putavit. Exin Renatus in Pelignos ducens, Castrum vetus subegit. Alphonfus in vallem Cardinam profectus, Arparium oppidum vi coepit, Marinum Boffam vallis dominum captivavit, Casertinum regulum in fidem recepit. In Lucaniam ducens, oppidum Anglum obsidione fatigatum obtinuit. Nuceriam dedentibus oppidanis accepit. Jam 15. millia equitum in castris ejus erant, quibus fretus absente Renato Neapolim petens, cum Petro fratre binis castris urbem obsedit, decem triremibus in portu collocatis, oppugnatur urbs magnis viribus, nec cives seipsos negligunt. Sed dum Petrus paululum à castris speculandi gratia in littore vagatur, è Carmelitano templo caput tormento ictus, repente occubuit. Vir apud omnes ordines gratosus, ad rem militarem natus, animi magnitudine & corporis robore excellens, ad subeunda pericula impavidus, acer & manu prom-



ptus, cujus interira consternato exercitu ejus diei dimissa est oppugnatio. Alphonfus ubi germani jacere truncum cadaver infexit: *Ad hæc* (inquit) *ego te frater stipendia duxi, ut esses, qui mihi tuo sanguine, tuaq. nece regnum parares,* recondiq. loculo corpus jussit, & in arcem maritimam deportari, cui post tempora nactus idonea, dignum suo genere funus duceret. Sequentibus verò diebus cum oppugnatio repararetur, tanta vis imbrium cecidit, ut necessario ab obsidione discessum, & res in religionem sit versa. Exin Caynanum oppidum, tradente quodam milite, multis oppidanis occisis, ab Alphonso receptum est, & arx fame coacta in deditionem venit. Renatus interea ex Pelignis reversus Neapolim, ubi quæ acta fuerant didicit, turrinæ S. Vincentii opportunè in mari sitam, ad tutelam regiæ arcis vi expugnavit: deinde arcem ipsam pluribus diebus oppugnans, dedente præfecto, cui annona prorsus deerat, in potestatem suam accepit. Alphonfus verò cum frustra obsessis auxilium ferre conatus esset, in Lucanos trajiciens, Salernitanos totamq. ferme provinciam & Brutiorum multos in deditionem accepit. Jacobutius autem Candola præstanti ingenio, & à literarum studiis non abhorrens, atq. in primis rei militaris peritus, qui sub Bracchio stipendia fecerat, dum castellum quoddam Jacobi Lagunissæ oppugnare nititur, catarrhi profluvio correptus occidit, clarus profecto regulus, & ingenti laude dignus, si, quanta industria & rei bellicæ cognitio, tanta illi fides & in promisso constantia fuisset. Joannes Vintimilius & ipse per idem tempus Acerras prodentibus oppidanis, & arcem fame laborantem in potestatem recepit. Averfani quoque à Renato deficientes, Alphonsum intromisere, qui arcem apprime munitam, & forti præsidio defensam, cum expugnare facile non posset, fossatis ingentibus exclusit, & oppugnari quotidie jussit. Renatus ad Antonium Candolæ filium in Apuliam profectus, cum nihil propterea ab oppugnatione arcis Averisæ cessari animadverteret, per Candinam vallem, & deinde ab Alphonso qui occurrerat impeditus, per transversos montes, sequente Antonio, in Nolanum descendit: nec tamen obsessis apud Averfam opem ferre præsumpsit, cum Alphonfus in castris illic potentior videretur. Sed reversus Neapolim, Antonium Candolam de proditione suspectum comprehendi & in carcerem trudi jussit: quæ res magno ei detrimento fuit. Nam cum castra illius sub urbem



urbem posita tumultuarentur, ducemque suum repescerent, Antonius dimissus est, qui contumeliam sibi arrogatam iniquo ferens animo, mox ad Alphonsum transiit, & arcem Averfanam septimo jam mense obsessam ei tradi curavit: persuaso per epistolam Xantho, qui cum patre suo militaverat, praefectusque ibi praesidii erat. Descivit tamen paulò post Antonius ab Alphonso. Deinde apud Beneventum ei reconciliatus est, cum arce per prodicionem tradita, cives quoque consternati in Alphonsi potestatem venissent: quo tempore & Calathini adactis machinis ab Alphonso expugnati sunt, & castellum Padula & ante Ursariam castra posita. Franciscus Sfortia Renato amicus Arrianum, Trojam, Manfredoniam, Nuceriam, & alia pleraque oppida per idem tempus in Apulia obtinebat: quorum custodiam Caesari Martinengo, cum non parvo equitatu commiserat, ipse in Piceno agens. Caesar cum esset Alphonso infestus, bis extra mœnia Trojae pugnare ausus, bis ab Alphonso ex acie fusus, turpi fuga in urbem sese recepit: nec multò post Vicarium oppidum resistentibus oppidanis vi captum, praeda militi permissa, foeminarum decus regio more servatum. Alexander autem Francisci Sfortiae frater, sub urbem Thetini Remundum Candolam, ac Riccium & Josiam cum copiis ad Alphonsum euntem repente aggressus, levi certamine fudit: Riccium ac Josiam praecipue fuga salvavit. Remundus interceptus est, qui cum esset Antonii Candolae patruus, illum secundo ab Alphonso alienavit. Venit & Joannes Cardinalis Tarentinus in regnum adversus Franciscum Aquinianum Eugenii copias ducens. Sed occurrens Alphonsus, retro eum repulit. Exin rupem Gvilelmi in alto monte sitam castellis circa occupatis fame coactam obtinuit, & paulò post Capreas oppidum in insula ejusdem nominis situm, Tiberii quondam Caesaris sive delicias, sive latebras dicere malis, tradentibus oppidanorum quibusdam recepit: nec moratus castra ad Neapolim posuit, simulque Puteolos obsedit: qui aliquandiu fortiter resistentes, tandem rei frumentariae inopia & defectione regi portas aperuerunt. Turris quoque (quem vocant Octatii) recepta est. Urgebantur interea rei frumentariae inopia Neapolitani, nec spem aliam habebant, quam vel Genuenses mari, vel Franciscum Sfortiam cum Antonio Candola auxilium terrestri itinere allaturos esse. Anellus interea, faber quidam cæmentarius, quem fames Neapolim exire compule-

rat,



rat, ad Alphonsum profectus, si præmium adsit, urbem parvo militum periculo capi posse demonstrat. Deliguntur viri fortes ducenti, qui cum Anello ejusque fratre, per ostensum aquæ ductum nocte urbem ingressi, mœnia occupent. Rex cum exercitu paratus, signum certaminis audaciter expectat. Illi ad domum quandam perveniunt, in qua unica erat anus, & adula cum ea virgo: mater cum exclamare cœpisset, celeriter oppressa, vocem emittere inhibita, filia sua sponte conticuit. Et jam sol exortus erat, nec amplius, quam viri quadraginta, ex omni numero puteum invaserant: qui nuntiare ingressum regi debuerant, sive negligentia, sive aliam ob causam nihil regi significarunt. Existimabat Alphonsus, aut cæcos esse qui missi fuerant, aut metu exilire non ausos: profectusque propius, urbem ab ea parte, quæ occupanda erat, invadit. Renatus cum ea manu, quam ad subitos inopinatosque casus paraverat, citato eqvo ad muros contendit, hostesque procul amovit. Ingens verò pavor & consternatio eos cœpit, qui è puteo evaserant: nec egredi in puteum, nec armorum strepitu proderentur, nec erumpere propter paucitatem, audebant. Alphonsus ut vidit nihil à suis intus misceri, desperatis rebus in castra rediit. Renatus tanquam periculum depulisset, relictis custodibus, & ipse in regiam concessit. Nec mora nuntius ad Alphonsum currens, multos è puteo prodiisse, atque in domo tacitos ob metum latere nuntiat. Iterum igitur ad mœnia succeditur, instauraturque prælium, ut erumpendi animus latentibus acuat. Interea filius ejus, quem nominavimus aniculæ, à statione sua domum veniens pulsatis foribus aperiri sibi expetit. Mater, & qui intus erant exanimati, quid agant, nesciunt. Vincit tandem ea sententia, ut reseratis paululum foribus, manus ei injiciant, eumque comprehensum tacere jubeant. Sed ille repente ut armatos vidit, trepidus refugit, hostesque intra urbem esse vociferatur. Ad Renatum verò subito pervolat, & quæ viderit refert. At qui intus erant uno agmine raptim è domo profiliunt, primoque impetu mœnia propinqua uno tantum vigile ibi reperto, turrinque occupant. Renatus eo nuntio ac tumultu excitatus, ad mœnia celerrime reversus, impetum in hostes facit. Alphonsus, quo suis animos addat, scalas admoveri imperat. Sed oppidani eam muri partem facile tuebantur, & qui per scalas incaptam turrin evaderent, gravium saxorum dejectu obfistebant.

Dum



Dum pugnatur acriter, obeqvitas moenia Alphonsus, locum quendam urbis neglectum esse animadvertit, eoqve celeriter scalas admo-  
 veri jubens, murum obtinuit. Jam verò qvi turrim occuparant, par-  
 tim graviter sauciati, pugnam remiserant, partim præcipites è muro  
 se dederant. Eratqve Renatus eam turrim recepturus, nisi à tergo sú-  
 bito cum ingenti clamore hostes inveci terrorem intulissent. Auxit  
 & trepidationem oppidanorum unus ex Alphonsi militibus, qvi per  
 moenia urbem ingressus, conscenso eqvo qvem vacuum forte inve-  
 nit, in hostem acerrimè invecus, opinionem præbuit proximæ portæ  
 captæ atqve infractæ. Non tum Renato defuit animus, sed cohorta-  
 tus, qvi aderant, in hostes fortiter irruens, eorum impetum paulu-  
 lum coërcuit atqve repressit. Mox verò, ut crescente hostium nu-  
 mero, suos exterritos animadvertit, sensim referre pedem cœpit: at-  
 qve ingressis per divi Januarii portam hostium compluribus, in arcem  
 regiam cum paucis se recepit. Tum & à fori Boarii porta, & ab aliis  
 diversis muri partibus irruptio facta, atqve ad prædas discursum est,  
 à cædibus tamen temperatum. Mox verò ingressus Rex, & prædæ  
 quoque finis factus. Insignis hujus anni memoria expugnatione tan-  
 tæ urbis, quæ eo modo capta est, quo annis antea mille per Bellisarium  
 è Gothorum manibus erepta fuerat, quadragesimo & quadringente-  
 simo supra millesimum ab ortu salvatoris Christi, is annus erat ab ini-  
 tio cœpti belli unus & vigesimus. Postridie duæ ingentes onerariæ  
 naves à Genuensibus missæ cum frumento applicuerunt, quæ cognita  
 urbis captura sub arcem concesserunt, Renatumqve omnium spe re-  
 cuperandæ urbis abjecta inde avexerunt. Tres adhuc arces in fide Re-  
 nati perseverabant, Capuana, quæ pactis paucorum dierum induciis,  
 ante Renati abitum se dedit. Regia aliquanto postea & Montana  
 tardius receptæ sunt, Renatus ad Eugenium Florentiæ morantem sese  
 contulit. Exin in Galliam ulteriorem abiit. Alphonsus munita Neapo-  
 li, adversus Antonium Candolam ducens, ad Carpenonum castra po-  
 suit, ubi cum facta pugnandi ab Antonio copia, ineundum certamen  
 reguli dicerent, nisi princeps adesset: *ergo* (inquit Alphonsus) *qvi mi-*  
*liti animam addere consuevi, jam præsentia mea terrorem adhibebo, absit à*  
*nostro sanguine ea vecordia*, moxqve galeam induit, signumqve pugnae  
 dedit. Certatum est aliquamdiu nutante victoria. Postremo fuso ho-  
 stili exercitu, Antonius ipse captus est, cui erroris veniam postulanti,



non modò ignovit Alphonſus, verumetiam oppida quæ à patre accepta hæreditario jure poſſidebat, reliquit; cæteris captivis perhumaniter habitis: nec quicquam ex Antonii ſuppellectile, quæ ingens erat, præter criſtallinum calicem cepit. Poſt hæc Pelignos Marſosque ſubegit. Manfredoniam & Subindæ arcem in poteſtatem recepit, omnesque belli reliquias in Apulia extinxit: ac pacato ubique regno, Neapolim rediens in triumphantis morem, exultante populo, magnificentiſſimis apparatibus ingreſſus eſt urbem. Poſt hæc de pace inter Alphonſum & Eugenium actum. Ludovicus Cardinalis Aquilegienſis & ſua virtute & pontificis autoritate potens, idcirco ad regem miſſus, eam conſecit. Leges pacis in hunc modum dictæ. *Eugenius Pontifex Alphonſum regem Neapolitanum decernat, appelletque. Ferdinando regis filio cui rex poſt mortem regnum deſtinaverat, poteſtatem ſuccedendi faciat, Terracinamque regno adjiciat. Alphonſus contra Eugenio auctoritati ſe ſubjiciat, atque opituletur ad agrum Picenum, quem Sfortia occupaverat vendicandum: ſi quando Pontifex adverſus Turcas aut Afros bellum ſuſcipiat, rex cum claſſe adjuvet: Sacerdotes regnorum ſuorum ſub concilio prætextu Baſilicam proſectos revocet. Nec patiatur iras ex ſuis, qui Cardinales ſub Amadeo Sabaudienſi creati fuerant, revertentes pro cardinalibus ſuſcipi haberi vè Matricem civitatem ducalem, atque Acumulum in Marſis oppida Romana eccleſia tradat.* Trajecit deinde in Picenum Alphonſus, & quæ ſupra relata ſunt, felici curſu peregit. Exin domum rediens, cum Genuenſibus duce Raphaële Adurno ea lege pacem fecit, ut bello ablata nemini petendi jus eſſet. *Nec regis hoſtes Genuenſis populus, nec rex Genuenſium reciperet, illos vè commeatu adjuvaret. Genuenſes regi quotannis dum viveret honoris gratia pateram auream dono darent, ac Neapolim miſſerent.* Poſt hæc Antonius paterna ſtirpe Gentilia, per matrem Vintimilius, qui multa in Apulis egregia facinora Alphonſi gratia ſeciſſet, ad Fontem populi non procul à Theano, quo juſſi erant regni principes convenire, cum equitibus trecentis proſectus, tanquam unum ex purpuratis autoritate majoribus interficere conſtituiſſet, apud regem accuſatus, clam fugiens Cantanzanum ditionis ſuæ oppidum repetiit, extinctasque regni lites excitare conatus, non ſolum vicinos proceres, ſed Venetos & alios Italia potentatus, ut in regem arma ſuſciperent, & literis & nunciis invitavit. Sed fruſtra illi cuncta ſucceſſere. Nam rex cum copiis adverſus eum proſectus, & Crotonam urbem & omnem



mnem ei reliquum agrum ademit, ipsumque in Catanciano reclusum, ad deditionem nulla conditione interveniente compulit. Joannem vero Nuceum, qui contumaciæ Antonii svasor fuerat, oppidis omnibus exutum, regno excedere jussit. Secuta est paulò post profectio regis in Tusciam, de qua suo loco relatum est. Unde reversus, non multo tempore interjecto, Fredericum imperatorem, & Leonoram imperatricem ex sorore sua neptem ad se venientes tanto honore excepit, quantum referre vix Oratori maximo facundia suppetat, donatosque magnificè ambos à se remisit. Exin quamvis pacem, ut prædictum est, Florentinis petentibus dedisset, cum tamen capta Mediolanensi urbe à Francisco Sfortia, Leonelli marchionis Estensi intervenitu, cum Venetis positis inimiciis fœdus iniisset, alterum tamen in Tuscia bellum gessit, missò in eam expeditionem Ferdinando filio, de quo satis inter res Hetruscas commemoratum est. Soluta est & pax cum Genuensibus capta nave, quæ de Chio insula Genuam petebat, ut postea referemus. Ob quam rem commota republ. Genuensi, Joannes Philippus Flisca gente prognatus, cum quatuordecim altissimis navibus in portum usque Neapolitanum adnavigavit, ibi ut regis triremes onerariasque naves incenderet. Sed repulsus tormentis æneis, inglorius abiit. Nec multis post diebus classis regia ad montem Cyrceum sex Genuensium naves insecuta, cum homines effugissent, demersit, diviti præda in eis recepta. Quibus ex rebus, quanquam de pace tota fere Italia convenisset, inter Genuenses tamen & regem concordia fieri non potuit: sed cum Genuenses exules ad regis opes confugissent, classis eis concessa est, quæ Ligusticum vexans litus, etiam urbem ipsam, ut relatum est, oppugnare non dubitavit, & nunc majoribus viribus idem bellum repetiit. Fuit autem Alphonsus cum Fredericus imperator ad eum venit, annos circiter octo & quinquaginta natus, corpore gracili, vultu pallido, sed aspectu læto, naso aquilino, & illustribus oculis, crine nigro, & jam albicanti, ad aures usque protenso, statura mediocri, cibi potusque temperans, nec vino usus, nisi aqua multa perdomito. Literis per omnem ætatem operam dedit, grammaticæ apprime peritus quamvis latinè perrarè loqueretur. Historias omnes calluit, nec poëtas aut oratores ignoravit, dialecticos nodos facilè solvit, nihil ei abditum in Philosophia, arcana theologiæ perscrutatus omnia, de poenitentia Dei,



de libero hominis arbitrio, de incarnatione verbi, de sacramento altaris, de trinitate, de difficillimis quæstionibus percontanti, & præsto & sapienter occurrit, in responsionibus dandis quamvis brevis & circumcisus, nunquam tamen diminutus, sermone blandus tersusque. Summa ei cura, ne quispiam ab se abiret ingratus, petitiones differre maluit, quam negare, favit religioni, rem divinam diligenter curavit. Sacerdotalia indumenta, & altaris ornamenta comparavit, quibus comparari alia nulla queant. Sacram ac domesticam suppellectilem, auream & argenteam admirabilem & incredibilem composuit, margaritas, uniones, adamantes, cæterosque lapides preciosos toto orbe quæsitos coëmit: sacelli in quo sacris interfuit, & aularum quas incoluit, parietes, divitibus atque aureis pannis ornavit. Vestivit seipsum nitidè magis quam pretiosè. Serico rarè usus, aut ostreo paludamento. Venatione magnam vitæ suæ partem consumpsit, in bello severus & asper, in pace clemens ac mansuetus, pepercit facile his qui contra se arma tulerant humanum sanguinem invitus fudit. Scelera tamen odit, nec impunè subditos delinquere passus est. Regnum, quod multis ante seculis spelunca latronum fuerat, adeò pacatum securumque reddidit, ut, quacunque iter habeas, nullus prædonum metus adsit. Legatis omnibus ad se venientibus sumptus opipare præbuit. Apostolicis qui Cardinales essent obviam extra urbem præfectus, quasi patres honoravit, naves insolitæ magnitudinis fecit, & quasi qui procul inspiciat, sublimes esse arces per mare videntes arbitretur. Edificavit pluribus in locis: Sed Neapoli supra quam dici possit, splendide ac magnificè arcem regiam, cui Novo castro fuit nomen, à fundamentis ejectam iterum erexit, tum opere mirabilem inexpugnabilemque, tum sumptu magnificentissimam, turribus orbiculari forma ex lapide quadrato, mirifica structura atque artificio, murique crassitudine inaudita, & ingenti arcu triumphali ex marmore candidissimo excitatis. Reformavit & arcem S. Salvatoris in mari ex Ovo nuncupatam, cuius inexpugnabilis situs ad usum magnificentissimæ regię redactus est. Ampliavit & urbis portum, objecta in profundum maris altissima mole, crassissimo muro, turribus munita, salubritatem urbi exsiccatis paludibus dedit. Magnus profecto princeps, & in utramque fortunæ partem probatus, qui inter cætera sibi adversantia, etiam terræmotum

anno




anno abhinc secundo passus est, toto fermè regno, qualem nec nostra nec patrum nostrorum memoria visum auditumvé ferunt. Nam & multa regni oppida funditus corruere, inter quæ Arrianum ita absorptum est, tanquam casmate perisset. Rara civitas absque insigni ruina superfuit, circiter triginta millia hominum inter cadentia tecta perisse feruntur. Neapolitanorum nobiliores ædes discissæ disjectæque sunt. Nec templum in ea urbe læsionem non sensit. Sed hodie jam civitas fermè resecta est, civium diligentia & Regis liberalitate.

Cæterum clarissimi regis, qui seculum nostrum, veluti sidus quoddam præfulgidum illustravit, haud ab re fuerit quam brevissime velut in epilogo præclara facinora percurrere, quamvis temporis à nobis recepti pleraque modum excedant, ex quibus illustriora hujusmodi sunt: Adolescens mortuo Ferdinando patre, Arragoniam, & quæ ab illo in Hispania regna suscepit, cum aliquandiu sapienter administrasset, adoptatus in filium à Joanna Neapolitanorum regina, discedentibus amicis, expeditionem in Italiam suscepit. Regina operam tulit, Ludovicum ducem Andegavensem, qui regnum sibi hæreditario jure debitum affirmabat, pluribus præliis afflictum expulit. Regnam quæ malo usæ consilio ab se defecerat, non tam punivit quam coërcuit. Renatum alterum regni æmulum armis victum cedere compulit. Joannem Vitelliscum Alexandria Patriarcham, magnis copiis insultantem regno fugavit. Cajetam bis cepit, semel acri pugna devictam, & iterum civitatis parte vocante, cum defecisset. Neapolim quamvis Renatus & magnus inesset populus, expugnavit: Joannem fratrem Navarra regem in Hispania laborantem armis adjuvit: Massiliam insignem provinciæ civitatem noctu adorsus obtinuit ac diripuit. Ad insulam Gerbini, quam veteres Lothophagiten appellaverunt, à continenti Africæ quatuor millia passuum distantem, obsidionem admovit. Bosorium provinciæ regem, cum copiis adventantem, in proximo littore victum, ex minoribus castris ad majora fugere, compulit, nec diu post ab eisdem tributa suscepit. Ab Eugenio Pontifice Maximo, qui sibi de regno contrarius esset, quas tandem voluit leges pacis accepit. Franciscum Sfortiam ex agro Piceno armis deturbavit, & in Albania & in Oriente per suos duces Turcis infestus, non parva eis damna intulit. Bis Florentinos ob res Gallicas armis af-



fixit. Bis eis pacem petentibus dedit. Sed majus omnibus est & admiratione stuporeq̃ve dignius, quod prælio navali à Genuensibus (ut antè diximus) superatus, & in Philippi Mediolanensium ducis captivitatē adductus, mox liberatus potentissimo regno potitus est, & à victoribus victor tributum accepit, & adeò erga Philippum gratus inventus est, ut ab illo suprema voluntate hæres sit nuncupatus. Vera Gothorum loboles, ex quibus derivatum esse regium Hispaniæ sanguinem, unde Alphonsi origo est, haud quaquam ambigunt. Illis & prælio vincere & regna sibi subicere proprium fuit. Quorum vestigia Ferdinandus imitatus, haud dissimilem filium genuit, quando & ipse Arragoniam, Cataloniam, Valentiam, Siciliam: Alphonsus vero eam Italiæ partem, quæ olim Magna Græcia dicta est, pugnando, instando, vincendo sibi subjecit: & magister Italicæ pacis factus, Hispanicarum quoque rerum moderator & arbiter esse videtur.

F I N I S.



INDEX



# INDEX CAPITUM.

Cap. I. De mundo in universo forma ejus & plagis terræ	pag. 7
Cap. II. An mare circumnavigari queat, sententiæ.	8
Cap. III. De marium & sinuum diversitate secundum varios autores.	9
Cap. IV. De longitudine & latitudine & climatibus terræ.	10
Cap. V. An sub æquinoctiali circulo ac torrida zona sint habitationes.	11
Cap. VI. Partitio nostræ habitabilis in Asiam, Africam & Europam treis principales parteis & ubi conjungantur.	12
Cap. VII. Qvi Africæ, Europæ, Asiæ limites: & divisione Asiæ per Taurum montem.	13
Cap. VIII. Generalis distributio Asiæ in sex præcipuas parteis.	16
Cap. IX. De Seribus populis.	17
Cap. X. De gente Atocorum. Ciconibus populis seu alii volunt Sementinis & quæ de Macino provincia denarravit Nicolaus Venetus.	19
Cap. XI. De Sacis populis quos & Nomadas appellant.	20.
Cap. XII. De Massagetis, ubi & de adolescente qvi tempore Pii Papæ Solem adorabat.	21
Cap. XIII. De Anthropophagis, Essedonibus, Arimaspiis & id genus immanium hominum.	23
Cap. XIV. Qvi populi inter Jaxartem fluvium & Hyrcanum mare incolunt, & de habitantibus sub polo Arcto & Hyperboreis populis.	24
Cap. XV. De Arimphæis populis non absimilibus Hyperboreis. Catajo, quæ de his locis enarrat Nicolaus Venetus.	25
Cap. XVI. De Sogdianis & Bactrianis.	27
Cap. XVII. De Aria & Hyrcania, & mirifica harum regionum vite.	30
Cap. XIX. De secunda Asiæ parte & Sarmatis generatim.	33.
Cap. XIX.	



## INDEX CAPITUM.

- Cap. XIX. De Albanis, & de bonitate soli sui & simplicitate gentis,  
& prisca eorum superstitione. 34
- Cap. XX. De Amazonibus & Gargarensibus, & ex quibus prolem  
susceperant. 37
- Cap. XXI. De Iberia, Iberis, victu, vestitu & repub. eorum, & quo-  
modo, quove tempore Christi fidem susceperunt, quodque  
Georgiani nunc appellantur. 41
- Cap. XXII. De Colchis, & quæ flumina Colchidem claudunt, de  
melle amaro & de Tragelapho, & quantum Colchis olim  
claruit. 44
- Cap. XXIII. De Dioscuriade, & apud eam linguarum varietate &  
aurati velleris ficta fabula, de victu & vestitu eorum qui apud  
Dioscuriadem conveniunt. 46
- Cap. XXIV. De Syracoris & Troglodytis, & nominum mutatione,  
& de pellibus, quæ ab iisdem manant. 47
- Cap. XXV. De Alopecia in Mæotide insula, quæ mistorum homi-  
num domicilium continet, quantave opprimantur glacie  
& frigore. 49
- Cap. XXVI. De Phanagoria, de gigantibus Venerem adorantibus,  
de Polemonis regis morte. 50
- Cap. XXVII. De Zygis & Heniochis, de lemborum magnitudine,  
& eorum maritimis furtis, de Enochiorum regum pluralitate. 51
- Cap. XXVIII. De Scythis, eorum origine, de sedibus incertis, eo-  
rum victoria, & qualiter in hos triumpharint Romani. 52
- Cap. XXIX. De Asiaticis Scythis, & eorum ferocitate, unde Atti-  
las, de eorum fœditate, & quomodo Hungaros velint esse  
Scythas, quomodove quidquam Hungarica lingua sint lo-  
quentes. 55
- Cap. XXX. De Parthis, apud eos vario terræmotu, sermone, mi-  
sto, de eorum vario incessu, & de regum varia successione,  
atque in bellis multa nunc regni populatione, nunc autem  
auctione. 58
- Cap. XXXI. De Cosdroa tyranno & victoria Heraclii crucem Do-  
mini ablatam ac iterum esse restitutam, de Mahumethe pseu-  
dopropheta nec non insigni victoria Tamerlanis Parthorum  
ducis 66



## INDEX CAPITUM.

Cap. XXXII. De situ Mediæ ac divisione generatim, de montibus ejus, fluminibus, Atropatia regione, & lacu Spantha.	69
Cap. XXXIII. De Media magna & solo eqvis pascendis apto, ex hac Vescos eqvos genus habere, de herba, quæ Medica vocatur, eqvorum nutritura, abundantia.	71
Cap. XXXIV. De Medorum in Venerem profusione, de uxorum pluralitate, & Medea, quæ hic regnavit.	74
Cap. XXXV. De Armenia, quod Tigris in ea nascatur.	75
Cap. XXXVI. De Armeniæ montibus variis, quod arca Noë in montibus Armeniæ hæserit, & quanta nive hi sint obruti.	76
Cap. XXXVII. Qui fluvii sint in Armenia, & de Arsino lacu, aqua quæ in illo propter celeritatem impermixta servet, de eqvorum apud eos bonitate, & eorundem opulentia.	78
Cap. XXXVIII. De opulentia Armeniorum, auctione, Thanaide dea, de vestitu atque Sarapetis populis.	80
Cap. XXXIX. De regibus & tyrannis qui Armeniam vicissim invaserunt gravissima inter se prælia commiserunt.	81
Cap. XL. Quomodo Armeni Christiani sint effecti, & Tyridates gentis illius rex sit ad baptismum conversus.	88
Cap. XLI. Quanta sit longitudo quantave latitudo Asiæ minoris.	88
Cap. XLII. In quot sit divisa Chersonesus.	90
Cap. XLIII. In quot sit divisa Cappadocia.	91
Cap. XLIV. De situ minoris Armeniæ, quomodo Deum coluit, quamvis in errores nonnunquam lapsa.	92
Cap. XLV. De Cataonia, & de Pyramo fluvio ejusque alveo.	93
Cap. XLVI. De Tyanensi prætura, quot Cappadociæ præturæ, ubi Asia fanum in quod nude mulieres nudis pedibus primores ingrediuntur.	95
Cap. XLVII. De Argeo, & quomodo Cappadocia linguis careat, & de Argei situ.	96
Cap. XLIX. De Mazaca, de exemplo quomodo parentes vereri debeant pueri hic gesto, quibus abundet Cappadocia, Onychitem lapidem in ea inventum.	97
Cap. XLIX. De Ponto, quare Cappadocia aliquando dicta Leucosyris, cujus sit figura Pontus.	98
Cap. L. De Gadilonitica regione.	99



## INDEX CAPITUM.

Cap. LI. De Themiscyra campo, & quomodo Pontus regio sit fertilis, & in ea viri docti orti sint.	100
Cap. LII. De Sidena & soli fertilitate.	102
Cap. LIII. De Coma urbe, & quanta incolarum superstitio, de variis Ponti regionibus, & unde Germani salis habeant excoctionem, de Sandara monte, ubi metalla effodiuntur, & qui Pontici Christum colant.	104
Cap. LIV. De Heraclia ex qua Heraclides.	107
Cap. LV. De Henetis, Sinopensibus, & de eorum vico, Harmena: unde Diogenes Cinicus & alii complures.	108
Cap. LVI. De Galatia & in eam Gallici hostis pulchra victoria.	111
Cap. LVII. De Lycaonia & lacu Tatta, & de mira salis congelatione, & cujus fraude interierit Amyntas,	113
Cap. LIX. De Pilidis, & quomodo Storace sylvæ abundant.	115
Cap. LIX. De Bithynia ejusque urbibus compluribus.	116
Cap. LX. De Salone Nicæa ejusque figura.	119
Cap. LXI. De Majori Phrygia, ejusque urbibus, & quomodo à Christo delapsi.	121
Cap. LXII. De Mysis, Lydis, & Mæonibus, quomodo viri hi literati & ad Christum proni.	124
Cap. LXIII. De insigni civitate, quæ diu sub Attalicis regibus fortunata fuit.	126
Cap. LXIV. De Sardensibus & viris apud hos excellentibus, de Troade & ad hanc pertinentibus urbibus.	128
Cap. LXV. De Adrastia, & quomodo homines cum serpentibus cognitionem habere dicantur.	132
Cap. LXVI. De Dardania.	134
Cap. LXVII. De Ilio duplici, de Ida & ejus fluminibus, deque pinu quæ mira magnitudine pulchra est cognominata.	136
Cap. LXVIII. De Ida & ejus fluminibus, deque pinu quæ mira magnitudine sua pulchra est cognominata.	139
Cap. LXIX. De Tenedo insula, & quod in ea castellum fuerit nobilissimum, quod cum Veneti & Genuenses pro eo multis inter se præliis contenderent, communi consensu est deletum. Item de urbe Alexandrina, quæ prius Sigra vocabatur, deque in ea Sminthæi delubro sacris muribus habitato.	140
Cap.	



## INDEX CAPITUM.

- Cap. LXX. De agro Lecti, campo Halesio, idem de salibus Tragelæis  
qui Etesiiis ventis spirantibus sponte nasci dicuntur. 142
- Cap. LXXI. De Palaſcephi, & qui ex ea Socratici fuere Philosophi,  
item de Theophrasto & ejus bibliotheca. 148
- Cap. LXXII. De Anderis, mirandoqve lapide, qui solus combustus in  
ferrum, cum terra quadam in argentum falsum. Quæ terra,  
si æs accepisset, in aurichalcum vertebatur: de Pitana urbe Æo-  
tica, quodqve apud eam lateres inventi sint, qui super aquas in-  
natarent. 146
- Cap. LXXIII. De Cluma Æolicarum urbe maxima, & quomodo Cu-  
mani insulsi & hebetes sint putati: item de Larissa. 148
- Cap. LXXIV. De Lesbo Ægæi maris insula, & quot in ea urbes me-  
moratu dignæ sint: item qui Philosophi, Poætæ, & rerum scri-  
ptores ibidem floruerint: insuper de scæmina quæ urbem à  
Turcis una servavit. 150
- Cap. LXXV. De Ionia minoris Asiæ regione, de Mileto & Epheso, quæ  
totius Ioniæ urbes fuere clarissimæ, de Branchidis oraculum  
Didymæum Xerxi prodentibus, de viris ex Mileto memoratu  
dignis, de Latino Endymionis astrologi monte. Item de A-  
verno pestíferas exhalationes habente. 154
- Cap. LXXVI. De Samo Ægei maris insula, de tabulis, statuis & colof-  
sis in ea pulcherrimis, de Polycrate annulum aureum in mare  
projiciente, & eum paulo post in piscis à piscatore accepti  
ventre inveniente, de Pythagora philosopho, & quod Calli-  
phontis confabulatoris sui animam diu noctuq; secum degere  
dicebat. 157
- Cap. LXXVII. De Icaria insula & quæ de ea dicta sunt fabulosa, de Or-  
tygia insula in qua Latona peperisse fertur, de Curetibus & E-  
phesiæ Dianæ templo nonnihil scitu dignissimum. Item qui  
apud Ephesum viri memoratu digni fuerint. 159
- Cap. LXXIIX. De Colophone, & qui ex ea viri fuere clari, de Lebedo,  
& quod in eo loco scenicorum histrionum fuerit collegium,  
de Erythris civitate Ionica, de Coryco monte à quo & Cory-  
cæi piratæ sunt dicti. 163
- Cap. LXXIX. De Chio insula, deq; in eo vino Ariusio Græcanicorum  
optimo. Item de Mastiche ibi nascente. 168



## INDEX CAPITUM.

- Cap. LXXX. De Clazomenis & Smyrneorum sinu ac civitate, de Leucis gentibus, & quod apud eas P. Crassus in praelio occubuerit. 166
- Cap. LXXXI. De Magnesia & de juxta eam Thorace monte, apud quem Daphita grammaticus, propterea quod reges versibus inceserat, cruci est affixus, unde & proverbium (cave à Thorace) natum est. Item de Trallibus, & ex eis viris illustribus, de Nissa, & mirabilis naturæ antro Corocino. 167
- Cap. LXXXII. De Mycale monte, de Hierapoli urbe, & quod aquas calidas habeat, quæ in Tophum durabantur. Item de ore Plutonio non nihil mirum creditu. 169
- Cap. LXXXIII. De Caria, & apud Halicarnassum Mausoleo. Item de Salmaci fonte celeberrimo. 170
- Cap. LXXXIV. De Coö maris Ægæi insula, Langoum à nostris jam dicta, de quæ in ea Venere ab Apelle picta, & quod in ipsa domus Hippocraticæ ostendantur adhuc ruinæ. 172
- Cap. LXXXV. De Astypalæa maris ejusdem insula, ex Cycladibus una, & quod in ea Dianæ Myndradis templum fuit, quod circumplui crederetur, dein mediterraneis tribus memoratu dignis urbibus Mylasis, Stratonicia & Alabandis. 173
- Cap. LXXXVI. De Antiochia Asiatica & Cibyreis populis quatuor linguis utentibus, quod quæ apud eos facile erat ferrum extor-  
nari, de Caribus, qui Leleges dicti sunt. Item qui proprie dicebantur Barbari. 175
- Cap. LXXXVII. De Lycia minoris Asiæ tertia parte, de quæ in ea Dorica Gersoneso, de Gnido promontorio. Item de Caunis populis viridem colorem habentibus. 178
- Cap. LXXXVIII. De Rhodo insula, & quod apud eam Telchines populi ferri & æris fabricam primi invenisse dicuntur, de Colosso & Portogenis tabula, de viris in ea claris, de religiosis militibus beato Joanni dedicatis. Item decanibus Christianis adventantibus blandientibus & Turcas moribus impetentibus. 178
- Cap. LXXXIX. De Lycia in qua tres & viginti urbes in suffragiis dandis participabant, de tribus Chelidoniis insulis asperis, de Climace monte, qui iter facientibus cum pelago nudante pervius est, & quod apud eum Alexander per hyemem incidens, cum suis 179



## INDEX CAPITUM.

- fuis militibus mare fluctu restagnante, umbilico tenus est mer-  
sus. 184
- Cap. XC. De Pamphilia, & in ea Cataracte fluvio admodum quam  
impetuoso, quodque in ipsa Pamphilia Christi Evangelium sit  
susceptum, postea in Mahumetis dogma deventum. 187
- Cap. XCI. De Cilicia duplici Trachea scilicet & Campestri, de em-  
porio nomine Delus, apud quod mancipiorum millia multa,  
quotidie venundabantur, de Arsinoë & Hamaxia cedrinifera,  
de Scandaloro oppido, cujus Dominus hominum viginti mil-  
lia armare posset. Item de Athenæo Philosopho, ruina domus  
per noctem oppresso. 188
- Cap. XCII. De Palica petra scalis excisa, de Coryco monte & antro  
crocum optimum producente, deque ibidem specu flumen ingens  
emittente, quodque flumen ipsum à terra invisibiliter absor-  
ptum in mare delatum exeat, de Zeniceto Pirata, qui capto  
monte Isaurico se cum tota domo concremavit. 191
- Cap. XCIII. De Zephyro Ciliciæ promontorio, & Anchiala urbe, in  
qua Sardanapali sepulchrum cum statua videbatur: de Cydno  
flumine & ejus natura, de Tarso, & quod apud id viri fuerint  
percelebres complures, inter quos & Paulus Apostolus. 192
- Cap. XCIV. De Mallo urbe, & qui apud eam viri clari fuerint, de mon-  
tis Amani portis Amanides appellatis, de Pindo amine, juxta  
quem Alexander cum Dario conflixit. 194
- Cap. XCV. De Cypro insula & in ea promontoriis, quodque in eo cu-  
jus summitas olympis dicebatur, Veneris Acreæ templum  
fuerit, quod mulieribus nec videre nec adire licebat, de Cli-  
dibus & Carpasiis circum Cyprum abjacentibus insulis, de  
promontorio unde qui Apollinis aram tetigissent, præcipita-  
bantur. Item de Treta Boosura Palapapho Arsinoë altera, Hie-  
rocepsia & Papho. 196
- Cap. XCVI. De Acama promontorio, Nicosia, Famagusta & Atra-  
denfi, hodiernis in Cypro urbibus quod apud Colossam ca-  
stellum cucurbitæ nascantur adeo ingentes, quod ex eis pica-  
tis efficiantur dolea. Item quod æs, metallum, vitriolum, ru-  
bigio æris, canna mellis, ex qua saccharum excoquitur, pluri-  
mum apud Cyprum abundant. 197



## INDEX CAPITUM.

- Cap. XCVII. Historia de bello apud Cyprum facto. Item quomodo  
Jacobus Cyprius nothus, Soldano fœdum & execrandum  
præstitit juramentum. 199
- Cap. XCIIIX. Quo jure Soldanus Cyprum & Turca Rhodum sibi per-  
tinere dicant. Item disputatio qui primum populi Asiam mi-  
norem coluerint, quique duces apud eam armis præcipue  
claruerint.
- Cap. XCLX. De Mithridatis Eupatoris laudibus admirandis, item de  
mulieribus in Asia clarissimis. 210
- Cap. C. De Turcarum origine & moribus. Item de Ottomanorum  
progenie. 212







## INDEX CAPITUM.

- Cap. I. De Hungaria, sive ut nonnulli volunt, Pannonia, de Sigismundo Imperatore Catholicæ fidei ad unitatem insigni redactore, de Alberto rege Bohemo in Imperatorem Romanorum à Germanis electo, de Jacobo Marchiano ad tumultum se dandum crucifigero, de multis aliis & ducibus & regibus, inter quos de Matthia, qui ex Carcere ad regnum est vocatus. pap. 219
- Cap. II. De Transsylvania regione, Teutonibus, Siculis & Valachis populis eam incolentibus. 226
- Cap. III. De Thracia & populo in ea, quomodo Byzantium, quod & Constantinopolis dicitur, à Constantino imperatore Romanorum sit muris & pulcherrimis ædificiis auctum. Idem de Synodo facta super sancti Spiritus processione. 229
- Cap. IV. De Turcarum origine & propagatione, victu, & moribus eorum. 231
- Cap. V. De bello contra Turcas ab Hungaris duce Johanne Huniade commisso. Item de altero ab iisdem contra eosdem magno Christianorum detrimento facto. 235
- Cap. VI. De alio bello per Huniadem, qui ignominiam apud Varmam acceptam abolere cupiebat, celeriter apparato, & quod Amurates à vita privata ad bellum ducendum sit revocatus. 241
- Cap.



## INDEX CAPITUM.

- Cap. VII. De Mahumete fidei Christianæ ferali inimico, & quod Constantinopolim Thraciæ urbem excellentissimam armis & Christiana fide spoliaverit 243
- Cap. VIII. De Mahumete in Hungaria ad Savum usque flumen exercitum ducente, & ab Alba vulnere sub papillam accepto turpiter refugiente. 245
- Cap. IX. De Macedonia, urbibus, fluminibus, montibus & aliis in ea rebus. 249
- Cap. X. De Boeotia, Thebis montibus & fontibus sacris in ea. 251
- Cap. XI. De Hellade, quæ & Græcia & Attica est dicta. 252
- Cap. XII. De Peloponneso & ejus forma, de Isthmo, Examilio muro ab Amurate diruto. 252
- Cap. XIII. De Acarnania, & strage memoratu digna à Jo. Vintimilio in ea facta. 254
- Cap. XIV. De Epiro XIV. gentes autore Theopompo continente, quod apud eam Paulus Æmilius imperator Romanorum urbes LXX. funditus evertit, quodque in sinu Ambracio Cæsar Augustus Antonium & Cleopatram bello Attico devicit. 255
- Cap. XV. De Albanio, inter Dyrrhachium & Apolloniam, regione. 256
- Cap. XVI. De Illyricis gentibus, de Manichæis hæreticis, deq; Matronis certo tempore post infirmitatem cum monachis promiscuè manentibus. 257
- Cap. XVII. De Dalmatia & Croatia, & ubinam Liburnia. 258
- Cap. XIX. De Istria hodie Sclavonia dicta, & quod Pomp. Mela & Nepos Istrum amnem à Danubio in Adriam fluere falso crediderunt. 259.
- Cap. XIX. De Carnis & Japidibus. 260
- Cap. XX. De Carinthia, ritu apud eam novi principis creandi, quomodo nobiles ex Ingonis principis Convivio



## INDEX CAPITUM.

vivio ad Christi fidem fuerunt inclinati, de Consuetudine in fures, & de Comite Henrico viro corruptissimo. 260

Cap. XXI. De Stiria olim Valeria dicta, quod Fredericus Comes uxorem suam amore concubinæ propria manu interfecit. Item quod nobilis quispiam, qui seipsum laqueo suspendere sæpe cogitabat, optimo in missa audienda est usus remedio. 263

Cap. XXII. De Austria, & aliquot rebus gestis in ea. 265

Cap. XXIII. De Moravia, per quam nulli, propter latronum insidias, transitus patet. 270

Cap. XXIV. De Silesia provincia, de mira apud Uratislavi-  
am urbem seditione, deque Bulione opoliensi, Viro  
neque inferos neque superos esse dicente, animam-  
que cum corpore interire putante. 271

Cap. XXV. De Polonia regione Vasta, quod in ea domus  
luto & macerie componantur, equi sylvestres & Viri  
inveniantur, de Uladislao cum regno baptismum su-  
scipiente, deque Frederico Brandenburgensi, & Al-  
berto Bavario regnum quodlibet pro se recusante. 272

Cap. XXVI. De Lituania regione, Vitoldo facile sangvina-  
rio in ea regnante, de soli ad transitum æstivo tem-  
pore difficultate, gentis in moribus qualitate, & quæ  
super sacrorum diversitatibus Hieronymus Pragen-  
sis eremita denarravit. 274

Cap. XXVII. De Ruthenis, & quomodo principatus apud  
eos soleat assequi. 278

Cap. XXVIII. De Livonia se miseros homines in una sui  
parte continente. 278

Cap. XXIX. De Prutenis & quomodo fidem Christia-  
nam à Teutonicis fratribus sanctæ Mariæ sumpse-  
rit. 279



## INDEX CAPITUM.

- Cap. XXX. De Saxonia, fluminibus, gentibus & oppidis in ea. 284
- Cap. XXXI. De Turingiæ oppidis, & nobilibus templis in ea, de ritu mirabili super homine gravioribus vitiis inquinato. 285
- Cap. XXXII. De aliquot aliis in Saxonia oppidis, & rebus in ea gestis scitu dignissimis. 287
- Cap. XXXIII. De Dania sive Dacia sive Svetia, & Norwegia, de Margarita trium regnorum insigni domina, deque varia trium regum fortuna. 290
- Cap. XXXIV. De Bohemia succinctè 292
- Cap. XXXV. De Phrysia, moribus gentis ejus & soli qualitate. 293
- Cap. XXXVI. De Holandia & Trajectensibus, & Selandia, quomodo Friburgium in jus Sabaudensium sit conversum. 294
- Cap. XXXVII. De Westphalia. 296
- Cap. XXXVIII. De Hassia & aliquot rebus gestis in ea. 298.
- Cap. XXXIX. De Francia nobili provincia, origine Francorum, & qui primum Duces & Reges in ea fuerunt. 299
- Cap. XL. De Franconia ubi de Alberto viro in armis dexterrimo, & quod suis egregis factis Achilles Teutonicus sit cognominatus. 302
- Cap. XLI. De Bajoaria, & unde gens ipsa secundum Strabonem sit deducta. 306
- Cap. XLII. De in Marchionatu Badensi nonnullis rebus gestis. Ubi de Svitenarium in hostes devictos mira crudelitate. 308
- Cap. XLIII. De Ludovico Delphino Viennensi bellum in Bafilienfes movente, de Amedeo Sabaudia Duce, ex ducatu eremum, ex eremo summum Pontificam



## INDEX CAPITUM.


- ficatum, & ex summo Pont. Cardinalatum subeunte. Item de Bolomero in lacum demerso, & Joan. Segobienſi Alcoranum Mahumetiſt traducente. 309
- Cap. XLIV. De Joanna virgine Lotharingenſi, Anglorum copias è Francia fugante, de Flocheto pontem arcis novo commento invadente, deq̃ve Thalboto Anglo duce cum filiis ad Burdegalam in bello cadente. 322
- Cap. XLV. Qvòd Gandavenſes ſupra viginti millia civium amittentes, Philippo Duci Burgundiæ ſe ſubmittere, qvòdq̃ Delphinus Viennenſis Agnetem occidere tentaverit. 316
- Cap. XLVI. De Anglia infula, & qvòd olim Britannia, qvòdq̃ Albion fuerit dicta. De rege Henrico, Soſulſo, Eboracenſi & Somerſeto Ducibus. 317
- Cap. XLVII. De Scotia & Mirandis apud Orcades arboribus, ſuos fructus in aves mutantibus. Item de Hibernia. 318
- Cap. XLVIII. Qvòd Hiſpania ſit in quinque regna diviſa, & qvòd apud ipſam nonnulla ſcitu digna ſint geſta. 319
- Cap. XLIX. De Genuenſibus, & eorum crebris in principatu reipublicæ mutationibus. 321
- Cap. L. De Mediolanenſibus, & variis apud eos rebus geſtis, Philippo Maria, & Francisco Sfortia, ducibus. 323
- Cap. LI. De Venetis, & qvòd Franciſcus Foſcarius dux ab imperio deſoſitus, animam indignatus ſtatim emiſerit. 330
- Cap. LII. De Mantuanis. 331
- Cap. LIII. De Ferrarienſibus, & diſputatione apud eos inter Græcos & Latinos facta. 332
- Cap. LIV. De Bononienſibus, & factione inter Baptiſtam conetulum & Hannibalem Bentivolum. 333
- Cap. LV. De Florentinis, & diverſis apud eos rebus geſtis. 336
- Cap.



## INDEX CAPITUM.

- Cap. lvi. De Senensibus & eorum aliquot bellis. Item de  
Hermaphrodito. 341
- Cap. lvii. De Plumbinensibus, Galeatio Baldasino viro in  
armis dexterrimo. 343
- Cap. lviii. De Viterbio. 345
- Cap. lix. De Roma, & apud eam Eugenio, Nicolao quinto,  
& Calixto tertio, summis pontificibus, aliisque  
viris multis per celebribus. 346
- Cap. lx. De Umbria & Piceno & diversis in eis bellis & Va-  
riis ducibus confectis. 354
- Cap. lxi. De Josia duce Asculano. 360
- Cap. lxii. Quod apud Urbinates Dux Oddo, & protono-  
tarius Carpenfis propter suam in fœminas libidi-  
nem fuerunt interfecti. 360
- Cap. lxiii. De Sigismundo Maletesta Duce Ariminensi. 361
- Cap. lxiv. De Faventia & Fabriensis. 362
- Cap. lxv. De Aquila Marforum urbe, ubi divo Bernar-  
dino Senensi. 362
- Cap. lxvi. De Neapolitano regno, & multis præliis per  
Alphonsum Arragoniæ regem, & alios duces non  
paucos, in ipso regno Neapolitano, & aliis locis  
factis. 363

F I N I S.





ÆNEÆ SYLVII  
PICCOLOMINEI  
POSTEA  
PII II. PAPÆ  
HISTORIA BOHE-  
MICA.



HELMESTADII,  
Sumptibus JOH. MELCHIORIS SUSTERMANNI;  
ANNO M DC XCIX.

II 74<sup>2</sup>



ENNE SYLVII  
PICCOLOMINI

POST

PHILIPPAE  
HISTORIA BOHE-  
MICA.



WILHELMUS  
JOHANNES DE WITTE  
LOND.





## PRÆFATIO

## ÆNEÆ SYLVII

Tituli Sanctæ Sabinae, Sanctæ Romanæ Ecclesiæ Cardinalis Senensis in historiam Bohemorum, ad illustrissimum Principem & Dominum ALPHONSUM, Regem Arragonum.



*N*teritura esse quæcumq; nascuntur, atque homines in primis, quos ea de causa mortales appellant, omnes norunt, plurimi damnant. Nam cur hominem natura finxit, cui negata immortalitate spacium brevissimum vitæ indulgit: cornicibus & cervis, quorum nihil intererat, longissimum largita est ævum? Sed cui de naturæ operibus judicare permissum? quam nihil esse aliud, quam Deum vel Dei decretum dixerim. Ego illud mihi persvadeo, nisi mors introisset in orbem terrarum, ex duobus alterum fuisse necessarium: aut terræ scilicet, quam



quam incoheremus, amplitudinem sine fine patuisse, aut humanam generationem interdictam. Nam quis mundi ambitus homines capiat, in horas absque mortis periculo nascentes? Tot prætereacalamitates hominem circumfiliunt, ut mori satius sit, quam vitam producere miseram. Optabant fortasse utcunque vivere, quævis vitæ alterius adempta spes. Quamvis & hujusmodi homines mortem sibi aliquando consciverint. At homini Christiano, (qui Deum fabricasse mundum constanter credit, nec dubitat illum gubernare, quæ condidit, iniquitatem quoque omnem ab eo alienam putat) sacri veteres novique sermones fidem faciunt, qui animas ex corporibus excedentes, in alia loca meare tradunt: in quævis præmia pro benefactis, supplicia pro malefactis expendant, quamvis in hac mortali vita, & viros bonos in adversis rebus oppressos, & iniquos homines sæpenumero blandis fortune afflatibus in sublimeraptos cernimus. Licet in omni gente, quæ sub cælo est, hoc videre: Bohemia tamen testimonio satis fuerit. In qua nostra ætate rejecta Romanæ ecclesiæ obedientia, conculcata parentum religione, sacerdotibus Christi occisis, fanis sanctorum dirutis, sine fide, sine bonis moribus, in latrocinis, in adulteriis, in omni spurcitia viventes, adversus potentissimos reges, innumerabiles populos, peritissimos



mos duces, structissimos exercitus invicti perstiterunt, ex quibus plerique ad hoc ævi pervenere delitiis affluentes, plerique cum diu ex arbitrio vixissent, non morbo, non gladio ex hac luce, sed natura necessitate senio confecti abierunt, ut si nihil aliud quàm presentis vitæ cursum animo volvas, beatos iudices, qui tot victoriis potiti, apud suos cives charissimi, inter opes quàm plurimas inoffensi morbis, quantum homini licet, ævum produxere. Contrà vero infelices dicas, ac superis odiosos fuisse, qui pro lege patrum custodienda, pro veritate, pro justitia, pro honestate, aut in exilio pauperes obiere, aut in medio vitæ cursu rapti, ante ora suorum miserabili cruciatu necati sunt. Sed verissima est Christiana religionis assertio, quæ post vitam huius sæculi patere alteram asserit, his qui religiose vixerunt jucundam & beatam, reliquis molestantem & infelicem. Cui sententiæ & Judæi & Saraceni & gentiles, & ipsi quoque Philosophi consentiunt, quos veri conscios & humanæ vitæ magistros putant. Nemo homo est, cui non insit aliquid boni, & id Deus in terra, & hac transitoria vitæ remunerat. Neque enim mole malorum obstante cælestem conferre lucem potest. Vitia apud inferos plectuntur. Viris bonis, quævis terra clausa est, cælum patet. Peregrina in terris virtus, in cælo civis. Zischia igitur,



*Ciaccho, Prasco, quos felices Bohemi credidere, tot  
 praeliorum victores, tanto imperio pradtos, Co-  
 randa quoque & Jacobelius, quibus ut Apostolis  
 Christi, aut angelis à cælo missis, populorum aures  
 patuere, cum Procopiis pugna casis, cum Joanne ac  
 Hieronymo Constantie in magna synodo igni da-  
 mnatis, apud inferos pœnas dant temerata religio-  
 nis, in æternumq; dabunt. Eosq; procul dubio Ro-  
 chezana sequetur, & qui ei auscultant, divina le-  
 gis temeratores, nisi ante finem vitæ suæ resipuerint.  
 Viri constantes, qui vel exilium vel carcerem vel  
 eadem pro testamento Christi fortiter pertulere, cum  
 rege suo in cælo regnant, ex aliena victoriâ trium-  
 phantes, quorum multa millia Bohemia tulit. Nam  
 sicut Hussitarum insania Bohemicum nomen labe-  
 factavit, ita & fortium virorum constantia illu-  
 stravit. Nec provincia est, quæ tempore nostro  
 plures Christi martyres quàm Bohemia produxerit.  
 Inter quos equitem fuisse non est ambiguum, nobili-  
 bus parentibus ortum, quem captum ab Hussitis, ad-  
 motum ignibus, pedes primum, deinde tibias, mox  
 genua coxasq; postremo reliquas corporis partes ex-  
 uri passum potius, quàm illorum insania consentiret.  
 Admiranda sunt, quæ tempestate nostra inter Bo-  
 hemos emergere, sive pacem sive bellum recenseas.  
 Mihi vero, dum valetudinis causa in balneis Viter-  
 bienfibus*



*liensibus ago, procul ab negotiis Curice, haud indigna  
 cura visa est, res Bohemicas scribere, atque homi-  
 nibus nostris ex Barbaris, quæ partim vidimus, par-  
 tim vero auditu accepimus, digna memoratu nota  
 efficere. Sunt enim multa, quæ in communi nosse  
 perutile est. Et dum cogito, cujus potissimum nomi-  
 ni dedicem, tu primus occurris, qui seculum no-  
 strum non doctrina solum ac bonis moribus, sed splen-  
 dore quoque rerum gestarum exornas, & quasi cla-  
 rissimum quoddam sydus illustras. Tibi ergo Bo-  
 hemicam historiam dedico. Nam tuo nomini inscri-  
 pta, facile cum rerum tuarum notitia, quas doctis-  
 simi celebrarunt, ad posteros transferetur: quam ego  
 ab origine gentis in hanc usque ætatem, si Deus da-  
 bit, producam. In qua etsi vetera digna sunt me-  
 moria, illustriora tamen nova existimo, quæ tum  
 certa, tum admirabilia sunt. Nec mea sententia  
 regnum ullum est, in quo ævo nostro tot mutationes,  
 tot bella, tot strages, tot miracula emerferint, quot  
 Bohemia nobis ostendit. Hæc ego tuæ Majestati li-  
 bens pandam. Vale: & quod ab homine deditissi-  
 mo tibi mittitur, quodcunque est, legito,  
 bonique consule.*



*De situ regionis Bohemicæ, de fluminibus ejusdem, & civitatibus ac de Bohemorum moribus.*

**B**ohemia in solo barbarico trans Danubium sita, Germaniæ portio est, Aquilonis flatibus tota ferme exposita. Cujus ad Orientem vergens latus Moravi obtinent, & Silesitarum natio: Septentrionem iidem Silesitæ & Saxones, qui & Misnenses & Thuringi appellantur. Ad Occidentem Advocatorum terra est Bojoariorumque regio. Meridionalem plagam tum Bojoarii, tum Australes habent, qui ripas Danubii utrasque accolunt, nec alia Bohemiæ quam Teutonum terra conjungitur. Regionis longitudo latitudoque penè par: nam formam rotundam ferunt, cujus diametrum trium dierum itinere expedito pateat. Sylva universam claudit, quam veteres Herciniam vocavere, cujus & Græci scriptores & Latini meminerunt. Flumina, quæ terram irrigant, universa in Albim exonerantur. Hic in montibus exoriens, qui Bohemiam Moraviamque determinat, mediam ferme provinciam perlabitur, primo in Occidentem, deinde in Septentrionem versus, ubi provinciam relinquit, per angustias montium & abrupta convalium præcepssaxoniam petit, quam duas in partes dirimens in Oceanum fertur, ubique à Rheno flumine æquo terrarum spatio distans. Quod plerique Germaniæ terminum, Sarmatiæque quondam dicere: sed nostra ætate Oderam fluvium, qui Silesiam intersecat, & ipsum Viscellam Prutenorum amnem Germania prætergressa Albim in alveo continet. Amnes alii, quos Bohemi memorant, Orlioze, quod Aquilam signat, Egra qui ex nomine oppidi, quod alluit, vocitatur, in terra Advocatorum exoriens apud Litomericiam Albi miscetur, sed cunctos Multavia excedit, qui metropolim regni Pragam influit, hic Saczanaim & Lusmicium & Misam & Albim secum trahit. Oppida, toto regno memorabilia, Praga regi pontificique honesta sedes, neque ignobilior Etrusca Florentia, tres in partes divisa, quæ nomina indidere, parvam Pragam, veterem ac novam. Parva sinistrum latus Multaviæ



Multaviæ fluminis occupat, colliqve conjungitur, in quo sita est regia, ac sancti Viti pontificale augustumqve templum. Vetus Praga in plano jacet, universa magnificis operibus adornata: inter quæ prætorium & forum & lætam curiam, & collegium imperatoris Caroli, mirificis efferunt laudibus. Jungitur autem minori Pragæ lapideo ponte quatuor & viginti arcuum. Novam civitatem à veteri fossa disjungit profunda, utrinque munita muro, & in quam facile fluminis aqua derivari potest. Hæc quoque civitas ampla est, & ad colles usque protenditur, quorum alterum sancti Caroli, alterum sanctæ Catharinæ appellant, tertium Vissegradum, in arcis modum exædificatum, ubi & collegium est, cujus præpositum, & cancellarium regni & principem vocant. Post Pragam Litemesce, altera in Bohemia pontificalis civitas, vicina Moravis. Cuthna quoque haud parvi nominis habetur: ubi argenti inexhaustæ venæ suffodiuntur, quamvis nostra ætate sæpius capta exhaustaqve fuerit: & in ipsas argenti fodinas pluviales aquæ derivatæ. Nec Budviciū contemnere oportet, æquè splendidum & munitum: habet etiam nomen Slagenverdiū. Eadium, Luna, & utraqve Broda, altera Bohemica, altera Teutonica: Budinge Colonia, Litomericiū, Poggiebracium, & quod regnis dotale dicunt, Greziū: potens insuper, & diutina obsidione memorabilis Pelzina, Zaziorumqve civitas, & si Bohemiæ dederis, Iglaria, qua iter est in Moraviam. Postremo arx hæreticorum asylumq; Thabor, memoria nostra ex ruinis alterius Hauschæ, difficili loco conditum oppidum, & ab Sigismundo Cæsare civitatis honore donatum. Gelida prorsus regio, pisce atqve armentis abundans, cum volucre ferisqve frumenti ferax. Sicera pro vino utitur, illi Cerevissiam vocant, quasi ex Cerere factum. Ager toto regno optimus. Circa Zazium colles, apud Litomericiū consiti vineis. Vinum, quod nascitur, acerbum, ditiores ex Austria atqve Hungaria importato utuntur. Sermo genti & Dalmatis unus. Mos vetus in hæc usque diem servatur, in templis sermone Teutonico plebes docent, in cœmiteriis Bohemico, ubi secularium presbyterorum collegia sunt aut monachorum prædia possidentium. Solis mendicantibus libertas fuit, qua vellent lingua populum instruere. Quæ res palam indicat, regionem ipsam olim Teutonicam fuisse, sensimqve subintrasse Bohemos. Quod Strabonis testimonio confirmare licet, cujus hæc verba septimo



commentario invenies: *Sennones, Suevorum natio, ut superius dixi, partim intra, partim extra sylvam habitat, Getarum contermina genti. Suevorum quidem gens amplissima, è Rheno siquidem usque ad Albim pervenit fluvium, eorum etiam portio trans Albim loca depascitur, quemadmodum Emondori & Laucosargi. Hæc Strabo. Plebs toto regno bibula, & ventri dedita, superstitionumque seqvax, & avida novitatum. Quoties Cretense vinum caupones venale proponunt, invenies quamplures, qui juramento adacti, nunquam cellam vinariam egredientur, nisi exhausto dolio. Idem efficiunt in electis Italiæ vinis. Qui paulo excellunt, atque inter plebem nobilitatemque medi sunt, audaces, versuti, ingenio vario, lingua præcipiti, rapinarum avidi sunt, quibus nihil satis esse possit. Nobilitas gloriæ appetens, belli perita, periculorum contemptrix, ac promissi tenax: quamvis ejus ingluviem explere difficillimum. At universum simul si expendas populum, non est qui religioni adversetur. Sed profecto in omni gente, qualis rector, talem invenies & populum. Quomodo autem & unde hoc genus hominum in Germaniam venerit, scripsi jampridem integerrimo & præstantissimo patri Dominico Cardinali Firmano, tuæ Serenitati amicissimo. Id hoc loco repetere non gravabor, quando historiæ, quam teximus, omnino quadrat.*

## CAP. II.

*De origine gentis Bohemorum.*

**B**ohemi sicut cæteri mortalium, originem quam vetustissimam ostendere cupientes, Sclavorum se prolem asserunt. Sclavos autem inter eos fuisse, qui post universale diluvium condendæ famosissimæ turris Babel autores habentur: atque ibi dum linguæ confusæ sunt, Sclavonos, id est verbosus appellatos, proprium idioma sumpsisse. Relicto deinde campo Sennaar, ex Asia in Europam profectos, eos agros occupasse, quos nunc Bulgari, Servii, Dalmatæ, Croaci & Bosnenses incolunt. Nondum ego quempiam legi autorem, cui fides adhibenda sit, qui tam alte suæ gentis initium reddiderit. Hebræos excipio, omnium mortalium primos. Multi ex Germanis satis se nobiles arbitrantur ex Romanis ortos, Romani ex Teucris,



Teucris originem ducere gloriosissimum putant. Franci qui & Germani fuerunt, Trojanum se sanguinem esse dixerunt. Eadem Britannis gloria satis est, qui Brutum quendam, exilio profectum, generi suo principium dedisse affirmant. At Bohemi longe altius orsi, ab ipsa confusiois turre se missos jactitant. Caterum, nec qui tunc principes fuerint, nec quem regem habuerint, nec cujus terræ cultores extiterint, nec sub quo duce, nec quibus periculis in Europam venerint, nec quo tempore, tradunt. Fuisse illic Sclavonos ajunt, dum labium universæ terræ confusum est. Vana laus, ac ridenda. Quod si qui Bohemos imitari velint, nobilitatem generis ex ipsa vetustate quaerentes, non jam exiturri Babylonica, sed ex arca Noæ, atque ex ipsa deliciarum Paradiso, primisque parentibus, & ab utero Evæ, unde omnes egressi, facile sibi principia vindicabunt. Nos ista tanquam anilia deliramenta prætermittimus. Omnes reges ex servis ortos, omnes servos ex regibus, scripsit Plato. Veram nobilitatem sola atque unica virtus gignit. Multa sunt, quæ de Bohemis vera ac memorabilia traduntur: ad ea, nugis omisis, festinat calamus.

## CAP. III.

*De Zechio, primo duce Bohemia.*

**Z**Echius Croatinus haud obscuris parentibus ortus; gentem Bohemicam condidit: qui homicidio domi perpetrato iudicium ultionemque fugiens, in regionem eam venit, cui nunc Bohemia nomen est: ac montem incoluit Chezip vocatum: quod vocabulum latine, *respiciens*, interpretatur. Surgit enim ex medio camporum æquore fluvios intuens, qui præcipui Bohemiam irrigant, Albim, Multaviam, atque Egram. Terram incultam fuisse tradunt, nemoribus atque sentibus asperam, serisque quam hominibus aptiorem. Credimus id quidem: nam præci Germani, qui ea loca tenuerunt, pastorem vitam agentes, agrorum culturam neglexerunt, ac more Nomadum alimoniam ex pecoribus trahentes, domesticum in carris tollentes instrumentum, quocunque sors tulit & opinio, cum suis armentis convertabantur. Non assentimur Bohemorum historiæ, quæ Zechium illum, omnemque familiam suam



(nam frater cognatiqve fugæ comites erant) glandibus ac sylvestribus pomis tantum vitam duxisse affirmat, oblitterato jam tum glandium usu: nec post diluvium ex his fuisse hominibus victum crediderim. Illud mihi persvasibilis fuerit, Zechium paucos invenisse cultores, quos lacte ac venatu viventes, arare terram, triticum serere, fruges metere, vesciq; pane docuerit: atq; ita sibi rudes homines ac penè feros, ad usum mitioris vitæ redactos subjecerit. Nec rursus apud me pondus habet, omnia tum fuisse cōmunia atq; tam viros quàm fœminas incessisse nudos. Neq; enim illa regionis temperies est, ut hominem asservare nudum queat ex Dalmatia venientem, ubi non defuit vestis usus: nisi fortassis in argumentum quis advexerit Adamitas, qui nostra tempestate apud Bohemos emergere, communione rerum omnium nuditateqve gaudentes, quos brevi deletos constat. Zechio frater fuit nomine Leches, paupertatis & exilii comes. Hic ubi germanum agris ditatum, bobusqve potentem adnadvertit, ad Orientem profectus, in magna camporum planitie sedem collocavit, Poloniamqve nomen ex loco dedit. Nam planities Slavonica lingua Pole nominatur. Cujus hæredes in numerosam multitudinem brevi coaluerunt, ac Russiam, Pomeraniam, Casubiamqve, sui generis hominibus impleverunt. Zechii quoqve familiam, Bohemos, id est, dirivos appellant, mirum in modum germinantes: non solum provinciam à se dictam, sed Moraviam Lusatiamqve pulsas veteribus incolis occuparunt. Dum vixit Zechius, nihil temere, nihil tumultuose actum: ejus imperio sine controversia obtemperatum. At eo vita functo, cum quisqve sibi principatum vindicaret, diu seditionibus agitata provincia est, sine principe, sine certa lege, judicio tantum multitudinis gubernata. Postremo cum potentiores imbecilles opprimerent, scurum atqve incertum esset populare remedium, exre visum est rectorem assumere, qui omnibus præsidens imbecilles ac potentiores pari jure gubernaret.



## CAP. IV.

*De Croco, secundo Bohemorum duce.*

**E**Rat per idem tempus apud Bohemos vir nomine Crocus, justitiæ opinione insignis, ac propterea magnæ apud vulgus auctoritatis: hunc sibi principem deligunt, summamqve ei rerum committunt. Cujus tanta moderatio fuit, ut non aliter quàm pater à provincialibus coleretur. Neque enim ad suam voluptatem, sed pro subditorum utilitate ac quiete provinciam rexit, ferocemqve populum non tam imperio, quàm benevolentia quietum continuit. Hic arcem apud Stemniam condidit, quàm de suo nomine Crocaviam nominavit. Moriens autem tres filias reliquit, Brelam, quæ castellum Brelum ædificavit, herbarum ac medicinæ peritam. Therbam sive Therbizam augurem & sortilegam. Tertiam Libussam, quæ ut natu minor fuit, ita divinarum humanarumqve rerum scientia major.

## CAP. V.

*De Libussa, filia Croci, quæ pluribus annis rexit Bohemiam.*

**L**ibussa autem velut una ex Sibyllis habita, post obitum patris savente populo pluribus annis provinciam gubernavit: & priusquam Praga ædificaretur, arcem Vissegradensem communivit: fuitqve suum imperium patribus plebiqve juxta gratum. Postremo non crudelitate aliqua, non tyrannide aut socordia usa, sed rectum judicium faciens, popularem favorem amisit. Contendebant coram ea duo ex optimatibus de possessione agrorum. Sententia ex bono & æquo dicta: potentior humiliori damnatur. Ille tanquam injuria esset, potentio rem in judicio succumbere, populares appellans, indecorum esse indignumq; ait, tantum populum, tot proceres, tantum imperium, unius scemina subesse arbitrio. Ad cujus vocem excitata multitudo, muliebre regimen accusare, vicinarum gentium mores in medium adducere, virum qui sibi dominetur, expectere. Libussa, indicto



silentio, desiderium se populi animadvertisse dicit, neque se illos co-  
frustraturam, imperium subditis, non sibi, post patris obitum tenuis-  
se. Jubet ad diem posterum redeant. Obtemperatum est, itum atque  
reventum,

## CAP. VI.

*De Primislao tertio Bohemorum Duce.*

**L**ibussa in concione ubi adesse multitudinem vidit, *Ego vobis, in-*  
*quit, Bohemi in hanc usque diem, placide molliterq̃, ut mulieribus*  
*mos est, imperavi: nulli quod suum esset eripui: nullum lasi. Ma-*  
*orem experti estis, non dominam. At vobis meum regimen ingratum.*  
*Mors humani ingenii mecum agitis. Nihil diu placet homini. Pium ju-*  
*stumq̃, principem desiderant populi magis quam ferunt. Estote ergo judicatu*  
*meo liberi: virum qui vobis præsit, quiq̃, suo arbitratu capita vestra judicet,*  
*sicut optastis, dabo. Ite, equum meum albicantem sternite, atque in campos la-*  
*tè patentes adducite, liberum effrenemq̃, ibi dimittite: sequentes eum quocun-*  
*que ierit. Currat equus aliquandiu, denique ante virum subsistet, in men-*  
*sa ferrea comedentem: ille mihi conjunx erit, vobis princeps. Gratus sermo*  
*concioni fuit.* Emissus equus decem millia passuum percurrit. Postremo  
ad flumen Bieli ante aratorem constitit, nomine Primislaum. Secuti  
proceres popularesq̃ve postquam stantem equum, & aratori blandien-  
tem adulantemq̃ve viderunt, accedentes propius, *Salve, inquirunt,*  
*bone vir, quem nobis superi dederunt principem. Solve boves, atque ascenso*  
*equo nobiscum venito. Libussa te virum, Bohemia ducem poscit.* Agrum  
colere, gregem pascere, navim regere, texere, suere, ædificare, mul-  
ti se ignorare fatentur. Magistratum in urbibus agere, regem gerere,  
gentibus ac nationibus imperare, quod est difficillimum, nemo sibi à  
natura negatum dicit, et si plerique sive laboris odio, sive otii amore  
oblatis regnis abstinuere. Primislaus, quamvis agrestis, nuntios be-  
nigne excipit, facturumq̃ve postulata respondit. Tanta est mortalibus  
regnandi cupido, nemo se regno indignum putat. Solutos boves, ut fa-  
bulosa est omnis antiquitas, elevatos in aëra ferunt, & in altissimam  
præscissa rupis speluncam delituisse, nunquam postea visos. Stimu-  
lum verò, quo boves urgebantur, terræ defixum, mox fronduisse,



ac tres coryli ramos emisisse: ex quibus duo statim exaruerunt, tertium in arborem ejusdem generis proceram excrevisse. Non recipio ad me veri istius periculum, apud autores ista quærantur. Vidi tamen inter privilegia regni, literas Caroli quarti Romanorum imperatoris, divi Sigismundi patris, in quibus hæc tanquam vera continentur, villæque illius incolæ, in qua hæc gesta creduntur, libertate donantur, nec plus tributum pendere jubentur, quam nucum illius arboris exiguum mensuram. Sed nec mihi Carolus fidem facit. Nam Reges plerumque creduli sunt, nec quidquam non verum putant, quod generis sui claritatem astringit. Primislaus igitur audita legatione, inverso vomere, pane caseoque appposito, viam quasi grandem facturum, cibum sumpsit. Eares Bohemorum animos confortavit, mensam ferream, de qua Libussa vaticinata fuerat, in vomere cognoscentes. Stupentes edentem circumstant, saturum equo imponunt, jubentque festinare. Inter eundem, quid sibi vult stimulus frondens? interrogant, & cur duo rami mox aruerunt? Ille, qui divinandi peritia calleret, tres sibi liberos nascituros ait, ex quibus duo funere immaturo deficiant, tertium nobiles fructus editurum. Quod si ager totus aruisset ante vocationem, genus ejus masculinum perpetuo regnaturum fuisse: cum ante tempus accersitus sit, eam spem ademptam. Interrogatus, cur nam calceos quævo robore factos secum afferret: Servandos in arce Vissegradensi respondit, ostendendosque posteris, ut scirent omnes primum, qui principatum inter Bohemos accepisset, ex agro fuisse vocatum, neque insolescendum esse, qui ex humili fortuna solum ascenderit. Servati calcei diu apud Bohemos, religiose habiti, ac per sacerdotes templi Vissegradensis ante reges delati, dum pompa coronationis educitur. Cum Vissegradum appulisset Primislaus, ingenti favore plebis atque honore exceptus est: Libussamque sibi matrimonio junxit. Nec diu moratus, Pragensæ oppidum aggere atque muro cinxit. De cujus nomine dum disceptaretur, jussit Libussa ex artificibus, qui primo occurrerit, rogari quid ageret, ac ex primo verbo ejus vocari oppidum. Interrogatus faber lignarius quispiam: limen se agere dixit, quod Bohemice, Praha dicitur, indeque nomen urbi datum. Sed corrupto vocabulo posterius Pragam dixere. Exinde leges conditæ, quibus Bohemi longo tempore usi, provincia pace & otio fruens, opibus aucta est. Et Libussa castellum Libus ædificavit,



ficavit, non longe ab 'Albi flumine: quod morienti sepulchrum fuit. Qua mortua, imperium ad Primislaum solum rediit, quod, vivente, conjugē, ejus maximo consilio administravit, foeminarum, quæ illa vivente plurimum poterant, autoritas extincta.

## CAP. VII.

*De puella Valasca, quæ principatum Bohemiæ,  
more Amazonum, septennio potenter  
obtenuit.*

**S**Ed fuit inter virgines, quæ Libussæ ministrare solebant, Valasca puella ingentis spiritus & Amazonicæ mentis, quæ clanculum accersitis comitibus, *Heram*, inquit, ô sorores perdidimus, quæ nos à virorum contumelia vindicavit, nec passæ est servire viris: contra, viri ejusdem imperium subicere, nos Reginarum honore fungebamur. Nunc jugum asperum & miserimum ferre oportet, nisi libertatem nobis ipsis vendicemus, vilissima mancipia sumus. Quod si vobis id animi est, quod mihi, facile pristinam auctoritatem obtinebimus. Ego secretorum Libussæ conscia, *Therbiza* quoque sortes novi, herbarum vires non minus quàm *Brela* calleo, quod tres habuere sorores, hoc mihi soli datum est. Adfistite audenti, vobis imperium in viros polliceor. Probant singulæ Valascæ consilium, conjurant, poculum recipiunt, quo virile genus odissent. Interea loci *Primislaus* virginem sibi per quietem sanguineum ministrare potum videt. Territus somno, ac malum, quod erat futurum, suspicatus, primores terræ admonet, ne tantum licentiæ foemineo sexui prabeatur. Mos enim virginibus erat equos ascendere, fatigare cursu, flectere in gyrum, hasta contendere, gestare pharetram & arcum, sagittare, jaculari, venari, nihil officii virilis omittere. Quod *Primislao* tum periculosum, tum bonis adversum moribus videbatur. At proceres ridere principem, foemineum sexum nil ausurum magis credere. Mirari tanto magis atque amare puellas, quanto agiliores ac doctiores dicerentur. Valasca monere interdium noctuque conspirationis socias, spem bonam facere, audaciam augere, poculis atque carminibus mentes earum à virorum amore avertere, dictim plures



plures allicere, provinciam universam veneno inficere. Ubi jam virginum ac nuptarum satis convenisse arbitratur, mandat omnibus suos viros, parentes, germanos, filios mares, omnes somno vinoque sepultos nocte occidant, armis equisque arreptis, in campum prodeant, non longe à Praga monstratum. Maturatur scelus, virorum quantum imperatum erat interficitur, veniunt in campum armatae feminae, prostratoque virorum exercitu, qui parricidas insequabantur, ducem in arce Vissegradensi obsident. Quam cum expugnare nequirent, castellum sibi haud procul inde in prærupto undique colle naturaque munitissimo ædificant, quod Dievizum appellant, quasi virginum castrum. Dievizæ namque eorum lingua virgines nuncupantur. Res visa patribus plebiqve perniciosissima, tum propter admissum scelus, tum quod illarum exemplo reliquas adduci feminas verebantur, & hostem cuique domi esse formidabile tuit. Hortantur itaque principem, ut puellas bello coercet, se cum copiis affuturos promittunt. Primislaus se à Diis admonitum ait, perituros omnes, qui puellas armis lacestant, tempus aliud expectandum. Illi spreto consilio, coacto sine principe exercitu, castra ad Dievizum ponunt, puellasque cingere obsidione pergunt. Valasca nil territa, in majori discrimine majorem adhibet animum, comites ne mente labantur, plena fiducia hortatur, advenisse tempus affirmat, quo toti Bohemiæ leges imponant, videre se omnes provinciæ optimates in suam potestatem venisse, vires tantum acuant, victoriam in manibus esse. Neque novum viros mulieribus obedisse, Amazones sibi Asiam vectigalem secisse, pugnasse ad Trojam, Thesei atque Herculis arma contempsisse. Si consilium atque animus mulieribus adsit, vires haudquaquam deesse, nullius Bohemi consilium suo præferre. Ubi persuasam multitudinem animadvertit, palantes hostes & nil tale verentes, aggreditur. Fit trepidatio totis castris. Mox foeda oritur fuga, instant virgines, virosque passim trucidant. Neque aliter pugnatum est, quam si muliebres viri animos, viriles feminae induissent. Pauci ex ea pugna evaserunt, quos velocitas equorum, non sua virtus, à morte redemit. Singularis audaciæ in hoc prælio septem puellas fuisse memorant, Maladam, Nodeam, Svataciam, Vorastam, Radgam, Zastanam, Tristanam: Reginam sua manu septem viros interemisse. Spolia ingentia capta, præmia pro meritis reddita, septem quæ vir-



tute præstiterant, torqvibus aureis atqve armillis donatas, Valascam veluti deam habitam, neqve post id prælium Bohemis adversus puellas audaciam fuisse. Illæ populari agros, abducere prædas, rapere, occidere, villas incendere, potentiam indies augere, fingere interdum se virorum amore teneri, amatorias epistolas nobilibus adolescentibus mittere, detestari fastum atqve insolentiam Valascae, simulare fugam, rogare, ut in sylvam potenti manu venirent, ac se raperent. Juvenes qvi puellarum facinora magis admirarentur qvàm odissent, victi blanditiis captiqve nonnullarum specie, (erant enim ple-ræqve pulcherrimæ) imperata facessunt. Sed ingressi sylvas, insidiis circumventi trucidantur. Alii nova fraude in arcem vocantur, Valascam velut per traditionem comprehensuri. Qvi mox intromissi, ad unum necantur. Ubi jam nulla fides virginibus est, commentum inauditum excogitant.

## CAP. VIII.

*De puella Sarca, quomodo dolose nobilem Stiradam deceperit, mortiq; tradiderit.*

**S**arca erat inter puellas admodum honesta facie, sed animo impuro, & ad omne scelus parato. Hanc in altissimo nemore strictis pedibus ac manibus arbori alligant, tubamqve venatoriam, ac vasculum medone plenum juxta ponunt: ipsæ in insidiis haud procul delitescunt. Solebat hac iter sæpe facere Stiradus nobilis eqves inter Bohemos, opibus & autoritate potens, & qvi puellarum tyrannidem præ cæteris abhorreret, atqve persequeretur. Is ergo cum sylvam pro suo more venaturus intrasset, puellamqve vinctam conspicatus esset, miserabundus qvid sibi ea res vellet, percontatur. Cui Sarca: *Nosti, inquit, quot scelera his in regionibus Valasca perpetravit, dum sibi potentiam regnumq; vendicat. Ego quoque pariter in furorem acta, insaniam ejusdem aliquandiu secuta sum. Peccavi fateor, parituit me tamen tot ineptiarum denique, cogitaviq; quonam modo scelestam relinquere vitam possem: statui ab iniqua discedere domina, Sed dum comitem fugæ quæro, prodita captaq; huc deducor, hic de me sumere statuerat supplicium sanguinaria carnifex. Interea dum ligor, dumq; mihi ultima verba dicuntur, ne*

*auditus*



*auditus est tuorum canum latratus, atque hinnitus equorum, illa mea socie salutem pedibus quaesire. At ego te vir clarissime, quem unum perfida turba metuit, per nobilitatem tuam oro, miserere infelicitis fœminæ. Solve me obsecro, atque abducito, aut si hoc non places, jugula me potius quam hic vivam deferas. Namque ubi abieris, mox aderit iniqua virginum cohors, meq; diris lacerabunt modic. Fuvat tua manu perire. Stiradus lachrymis motus muliebribus puellæqve forma captus, eqvo desiliens vincla solvit, rogatqve medonis vasculum simulqve tuba apposita quid sibi velint. Tum Sarca, medonem, inquit, optimum carnifices attulerunt, quo inter cruciandum uter, hunc jam læta securaqve bibam, & haustu sumpto, quod reliquum fuit Stirado propinavit, qui pariter bibit. Erat autem potus suavissimus, quem Bohemi ex albo melle conficiunt, sed quam mulieribus saluber, herbis & carminibus adhibitis, tam viro pestilens, qui mentem Stirado prorsus alienavit. Exinde, tuba hæc, inquit, mea fuit dum venarer, quam mihi mortuæ ad collum suspendere statuerant pessima, quasi venatricis signum. Instabo ut intelligant me viventem, suisq; manibus ereptam esse. Moxq; tuba cecinit. Valasca ubi sonitum audivit, ex composito cum armatis puellis adest, Stiradum incautum capit, comites ejus obruncat. Ferunt dum hæc agerentur, auditum tota sylva ingentem veluti ridentium strepitum, ubi dum esset hominum solitudo, creditum dæmones de puellarum facinore ac fallacia cachinnatos. Illas vero instructo exercitu Stiradum catenis vinctum, in conspectu arcis Vissegradensis deduxisse, ibiqve prospectante Bohemorum principe nobilem virum rotæ supplicio, quod est inter Germanos atrocissimum ac miserrimum, peremisse. Post hæc jam plane regionis dominas viros sibi adscivisse, ex quorum complexu novis fœtibus rempublicam sustentarent, sancitumqve lege, ut natæ fœminæ diligenter asservarentur, masculis dextri oculi eruerentur, amputarenturqve pollices, ne viri facti arcus tendere aut armis uti valerent. Idqve aliquandiu factitatum. Septem annis ea pestis Bohemiam afflixit, tributariaqve magna ex parte provincia virginibus fuit. Qui detrectavere imperium: intra moenia clausi, nusquam exire audentes, magnis incommodis affecti sunt. Denique cum necessaria deessent, eoqve perducta res videretur, ut coactos fame deditionem facere oporteret, tumultuarie principem adeunt, dirum puellarum bellum deplorant, ignaviam ducis accusant, malle se fœminis obedire*



quam perire inedia dicunt, aut populum tueatur, aut meliori cedat, probris & contumeliis minas adjiciunt. Primislaus tot angustiis circumventus, cum non tam armis, quam sortibus valeret, plebem paucos adhuc dies expectare hortatur, id si faciant, puellarum excidium imminere. Paret multitudo. Ipse medio tempore scribit Valascæ, injussu suo optimates provinciæ arma in eam sumpsisse, placere sibi eos subiisse pœnas. Se illam filiæ loco amare, neque invidere principatum, quæ conjugis suæ Libussæ discipula extitisset, imperium virtuti suæ deberi, quæ Bohemiam virili audacia bello attrivisset, senium suum regno ineptum, neque filio impuberi gubernationem credendam, monere ut arcem Vissegradensem ex manibus suis accipiat, sic Bohemiam totam in potestatem ejus venturam, filio quam velit partem faciat. Sibi privato, quod restat ætatis, vivere libeat atque in agrum reverti, quem reliquisset invitus. Potestatem quam sibi scemina tradidisset, jure optimo se sceminæ restituere. Capitur Valasca suis artibus missa quæve puellarum cohorte, tradi sibi arcem postulat. Intromissæ virgines apud principem opipare epulantur. Interea prosilientes ex insidiis juvenes armati, puellas omnes trucidant, nec morati castellum Dievizum cum exercitu petunt. Valasca recognita, furore amens, cum paucis obvia egreditur, confertoque prælio priusquam comites assint, dum strenue pugnat, inter confertissimas hostium turmas occiditur. Subsecutæ virgines, ubi dominam cecidisse cognoscunt, non tam spe victoriæ, quam ultionis ardore certamen instaurant. Pugnatum est aliquandiu, nunc huc, nunc illuc victoria inclinante: ad extremum infelicitèr præliantes sceminæ, cæsis quam pluribus, fugæ se commiserunt. Subsecuti hostes, uno agmine victores cum victis castellum irrupere, potiti quæ arce, quicquid sceminei sexus inventum est, ferro extinxere, atque hoc pacto magnanimi juvenes dominatu scemineo Bohemiam liberarunt. Valasca inter sceminas clarissimas numeranda, plus aucta quam sexui suo congrueret, insepulto cadavere jacens, feris ac volucribus esca fuit.



## CAP. IX.

*De Nimislao quarto, ac Mnata quinto, Vorcioq; sexto, nec non Vinslao septimo Bohemorum ducibus.*

**P**Rimislao ex Libussa tres filii nati, duo immaturo rapti funere, tertius morienti seni haeres dictus, Nimislaus nomine, quod nihil excogitans interpretatur. Fuit enim stupidi ingenii & prorsus iners: inter scorta & concubinas otio marcens. Molliciem ejus fortuna consovit: quæ pacem illi perpetuam dedit, nullo vicinorum arma movente, nec seditionibus studente populo, quem diutina virginum bella prorsus extenuaverant. Huic Mnata filius subsequutus est. Mnata Vorcius, cui duo fuerunt filii, Vinslaus & Uratislaus. Inter quos moriens partitus est terram. Vinslao Praga & ducatus Bohemiæ cessit; Uratislao Lucensis principatus, qui post Zacensis dictus est.

## CAP. X.

*De Grezomislao, qui & Neclam dictus est, octavo Bohemorum duce. Et gravibello, quod gessit cum patruo suo Uratislao.*

**E**X Vinslao natus est Grezomislaus, qui & Neclam dictus est, unicum timoris & pacis exemplum. Cujus ignaviam in animo volvens patruus, optimum instrumentum ad subigendam sibi Bohemiam ratus, arma movens plura adversus eum bella feliciter gessit. Quibus magnificatus & auctus, urbem condidit inter duos montes Mecdnam & Pubecham, quam de suo nomine Uratislaviam nuncupavit. Neq; contentus prioribus victoriis, novum nepoti bellum indicit capitalem poenam interminans, qui gladii longitudinem æquant in prælio deessent. Jubet quoque purpuratos suos falcones atque accipitres secum asserant, quos humana carne pascere velit, non ad



pugnam, sed ad eadem iturus. Postremo se nulli ætati parsurum dicit, ipsosque lactentes pueros ab ubere matrum rapi atque confodi mandat, mammasque mulierum pullis equorum sugendas tradi. Insolens sanè ac superbissimus, & fortasse crudelior quàm si vicisset. Parte alia, Neclam vir muliere corruptior, trepidare atque pavere, nihil consilii, nihil spei habere, ultimam vitæ suæ diem advenisse putare, non gladium intueri, non milites affari posse, alieno tamen ductus consilio se pugnae interfuturum dicit. Et accersito clam Sclerico nobili equite, figura corporis sibi quàm persimili, animi vero fortitudine & corporis robore dissimillimo. Fuit enim manu promptissimus, & audaci animo, atque in primis rei bellicæ peritissimus. Huñc suis armis indutum, ac insignibus principalibus honestatum, quàm paucissimis rem scientibus, dare ducis munia jubet. Multa interim vatum præfagia, scæminarum quoque spiritu, ut ajunt, pythónico imbutarum vaticinia exquiruntur. Ex quibus una placandos Deos humana hostia respondit, sic enim victoriam repromitti. Cui Neclam plus religioni quàm armis fidens, cæso quem sortes designavere juvene, morem gessit. In alia parte mulierem fuisse tradunt, quæ privigno bellum petituto, Uratislaum in pugna casurum, majoremque populi partem cum eo interituram prædixerit, posse tamen evadere juvenem, si sibi crederetur. Adolescenti se credere, atque imperata facturum respondentem, jussisse ut pergeret, quando remanere domi capitale esset, primum qui obvius fieret occidere, atque utrasque aures cadenti amputare, & in pera recondere. Exin gladio inter priores equi pedes signum crucis in terram facere, qua deosculata, equum ascendentem fugam maturare. Pugna in campo, cui Thusco nomen est, committitur, concurrunt acies, magnis utrinque viribus ac clamoribus certatur. Stat belli fortuna diu anceps, multi hinc atque inde vulnerantur, prosternuntur, occiduntur. Ad ultimum Bohemi, qui non pro gloria, aut ampliando imperio, sed pro vita, pro focis, pro aris, pro uxoribus ac liberis in aciem venissent, desperatione in virtutem versa, audacibus animis invicto robore præliantes, victoria potiuntur, non sine Sclercii magna laude & summa gloria, cujus in hoc bello tum ars, tum virtus plurimum valuit. Occiditur tamen inter præliandum, & ut jusserat, in eo campo sepultus est, ubi prælium gestum, suaque morte vitam ducis, & patriæ liberationem obtinuit.

Parte



Parte autem alia, duce prostrato, quam paucissimi evaserunt. Ajunt adolescentem, qui novercæ jussioni paruerat, domum redeuntem, uxorem suam, quam unice amavit, interemptam reperisse, ambabus carentem auribus, pectusque confossum, & quas hosti amputaverat aures, conjugis suæ fuisse stupentem tristemque cognovisse. Tantum præstigia possunt, aut veneficarum carmina mulierum.

## CAP. XI.

*De infidelitate Duringi, qui Uratislai filium sibi commissum interfecit, pœnamque condignam dedit.*

**B**ohemi parta victoria, occiso Uratislao, terram ejus ferro atque igne devastant: inventumque Uratislai filium impuberem, principi tradunt. Qui misertus ætatis, patruelem educandum Duringo, ad Egram fluvium imperium possidenti, Uratislai potentissimo quondam comiti tradidit. Qui cæca cupidine captus, tanquam initurus principis gratiam, puero super Egram, qui tum glacie constrictus erat, perfracto gelu pisces quærenti, gladio caput abstulit, secum Pragam deferens, ubi ad Neclam introductus est, proferens cruentum caput, *solium*, inquit, *tuum hodie firmavi, aut perire hoc, aut te oportuit. Securius in utramvis aurem posthac dormies, amulo regni sublato.* Motus haud aliter quam par erat princeps tam diro spectaculo, perfidiam, ait, *nulla beneficia vincunt. Ut aleres puerum, non ut occideres, credidi. Te neque meum in perium, neque amici memoria, neque innocentis pupilli misratio retraxit ab scelere. At mihi quicquam parare voluisti, cui ergo meriti hac sumito pramia. Ex tribus mortibus, quam malueris optionem habeto: aut gladio te ipsum confodito, aut laqueo perfringito guttur, aut ex Vissegradensi rupe præceps ruito.* Duringus accepta sententia, in alni arbore, quæ propinqua fuit, sese suspendit, alnus postea quamdiu remansit, arbor Duringa dicta est.



*De Nostirico nono, & Borsivojo decimo Bohemorum ducibus, qui & ultimus Paganorum ducum fuit, & tandem cum uxore sua fidem Christi suscipiens baptizatus est.*

**N**Eclam verò moriens, Nostiricum majorem natu filium hæredem instituit, Dipoldo provinciam Surimensem testamento dimisit. Nostirico Borsivojus filius successit, ultimus Paganorum ducum: qui tamen & ipse imperante Arnolpho Cæsare, à beato Methodio Moravorum archiepiscopo, cum Ludmilla, conjugē ad baptismi gratiam perductus est. Nongentesimo nonagesimo quinto anno post Christi salvatoris nostri ortum, Ludmilla sancta mulier habita, etiam miraculis clarissima fertur.

## CAP. XIII.

*De situ Moravia, & Svatocopio, penultimo rege ejusdem, qui & primus Christianus inter reges Moravia fuit.*

**S**Vatocopius eo tempore Moravis imperabat, Christianæ religionis cultor, & dignus cujus memoriam ad posteros referamus. Moravia trans Danubium jacet, cui ad orientem Hungari Poloniqve regnum possident, Morava disjuncti amne, qui nomen regioni dedit. Occidentem solem Bohemi excipiunt: Australes meridiana: Septentrionale latus Silesiæ occupant. Ager vini frumenti qve ferax, gens rapinis asveta, nulli tutum iter nisi armato potentiori qve præbet. Hic multos annos regnatum. Hungari, Bohemi, Russani, Poloni qve, Moravorum principi paruerunt, princeps ipse Romano imperio. Caput regni civitas Volegradensis. Svatocopius regum, penultimus, cum aliquandiu feliciter regnasset, tandem Arnolpho imperatori tributum pendere recusans, commisso prælio, cum suis cadere



cadere animadvertisset, clam sese pugnae subtraxit, atque ut erat mutata veste incognitus, salutem fuga quaesivit. Cumque ad montem venisset, cui Sambri nomen est, abjectis armis, equo dimisso pedibus iter fecit, & tanquam viator inops, vastissimam ingressus eremum tam diu pomis arborum, atque herbarum radicibus vitam sustentavit, donec tres eremi cultores obvios habuit, quibus sese adjungens, usque ad extremum vitae perseveravit incognitus, patienter ac sedato animo incommoda quaeque ferens. Ubi vero obitus affuit, accersitis eremitis, *nondum*, inquit, *quis fuerim novistis. Rex ego Moravorum, praelio victus ad vos confugi, & regiam vitam & privatam expertus morior. Nulla regni fortuna est tranquillitati eremi praefenda. Hic securus somnus dulces herbarum radices atque undas efficit, ibi cura atque pericula nullum cibum, nullum potum non amarum reddunt. Quod vita mihi fata dederunt, apud vos felix peregi: in regno quicquid ejus transactum est, mors verius quam vita fuit. Sepelire me hic postquam anima corpus liquerit, Moraviamque, deinde petentes, filio meo, si adhuc vivit, hac nunciate.* Atque his dictis vita excessit. Arnolphus interea victoria potitus, regnum Moraviae Svatocopii filio, quem de sacro fonte levaverat, possidendum reliquit. Is ab eremitis edoctus de fortuna patris, quem cecidisse in praelio existimaverat, corpus ejus ex eremo defossus, Volegradum retulit, atque in sepulchris majorum condidit. Fuit autem Svatocopii filius, quancquam Christianorum sacris imbutus, minus tamen quam decuit, sacerdotes Dei veneratus. Qui venationem aliquando facturus, archiepiscopo Methodio imperavit, ne ante suum reditum divina perageret. Expectavit Methodius ad meridiem usque; tandem negligi rem divinam veritus, Deo sacrificium coepit offerre. Interea princeps, ubi se neglectum animadvertit, sacram ingressus aedem, multitudinem canum intromisit, tubasque clangere jubens, ad altare usque progressus, convitia multa ingerens, vix manus a violatione sacerdotis abstinuit. Ob quam rem, paucis post diebus Methodius in Bohemiam fugiens, regem extra ecclesiam fecit, regnoque sacris interdixit. Quo facto, non solum archiepiscopalis sedes in Moravia defecit, sed in seipso quoque regnum extinctum est. Mortuo namque paulopost excommunicato rege, imperii Moravorum partem Teutones ac Bohemi, partem Poloni atque Hungari diripuerunt. Methodius in Bohemia aliquandiu moram traxit, deinde Romam se contulit,



tulit, ubi fratrem suum Cyrillum comperit, qui, baptizato quondam Svatocopio, Moravis Christiana sacra crediderat, multasque alias Slavorum gentes ad fidem Christi converterat. Referunt Cyrillum cum Romæ ageret, Romano pontifici supplicasse, ut Slavorum lingua ejus gentis hominibus, quam baptizaverat, rem divinam faciens uti posset. De qua re dum in sacro senatu disceptaretur, essentque non pauci contradictores, auditam vocem tanquam de cœlo in hæc verba missam: *Omnis spiritus laudet dominum, & omnis lingua confiteatur ei.* Indeque datum Cyrillo indultum.

## CAP. XIV.

*De Spitigneo undecimo, ac Vradislao duodecimo Bohemorum ducibus.*

**B**orsivojus autem, conjunxque Ludmilla, Christianam veritatem amplexi, fidem catholicam inter Bohemos magnopere ampliarunt. Ludmilla filia fuit comitis Slamborii castelli Bizenæ, quod postea Melina dictum est. Ex qua tulit Borsivojus duos filios, Spitigneum & Uradislaum. Primus patri successit, sed moriens sine filiis, fratri principatum reliquit. Conjunx Uradislai Drabonucia, mulier audax & ad scelus prona, duos pariter filios viro peperit, Venceslaum & Boleslaum. Priorem Ludmillæ tradidit educandum, alterum ipsa enutrivit. Alumni ex nutricibus imitati mores. Venceslaus pietatem colere, mansuetudinem præ se ferre, Christiana sacra venerari, elargiri multa pauperibus, nulli noxius esse: Boleslaus idolorum sectari culturam, honores ambitiose querere, adulterari, rapere, occidere, in scelera cuncta labi,

## CAP. XV.

*De sancto Venceslao martyre, tertiodecimo, & fratre suo Boleslao quartodecimo Bohemorum ducibus.*

**P**ater suprema ordinans, Ludmillæ, cujus integritatem prudentiamque optime nosset, quousque liberi adolevisent, gubernationem



tionem provinciæ dimiserat. Id ægre Drabonuciæ fuit, quæ Tymam & Simonem nefarios homines submittens, focrum in castello Thetimi strangulari iussit. Ipsa deinde imperium accepit. In omnes crudelis, in Christianos sævissima & intolerabilis, ac propterea Venceslao etiam filio infesta, cui præferre fratrem non dubitavit. De Venceslao hæc referuntur. Potus cibiqve parcissimum fuisse tradunt, corporis maiestate decorum, virginitatem ad ultimum vitæ servasse, divina in templis officia, diurna nocturnaq; nunquam neglexisse. Et noctis quidem tempore nudis pedibus super glaciem ac nivem iter agentem, vim frigoris minime sensisse. Podium vero ejus comitem cum caligatus obriguisset, iussu vestigia Venceslai pedibus premere concaluisse. Postera die cruenta sancti viri vestigia inventa. Inisse cum populo perurgente, adhuc vivente matre, principatum. Duci vero Curmensi, nulla injuria lacessito, cum exercitu in Bohemiam ingressu, atqve agros vastare conanti, armatum cum copiis occurrisse, vocatoqve in colloquium, singulare certamen obtulisse. Accepta ab adversario conditione, ubi manus conferi debuit, angelos visos, qui Venceslaum protegentes arma ministrarent, territum ea novitate Curmensem, ex eqvo prolapsu veniam petivisse, Bohemum libenter humiliato pepercisse, monuisseqve ne deinceps aliena cuperet. Similem angelorum comitatu vidisse ajunt imperatorem, cum Venceslaus adolescens in ejus curia obversaretur, eamqve ob causam brachium sancti Vitidono ei dedisse, in cujus honore cathedralis ædes in Praga constructa est. Ferunt tunc Bohemiam sub episcopo Ratisbonensi fuisse, ac propterea cum Venceslaus Volsigangum præsidem, qui postea inter sanctos relatus est, ad consecrationem ejus basilicæ summis precibus invitasset, respondisse pontificem, coram Deo jam templum suum dedicatum esse, quod futuram Metropolitam cerneret, missurum se tamen, qui sua vice Venceslao satisfaceret. Creverat jam Venceslai nomen, mira qve populi charitate atqve admiratione celebrabatur. Sed quanto cæteris acceptior erat, tanto acrius in se odium fratrisqve matrisqve concitabat, ac propterea licet dimittere seculum, & in monachum tonderi destinasset: non potuerunt infelices animæ sancti viri propositum expectare, sed impatientes moræ piam principis intensionem scelere pravehiunt. Fit convivium apud Boleslaum, matre jubente, vocatur Venceslaus. Qui etsi mortem in-



stare prædixerat, facta tamen cum sacerdote de peccatis suis ex more Christiano confessione, fraternam domum ingreditur, ibique statim Boleslai manu percussus interiit. Dicat aliquis homicidam suipsum Venceslaum fuisse, negetque cœlo dignum, qui certæ se morti obtulerit. Nos Gothorum instante procella plurimas Romæ fuisse puellas legimus, quæ pudicitiae suæ vim inferri timentes, & ne in manus hostiles inciderent, in Tyberim sese præcipitaverunt, quæ postea miraculis coruscantes, sanctorum honores meruere. Venceslai sanctitati quæ die cæsus est, Christum Deum testimonium præstitisse, memoriæ prodiderunt, qui regi Daciæ per visum apparens, suo martyri ad eum construere mandavit. Ipsum autem Venceslaum multis miraculis claruisse, atque inter sanctos martyres ab ecclesia receptum tradunt. Drabonuciam paucis post diebus fatis suis trahentibus, ultionemque parricidii exigentibus, hiatu terræ apud arcem Pragensem absorptam. Boleslaum multis sceleribus nobilitatum, morbo absumptum, duos filios reliquisse, Boleslaum paternum nomen referentem, & Stratiqvatem.

## CAP. XVI.

*De Boleslao quintodecimo Bohemorum Duce.*

**B**oleslaus imperio potitus, patruum magis quam patris æmulator, extitit. Religionem enim Christi extollens, viginti ecclesias erexit. Huic soror fuit Milada, eximia specie virgo, sacris imbuta literis, & multa pollens eruditione. Quæ cum Romam orationis causâ petivisset, à Joanne pontifice maximo benigne excepta, ipsius auctoritate monasterium sancti Georgii in arce Pragensi construxit, ibique sacerdos consecrata est. Eadem quoque sancti Viti ædem, à Venceslao fundatam, in pontificalem elevari obtinuit. Dithmarus natione Saxo, & opinione sanctitatis insignis, primus ibi episcopus consecratus, cui Adelbertus successit. Nobili genere apud Bohemos natus Stratiqvas, Boleslai frater, relicto sæculo apud Ratisbonam Bajuvariarum civitatem, in cœnobio sancti Emerani monasticam vitam elegerat. Quem Pragam forte advenientem aggressus Adelbertus, pontificalem ei cathedram offert, qui cum esset regis frater, ex rege natus,



natus, facile populum sub religione continere posset: nam sibi non esse facultatem ejusdem regendæ plebis, quæ rapinis & adulteriis assueta, jus fasque omne contemneret. Stratiqvas mundanas dignitates quasi malas pestes effugiendas esse respondit, monasterium sibi & præsentem vitam suavem præstare, & futuram promittere meliorem, in eo se vivere morique velle. Scribunt autores Adelbertum his auditis prophetico spiritu plenum Stratiqvati dixisse: *Poteras modo pontificali honore cum salute defungi, at quod nunc recusas, in perniciem tuam vehementer expetes.* Abiisse deinde Romam, ac cum fratre suo beatæ vitæ Gaudentio in monasterio sancti Alexii tamdiu delituisse, donec jussu Pontificis maximi suas oves repetere jussus est. Quibus cum esset prorsus ingratus, in Hungariam profectum, regem Stephanum baptizasse, quem inter sanctos relatum ajunt. Exinde Poloniam ingressus Gaudentium fratrem in ecclesia Gneznensi prædicaturum Evangelium, pontificem ordinasse. Postremo Prutenos adiisse, apud quos dum Christi legem prædicat, gladio cæsum, martyrio vitam finisse. Interea Stratiqvatem mutato proposito Pragensem Ecclesiam poposcisse, neque repullum fraterno regioque favore adjutum. Sed dum apud Maguntinum archipræsulem agit, lacris de more imbuendus, inter duos episcopos jacentem pronum, diabolico spiritu arreptum, tamdiu vexatum, donec animam exhalavit, Adcodato natione Teutonico, ecclesiam commissam.

## CAP. XVII.

*De Boleslao sextodecimo Bohemorum duce.*

**B**Oleslaus duobus & triginta annis imperium potitus, ex vita decessit, relicto successore filio sui nominis Boleslao tertio. Huic Mefcho Polonorum princeps, Cracoviam per fraudem eripuit. Bello deinde orto, vastatis agris, induciæ demum dictæ, statutumque uti ambo duces apud Cracoviam convenirent. Boleslaus accepta fide eo pergit, atque in convivio captus, luminibus privatur, comites ejusdem crudeliter necati, exceptis Vrisbuicentibus insidiarum conficiis, scelerisque participibus. Qui domum reversi, tanquam magno ex periculo evasisent, publicam fidem atque jusjurandum & jura hospitii



à Polono violata q̄veruntur. Ubi fides habita, Janurem Boleslai fratrem dolo necare conantur. Cocharis inter Vrisbuicenses consilio, opibus & autoritate major, adolescentem sub specie venationis in sylvam tractum, ad stipitem arboris alligatum sagittis confodi jussisse fama est, divum Joannem Baptistam ab eo precibus exoratum, hirsuto regmine sagittas excepisse, uxoremq̄ve ejusdem per visum commonuisse, periclitanti viro opem ferret. Interea famulum principis Overam nomine, ex periculo prolapsum, proditores populo exposuisse: illum tanta novitate commotum, correptis mox armis in sylvam procurrisse, captisq̄ve proditoribus atq̄ve occisis, ducem saluum reduxisse. In eo loco ubi hæc acta sunt, monasterium ordinis sancti Benedicti, quod Veliscam appellatur, constructum, & aram majorem ibi sitam, ubi arbor religatum Janurem tenuit. Mescho autem coacto exercitu, longe lateq̄ve Bohemorum populatus agros, Pragam deniq̄ve obsidione cinxit, eamq̄ve biennio fame laborantem obtinuit, excepta arce Vissegradensi, quæ in fide Januris mansit.

## CAP. XVIII.

*De Udalrico, septimodecimo Bohemorum Duce.*

**F**uerat & alter Boleslao frater, Udalricus nomine, quem pater, Henrico imperatori nutriendum dederat. Is audita Meschonis proditione clam ab imperatore dimissus, castellum Dievizum natura & arte munitum ingreditur. Exin collecto raptim milite, colles occupat, qui Pragæ supereminent, tubasq̄ve clangere jubet. Mox alta voce præconem Pragensibus nuntiare, victos prælio Polonos fugam cepisse, victorem principem cum exercitu adesse. Qua voce accepta Polonorum præsidium, quod urbem tenebat, metu perculsum excessit, Pragenses aucti animo insēcuti, complures in fuga captos necavere, Mescho cum paucis in Poloniam se recepit. Udalricus Pragam ingressus, germano suo, sive proditoribus suggerentibus, sive quod ætatis beneficio illum sibi præferri verebatur, effodi oculos jussit. Multa hujus facinora referuntur, partim reprehensione, partim laude digna. Inter cætera & illud narratur, redeuntem ex venatione, puellam vidisse in villa quadam, juxta puteum vestimenta lavantem,



vantem, nomine Bozenam, quod *Beatricem* interpretatur, elegantem  
 forma, & moribus, supra quam par esset agresti, venustis, captum,  
 specie & alloquio modesto, quamvis amici adversarentur, conjugem  
 accepisse. Bizetislaum ex ea natum. Is cum adolevisset, Jutham im-  
 peratoris Ottonis Rufi filiam, quamvis nunquam vidisset, sola fama  
 commotus, vi rapuit, solusque cum illa ad patrem perrexit, comiti-  
 bus velocitatem ejus insequi nequeuntibus, ab imperatore ex fuga  
 retractis atque occisis. Non improbavit pater factum, sed admira-  
 tus audaciam, tantum se filium genuisse gavisus, matrimonium cum  
 rapta in Moravia celebrari mandavit, tanto præstantiorem filium  
 æstimans, quanto nobilius est, imperatoris quam villici filiam amavis-  
 se. Imperator ea contumelia motus, jurejurando affirmat exercitum  
 in Bohemiam ducturum, terram malis affecturum, sibi que sedem in  
 medio regni collocaturum. Statimque cum exercitu Bohemiam in-  
 star torrentis cuncta secum rapientis ingreditur. Contra Udalricus  
 filiusque castra movent. Jam duo exercitus ad jactum teli convene-  
 rant. Tum Jutha, cujus ex injuria bellum ortum, crinibus sparsis,  
 scissa ungvibus facie, victo periculorum magnitudine muliebri pavo-  
 re, ausa telis sese inferre volantibus inter primas acies proficiens, pa-  
 tris alloquium, priusquam furor ardeat amplior, exposcit. Quo im-  
 petrato, *Fateor inquit pater, justum te bellum movisse, cujus filia rapta est,*  
*illumque, pœna dignum, qui te contempsit, nisi compulisset amor, cujus caca cen-*  
*filia sape veniam meruere. Sed age obsecro, pone ante oculos quem armis in-*  
*sequeris. Gener tuus, mihi maritus, cui tantopere irasceris, & fortasse ne-*  
*pos tuus, ejus filius in ventre meo conceptus est. Parce oro filia, parce nepoti,*  
*patrem illi, mihi virum dimitte. Non est degener maritus, nec solvi con-*  
*summatus matrimonium Romana ecclesia sinit, nec tibi victoria potestas est.*  
*Utrique vires, utriusque belli artes suppetunt. Mars dubius casum respicit. Ne*  
*obsecro pater, mei causa tantam militiam morti obicito, parce, cui ego prior*  
*læsâ peperci. Illacrymatus pater audita filia, taciturnusque se, quod illa*  
*vellet, nisi obflaret juramentum. Tum Jutha, Et maritus, inquit, meus*  
*jurejurando adstrictus est, Theutoniam armis laceffere. Sed vana religio, quæ*  
*sceleri locum facit. Vim criminibus sacramenta non addunt. Expromissorem*  
*maleficii divina majestas odit, facto enim exterminat. Inveni tamen si libet*  
*viam, quæ te simul promisso virumque solvam. Veniet cum patre gener ad pe-*  
*des tuos, veniam commissi petet, te Regem, te Dominum profitebitur. Ne-*  
 que



*que impedimento erit, quo minus sedem in medio Bohemia collocares, ibiq, jus dicas. Postremo curiam tuam in Theutonica petens, villas aliquas, quas jusseris, in ex equitandum maritus diripiet.* Placuit imperatori consilium filiae, atqve in ejus verba sœdus ietum, exercitus consalutati, & in Boleslavia, quæ umbilicum tenere Bohemiae creditur, sedes imperatoris lapidea erecta, perpetuum rei monumentum principibus terræ insigne datum imperialis aquilæ. Exin Bisetislaus Moraviam ex paterno indulto rexit, Polonosqve, qui magnam ejus partem occupaverant, bello delevit, eorumqve multa millia, ligatis post tergum manibus, in Hungariam venundandos misit.

## CAP. XIX.

*De Bisetislao decimo octavo Bohemorum duce.*

**D**Um hæc aguntur, anno post Christi ortum tricesimo ac millesimo Boleslaus apud Cracoviam excæcatus interiit, Udalricus quoque frater ejus vita functus est. Qua re cognita Janur & ipse cæcus, Pragam veniens, ducatum gentis suo pte ingenio nepoti dimisit. Bisetislaus ea re animo auctus, quamvis nulla injuria laceratus, exercitum in Hungariam duxit, magnamqve inde prædam retulit. Quinqve ei ex Jutha fuerunt filii, Spitigneus, Uratislaus, Conradus, Jaronurus & Otto, quorum fiducia plenus, etiam Polonos ulturus, avum pulsare bello non timuit, Cracoviamqve armis captam funditus evertit. Gneznenium quoque metropoliticanam urbem diripuit, multorumqve martyrum sacratissima inde corpora asportavit, & crucem auream CCC. pensantem libras. Quod cum imperator Henricus, ejus nominis secundus, accepisset, indignatus injussu suo Poloniam vastatam esse, Bisetislaum aut resarcire Polonis damna, aut bellum expectare jussit. Ille se nihil imperatori, nisi tributum debere respondit à majoribus institutum. Pendebat autem dux Bohemiae Romano imperio quotannis C. & XX. boves, & argenti puri CL. marcas. Id se neque neglexisse hætenus, neque neglecturum. Si quid amplius jusserit imperator, à bono & æquo recedere, se libertati gentis nihil detracturum. Imperator his auditis, ex Ratispona in Bohemiam copias traducit: Othardo Saxonum duce ex altera



altera parte cum exercitu properare jussu. Ingressus sylvam, qua Bohemiam cingi diximus, præcis arboribus iter interceptum reperiens, milites viam securibus aperire jubet. Magnus hic labor eqviti. Erant enim vastæ magnitudinis arbores, multaqve rubeta incidenda, priusquam iter pateret. Ob quam rem cum jam opere peracto ad interiora pervenissent, nec hostis in conspectu usquam daretur, fessi ac sitibundi projectis armis flumina petunt. Bisetislaus ex insidiis prodiens, palantes atqve inermes aggressus, stragem haud parvam effecit. Imperator repentino commotus malo, multis suorum desideratis, fugam salutem petit. Othardus vero jam fines Bohemiæ ingressus, Septentrionalem provinciæ partem longe lateqve populatus, his cognitis, cum præda domum revertitur. Procopius comes Bicliniensium, cum parte copiarum adversus eum missus, fortuna parum prospera usus, tanquam pecunia corruptus, effossis oculis, manibus pedibusqve obtruncatis in flumine Bicline demersus. Nec tamen eo pacto quies Bohemiæ data. Nam sequenti anno Henricus Imperator, & Othardus majoribus collectis copiis redeuntes, transmissa sylva ferro ac flamma cuncta vastarunt, Bisetislaum armis diffidentem intra Pragæ mœnia clausum obsederunt. Severus tunc episcopatum urbis gerebat, jurejurando imperatori obnoxius, ex cujus indulto pontificali sedi præerat. Is noctu cum pluribus ad Henricum confugit, obtinendiqve urbem viam ostendit. Quare fractus animo Bisetislaus, errati veniam petit: dictæ sunt pacis leges, quas voluit imperator, & trium annorum tributum pensum, Silesia sub annuo tributo auri triginta, argenti cl. marcarum Bohemiæ principi tradita. Secundo & quinquagesimo anno post millesimum à Christi Salvatoris adventu, pace cum imperatore composita, Hungariam sibi subigere Bisetislaus aggreditur, cujus populus suis utens legibus, Romanorum imperium contemnebat. Sed ingressus hostilem provinciam, mox ardenti febre correptus, ultimum instare diem intelligens, vocatis Bohemiæ primoribus, Spiti-gneum primogenitum, successorem suum designat, reliquos filios Moravia inter eos divisa, parere fratri jubet, atqve his demandatis vita decedit, quarto Calend. Maji. Corpus ejus Pragam translatum apud parentes sepultum.



*De Spitigneo decimonono Bohemorum Duce.*

**S**pitigneus ut regnum primum potitus, omnes Teutonici generis Bohemia excedere jubet, nec matri potestatem manendi facit. Exinde Moraviam infestis petens armis, fratres bello aggreditur. Uratislaus audito germani adventu, relicta in Olomucio conjuge, ad regem Andream in Hungariam confugit. Conradus & Otto fratri se dedunt. Uxor Uratislai capta, aliquandiu in vinculis habita. Postremo suadente Severo episcopo dimissa. Dum virum in Hungaria petit, vicina partui in itinere decedit. Mœllus ea re conjunx, ab Andrea rege consolationem accepit, qui filiam suam Adilheidam nuptam ei tradit. Quod cum Spitigneus accepisset, veritus ne vires Hungaricas in se frater armaret, missa legatione sine causa illum ex Moravia abiisse dicit, nihil hostile timendum fuisse. Nam cur frater, fratrem oderit, secundo post se loco genitum? Servasse se abeunti bona, non abstulisse, redire eum ad suos debere, cuncta ei salva esse. Nec frustratus est fratrem, redeunti quæ armis abstulerat, cuncta restituit. Jutha vero à filio dejecta, cum secundo nupsisset, brevi mortua est, cujus corpus in Bohemiam translatum, in sepulchris principum condidere.

## CAP. XXI.

*De Uratislao vicesimo Bohemorum Duce.*

**S**pitigneo vita defuncto, Uratislaus successit. Qui Moravia rursus inter fratres divisa, Jaronurum, quem pater ecclesiæ dedicatum exortem regni fecerat, in diaconum vel invitum ordinari jussit. Is relicto Christi habitu, ad Poloniae duces confugiens, militarem disciplinam sectatus est. Fuerunt Uratislao ex Adilheide tres liberi, Bisetislaus, & duæ foeminae, Ludmilla & Juditha. Verum Adilheida mortua, uxorem alteram ex Polonia duxit, nomine Svaranam, ex qua Boleslaum, Borzivilaum, Uladislaum, Sobieslaumque suscepit. Inter hæc Severus episcopus, qui Bohemiam Moraviamque sacerdotio tenuerat, Joanne in Moravorum ecclesia sibi substituto, jam  
gravis



gravis senio ex vita decedit. Ob quam rem Conradus & Otto Uratislaum precibus onerant, Jaronuro fratri ut ecclesiam Bohemiæ ab imperatore impetret. Annuat Uratislaus, neque imperator adversatus est. Jaronurus ex Polonia revocatus, relicta militia, episcopus ordinatur, ac mutato nomine Gebhardus appellatur. Qui mox spiritu superbiæ inflatus, Moraviam non minus sibi quam suo antecessori delatam dicit, illum exterum, se civem: illum infimo loco natum, se regia stirpe ortum. Ingressus Moraviam, Joannem episcopum, qui cedere nollet, contumeliis & verberibus afficit. Uratislaus, qui Joannem amaret, care commotus, Romanum pontificem contumaciam Gebhardi uti corripiat, scriptis hortatur. Missus est in Bohemiam Rodolphus Cardinalis, qui causa cognita delictum puniat. Is vocatum Gebhardum, cum minime pareret, sacerdotio abdicavit. Sed rogatus à clero, dignitatem ei restituit, jubens & ipsum & Joannem intra annum coram summo sacerdote se exhibere. Paruerunt ambo. Sacerdos maximus ambobus auditis, Gebhardum movere sacerdotio statuit, fecissetque, nisi preces intervenissent Mathildis virginis, filiae Bonifacii ducis Lucani, quæ tum Romæ fuit, ex Bohemorum sanguine nata. Hæc est illa Mathildis, fama inclyta, & apud historicos latè memorabilis, quæ à Radicophano Senensis agri oppido, usque Ceperanum interjacentem terram, donavit ecclesiæ, posteris patrimonium beati Petri appellarunt. Hujus ergo interventu, Romanus præsul utrumque sacerdotem sua diocæsi contentum esse, ac remissis injuriis, in patriam reverti jussit.

## CAP. XXII.

*Uratislaus dux Maguntia in regem creatur per Henricum imperatorem quartum, regnoq; Bohemiæ, Poloniam, Silesiam, Lusatiam Moraviamq; adjecit.*

**I**Nter hæc Leopoldus Austriæ marchio, Moraviam latrociniiis magis quam justo bello infestam reddit, nec Conradi aut Ottonis, qui tunc provinciæ præsidebant, preces audit. Illi fraterna solatia expetunt. Uratislaus collecto raptim exercitu Austriam ingressus, instar horridæ tempestatis obvia quæque prosternit, occurrentem Leopoldum prælio victum, in fugam convertit, ipse onustus spoliis



domum revertitur. Post hæc anno sexto & LXXX. supra mille ab ortu salvatoris Christi, apud Maguntiam in concilio principum ab imperatore Henrico, ejus nominis quarto, Uratislaus Rex declaratur, Moravorum regno, quod supra extinctum diximus, in Bohemiam translato, Polonia, Silesia, Lusatia, Moravia, Bohemorum imperio adjectæ. Gilbertus Trevirorum Archiepiscopus cum eo Pragam missus, qui coram provincialibus regem inungat, regalibusque adornet insignibus. Id eodem anno factum, acclamante populo, *Uratislao regi salus honor atque victoria*. Suatana quoque Regina cum eo coronata. Mortuus est per idem tempus Joannes Moravorum Episcopus, cujus ecclesia, instante Gebardo, Pragensi unita est. Quæ res illi majoris insolentiae somentum fuit, adeo, ut præsentem rege interesse divinis minimè dignaretur. Ob quam causam Uratislaus, indulgente Alexandro Papa III. natione Senensi collegium canonicorum regularium in arce Pragensi erexit, in quo dum res agitur divina, non præpositus tantum, sed decanus, & sacerdos, diaconus, & subdiaconus, rem divinam facientes, episcopalibus ornamentis utuntur. Et Præpositus quidem cancellarius regni appellatus, principis honore defungitur. In foundatione autem ejus ecclesiæ, regem suis humeris duodecim copphinos lapidum gestasse ferunt. Religiosum principem, dignumque qui primus inter Bohemos regio diademate uteretur. Gebardum vero indies magis atque magis insolescentem, ac propterea à Moravorum plebe repulsum, dum per Hungariam ad Romanum pontificem questum injurias proficiscitur, apud Strigonium morbo interiisse, Cosmumque illi suffectum. Fuerunt Uratislao, & cum Saxonibus, & cum germano, qui Moraviam obtinebat, inimicitia. Illos per filium vicit: germanum ipse ex Moravia armis expulit, urbemque Olmucensem possidendam filio tradidit.

## CAP. XXIII.

*De Conrado vicesimoprimo, Bisetislao vicesimosecundo, ac Boleslao vicesimotertio, nec non Borzivilao vicesim quarto, Bohemorum ducibus.*

**V**Ita functus Uratislaus non filium, sicut optaverat, sed Conradum fratrem habuit successorem. Qui septimo mense potitus imperio, morbo correptus, nepotibus ex fratre locum fecit.



fecit. Qvinque eos fuisse diximus, qui sibi invicem pro nativitatibus ordine succedere. Duos ex his Urbuicenses, perpetui regum hostes, fraudibus interceptos necavere.

## CAP. XXIV.

*De Uladislao, vicesimoquinto Bohemorum duce  
& Rege secundo.*

**P**Enultimus Uladislaus nomine, ex Bisetislao fratre nepotem sui nominis, cum CCC. galeatis equitibus auxilio Henrici sexti Romanorum imperatoris Romam misit, qui plurimas inde reliquias sanctorum reposuit. Inveni in historia Bohemorum post Uratislaum primum regem, pluribus annis interregnum fuisse. Nam Conradum fratrem ejus, ac deinde Uratislai filios non regis nomine, sed ducis tantum usos, tanquam regni decus homini, non provinciæ datum fuisset. Uladislauum vero quarto loco Uratislao natum, à Friderico primo, sibi & posteris regiam dignitatem obtinuisse, & cum in expugnatione Mediolanensi egregiam operam navasset, imperatori mirifice gratum, leonem trubeum bifurcatæ caudæ, in clypeo albi coloris insigne regum accepisse, candelabrum quoque Salomonis ex Mediolano asportatum, in ecclesia S. Viti Pragensis recondisse. Pontem super Multaviam, quæ vetus Praga minori jungeretur, magni operis ædificasse, quem Ratisponensi præferunt, in quatuor & viginti arcus, ut antea diximus, protensum.

## CAP. XXV.

*De Sobieslao vicesimosexto, & Friderico vicesimoseptimo,  
nec non Conrado vicesimooctavo, ac Bisetislao vicesimo-  
nono, atque Venceslao tricesimo, Bohemorum  
Ducibus.*

**P**ost eum Sobieslaum quinque annis ducatu functum, à provincialibus exactum in exilio interiisse, exin Fridericum Uladislai filium successisse. Post Conradum, qui apud Apulos in Italiam



secutus Imperatorem, decessit. Conradum Bisetislaus sequitur, qui & Henricus dictus est. Et cum esset Pragensis episcopus, quindecim annis pontificatum simul & principatum Bohemiæ tenuit. Post eum ducatum obtinuit Venceslaus frater ejus. Hos quoque regis nomine, abstinuisse constat, sive quia magis vi quam jure imperaverunt, sive quod indultum Imperatoris Romani sumendæ coronæ, more majorum obtinere non valuerunt.

## CAP. XXVI.

*De Primislao tricesimo primo Bohemorum Duce,  
& Rege tertio.*

**V**enceslaum tribus mensibus ducali autoritate functum, Primislaus Uladislai secundi regis filius, armis dejecit, & à Philippo Romanorum Imperatore Friderici secundi fratre, quem Romana ecclesia non accepit, tertio loco inter Bohemos reges coronatus est.

## CAP. XXVII.

*De Venceslao Bohemorum Rege quarto. Et de Othocaro  
Bohemorum Rege quinto.*

**P**rimislao duo fuerunt filii, Venceslaus & Othocarus. Venceslao regnum Bohemorum cessit, Othocaro Marchionatus Moravia. Fuit autem Venceslaus unoculus, & sine liberis decedens, regnum Othocaro reliquit, qui & alio nomine Primislaus appellatus est, inter Bohemiæ reges quintus, belli appetens, & magnorum operum effector, cui nec animus in rebus arduis, nec consilium defuit. Imperium quod à fratre susceperat, ex mari Baltheo, quod falso plerique Oceanum putavere, (est enim mediterraneus sinus) usque ad Danubium protensum, ad internum nostrumque mare, quod Adriaticum dicimus, extendit. Nam cum obiisset Fredericus dux Austriæ sine liberis, soror ejus Margarita hereditatem accepit. Nupserat hæc olim Henrico Imperatoris Friderici secundi filio, eoque sine sobole vita functo in patriam redierat. Eadem jam anus Othocarum sibi virum adscivit, qui non tam conjugis ætatem, quam dotem animo volvens, sterile matrimonium contraxit, & principatum nobilem consecutus,



entus, more humano, quanto plura possedit, tanto majora concupivit. Ulricus eo tempore Carinthiorum principatum tenebat. Qui cum virili sobole careret, accepta ex Othocaro pecunia, Carinthiam illi, Carniolam, Marchiam Sclavoniam & portum Naonis tradidit. Veronenses, exinde Feltrenses, Tarvisini, & multi ex foro Julii, ultimo sese ei submiserunt. Bellum Hungaris indixit, commissoque praelio, victor ingentem praedam reportavit, Stiriamque provinciam illis ademit. In Prussia, quam veteres Ullinrigiam vocavere, superatis Tartaris urbem condidit, quam Cunispergium, id est montem regium, vocant. Sed quantum aucta ejus potentia est, tantum etiam insolentia crevit. Qui vivente legitima uxore, & quæ sibi tantum imperium adjecerat, alteram superduxit Canigundam regis Maschoriæ filiam. Vocatus per principes electores ad imperium, contempsit, palam inter suos jactitans, *pluris Bohemia regem, quam Romanum imperatorem esse*. Rodolphus itaque Habsburgi comes, qui magister curiæ Othocari fuisset, non minus belli quam domi clarus, Christianæ reipublicæ præfectus est, missis ad Othocarum legatis, Austriam & Carinthiam, ceterasque vicinas Italiæ provincias tanquam juris Imperii repetit, quando nec Austria muliebri feudum esset, nec Carinthiam injussu Caesaris Ulricus venundare potuisset. Renuit Othocarus, & Imperatori, qui aliquando sibi servivisset, impacato respondit animo. Sed intervenientibus amicis, ea lege reconciliati sunt, ut Austria Imperatori cederet. Exin datis acceptisque filiabus, affinitas utrinque jungeretur, provinciæ de quibus lis esset, dotales fierent. Adeptus Austriam Rodolphus, Othocarum in verba sua jurare more majorum exposcit. Id superbo regi gravius visum, tanquam ex domino servus fieret. Exoriuntur novæ lites, bellum indicitur. Cumque jam duo exercitus ad mille passus alter alteri proximus convenissent, veritus Othocarus Rodolphi potentiam, injustamque belli causam animo volvens, legatos mittit, qui se juraturum dicant, si modo intra tentorium Imperiale honoris sui causa fieri Rodolphus velit. Accipit conditionem Imperator potius, quam belli fortunam experiatur. Suggestum in tentorio sublime paratur, ibique aureum solium eminentiori loco erigitur, Rodolphus diademate & Imperialibus insignibus conspicuus, confidentibus electoribus Imperii, ceteris baronibus circumstantibus, advenientem regem sedens expectat. Ille cum pau-



cis regni sui optimatibus ingressus, consensu suggesto, ad pedes Imperatoris genua flectit, proinde ex veteri consuetudine admotis sacrosanctis Evangeliiis jurejurando se adigit. Interea tentoriū arte compositum, à summo usque deorsum, in quatuor profcissum partes, decidit, regemque, ut erat in alto loco ad Imperatoris genua supplex, videndum exercitibus præbuit. Stabant circum armatæ acies, rei exitum spectantes, sed quàm læti Teutones gloriosum Imperatorem suum videntes, tam indignabundi Bohemi, quod rex eorum humiliari magis quàm prælium experiri voluisset. Stupefactus ea re Othocarus, quamvis dolo magis quàm casu cecidisse tentorium non ignoraret, subticendum tamen in præsentia censuit, petitaque ab Imperatore venia, plenus irarum domum rediit. Quem, tametsi sua sponte satis fureret, magis tamen ac magis uxor incendit. Quæ cognito rerum successu, advenientem regem hisce verbis allocuta fertur: *Hæcine nobis spolia, hanc belli gloriam domum refers? Dediti omnes hodie tua opera veluti mancipia, veluti pecudes sumus. Regina provinciarum Bohemia, tributaria facta. Cum te olim superasse pralio Tartares, exuisse castris Hungares, Sciriam armis adeptum esse, Italiam cum exercitu penetrasse audiveram, felicem me, quæ tali nupsissem viro, patrem, qui me regi magnanimo tradidisset, sapientem existimabam, neque reginam esse ullam orbe toto, cui me cedere oporteret. Nunc falsa omnia experior. Nam quæ mulier me infeliciores? quis te virorum omnium ignaviores? Austriam provinciarum nobilissimam, tot urbibus, tot proceribus insignem, nulla necessitate coactus, ex manibus tradidisti. Sciriam, Carinthiam, & quas possidebas in Italia civitates, turpi metu reliquisti: cum comite Hapsburgensi infimi generis affinitatem contraxisti. Postremo ei, qui satellites tuus quondam fuerat, jurejurando exhibito, te remisisti, & servus servi factus, tuam simul ac majorum tuorum gloriam offuscasti. En virum qui magnitudine animi renuisse imperium videri vale. Laudarem, si te illi non subjecisses. Age, si tibi animus virilis deest, neque gladios intueri potes, sine me regem esse, experiar profecto, Bohemis an Teutonibus Imperium debeatur. Sunt Poloni, sunt Saxones ac Francones, qui nostra signa sequuntur, sunt Silesia Moraviaque, & verebimur belli tentare fortunam? Utinam aut tibi meus animus fuerit, aut mihi obedientia, quam te habere animadverto, sentiret profecto Rodolphus, neque viros adversus dominos valere, neque dolos. Othocarus, qui uxoris charitate teneretur, eamque verum locutam animadverteret, simulque animi magnitudine*



dine irrogatam contumeliam ferre non posset, accersitis regni primoribus, collectisque novis copiis, Rodolpho, qui dolo secum egisset, bellum indicit, neque ille certamen detrectat. Conveniunt ambo cum exercitibus in campis Austriae trans Danubium, commissum est atrox praelium, diuque Marte dubio depugnatum, cum Bohemi multitudine ac robore, Svevi quibus Rodolphus maxime fidebat, ordine ac arte superiores essent. Cecidere quam plurimi ex utraque parte, major tamen strages Bohemorum edita. Ad extremum, relictus à suis Othocarus, dum fortiter pugnat, inter confertissimas hostium acies occiditur. Ferunt Stirienses duos domi nobiles, quorum frater ab Othocaro per injuriam extinctus fuisset, cum toto praelio quasi-  
tum, cum certis indiciis cognovissent, in ultionem fraternæ cædis obtruncavisse. Corpus ejus permittente Rodolpho in Bohemiam translatum regio honore sepultum. Praelium ipsa die beati Ruffi peractum, anno ab incarnatione verbi 78. post ducentos & mille. A populatione Bohemiarum Imperatorem abstinuisse, quæ genero deberetur.

## CAP. XXIIIX.

*De sancto Venceslao Bohemorum Rege sexto.*

**V**enceslaum Othocari filium, septem annos natum, ab Othone marchione Brandeburgensi in Franconiam abductum, regnumque tutorio nomine ab eo quinque annis gubernatum, reversum puerum sub imperio matris fuisse. Illam Zavisium quendam, ex Baronibus potentem, amasse, cujus nuptias adeptam, multas regni opes ad eum contulisse. Sed ipsa brevi morbo extincta, Zavisium captum, necique traditum, regnum deinde ex Venceslai arbitrio ordinatum. Quo regnante, eo ipso anno, quo Ptolomaida à Saracenis occupata, in hanc usque diem tenetur, Pragam ferme universam igne familiari exustam, liberalitate regis, civiumque diligentia atque impensa ita instauratam, ut felix incendium fuisse videretur. Rodolpho Albertus filius successerat Imperator. Huic non minores inimicitiae cum Venceslao, quam inter parentes eorum fuerant. Has Jutha Venceslai conjunx atque Alberti soror, mulier viro cautior, magno labore diremit. Charissimus apud Venceslaum Alexius  
f  
qui-



quidam, pontificio jure consultus habitus est. Qui multa de Romanorum nobilitate cum eo locutus, usque adeo animum regis illexit, ut Jutham filiam admodum parvulam, in clara Ursinorum familia gentili cuidam matrimonio sponderit. Hinc secuta inter Ursinos & Bohemiarum reges amicitia, quæ apud Matthæum ejusdem familiæ Cardinalem plurimi fuit. Is enim rogatus à Venceslao, Gotium Urbevetanum, utroque jure consultum, in Bohemiam misit, quo regnum sub leges reduceret. Sed impedivere principes, quibus incerta esse omnia lucrum est. Hujus Venceslai soror, nomine Agnes, Rodolpho nupsit, Imperatoris Rodolphi filio, qui Pragæ moriens ibi defunctus jacet. Ex ea natus est Joannes, qui Albertum Cæsarem, circa flumen Rhenum non longe ab oppido Schaffhausen, dum simul amice iter agerent, sua manu interfecit. Deinde poenitentia ductus, Clementem quintum Pont. max. qui sibi purgationem indulgeret, apud Avinionem adiit. Pontifex Imperatoris occisionem ab Imperatore judicandam ait. Venit igitur Pisas Joannes, ubi tum Cæsar Henricus septimus ejus nominis Imperator considebat, à quo jussus religionem ingredi eremitarum sancti Augustini, in eaque perpetuo poenitere, non recusavit. Mortuus est tandem in eadem urbe, & in ade sui ordinis sepultus. Tumulum ejus nos eo anno vidimus, quo jussi ab Imperatore Frederico tertio sponsam ejus Leonoram ex Portugalia venientem, sororis tuæ filiam, cum aliis collegis ducturi Senas excepimus. Mater ejus Joannis cordata mulier fuit, & ingenio feroci. Quæ cum accepisset germanum suum contentum regno Bohemiarum, delatum imperium recusasse. *Atego, inquit, si rerum potiar, globaq. una mihi modo desit, aut quod reliquum est subjiciam, aut imperio excedam.* Ferunt in coronatione Venceslai, non minus novem ducenta equitum millia apud Pragam ex regia curia cibos accepisse, peditum vero infinitam multitudinem pastam. Subjecisse & Polonos sibi Venceslaum, à quibus invitatus, in civitate Gneзно diadema suscepit. Filium quoque sui nominis tredecim annos natum, petentibus Hungaris regem dedisse. Sed cum Bonifacius pontifex maximus, Carolum adolescentem, Caroli regis Siciliae filium eo misisset, & Hungarorum animi mutarentur, filium suum Albæ coronatum, & sacram simul coronam ad se recepisse. Nec diu postea tertio & tricesimo ætatis suæ anno, ex tabe obiisse. Mortem ejus Bohemos

magno



magno mœrore persecutos. Fuerat enim mansuetus & clementissimus princeps, & admirandus opinione sanctitatis, quæ postea vel miraculis confirmata, traditur. Joanni Brixinensi episcopo, si vera est fama, per quietem apparens, cum eum flentem tristemque reperisset, interrogavit, quanam esset causa mœstitiæ. Dicenti se mortem ejus æquo animo ferre non posse, incredulitatem exprobat, qui sacris eloquiis fidem non adhiberet, in quibus hæc verba potuisset aliquando legisse: *Cum te consumptum putaveris, orieris ut Lucifer, & habebis fiduciam proposita tibi spe, & defossus securus dormies. Requiesces, nec erit qui te exterreant, & deprecabuntur faciem tuam plurimi*: subjungensque parvam esse ejus fidem, atque inanem, si mortem sanctorum miseram putaret, repente disparuit. Episcopus excitatus, verba quidem sibi dicta memoriter tenuit, sed ubinam scripta essent in sacro codice, penitus ignoravit. Evoluta autem concordantiarum libro, undecimo apud Job capitulo, quod quærebat, invenit. Ad tumulum autem ejus insignis latro cum accessisset, exprobrans mortuo vitam, lapideæ statuæ super sepulchrum jacenti, colaphum incussit, nec mora cecitate percussus impietatis suæ poenam dedit. Statua postmodum in sacrario erecta est, & alia ænea loco ejus reposita, Joannis Brabantini egregii statuarii nobile opus.

## CAP. XXIX.

*De Venceslao Bohemorum Rege septimo.*

**V**enceslao filius ejus successit, quamvis eodem nomine, moribus tamen longe dispar. Qui cum ebrietati, & turpissimæ parti corporis dies noctesque indulgeret, & aliorum bona diriperet, aliorumque uxoribus illuderet, apud Olomutium Moraviæ civitatem, dum solus in domo Decani pontificalis adis perambularet, tribus vulncribus confossus, duodeviginti natus annos interiit. Ignoratus est necis autor, quamvis Conradus eques Thuringus, cruentum gestans pugionem, exire regiam visus fuerit. Nam is prius obtruncatus est populari tumultu, quam crimen confiteretur.



*De Rodolpho Bohemorum Rege octavo.*

**V**enerat forte eo tempore Pragam dux Carinthiæ Henricus, cui altera ex sororibus regis, nomine Anna, natu major, jam pridem nupserat. Hunc Bohemi regem sibi deligunt. Id ægre fert Albertus Imperator. Qui repente coactis copiis Bohemiam ingressus, Henricum regno deturbat, Rodolphumque filium suum regem constituit. Elizabeth senioris Venceslai relicta in matrimonium, ei tradita, quo regnum ejus solidius esset. Qui cum magna Bohemorum spe regnare cœpisset, subitaneo morbo correptus, primo regni sui anno absque liberis decessit.

## CAP. XXXI.

*De Henrico Bohemorum Rege nono.*

**P**ost obitum Rodolphi dissidentes inter se Bohemi, alii Fredericum Rodolphi fratrem, alii Henricum, quem dejecerant, petierunt. Vicit Henrici factio, trucidatis alterius partis autoribus. Et quamvis Albertus Imperator cum magnis copiis Bohemiam ingressus, regionem longe lateque affligerit: Henricum tamen regno deicere non potuit, prius à nepote, ut ante diximus, occisus, quam meditata in Bohemis exequeretur. Successit Alberto Henricus septimus, de quo paulo antè mentionem fecimus, comes Lutzelburgensis, consilio & animo juxta potens. Hic Elizabeth alteram Venceslai sororem, octo & decem annos natam, clam jussam ad se venire, apud Spiram Galliæ civitatem Joanni filio suo quatuor annis minori matrimonio conjunxit. Eodem quoque tempore, tribus comparatis exercitibus, unum ipse in Italiam duxit adversus Brixinenses, quos armis victos, imperata facere compulit, Longobardosque omnes in potestatem accepit. Alterum adversus comites Wirtenbergenses direxit, sacro Imperio rebelles, quibus ex octoginta castellis & munitissimis oppidis, quæ obtinebant, duo & septuaginta armis expugnata ademit. Tertium ex Franconibus ac Bajoariis comparatum, duce Petro archiepiscopo



piscopo Maguntino, cum filio in Bohemiam misit. Hic est ille Henricus, qui Romæ coronatus renitente Roberto rege Neapolitano Florentiam obsidione arctissima cinxit, Pisas, Senasque in potestate habuit, & apud Bohemicum conventum in agro Senensi hostili fraude veneno extinctus fertur. Cujus corpus in vetusto ac nobili templo Pissarum, sublimi loco post aram amici condiderunt. Pugnatum est in Bohemia pluribus locis, cum alii Bohemorum Joannem regnare cuperent, alii Henrico studerent, qui jam cum tribus Imperatorum filiis de regni possessione contendisset. Obpressa est denique Praga regni caput, diuque oppugnata, cum Henricus & Marchio Misnensis haud pigre mœnia tuerentur. Ad extremum tamen oppidanorum prodicione Joanni tradita, hostis in arcem sese recepit, nec multis post diebus Henricus in Carinthiam profugit. Ex eo tempore usque ad Imperatorem Sigismundum, Bohemia in potestate Lutzelburgensium ferme centum viginti sex annis fuit.

## CAP. XXXII.

*De Johanne Bohemorum Rege decimo.*

**J**Oannes potenti manu regnum gubernavit, & patre in Italia agente apud Germanos vicario nomine administravit imperium. Patre vero defuncto, cum plurimæ Italiae civitates ei sese dedissent, penetravit Alpes cum exercitu, easque non paucis annis tutatus est, dum Fredericus Austriae, & Lodovicus Bajoariae princeps, de Romano Imperio inter se contendunt. Fuerunt ei & cum conjuge graves dissensiones, Baronibus regni reginam à rege subtrahentibus, tanquam Bohemorum inimico, qui Teutones in primis haberet acceptos. Ventum est ad arma, affectum magnis calamitatibus regnum. Vix tandem compositæ lites. Post hæc Egra à Joanne recepta est. Uratislaviensium civitas, quam dux Silesiæ occuparat Henricus, Legnicium quoque, & quam plures aliæ Silesiæ civitates, Joanni subjiciuntur. Geritur & adversus Australes bellum, in quo victor Joannes suos milites præda non modica ditat. Cum regnum Poloniae quiete obtinere non posset, Casimiro acceptis viginti millibus marcarum argenti, rursum cedit. Cracoviam tamen obsidione cingit, sed deficientibus com-



meatibus abire compellitur. Cæcus effectus, à rege Francorum adversus Anglicos in auxilium accersitus, cum lectissima equitum manu consanguineo solarium tulit, prælioqve memorabili & cruentissimo se immiscuit, in quo cum multis millibus cæsus interiit, cum regnasset quinque & triginta annis. Bellum in celebritate sancti Ruffi gestum. Hinc ea dies apud Bohemos atra atqve innominabilis habita, quæ duos reges hostili gladio abstulisset.

## CAP. XXXIII.

*De Carolo Bohemorum Rege undecimo, qui & postea Romanorum Imperator factus, Carolus quartus dictus est.*

**U**Num & triginta annos agebat Carolus tum filius ejus, ex Elizabeth conjuge natus. Is vivente patre adversus Tartaros feliciter dimicavit, civitates Lombardiæ à patre acceptas armis tutatus est. Pugnavit adolescens cum Veronensibus, eos prælio fudit. In ea pugna bis equo dejectus, non dubitavit tertium conscendere, facinoræqve fortissimi militis edere. Ferunt eum juveniliter lascivientem, cum Parmæ ageret, alienos thoros non paucos polluisse, neqve increpatum à patre abstinuisse. Fuisse per idem tempus Delphino Franciæ cum principe Sabaudia bellum, cui cum rogatus Joannes auxilium ferre statuisset, nocte quæ decretum iter præcessit, visum est in somnis Carolo, juvenem forma conspicuum, militari manu raptum, eminentiqve loco unde videri ab omnibus posset, vestimentis exutum, moxqve virilia ei exsecta. Carolo ex proximo adolescente qui speciem supra humanam venerabilis adstabat, eaq sic geri mandaverat, quisnam hic juvenis esset tam crudeliter acceptus, & cur eo supplicio afficeretur, interroganti responsum datum, *Delphinum esse regis Franciæ primogenitum, qui talibus modis acciperetur, sic plebescens esse, qui aliena matrimonia violarent.* Experrectum Carolum summo mane patri somnium recitasse, rogasseqve ne frustra exercitum fatigaret, Delphinum enim non egere auxilio, quem interemptum esse non dubitaret. Contempsisse patrem verba filii, somniisqve nihil inesse ponderis respondisse, duorumqve dierum itinere cum exercitu profec-



profectum, certum accepisse nuntium, Delphinum in obsidione cujusdam castelli, sagitta in incertum missa, confosso ingvine expirasse, copias ejus dissipatas esse. Carolum in villa Terentii Parmensis agri, quo in loco visum viderat, in honore beatæ virginis Mariæ collegiatam ecclesiam erexisse, magnificeqve dotasse, quæ adhuc extat. Patronus ejus est præcentor ecclesiæ Pragensis, quemadmodum ejusdem Caroli literæ attestantur, quas nos vidimus legimusqve. Nomen huic Carolo in baptismo Venceslaus fuit, quod in confirmatione à Carolo Francorum rege muratum est, apud quem pueritiæ rudimenta peregit. Fuit autem hic Carolus vir magnorum operum, qui regnum Bohemiæ, tum religionis cultu, tum legum ac bonorum morum disciplina illustravit. Nam schola liberalium artium ab eo in Praga erecta est, nova civitas mœnibus cincta, palatium regium magnificentissime exædificatum, monasteria multa fundata, arces constructæ admirabiles, pax toti regno reddita. Adeptus imperium, rursus Italiam ingressus, Longobardos in potestatem accepit. Gibellinos, qui jam pridem Florentia exulaverant, ejectis Guelphis, in suum locum restituit, reliquis Etruriæ partibus pro suo arbitrio leges dedit. Coronatus Romæ magnifico apparatu, novatores rerum, qui adversus ecclesiam sentiebant, Romano pontifici judicandos tradidit. Joanni fratri suo Moraviam possidendam concessit. Vislegradum novis muris ac propugnaculis comunivit. Corpus sancti Viti Pragam detulit. Pontem Multaviæ, qui exundationibus corruerat, in Praga restauravit. Ecclesiam Pragensem ad Metropoliticum decus erexit, cum antea Maguntino pontifici subiecta esset. Clarus profecto imperator, nisi Bohemici regni gloriam magis, quam Romani imperii quæsitivisset. Illud quoq; nomini suo non parvam inussit maculam, quod Venceslaum ex filiis suis natu majorem, in imperio sibi successorem adhuc vivens ordinare, conatus est, idqve pecunia. Nam cum principes electores haud facile ad eam rem trahi possent, quod virtute obtinere non potuit, precio comparavit, promissis cuiqve electori centum millibus aureis. Quos cum repræsentare non posset, publica illis Romanæ reipublicæ vectigalia obligavit, perpetuum imperii malum. Hinc Romana potestas ad nihilum redacta, nec posthac extollere caput imperium potuit, cum principes electores omnia sibi retinerent, imperatoremqve jurejurando adigerent, ne pignora revocaret. Sigismundus alter Caroli  
filius



filius à rege Hungariæ Ludovico in spem regni adoptatus est. Ibiqve tandem coronam adeptus, pugnavit feliciter contra Turcas, triginta duos Turcarum regulos securi percussit. Tumultu populari captus, ac viduæ, cujus virum occiderat, in custodiam traditus, beneficio linguæ libertatem adeptus, regnum armis recuperavit. In quo fortunam utramqve expertus, inter viros claros enicuit.

## CAP. XXXIV.

*De Venceslao Bobemorum Rege duodecimo, qui &  
Rex Romanorum extitit.*

**V**enceslaus ætatis suæ anno secundo, permittente patre, regni Bohemici sceptrum assecutus, exin quindecimum agens annum, cum conjuge sua Joanna, apud Belgas civitate Aqvensi, Romani regni coronam accepit. Quarto deinde anno pestis gravissima Bohemiam populata est. In Praga vero quatuor mensibus in una tantum sancti Stephani parochia tria millia funerum & quinquaginta fuere. Sexto deinde anno regina decessit, & altera superducta est ex domo Bajoaria, nomine Sophia, longe viro suo præstantior. Inter hæc Pragenses populari tumultu excitati, atqve in furorem acti, Judæorum domus invadunt, bona eorum diripiunt, domos incendunt, atqve inter duas horas, non sexui, non ætati parcentes, infelicem gentem gladio cædunt. Periisse aliquot millia seruntur, servati complurimi infantes misericordia bonorum civium, baptismi gratiam acceperunt. Calamitosum genus hominum Judæi, inter Christianos agentes, qui ubi paululum abundare creduntur, mox tanquam Jesu Christi Dei nostri majestatem contempserunt, aut religioni illuserunt, non fortunas tantum, sed vitam quoque amittunt. Impune apud Pragenses flagitium fuit, tum quia populi haud facile corriguntur scelera, tum quia Venceslaus desidia corruptus, præsentis rerum statu contentus, neqve præterita corrigere, neqve futura curavit, præcavere. Fuit enim Venceslaus longe patri ab similis, voluptatum seqvax, ac labores refugiens, vini prorsus quàm regni curiosior. Ob quam rem captus à Baronibus, decem & septem hebdomadas in custodia habitus est. Joannes Dux Lusatiae & Procopius Marchio Mora-



viæ magno reipublicæ malo eum libertati reddiderunt. Captus & secundo per Sigismundum Hungariæ regem fratrem suum, & Alberto Austriæ duci in custodiam datus. Custodia ejus in egregiis ædibus apud Viennam habita, quibus exinde cognomen Praga datum, quod eas rex Pragensium incoluisset. Sed cum parum diligenter custodiretur, fugam arripuit, regnoque rursus ipotitus est, neque tamen vitam mutavit. Sed priori consuetudine vino ciboque marcens, lucemque dormiendo nocti conjungens, ab Electoribus imperii, comprobante Romano Pontifice, imperio dejectus, domi torpens illaudatum egit ævum.

## CAP. XXXV.

*De perfida secta Hussitarum, & damnatis articulis  
professionis illius.*

**S**ub hoc Rege, nostra demum memoria, ætatis vero suæ anno circiter quingvagesimo, perfida Hussitarum insania ortum habuit, cujus & originem, & progressum hoc loco prosequi animus est, quando ea pestis omnem penè Germaniam conturbavit, neque adhuc extincta, regni Bohemici magnam partem occupat. Rexerunt scholam Pragensem usque in ea tempora Teutones. Id molestissimum Bohemis fuit hominibus natura ferocibus, atque indomitis. Ex quibus vir quidam genere nobilis, ex domo, quam Putridi piscis vocant, apud Oxoniam Angliæ civitatem literis studens, cum Joannis Wiclevi libros offendisset, quibus de realibus universalibus titulus inscribitur, magnopere illis oblectatus, exemplaria secum attulit. Inter quæ de civili jure, deque divino, de ecclesia, de diversis quæstionibus, contra clerum pleraque volumina, veluti pretiosum thesaurum patriæ suæ intulit. Imbutus jam ipse Wyclevitarum veneno, & ad nocendum paratus, tum quod erat familiæ suæ cognomen, Putridum piscem, id est, foetidum virus, in cives suos evomit. Commodavit autem scripta quæ attulerat, his potissime, qui Teutonicorum odio tenebantur. Inter quos Joannes eminuit, obscuro loco natus, ex villa Hus, quod anserem significat, cognomentum mutuatus. Hic cum esset ingenio peracri, & lingua disertus, multumque dialecticis oblectaretur, & peregrinas opiniones amaret, avide admodum Wyclevita-



rum doctrinam arripuit, eaque Teutonicos vexare magistros cœpit, sperans eo modo confusos Teutones, scholas relicturos. Quod cum succederet, à Venceslao impetratum, ut Pragenſe gymnaſium ritu Pariſienſis gubernaretur. Ea res magiſtratum ſcholæ Teutonibus abſtulit. Quam ob cauſam commoti magiſtri ac diſcipuli Teutonici generis, jurejurando adaſti, uno die ſupra duo millia Pragam reliquere: nec diu poſt circiter tria millia ſecuti, apud Lipſicam Miſniæ civitatem, trium dierum itinere à Praga diſtantem, univerſale ſtudio erexere. Bohemis ſcholæ ſuæ gubernatio libere patuit, quorum princeps eſt habitus Joannes Huſ, lingua potens, & mundioris vitæ opinione clarus. Qui ubi ſatis fidei comparatum ſibi exiſtimavit, venenum quod jam pridem occultè conceperat, palam evomuit. Fundaverat opulentus quidam civis in urbe Pragenſi, ſub nomine ſanctorum Matthiæ & Matthæi, haud ignobile templum, quod Bethlehem appellavit, redditibus additis, ex quibus duo prædicatores alerentur, qui feſtis profeſſiſque diebus verbum Dei Bohemico ſermone plebibus inſinuarent. Horum alter Joannes aſſumptus eſt. Qui cum ſe libenter audiri animadverteret, multa de libris Joannis Wiclevi in medium attulit, aſſerens in eis omnem veritatem contineri, adjiciensque crebro inter prædicandum ſe, poſtquam ex hac luce migraret, in ea loca proficiſci cupere, ad quæ Wiclevi anima perveniſſet, quem virum fuiſſe bonum, ſanctum cœloque dignum non dubitaret. Sequebantur Joannem clerici ſerè omnes, ære alieno gravati, ſcleribus ac ſeditionibus inſignes, qui rerum novitate evadere pœnas arbitrabantur. His & nonnulli doctrina celebres juncti erant, qui cum in eccleſia conſequi dignitatem non potuiſſent, iniquo animo ferebant ſacerdotia majorum cenſuum his comitti, qui quamvis nobilitate præirent, ſcientia tamen viderentur inferiores. Excœcavit eos invidia, ut qui viderant non videret, & qui intellexerant, non intelligerent. Proruperunt in blaſphemias, & cum aliquibus ignaris fortasſe ac vitioſis maledicere poſſent, in omnes latrare ſacerdotes cœpere, & ab eccleſia catholica recedentes, impiam Valdenſium ſectam atque inſaniam amplexi ſunt. Hujus peſtiferæ ac jam pridem damnatæ ſactionis dogmata ſunt: *Romanum præſulem reliquis episcopis parem eſſe, inter ſacerdotes nullum diſcrimen. Presbyterum non dignitatem, ſed vitæ meritum efficere potiorem. Animas è corporibus excedentes, aut in æternas è veſtigio pœnæ mergi, aut perpetua conſequi gaudia, purgatorium ignem nullum invenire.*



veniri. Vanum esse orare pro mortuis, & avaritia sacerdotalis inventum. Dei & sanctorum imagines de'endas. Aquarum palmarumq. benedictiones irridendas. Mendicantium religiones malos demones invenisse. Sacerdotes pauperes esse debere, sola contentos eleemosyna. Liberam cuique predicationem verbi Dei patere. Nullum capitale peccatum, quantumvis majoris mali vitandi gratia, tolerandum. Qui mortalis culpa reus sit, eum neque seculari, neque ecclesiastica dignitate potiri, neque parendum ei. Confirmationem, quam chrismate pontifices inducunt, & extremam unctionem inter ecclesia sacramine contineri. Auricularem confessionem nugacem esse, sufficere sua quemque Deo in cubili suo confiteri peccata. Baptisma fluvialis unda, nulla interjecta sacri olei mixtura recipiendum. Cœmiteriorum inanem usum, quæstus causa repertum, quacunque tegantur tellure humana corpora nil distare. Templum Dei late patentis ipsum mundum esse, coartare majestatem ejus, qui ecclesias, monasteria, oratoriaq. construunt, tanquam propitiorem eis divina bonitas inveniat. Sacerdotales vestes, altarium ornamenta, pallas, corporalia, calices, patenas, vasaq. hujusmodi, nil habere momenti. Sacerdotem quocunque loco, quocunque tempore, sacrum Christi corpus conficere posse, petentibusq. ministrare, sufficere si verba sacramentalia tantum dicat. Suffragia sanctorum in cælis cum Christo regnantium, frustra impetrari, quæ juvare non possunt. In canonicis horis cantandis dicendisq. frustra tempus teri. Nulla die ab opere cessandum, nisi qua Dominica nunc appellatur, celebritates sanctorum prorsus rejiciendas. Jejuniis quoque ab ecclesia institutis, nihil inesse meriti. Subinco, cognomine Lepus, claris parentibus apud Bohemos ortus, per idem tempus Pragensẽ ecclesiam pontificio retinebat, consilio & animo illustris Qui orienti calamitati obviã ire cupiens, priusquam amplius debaccharetur, libros Joannis Wiclevi ad se ferri, omnesq. doctorum viros: ũ consilio adhibito, publice concremari jussit. Supra ducenta volumina fuisse traduntur, pulcherrime conscripta, bullis aureis tegumentisq. pretiosis ornata. Joãni prædicatione interdicta, & minæ adjectæ, si quando priores in populũ errores vulgare auderet. Ipse Praga excedens, apud villam, ubi sibi origo fuit ac cognomen, permittente loci domino, qui ejus insanie favebat, vocare plebes, ac docere non desistit, multa in Romanum præsulem, multa in reliquos ecclesiæ pontifices maledicta congerens. Utq. populi animos sibi magis ac magis conciliaret, Decimas hand a'iter quam elemosinas sacerdotibus debitas adstruit, liberum prædia possidentibus, si velint eas dare, si nolint, nullo ju-



*recogi posse.* Nondum error de sacramento altaris irrepserrat. Sed attulit novam pestem Petrus Dresdensis ( id oppidum Misnæ super Albim situm ) qui cum aliis Teutonibus paulo antè Bohemiam reliquerat. Cognitus inter suos, quia Valdensi lepra infectus esset, patria pulsus, velut hæreticorum asylum Pragam repetiit, puerorumque docendorum, curam accepit. Apud ecclesiam sancti Michaëlis per id temporis populum prædicando instruebat Jacobellus Misnensis, literarum doctrina & morum præstantia juxta clarus. Petrus hunc aggressus mirari se ait doctum & sanctum virum, qui divina eloquia plebibus exponeret, errorem illum non animadvertisse communionis Eucharistiæ, qui jam pridem ecclesiam pessundasset. In qua sub una tantum specie, dominicum corpus populo ministraretur, cum apud Joannem Evangelistam & Apostolum Christo dilectissimum, sub duplici specie panis viniqve sumi jubeatur, dicente apud eum Salvatore: *Nisi manducaveritis carnem filii hominis, & biberitis ejus sanguinem, non habetis vitam in vobis.* Conmotus his Jacobellus, cum perquisitis vetustis sanctorum doctorum codicibus, Dionysii præsertim, & Cypriani, communionem calicis laudatam invenisset, prohibitus apud sacellum archangeli Michaëlis prædicare, in templo majore sancti Martini cathedram sortitus, publice commonere populum cœpit, ne deinceps communionem calicis, sine qua salvari nemo posset, quoquo pacto negligenter. Huic omnes hæretici consenserunt, haud modica gestientes latitia, quod articulum invenissent in Evangelica lege fundatum, per quem Romanæ sedis vel ignorantia, vel nequitia argui posset. Odioso quamvis hac animo rex intelligeret, desidia tamen corruptus, & inertia torpens, impune debacchari sinebat hæreticos. Subinco archiepiscopus ubi nullum adversus tantum emergens malum in Venceslao præsidium invenit, ad Sigismundum Hungariæ regem confugit, obsecrans atque obtestans, ut negligentiam fratris emendet, neque labefactari orthodoxæ fidei sacramenta permittat. Dat fidem Sigismundus petitorum se brevi Bohemiam, ecclesiæ catholicæ consulturum. Sed dum dies die ducitur, Subinco apud Postinium in Hungaria moritur, & Albicus ei sufficitur, natione Bohemus, arte medicus, & Sigismundo propterea charus, unicum extremæ avaritiæ barathrum. Qui claves cellæ vinariæ nulli alteri quàm sibiipsi credidit, & animalia viventia, dono accepta mox vendidit. Et quia sumptuosos esse coquos didicerat, abjectam



abjectam anum popinæ suæ præfecit. Interrogatus aliquando, sonorum omnium quem molestius audiret, *maxillarum*, inquit, *ossa frangensium*. Idoneus profecto pontifex, qui surgenti fomentum hæresi daret. Infestabat ea tempestate Romanam ecclesiam Ladislaus rex Neapolitanus, adversus quem Joannes Papa tertius & vicesimus bellum decernens, plenariam peccatorum remissionem indulxit his, qui ad tuendam ecclesiam arma induerent. Recitabatur in ecclesia Pragensi decretum pontificis. Quod cum quidam sordidæ artis homines audissent, Joannem Papam Antichristum esse magna voce clamaverunt, qui crucem contra Christianos decerneret. Eos è vestigio senatus in carcerem rapi jussit, populus vero susceptis armis, dimitti omnes petiit. Sed placatus oratione senatus, tanquam vita captivorum in tuto esset, suam quisque domum rediere, de illis clam supplicium sumptum. At cum sanguis extra prætorii januam defluens indicium necis fecisset, iterum accurrens populus, interemptorum corpora rapuit, & aureo circumvoluta panno per omnes urbis ecclesias detulit, clamantibus ejusdem sectæ sacerdotibus, isti sunt sancti, qui pro testamento Dei sua corpora tradiderunt. Exin cadavera in sacrario in Bethleem reposita, quasi martyrum reliquiæ aromatibus condita.

## CAP. XXXVI.

*De Joanne Hus, & Hieronymo hæresiarchis, in Constantiensi concilio igni traditis.*

**D**Um hæc aguntur, generale Concilium apud Constantiam Svecorum urbem cogitur. In quo de rebus Bohemicis sermo habitus, patrum mentes ingenti cura confecit, volventium animo quonam modo sanari provincia posset. Placuitq; tandem, Sigismundo Imperatore svadente, Joannem & Hieronymum ad Synodum vocari, qui tum cæteris ejusdem regni doctiores, tum populi ductores, ac hæresum principes habeantur. Venerunt ambo, non tam verecunde aliena discere, quam sua impudenter ingerere parati, docendi quippe quam discendi cupidiores, & populares amantes aures. Auditi sunt in confessu patrum Joannes ætate major & auctoritate habitus, doctrina ac facundia superior Hieronymus. Lecti ex



omni natione patres, divini atqve humani juris doctores, sæpe cum his colloqvium habuere, dogmata eorum à lege divina aliena esse monstrarunt, neqve bonis conducere moribus. Rogaverunt, ne plus sapere quàm ecclesia vellent, sed saperent ad sobrietatem. Peregrinas opiniones relinquerent, ingenia sua, quæ quidem essent nobilissima, Wiclevitarum insania ne fœdarent. Eloqvientiam, qua præditi essent, in corroborandis ecclesiæ institutis, non evertendis: in edocendis populis, non dedocendis, exercerent. Posse eos & in conspectu dei, & in ecclesia militante sublimem consequi locum, si rejectis novitatibus patrum vestigia sequerentur, inventionesq; suas universali Concilio submitterent. Stetere in proposito pertinaces Bohemorum animi, neq; victi rationibus vinci voluere. *Se veraces, se sancti Evangelii amulatores, se Christi discipulos esse. Romanam ecclesiam, ceterasq; per orbem dispersas, longe à traditionibus Apostolorum abiisse, quæ opes ac delicias sectarentur, dominatum in populos, & primos in conviviiis accubitus exquirerent, canes, equos alerent, ecclesiarum bona, quæ Christi pauperibus deberentur, per lasciviam luxumq; consumerent. Aut nescire prorsus divina mandata, aut scientes contemnere.* Primores magnæ Synodi, ubi pertinaciam & immutabiles animos perditorum hominum animadverterunt, membra ecclesiæ putrida, quæ sanari non poterant, ne reliquum corpus inficerent, resecanda censuerunt. Lata est in consensu patrum adversus contumaces sententia, *cremandos esse qui doctrinam ecclesiæ respuerent.* Prior igitur Joannes combustus est, Hieronymus diu postea in vinculis habitus, cum resipiscere nollet, pari supplicio affectus. Pertulerunt ambo constanti animo necem, & quasi ad epulas invitati ad incendium properarunt, nullam emittentes vocem, quæ miseri animi posset facere indicium. Ubi ardere cœperunt, hymnum cecinere, quem vix flamma & fragor ignis intercipere potuit. Nemo Philosophorum, tam forti animo mortem pertulisse traditur, quam isti incendium. Poggius Florentinus, ætatis nostræ nobilis scriptor, de morte Hieronymi ad Nicolaum Nicolai concivem suum, elegantem scripsit epistolam, quamvis paululum sua consuetudine in mores cleri invecus videatur. Cjneres exustorum, ne raperentur à Bohemis, in lacum projecti. Discipuli eorum ex eo solo terram abstulere, in quo ignis fuit, eamqve veluti sacram secum attulere in patriam. Joannes ac Hieronymus apud Bohemos martyrum honores meruere, nec minores quàm Pe-



trus & Paulus apud Romanos habiti. Nunciatis enim in Bohemiam, quæ Constantiæ gesta fuerunt de Joanne ac Hieronymo, discipuli eorum seqvacesque omnes in unum convenientes, memoriam in primis defunctorum consecrant, celebrandamque quotannis decernunt. Exin per amicos nonnullas sibi ecclesias à rege tradi extorquent, in quavis suæ prædicare plebi, sacramentaque ministrare liberè possint. Neque hoc modo contenti, apud Sclavoniam nobile monasterium fratrum Prædicatorum extra mœnia oppidi situm, è fundamentis dejiciunt. Eaque prima ecclesiarum ruina in Hussitarum novitate facta, decurritur in ecclesias, monasteriaque passim, nobilissima superis dicata templa ferro atque igne vastantur. Nullum ego regnum ætate nostra in tota Europa tam frequentibus, tam augustis, tam ornatis templis ditatum fuisse, quam Bohemicum reor. Templà in cœlum erecta, longitudine atque amplitudine mirabili, fornicibus tegebantur lapideis, altaria in sublimi posita, auro & argento, quo sanctorum reliquiae tegebantur, onusta, sacerdotum vestes margaritis tectæ, ornatus omnis dives, pretiosissima suppellex, fenestræ altæ atque amplissimæ conspicuo vitro & admirabili opere, ut lucem præbeant. Neque hæc tantum in oppidis atque urbibus, sed in villis quoque admirari licebat. Fuit inter cætera monasterium Aulæ regiæ, apud ripam Multaviæ, quæ Mosa fluvius illi jungitur, situm, in quo regum corpora condebantur, singularis excellentiæ. Nam præter, ædem magni & memorabilis operis, amplum dormitorium, cæterasque monachorum officinas magnifice constructas, habuere circuitum, qui non parvum conclusit hortum, ambitum vocavere. In hujus lateribus vetus novumque testamentum ab initio Genesis usque ad Apocalypsim Joan. literis majusculis in tabulis scriptum, continebatur, notis quo altius irent paulatim crescentibus, ita ut à summo usque deorsum facilis lectio præberetur. Sed hoc decus post Venceslai mortem, Hussitarum rabies delevit. Qui postquam ecclesias quamplurimas dejecerunt, monasteria inconsiderunt, castellum petentes, cui Bechingen nomen est, octo terè milliaria ab oppido, quod nunc Thabor appellant, triginta circiter millia hominum convenere, atque ibi trecentas menses in patentibus campis crexere, ex quibus populo sacramentum calicis ministrarunt. Terruit ea congregatio Venceslaum, verentem ne tumultu facto in se arma converterent, regnumque sibi adime-



adimerent. Nec sua res periculo caruit. Venceslaus ei salutis fuit, cognomento Coranda, singulari facundia presbyter, & in plebibus auditus. Quidum populum de republica admoneret, inter cætera locutus est, *Quamquam*, inquit, *viri fratres, ebriosum atque incertum sortiti regem fuimus, sitamen ceteros expendere principes pergitimus, nemo est quem nostro regi anteferamus, quem recte omnium regum specimen dixerim, quietum, benignum, nostri amantem. Nam quis coregnante nos laceffere audeat? licet nos ex voto vivere nostro. Si non est eadem sibi, qua nobis de religione sententia, ritum nostrum neque ipse perturbat, neque alios perturbare sinat. Quibus de rebus par esse arbitror preces pro eo ad Deum fundamus, utque singuli ei vitam rogemus, cujus desidia nostra salus, nostra quies est.* Quod cum ab exploratoribus rex cognovisset, quieto animo fuit, & factus ex tepido frigidus, Corandum inter amicos habuit. Per idem fermè tempus surrexit & alius pseudosacerdos apud Pragam, Joannes quidam ex ordine Præmonstratensium impius monachus, & ad omne scelus audax. Qui cum prædicaret apud sanctum Stephanum in Piscina, neque bene sapere videretur, inde amotus monasterium Carmelitarum invasit. Hoc suasere hæretici, ut suam potentiam ostentarent. Singulis fermè diebus sacram eucharistiam per suas ecclesias circumvectabant. Quas cum paucas esse dicerent, ductore Nicolao viro nobili, ejus loci domino, unde Joannem Hus originem trahere diximus, in regiam tumultuarie prorumpentes, Venceslaum oravere, sibi ut ampliores ecclesias elargiretur, qui jam populi majorem partem obtinerent. Audivit rex benigne Nicolaum pro multitudine loquentem, utque in posterum diem rediret, jussit: deinde misso populo ad Nicolaum qui remanserat, conversus, *Tu*, inquit, *quam me regno ejiceres, orditus es clam, at ego laqueum inde efficiam, quo te postea strangulem.* Ille à regis conspectu abiens, populares magis ac magis incendit. Rex in arcem Vissegradensem urbi vicinam, parveque tantum fluvio disjunctam, sese recipit, & paulopost in castellum novum, quod ipse construxerat, quinto distans lapide, cum paucis adiit, missis ad fratrem oratoribus, qui ejus auxilium implorarent. Consulibus autem novæ civitatis Pragensis, ne ulterius ab hæreticis dominicum corpus in pompa deferri linerent, imperavit,



## CAP. XXXVII.

*De morte Venceslai Regis.*

**A**T hæretici pridie calendas Julii apud ecclesiam Carmelitarum convenientes, ad ædem sancti Stephani eucharistiam per plurimas plateas atqve ecclesias armati circumtulere, ibiqve domum sacerdotis suis ineptiis non consentientis diripuerunt, & sublato clamore ingenti furentes prætorium petiere. Consules undecim metu perculsi fuga salvati sunt, septem qui remanserant, & cum his judex urbis, atqve alii nonnulli cives, raptim intercepti, ex altissimis fenestris in forum præcipitati, lanceis ac veribus irati populi excepti, dirum spectaculum dilaniati præbuere, stante in foro Joanne monacho, & sacrum Christi corpus sangvinario populo ostentante. Camerarius regni, qui cum trecentis equitibus ad sedandum tumultum occurrerat, ubi furentem plebem animadvertit, de sua vita sollicitus, fuga sibi consuluit. Ea cum regi renuntiarentur, cunctiqve circumstantes attoniti facinus detestarentur, *at ego* (inquit pincerna) *futura hæc præscieram.* Quem rex indignatus correptum, repente ante pedes suos prostravit, & arrepto pugione conatus est interficere. Sed impeditus à circumstantibus, agrè illi vitam dimisit. Nec mora paralyti correptus, agrotare cœpit, atqve infra octo & decem dies, signatis nominibus hæreticorum, quos neci destinaverat, fratrem assidue vocitans, & amicorum auxilia anxius expectans, ante vita excessit, quàm vocati principes adessent, cum regnasset annis quinque & quinquaginta, vixisset & duobus amplius. Consueverunt corpora regum apud Bohemos, priusquam sepelirentur, octo diebus aromatibus condita, per sacraia urbis circumferri plangi qve, & sequentibus amicis ac Baronibus conclamari. Hoc in Venceslao neglectum, non audente regina ingredi novam civitatem. Delatum est cadaver ad ecclesiam sancti Viti in arce, & inde ad Aulam regiam, de qua paulo ante meminimus, ibiqve conditum in sepulchro, quod ipse sibi delegerat. Sed postea cum monasterium ipsum ab hæreticis diriperetur, & sepulchra regum effringerentur, cadavera qve abjicerentur: pisciculos quispiam, nomine Muscha, Venceslao vendere solitus, regis, quem amaverat, corpus clam collegit, & in loculo apud se domi

h

condi-



condidit. Interjecto deinde tempore, rebus in meliorem formam, redactis, cum Venceslai corpus inquireretur, acceptis viginti aureis illud reddidit, tumque circumgestatio ex more facta, & justum regi funus exhibitum.

## CAP. XXXIIX.

*De Joanne Zischa, hæreticorum Hussitarum capitaneo,  
in armis strenuissimo, ac victoriosissimo.*

**R**Ecens obierat Venceslaus, cum Joannes Zischa nobilis genere ex loco, cui Trosnovia nomen, censu tenui, in curia regis à puero enutritus, & bellis exercitatus, uno carens oculo, quem strenue pugnans jam pridem amiserat, infectus Hussitarum veneno, & rapinarum avidus, collecta perditorum hominum multitudine, in ecclesias, quæ restabant, impetum fecit, simulachra Sanctorum, & imagines magni Dei perfregit. Monasterium Carthusiensium Pragæ vicinum invasit, quo direpto monachos ejus ordinis tanquam populo inutiles, qui veluti sues in claustro saginarentur, migrare alio jussit. Venere per idem tempus ex montibus Pragam CCCC. circiter viri cum mulieribus, lepra Hussitarum infecti, atque in foro sedentes, cibum ex magistratibus petiere. Consulatus metu plebis, quæ advenarum miserebatur, cibaria eis publicitus ministravit. Zischa hos sibi adjunxit, arcem Vissegradensem, quæ negligenter custodiebatur, invadere cupiens, ad locum, quem Cruces appellant, profectus est. Ibi supra quadraginta millia virorum ex hæreticis convenere. Qui suam multitudinem conspicati, animum ad omne facinus audacem sumpserunt. Multa ibi adversus Sigismundum Cæsarem, quem regium hæredem suis conatibus insensum norant, excogitata atque decreta. Exin Zischa, duce Coranda, de quo supra meminimus, Pelzinam, ubi complures esse suæ factionis amicos non ignorabat, valido præsidio muniit, qui apud Cruces remanserant, arcem Vissegradensem invasere. Sophia interim anxia, quo se pacto tueretur, crebris nuntiis ac literis Sigismundum vocare, vicinorum auxilia petere, atque in omnes partes mentem dirigere. Sigismundum, malo usum consilio, in Turcas, qui se jam pridem castris exuerant, ar-



ma prius movere, quàm Bohemiam petere libido incessit. Quod si exercitum Pragam duxisset, antequam vires hæreticorum convaluissent, nunquam ea incendia, quæ postea vidimus, Germaniam exuissent. At dum ille Turcas laceßere parat, Bohemiam amisit, & Hungariam non defendit. Ea propter cum seruum esset ejus auxilium, regina cum Cenchone Wartenbergenfi regnum gubernans, ex thesauro regio copias comparavit, arcem Pragensẽ & minorem civitatem, quæ arci adjacet, præsidio firmavit, ponti Multaviæ, ne transitus illac esset hæreticis, ligneas turres ac januas adjecit. At illi passim per regnum conventus agitare, sollicitare populos, hos minis terrere, illos blanditiis allicere, implere Novam civitatem suis hominibus, dies noctesqve consultare, quibus modis summam sibi rerum acquirerent. Cum quibus Petrus Staremburgius apud insulam Benedicti confligens, æquo Marte prælium diremit. In Praga aucta hæreticorum alluvie, pro ponte pugnatum, multisqve utrinque cadentibus, pons denique in potestate Hussitarum factus, declivioris partis Pragæ minoris fideles in altiore se se partem receperunt, atqve inde conversi acribus animis instauravere certamen. Pugnatum est die noctuqve continuis quinqve diebus, sævissimis ac crudelibus ausibus, multi utrinque cæsi, magnificæ domus exustæ, prætorium infimo loco situm, incensum atqve deletum.

## CAP. XXXIX.

*De Sigismundo Bohemorum rege tertiodecimo, & Romanorum imperatore.*

**C**Um hic esset rerum status, legati Sigismundi supervenere, qui regni gubernationem accipientes, cum civitate Pragensi ea lege inducias fecere, ut arce Vissegradensi reddita, liceret civibus ad Sigismundum oratores mittere, deq; re sua cum eo transigere: Zischa Pelzinam, Pießam, & alia quæ occupaverat loca, restitueret. Conditionibus acceptis atqve completis, externi hæretici urbem reliquere, consulatus ex præfco more gubernationem iniit, quietior reddita civitas, non tamen Catholici, qui excesserant, redire ausi. Expectabant autem Sigismundi adventum, cujus præsentia sese,



rutos arbitrabantur. Sed interruperunt spem literæ ab eo missæ, in quibus scriptum erat *ipsum brevi venturum, regnumque eo modo gubernaturum, quopater ipsius Carolus provinciam gubernasset.* Quibus ex verbis intellexerunt hæretici sectam suam exclusum iri, quæ regnante Carolo nondum ortum habuisset, proinde magis ac magis indignari. Sigismundus autem ad festum nativitatis Dominicæ, Brunnam, quod est Moraviæ oppidum, petiit, ibique Pragensibus veniam petentibus ea lege pepercit, ut catenas & repagula tota ex urbe deponerent, suos magistratus acciperent. Paruit attonita civitas, cum primores regni elevatis in cælum manibus adventum novi regis gratulabundi exposcerent, ejusque rectores sine controversia reliquæ urbes admitterent. Nec dubium videbatur, quin tota Bohemia labes Hussitarum excessisset, si ex Brunna Sigismundus recta via se Pragam contulisset. Sed divertit ille, ut fortasse fati sui erat, Uratislaviamque Slesiae caput accessit. Quo in loco populus urbanus non diu antea consulatum à Venceslao fratre suo constitutum per seditionem obtruncaverat, cujus sceleris autores securi percussit. Quod ubi Pragæ renunciatum est, diffusi de venia cives, exemplum Vratislaviensium veriti manifesto desciverunt, & allecto præmiis Cenchone, qui arci Pragensi præerat, in totum regnum literas dedere, *ne quissiam Sigismundo aditum praberet, qui Dalmatica lingua hostis esset, nec alia cura teneretur, quam regni perdendi, qui antiquam Prutenorum civitatem Ordini jure pignoris obligasset, Brandenburgeres autem à corona Bohemica alienasset, Johannem ac Hieronymum in Constantiensi concilio cremari non solum permisisset, verum etiam procurasset, dogmata fidei, quæ ipsi sequerentur, totis conatibus impugnaret.*

## CAP. XL.

*De civitate Thabor & extructione ejus, fratribusque Thaboritis.*

**Z**Ischa dum hæc aguntur, relicta ex fœdere Pelzina, bis à fidelibus invasus, bis versutiis usus, ex penè victo victor evasit. Erant aspera loca, in quibus pugnare oportuit, hostes in equis, milites sui omnes pedites, nec certamen committi nisi pedestre poterat. Ut ergo desiliere ab equis adversarii, mulieres quæ de more



more suum exercitum sequebantur, projicere pepla in terram iussit, quibus implicita per calcaria equites, prius extincti sunt, quam pedes expedire valerent. Ipse deinde Aufcam petiit, oppidum ad Lusini-  
 nium amnem in ripa situm, ex quo Copius & Ulricus fratres, ve-  
 ræ fidei cultores, ejusque loci domini, non parvam populi partem  
 ejecerant cum hæreticis sentientem. Id Zischa Quadragesimæ no-  
 ãe aggressus armis expugnavit, diripuit, incendit. Sed & Lici-  
 um castellum, ab eo loco mille passuum distans, quo se Ulricus  
 receperat, vi cepit, Ulrichum familiamque suam gladio occidit, uni  
 tantum vita retenta, qui reliquos obtruncaret. Cumque civitatem  
 quam incoleret muro cinctam non haberet, locum natura munitum  
 ad eundem amnem elegit, vix octo stadiis ab Aufcha separatum.  
 Hunc mœnibus cinxit, & ut quisque tentoria fixerat, ita ædificare  
 sibi domos imperavit, civitati Thabor indidit nomen. Nam & co-  
 mites ejus, fratres Thaboritæ appellabantur, tanquam cum tribus  
 Apostolis salvatoris Christi transfigurationem in monte vidissent, in-  
 deque suas opiniones mutuati essent, quas fidei veritates appellant.  
 Civitas quamvis altis defensâ rupibus, muro tamen & antemurali  
 cincta est. Lusini-  
 cius amnis maiorem urbis partem alluit, quod reli-  
 quum torrens non modicus ambit. Qui cum recte in Lusinium  
 tenderet, saxeo colle impeditus, quam longa est civitas, flectere ad dex-  
 teram iter coactus, in fine urbis majori fluvio miscetur. Spacium,  
 quo per terram acceditur (nam penè insulam duo amnes efficiunt)  
 vix pedes triginta protenditur. Hic fossa profunda manufacta, &  
 triplex murus ea crassitudine, quæ nullis effringi machinis queat.  
 Turres in mœnibus crebræ, & propugnacula, quæ ipsi Thaboritæ  
 expugnandarum urbium magistri excogitaverunt, locis opportunis  
 constructa. Hic refugium omnium hæreticorum, arcemque Zi-  
 scha primus erexit, qui eum secuti sunt, pro suo quisque ingenio  
 munimenta urbis auxerunt. Nos qualem vidimus civitatem descrip-  
 simus. In amne Lusincio auti grana reperiuntur, ciceris æquantia  
 magnitudinem, quæ nullo egent purgamento. Nondum equites  
 apud Thaboritas militaverant, cum essent omnes ferme infimæ ple-  
 bis homines, & qui non tam novam fidem secuti, quam judicia &  
 carceres fugisse videbantur. Nicolaus magister monete, quem Si-  
 gismundus ad res curandas in Bohemiam miserat, primus omnium,



eqvorum copiam Thaboritis fecit, qui cum mille eqvitibus in vico, cui Vogice nomen est, novis Zischæ motibus occursum confederat. In hunc nocte ipsa parasceves Zischa ex improvise prorumpens omnes illi eqvos ademit, arma surripuit, vicum incendit. Milites suos eqvos ascendere, saltare, currere, flectere in gyrum docuit, neque posthac absque alis eqvitum copias duxit. Nicolaus in arce salvatus est.

## CAP. XLI.

*De Adamitis hereticis.*

**I**Nter hæc & alia apud Bohemos nephanda & inaudita prius emerit hæresis. Picardus quidam ex Gallia Belgica, transmissio Rheno, per Germaniam in Bohemiam penetravit, qui præstigiis quibusdam fidem sibi concilians, brevi tempore non parvam mulierum virorumque plebem ad se traxit, quos nudos incedere iubens, *Adamitas* vocavit. Et occupata insula quadam, amne Lusinio cincta, filium Dei se dixit & Adam vocari. Connubia eis promiscua fuere, nephas tamen injussu Adam mulierem cognoscere. Sed ut quisque libidine incensus in aliquam exarsit, eam manu prehendit, & adiens principem, *In hanc*, inquit, *spiritus meus concaluit*. Cui princeps respondit, *Ite crescite, & multiplicamini, & replete terram*. Aiebat ceteros homines servos esse, se vero & qui ex eis nascerentur, liberos. Ex iis quadraginta viri insulam exiere, & intrantes vicinas villas, evaginati gladiis super ducentos agrestes interfecere, quos diaboli filios afferebant. Zischa iis auditis, quamvis sceleratus, scelus tamen exhorruit. Habet enim hoc natura hominum, ut aliena magis quam sua quisque vitia perhorrescat. Neque summa mala diu inulta manent, ultoremque mali sæpe malum cernere licet. Direxit igitur in eos exercitum, expugnataque insula, Adamitas omnes gladio delevit, duobus tantum reservatis, ex quibus gentis superstitionem cognosceret. Audivi ego ex Ulricho Rosensi præstanti regulo, cum agerem in Bohemia, fuisse apud se viros & mulieres ejus sectæ captivos, & mulieres quidem palam dixisse, *non esse liberos, qui vestibus & præsertim femoralibus uterentur*, easque in carcere apud se peperisse,



riffe, quas cum anno elapso simul cum viris igni tradidisset, ridentes eantantesque flammarum incendia pertulisse.

## CAP. XLII.

*Quomodo Sigismundus Bohemiam ingressus, coronam regni acceperit, minusque feliciter pugnauerit.*

**S**igismundus interea convocatis Silesiæ ducibus, ingressus Bohemiam, Gracium, exinde Cuthnam infesto exercitu petit. Cenchohem ut arcem Pragensem sibi reddat, magnis sponsonibus allicit, equitum quatuor millia, qui urbem laceffant, ibidem collocat. Cencho bina prodicione insignis domum revertitur. Pragenses Zischam accersunt, qui cum Thaboritis nihil moratus, urbem accepit in potestatem. Duo tantum ex Baronibus Hilco Crussina Lituburgensis, & Hilco Valdesteinensis, ac pauci nobiles, Pragensium signa sequebantur, reliqua multitudo ex plebe collecta. His primum studium fuit arcem oppugnare. Locus ipse natura munitus, non aliter quam vinci fame posse apparebat. Clausi aditus, ne quid commeatus importaretur. Sigismundus ferro iter aperuit, obsessisque necessaria præbuit, nec diu postea civitatem ipsam, accersitis ex imperio auxiliis, obsidere decrevit. Fuerunt in castris ejus Saxoniarum duces, Marchionesque Brandenburgenses, & gener ejus Albertus Austriæ princeps. Oppugnata est civitas sex hebdomadibus. Ipse vero Sigismundus in æde Metropolitana, quæ in arce sita est, regni coronam accepit. Conradus natione Westphalus archiepiscopus, qui postea in hæresin prolapsus est, sacris solennibus rite peractis, diadema ei imposuit. Albicus enim jam pridem dignitati cesserat, cum familiam edentem bibentemque ferre non posset, & minori contentus officio, avaritiæ serviebat. Oppugnabatur summis viribus hæretica civitas. Medio tempore reguli Rosenses, & Chrageri Thaboritæ castra tenentes, à Nicolao Hus, quem Zischam cum parte copiarum eo miserat, prælio victi exuuntur. Gracium quoque reginæ ab hæreticis expugnatum. Imminet urbi Pragensi sublimis mons, quem Viclechonis appellant, hunc ne hostes occuparent, Zischam præsidio munierat. Cum quædam Marchio Misnen-



Misnensis congressus, magnam militum suorum partem amisit. Misnenses enim cum jam montis cacumen occupassent, in partem coacti, quæ prærupta erat, acrius oppressi, ubi retinere impetum non valere, alii cæsi sunt, alii ex monte deturbati per abrupta dilapsi perierunt. Sigismundus obsidione dimissa Cuthnam se recepit. Per idem tempus vulgaverant hæretici *ipsa die Pentecostes ignem de cælo casurum, qui urbes Bohemicas omnes exurerei*. Ob quam rem magna ex parte civitatum moenia relicta, populariter in agris errant. Sed die prædicta, cum imbres tota ferme Bohemia vehementes fuissent, religio in risum conversa, multum hæreticis opinionis detraxit. Vicit tamen obstinatio eorum, quos rapinarum cupido magis quam fidei zelus pellexerat. Zischa apud pragenses degens, ex consilio suorum sacerdotum, omnes basilicas delere adorsus est, quæ sanctorum nominibus dedicata fuerant. Neque enim fas esse dicebant, *alteri quam soli Deo templa sacrari*. Hinc plurima monasteria & nobiles ecclesiæ uno impetu in civitate disiectæ. Id Pragensibus ægre fuit, quibus servandum ædificiorum decus videbatur. Orta dissensione, jurgioque sensim obrepente, Zischa cum suis abiit, & ad Thaboritas reversus multa fidelium loca expugnavit. Inter quæ Pragatini præpositi Vissegradensis oppidum diripuit, in quo viros ac mulieres cum pueris & infantibus, cunctosque loci sacerdotes in ecclesia conclusos, immisso igne combussit.

## CAP. XLIII.

*De Orebitis hæreticis.*

**F**uit & alia in Bohemia hæreticorum factio, fratrum Orebitarum appellata, quæ territorium Gracense vicinasque gentes magnis affecit cladibus, pestifera atque immanis, neque Thaboritarum crudelitate ulla ex parte inferior. Adversus quam Martinus quintus Pontifex maximus nominatim crucem decrevit, neque tamen in plures annos extirpari potuit. Hujus sectæ homines, quotiens sacerdotes nostros intercepere, aut igne cremaverunt, aut nudos rigente hyeme super glaciem colligatos dimittere. Quos parvi momenti existimant, defectis virilibus abire permiserunt. A Pragensibus inter hæc summis viribus arx Vissegradensis oppugnatur. In qua cum

cetera



cætera abessent, eqvinæ carnes aliquvandiu pro cibo fuere. Ad extremum nisi ad certum diem Sigismundus auxilium ferret, deditio promissa, verum ea lex adjuncta, *ut veniente Sigismundo Vissegradenses prorsus quiescerent.* Affuit inter diem dictum imperator, ignarusque conditionis, locum ingressus arctum sub arce, in quo facile ab obsessis defendi poterat, cum illi datam fidem observassent, invasus repente, à Pragensibus, ingentem perpeffus stragem, rebus infectis retro abiit. Ceciderunt ex Moravis quatuordecim procures, ex Hungaris cæterisque gentibus quàm plurimi, arx Pragensibus dedita.

## CAP. XLIV.

*De multis præliis & victoriis Joannis Zischæ.*

**Z**ischæ dum hæc fiunt, Booslaum regulum, cui Cygneo cognomen fuit, qui multis antea cladibus hæreticos affecerat, in oppido suo munitissimo vi cepit & in hæresim suam pellexit. Qui ad Rethium paucis post annis in Austria, dum hæreticorum copias ducit, vulneratus interiit. Erant in territorio Pelzinenfi complura cœnobîa, opibus & structuris insignia, ex quibus Zischæ quinque combussit. In monasterio vero Claronenfi, quod munitius fuit, præsidium posuit. Huic Sigismundus exercitum admovit, Zischæ autem in eum copias ducente, turpi fuga recessit, nec diu postea Bohemiam quoque reliquit, Zischæ ad Pelzinam duxit. Sed cum civitatem egrègie defensam expugnare desperaret, inde solvens Comitaviam petiit, non parvi nominis oppidum. Quo vi capto populares cum sacerdotibus in ædibus ligneis reclusos, frustra veniam petentes exussit. Cum vero ante oppidum, cui Rabi nomen est, convocatis fratribus Thaboritis & Orbitis castra teneret, obsessosque summa vi oppugnaret, oculum quo uno lumen cœli videbat, sagitta confossus amisit. Inde Pragam ad medicos vectus, quamvis ex vulnere curatus vitam retinuit, lucem tamen haudquaquam recuperavit. Nec propterea castrensem laborem, aut rei militaris curam dimisit. Cæco populo, cæcus placuit ductor. Res apud posteros plus admirationis habitura, quàm fidei, Pragenses autem Peronam, ubi magnum inerat Sigismundi præsidium, armis ceperunt, & paucis vita reservatis, puberes utriusque se-



xus interemerunt. Expugnarunt & Brodam Teutonicam, interfecto præsidio, mox Cuthnam pluresque alias civitates deditibus oppidanis in potestatem acceperunt. Cum vero ad oppidum, cui Pons nomen est, & à Misnensibus possideretur, copias ducerent, occurrentibus Saxonibus non audentes congregi, redierunt. Posthac Sigismundus electoribus diem statuit, ut in celebritate D. Bartholomæi ad Occidentalem plagam Bohemiam cum copiis ingrederentur, ipse ad Orientale latus cum Hungarorum exercitu aggressurus. Venere Maguntinus Archiepiscopus & Colonienſis, Comes palatinus Rheni, Saxoniæ duces, Marchio Brandenburgensis, & plurimi ex Alemania pontifices, cæteri suos misere. Castrametati ad oppidum Sozium munitissimum locum, expugnare non potuere. Vastatus est undique per circuitum ager, continuata obsidia ad festum usque sancti Galli, tumque soluta, cum Sigismundus ad præmissum diem non adesset. Ille autem collecto ex Hungaris, Australibus ac Moravis exercitu, circa solennia Dominicæ nativitatis Bohemiam intravit, & cum aliqua oppida vi cepit, Cuthnenses per deditorem accepit. Sed irruente in se Zischa quamvis cæco, pavidus trepidusque multis ex suis interfectis nobilibus, & amissis impedimentis effugit. Prius tamen Cuthnam exussit, quam Thaborenſes propter argenti fodinas *crumenam Antichristi* vocabant. Zischa itinere unius diei Imperatorem secutus, magna fugientium præda ditatus est, & oppidum Brodam, quod Teutonicorum vocant, vi captum incendit, quod postea quatuordecim ferme annis sine habitatore permansit. Imperator omnem Iglariam ponte transmisit. Piso Florentinus, qui equites in eam expeditionem quindecim millia ex Hungaria duxerat, per glaciem iter habuit, quæ multitudinis pondere dissoluta, multos mortales in profundum rapuit. Hac victoria elatus Zischa magis ac magis in ecclesias desiecit. Nec jam amplius ullam pati aut statuam sanctorum, aut picturam poterat, nec tolerandum esse putabat, qui prisco more sacerdotalibus indutus vestibus rem divinam conficeret. Ob quam rem majores, quam prius inter eum & regni procures, inimicitie obortæ. Consules vero Pragenses insolentiam Joannis Apostatæ Præmonstratensis iniquo serentes animo, eum in prætorium vocavere, & novem simul scelerum principes, tanquam de republica cum his aliquid acturi, intromissosque statim gladio percussere, & quasi nihil actum esset, pacatam civitatem arbitrati, domos quisque suas petierunt. Sed  
ministri



ministri parum cauti, dum atrium aqua proluunt, cruorem interemptorum per aquæductum in forum transmissere. Eo viso, non latuit populum res gesta. Tumultus è vestigio factus, expugnato armis prætorio, undecim primarii cives, qui rei auctores putabantur, occisi, collegium Caroli direptum, & nobilis bibliotheca disjecta. Mulieres, quæ Joannem monachum veluti divinum habebant, caput ejus intercipientes, pluribus diebus ululantes, per urbis ecclesias circumtulere, *beatum* vociferantes, *sanctum & Deo plenum virum, qui pro veritate & patrum traditionibus occubisset.* Contra vero sacrilegos nepharios atque hominibus odibiles, qui sacro & optimo sacerdoti manus injecissent: postremo inter sacras reliquias aromatibus conditum Joannis caput obtinere. Per idem tempus castellum Purgellinum, in quo parvum Sigismundi erat præsidium, & quo multi Pragenſes rectæ fidei cultores, cum liberis & uxoribus confugerant, per incuriam arsit: qui superfuerunt incendio, Pelcinam se contulere. His actis nonnulli Bohemorum reguli, & consulatus Pragenſis legatos ad Vitoldum Lituaniæ ducem misere, eumque sibi regem asciverunt, adversante Zischa, ejusque factione, qui liberis hominibus regem habendum esse negabat, & eum potissime, qui gentium ritu viveret. Vitoldus Sigismundum Coributum cum duobus milibus equitum in Bohemiam misit. Qui apud Pragenſes magnis exceptus honoribus civitatem brevi ad meliorem formam redegit, nobilibus, & qui quiete vivere vellent, blandus atque amicus, in insidiosos & facinorosos asperrimus vindex. In hujus adventu munitissimum castellum in monte situm oppugnare placuit, quod lapidem Caroli vocant. Hic Sigismundus quatuor centurias militum præsidio liquerat. Castra tribus locis posita sunt, obsidio sex ducta mensibus, neque die, neque noctu omiſſa oppugnatio, quinque balistæ majores ingentia saxa per omnes horas intra mœnia jactaverunt, vasa circiter duo millia cadaveribus, & humano excremento plena in omnes emissâ, tantum miseris obsessis foetorem attulere, ut omnibus infectis dentes aut deciderent, aut nutarent. Toleraverunt tamen forti animo, & hyemem usque protraxere certamen, accepto clam ex Praga medicamento, quo dentes contineri possent. Fons erat extra mœnia in medio præruptæ rupis, unde aquam oppidani necessariam hauriebant, & turtis desuper vetu-



sta, qua tuerentur aqvantes. Hanc Pragenſes diruere machinis conabantur. Fama eſt in poteſtatem obſeſſorum primarium qvendam Pragenſem civem caſu factum, eumqve in turris culmine deligatum, dato per irriſionem in manu flabello, qvo lapides baliſta miſſos quaſi muſcas abigeret, parſuros qvippe concivi ſuo Pragenſes arbitrabantur, illos nulla miſericordia flexos ſaxa ingentia qvàm plurima projeciſſe, hominem vero cum diem integram intactus perſeveraſſet, hoſtium magis miſericordia, qvàm civium ſuorum humanitate ſervatum. Interea Fredericum Brandeburgenſem principem magnis copiis Bohemiam ingreſſum, longe lateqve prædam agentem, Pragenſes ab obſidione diſcedere compuliſſe, Vitoldum vero, rogatu Vladislai Poloniæ regis, qvi cum Sigismundo Caſare in finibus Hungariæ convenerat, patruelem ſuum Coributum ex Bohemia revocaſſe. Putavit ea re Sigismundus hæreticos externis auxiliis deſtitutos, mox imperata facturos. Sed longe deceptus. Nam illi magis ac magis inſoleſcentes, ſubactis intra regni fines Catholicæ fidei cultoribus, exercitum extra Bohemiam duxere, vicinas longe gentes popuſati. Ferunt Ziſcham in Austriam proſectum, cum agreſtes armenta qvæqve navibus in inſulam Danubii transportaſſent, vitulos ſuesqve nonnullos per negligentiam in villis dimiſſos, ad ripam fluminis tamdiu deverberaſſe, donec pecus inſulam depaſcens, mugitum, grunnitumqve audiens, deſiderio ſimilis animantis fluvium transnatavit, eoqve modo magnam prædam abactam. Per idem tempus Sigismundus Imperator Alberto duci Austriæ genero ſuo Moraviam, ne deſenſore careret, dono dedit, qvamvis jam pleriqve illius provinciæ proceres ad Huſſitarum inſaniam deſeciſſent. Eo quoqve tempore Ericus rex Daciæ, & inſans Petrus regis Portugaliz familiaris, germanus Jacobi Cardinalis ſancti Euiſtachii excellentis & clariſſimi viri, Imperatorem accedentes, ambo rei militaris peritiſſimi, exercitum ejus & copiis & auxiliis auxere. Ob quam rem caſtra ad Jutenbergam Moraviæ oppidum, Huſſitarum peſte infeſtum, ſtatim poſita, obſidio tribus menſibus eo loco ducta. Eqves apud Pragenſes, cognomento Aqva, ſatis opulentus fuit, & inter ſuos cives autoritate præditus. Is ſororis filium nomine Procopium, cum ſobole careret, in ſuum adoptavit, eumqve grandiuſculum, ad Galliam, Hiſpaniam, Italiam, deniqve Hieroſolymam ſecum adduxit,



xit, reversus in presbyterum ordinari curavit. Qvi surgente in patria Hussitarum novitate, Zischæ adhæsit, & cum esset robustus & manu promptus, nulliusqve fugax laboris, magno loco apud eum habitus, primos ductavit ordines, malus malo aptissimus. Hic est ille Procopius, qvi postea ob res fortiter gestas magni cognomen obtinuit. Huic provincia Moraviæ commissa est, & Jutenbergenium defensio. Qvi non parva militum manu accepta invitis obsidentibus, comitatum in obsessum oppidum importavit, irritamqve Sigismundo fecit obsidionem. Dederat imperator Marchionibus Misnensibus Pontem & Aufcam, super Albim fluvium, ut eas civitates præsidio tuerentur. Obsederunt Aufcam Zischæ simul cum Pragensibus, Fredericus Marchio Misnensis pater eorum, qvi modo provinciam regunt, & frater ejus Lantgravius Thuringiæ, collecto ex Saxonia, Thuringia, Misnia, & utraqve Lusacia milite, obsessis auxilium ferre statuerunt. Commissum est ante urbem prælium, incerta diu victoriæ pependit, cum fortissimi utrinq; caderent, & nunc illi nunc isti victi victoresqve viderentur. Ad extremum cæca cæcum secuta, penes hæreticos fuit. Burggravii Misnenses & \* Chirpogeneses, & Comites \* *Kirch-*  
*Glicheneses*, multiqve nobiles in eo prælio ceciderunt. Ex quibus *bergenses*, pleriqve projectis armis, flexis genibus frustra supplices vitam petierunt. Novem millia ea pugna ex fidelibus caesa, Aufca capta, & funditus deleta. Elatus ea victoria Zischæ, insolentius indies agere, ecclesias passim delere, si quæ restabant, sacerdotes qvi more majorum sacra peragerent, crudeliter persequi, nobilibus insensus esse, civitatibus gravia imperare tributa. Pragensium qvi detrectarent, ejus imperium, vicos & villas incendere. Ob quas res Pragenses Baronum auxilio freti, adversus eum copias eduxere. Ille cum se armis imparem animadverteret, ad Albim usqve profugit, eratqve penè comprehensus, nisi pater Georgii ejus, qvi nunc regno potitur, Poggiebracium oppidum transitum sibi præbuisset. Nec sic sua res tuta facta est. Fuerunt & hostibus alio loco pontes, per quos Albim transmiserunt, sed Pragenses fugientis ultimum agmen insectati, complures Thaboritas necavere. Perventum est deniqve ad montes, ubi Zischæ vallem ingressus, cum loci angustias eas esse nosset, in quibus explicare hostes suas acies minime possent, stare signiferum jussit. Exin commilitones pro tempore hortatus, pugnae copi-



am fecit. Certamen atrox commissum, victor Zischa tria millia Pragensium cecidit, reliquos in fugam vertit. Nec moratus, Cuthnam à Pragensibus instauratam, iterum vi cepit, atque incendit, & qui Pragenses inerant, eodem igne consumpsit. Mox successu rerum tumens, infestis signis Pragam petiit, & ad sagittæ jactum castrametatus obsidere urbem cœpit. Erant & in civitate & in exercitu plurimi, qui hoc dissidium detestabantur, & alii Zischam, alii Pragenses accusabant. In castris quoque tumultuatum est, dicente milite, *indigne esse eam urbem armis premi, quæ caput regni esset, neque de religione secum dissensiret, casuram brevi Bohemorum potentiam, si se hostes divisos norint. Materiam belli satis magnam à Romano imperatore præberi, stultum esse consilium in se arma vertisse.* Accepit Zischa, quæ vulgo dicebantur, & advocatam in concionem multitudinem, vas vinarium, quod forte aderat conscendens, *Nolite, inquit, amari super me fieri, fratres, & hominem accusare, qui vobis salutem peperit. Recentes victoria sunt, quas me duce consecuti estis, nunquam ego in aliquem locum vos duxi, unde victores non rediretis. Vos clari, vos divites, ego vestri causa lumen amisi, & jam in tenebris ago, nil mihi ex tot bellis feliciter actis, nisi nomen inane superest. Vobis pugnavi, vobis vici, nec laboris pœnitet. Nec mihi cecitas dura, nisi quod rei nostræ priore ex more consulere nequeo. Nec ego Pragenses mei causa persequor, ipsi vestrum sanguinem, non meum sitiunt. Parum eis fuerit me jam & utroq, cassum lumine perdidisse, vestras illi manus timent, & fortes in periculis animos. At vos certe, aut illos perire oportet, qui dum mihi parant insidias, vestras animas expetunt. Domestica nobis arma timenda magis quàm externa, civiles auferre seditiones oportet. Pragam prius expugnabimus, seditiososq, cives exterminare licebit, quàm Sigismundo divisionis nostræ nuntius asferre possit. Cum paucis ejusdem animi tutius imperatorem expectabimus, quàm si nobiscum dubii Pragenses in castris militent. Verum ne me amplius accusetis, liberam vobis consulendi facio potestatem. Si libet Pragensibus pacem dare, non abnuo, insidia modo absint. Si bellum decernitis, præsto assum. In utramvis partem declinaveritis, Zischa vestri consilii adiutor erit.* His dictis, mutati militum animi bellum decrevere, multitudo arma capere, festinare, muros adire, provocare hostem, pro portis urbis pugnam ciere, egredientes cives in urbem repellere, Zischa ad oppugnationem urbis cuncta parare.



## CAP. XLV.

*De Joanne Rochezana presbytero heretico.*

**O**ppidum est Pragensis ecclesiæ, non longe à Pelzina, cui Rochezana est nomen. Ex hoc loco puer obscuris parentibus, censuque tenuissimo natus Joannes nomine Pragam venit, mendicatuque victum quærens, Grammaticam & Dialecticam didicit. Cum adolevisset nobilis cujusdam pueri pedagogus factus est, & cum valeret ingenio, linguaque promptus esset, in collegio pauperum receptus, auditor Jacobelli fuit. Postremo presbyter ordinatus, prædicare verbum Dei Pragensibus cœpit, ex oppido unde ortum habuit, Rochezanae cognomen ducens. Et jam nomine & autoritate valebat, cum Zischa Pragam obsideret: exiit ergo consentientibus civibus & in castra profectus civitati Zischam conciliavit.

## CAP. XLVI.

*De morte Joannis Zischæ.*

**S**igismundus autem, ubi Zischæ cuncta ex sententia cedere animadvertit, & jam illum esse unum, ex quo res Bohemiæ penderent, clam sibi cum conciliare tentavit, gubernationem totius regni, militiæ quoque ducatum, & ingens auri pondus quotannis promittens, si regem nominaret, & in verba sua civitates jurare cogeret. Magna profectò Regiæ majestatis ignominia, & imperialis gloriæ dedecus, atque infamia reipublicæ Christianæ sempiterna, Sigismundum pluribus annis provectum, ex imperatoribus natum, & ipsum imperatorem, cujus nomen Italia, Gallia, Germania, & omnis Europa venerata est, quem Barbaræ nationes timuerunt, supplicem, vidit nostra ætas homini haud ex parentibus admodum nobilibus nato, seni, cæco, heretico, sacrilego, & in omne scelus audaci, pecuniam & summos honores offerre, ut suarum esse partium dignaretur. Sed avertit divina pietas eam pestem, & tantum malum è medio Christianorum eripuit. Nam Zischa conditionibus annuens, dum conventa comple-



completurus Sigismundum petit, inter eundem apud castellum Priscoviam, divinitus, ut par est credere, peste tactus, expiravit, monstrum detestabile, crudele, horrendum, importunum, quod postquam manus humana conficere non valuit, digitus Dei extinxit. Ferunt illum, cum ægrotaret interrogatum, quonam loco mortuus sepeliri vellet, *iusse cadaveri suo pellem adimi, carnes volueribus ac feris objectari, ex pelle tympanum fieri, eoque, duce bella geri, arrepturos fugam hostes, quam primum ejus tympani sonitum audierint.* Thaborenles, qui reliquas picturas abominantur, Zischæ tantummodo, & angeli cuiuspiam calicem manu tenentis, effigiem supra portam urbis pinxere, eiûve sacra quotannis agunt.

## CAP. XLVII.

*De Orphanis hæreticis, qui se post mortem Zischæ separaverunt à Thaboritis.*

**Z**ischæ mortuo ingens mœror invasit exercitum, trepidari, lamentari milites, accusare fortunam, quæ ducem invictum, morti vincendum dederit. Nec mora duæ factiones exortæ. Altera Procopium magnum, quem Rasum vocavere, cuiusque supra meminimus, sibi ducem præfecit. Altera nullum inveniri posse dictitans, qui jure Zischæ succederet, selectis paucis qui communi concilio bellum administrarent, sese *Orphanos* appellavere, inter quos potior habitus est Procopius, cognomento minor, atque ita Thaboritæ in duos exercitus divisi, alii vetus nomen retinere, aliis Orphanorum, ut diximus, ob mortem ducis inditum nomen. Qui etsi aliquando inter se dissentirent, ubi tamen extrinsecus vis ingruit, junctis viribus in unis castris sese defenderunt. Muro circumdatas urbes nisi necessariorum emendorum gratia perraro ingredi, cum liberis & uxoribus in castris vitam agere. Carros quamplurimos habere, his pro vallo uti. Procedentes ad pugnam, duo ex his cornua facere, in medio peditatum claudere, alæ equitum extra munitiones prope adesse. Ubi congregi tempus visum, aurigæ qui cornua ducerent, ad imperatoris signum, comprehensa sensim, quæ voluerunt, hostium parte, ordines quadrigarum contrahere, incercepti hostes, quibus sui subveni-



subvenire non possent, partim gladio à peditatu, partim missilibus ab his, qui erant in carris, viris ac mulieribus necari. Equitatus extramunimenta depugnare, quem si forte quis oppressisset, fugientem, mox aperti currus excipere, indeque velut ex civitate mœnibus cincta defendi, eoque modo victorias quamplurimas consequi, cum eam, pugnandi peritiam vicinæ gentes ignorarent, & ager ille Septentrionalis late patens, ad explicandas bigarum quadrigarumve ordines peridoneus haberetur. Egrediebantur duo exercitus, alter Silesiam, alter Moraviam populabatur, vicinasque regiones assiduis incursionibus infestabant, Teutones per circuitum habitantes, alios *Philistaos*, alios *Idumaos*, *Moabitasque* vocabant. Bohemiam terram promissionis esse dicebant. Cumque in proximam provinciam exissent, prius cum præda depopulatis agris revertebantur, quam hostis cognovisset adventum. Erat & tertius exercitus, quem fratrum Orebitarum appellari diximus. Huic ductor fuit Bredricus presbyter Stralsmicensis, natione Moravus, qui bellis assiduis Silesiam afflictauit. Hic etiam hodie vivit, & urbem Coloniam appellatam possidet. Qui spreta religione Christiana, calcatoque pontificio jure uxorem publice duxit, & illa mortua alteram ex Polonia superduxit, ex qua filios suæ nequitiae sectatores sustulit. Cum obsiderent Suerlam oppidum in Austria, Thaboritæ simul & Orphani duabus noctibus & una die absque intermissione mœnia expugnare, superveniente autem Alberto ejus terræ principe cum exercitu, ut auxilium oppidanis afferret, pugnatum est quatuor ferme horis nutante hinc aut illinc victoria. Ceciderunt ex utraque parte primi bellatores. Postremo ita discessum est, ut currus suos Thaboritæ amitterent, Albertus castris exutus abiret, quod negligentia Roberti Vallensis factum credidere, qui tum ductor exercitus fuit. Rediit tamen paulo post Procopius Rarus, & oppidum Retium in Austria celebri obsidione cinxit. Pragenses ejus signa secuti, & Boheslaus Cygneus, cujus supra meminimus, qui eo loco sagitta confossus interiit. Retium vi captum, direptum, atque exultum, in quo multi mortales periire, Burggravius Malburgensis, loci dominus, captus, & Pragam ductus in carcere diem obiit. His gestis, vocati ab Imperatore Bohemorum principes, ad eum usque Posenonium profecti sunt. Id oppidum Hungariæ, in finibus Austriæ atque in ripa Danubii situm. Neque ingressi mœnia, in tentoriis è regione,



urbis mansere. Egressus ad eos Sigismundus, multa de jure suo locutus, paternum atque avitum regnum repetere, si qua essent qua provincialium mentes ab sese alienarent, ea ablaturum, Bohemis ex quibus natus esset, pacificum, benignumq, regem futurum. Illi se armis ab eo sine causa impetitos dicere, cives suos in Constantia contra publicam fidem exustos, inauditos Bohemia primores tanquam hæreticos à Romana ecclesia damnatos, regnum sacris contumeliose interdictum, non esse tam exiguum Bohemorum patientiam, qua suo nequeat honori consulere. Responsum à Sigismundo benigne datum ad objecta, oblatumqve generale concilium, in quo suam innocentiam Bohemi ostendere possent, si se universalis ecclesiæ judicio submittere vellent.

## CAP. XLIX.

*De expeditione in Bohemiam, contra hæreticos & rebelles per Martinum Papam quintum instituta, & de infelici pugna contra eosdem.*

**A**T Martinus Pontifex maximus, ubi armatam hæresim crescere indies animadvertit, priusquam pestis amplius invalesceret, Cardinalem Vintoniensem natione Anglicum, regia stirpe natum, in Germaniam proficisci jussit, qui contra Bohemicam labem vicinas gentes in arma conciret, cui & imperator adjumento fuit. Instituti sunt tres exercitus. Saxoniæ duces, & quas vocant Stagnales civitates, in primo militavere. Secundum ex Franconibus constitutum Marchio Brandenburgensis ductabat. Tertio præfuit Otto Treverensis Archiepiscopus, quem Renenses secuti sunt, Bajoarii quoque, & civitates Svevorum imperiales. Ingressi Bohemiam tribus locis, postquam sylvam penetravere, juncti simul ante Misnam castrametati sunt. Hanc urbem Prichicho Elenotensis inter hæreticos quantum doctior ac facundior, tantum crudelitate ac perfidia nequior, præcedenti nocte ex fidelium manibus eripuerat. Erat igitur consilium exercitus, hanc urbem prius recuperare, quam ultra procederent. Sed cum hæretici collecto raptim milite in eos properare nunciarentur, non visum hostem fugerunt, Thacoviamqve petentes, instrumenta bellica cum præda ibi dimiserunt. Nondum Cardinalis in exerci-



exercitu fuerat, sed ad Thacoviam fugientibus occurrens, admiratus est tot ducum, tot sortium virorum pavidam scædamque fugam, magnis precibus ut redirent in hostem, omni ex parte debiliorem hortatur. Quod cum frustra niteretur, & ipse turpis fugæ comes effectus. Vix sylvam ingressi erant, cum supervenientes Bohemi postremum agmen laceßere cœperunt. Facta est profusior ac pavidior fuga, nec prius Teutones fugere, quam Bohemi persequi destiterunt. Hostes impedimentis direptis, Thacoviam expugnantes, machinisque bellicis potiti sunt. Exin Misniam populati, cum per Franconiam redirent, ne Bambergens. agrum, Norimbergensemque vastarent, pecunia placati divitem exercitum reduxere. Sigismundus his cognitis, Norimberga profectus nova principum auxilia comparat. Martinus quoque pontifex maximus Julianum Cardinalem Sancti angeli, literis ac moribus excellentem, cum ea legatione in Teutonium mittit, ut Bohemis bellum inferat, & adveniente tempore in Basiliensi concilio, quod propediem futurum erat, nomine apostolico præsideat. Is Germaniam ingressus, mox Norimbergam ad Sigismundum se confert, quo in loco persæpe Germanorum reguli convenerant. Decreta est nova in Bohemos expeditio, ad VIII. Calend. Julii. Dux belli Fredericus Marchio Brandeburgensis declaratus, qui Cardinalem sequeretur. Ingressus est Bohemiam per viam quæ ducit ad Teplam. In ea expeditione Albertus & Christophorus Bajoariæ, & Fredericus Saxoniæ duces fuere. Joannes & Albertus Brandeburgenses principes, cum patre, quem penes belli summa erat, Herbipolensis, Bambergensis, Eistetenensis episcopi, Societas Svevorum, quam sancti Georgii vocant, & imperialium civitatum, Maguntinus, Trevirensis & Coloniensis antistes, auxilia miserunt, & cum his provinciarum suarum primores. Supra quadraginta millia equitum fuisse traduntur, Peditum minor erat numerus. Nam Germani patentibus fœti campis, equestres plerumque pugnas agitant. Promiserat & Renatus Lotharingiæ princeps in eam expeditionem sese venturum. Sed domestico bello implicatus, dum comitem Videmontensem oppugnare nititur, neque promissio satisfieri potest, neque Comes Palatinus Rheni, qui Videmontensi opem tulit, adversus Bohemos ire permittitur. Cardinalis dum eos operitur, ad calendas usque Augusti profectionem suspendit. Albertus interea ex Austria ducens, cum ad dictum diem



adefse Cardinalem minime intelligeret, impar Bohemicæ potentia retrocessit. Ingressus deinde Cardinalis, numerosum exercitum ductans, multas hæreticorum villas incendit, oppidaque diripuit, in quibus non avaritia tantum, verum crudelitas etiam militum grassata est, qui mares cum foeminis obvios, senes puerosque passim necavere. In extremis tamen regni partibus ea calamitas defecit, cum duces copiarum interiora petere formidarent. Bohemi, qui jampridem hostem affuturum acceperant, expeditas in armis legiones coegerant, & ubi fidelium domicilia reperiebant, ea ferro atque igne vastabant. Inter quæ Stiltivergium oppidum ab Orphanis expugnatum ac direptum, puberes ad unum necati. Interea sive proditio in exercitu fidelium fuit, quod plurimi putavere, sive inanis sua sponte mentes hominum pavor invasis, totis castris trepidatum est, & priusquam hostis ullus in conspectu daretur, sceddissima cepta fuga. Miratur Julianus, unde hic timor, quæ ratio tantum exercitum fugere svaderet, ambire duces, hortari arma expedirent, aciem instituerent, fortianimo hostem expectarent. *Non de regni gloria aut agrorum possessione certari, de vita, de religione, de Christi honore, de animarum salute bellum geri. Turpe Germanis esse, quorum nobilitatem virtutemque, totus orbis celebraret, ex pralio fugere, mori satius, quam hosti nondum viso cedere. Neque, secure intra mœnia habitare posse, qui campos hosti relinquerent, arma viros non muros tegere. Nisi gladiis modo libertatem suam tueantur, aut casuros brevi hostili ferro, aut servitutem morte miseriorem laturos.* Sed frustra apud eos cohortatio fuit, quorum pudorem metus evicerat. Ablata sunt raptim signa, & tanquam nullus esset in exercitu ductor, tumultuose quisque non expectato imperio, non salutato comite, multi etiam projectis armis non aliter quam si hostis à tergo inflaret, rapido cursu fugam maturavere. Quibus & Cardinalis invitus sese comitem dedit. Hostis paulo post ex metu alieno factus audax assuit, impedimentisque omnibus, quibus per sylvam non erat facilis exitus, & ingenti præda potitus est. Albertus tamen cum accepisset intrasse Bohemiam Cardinalem, & ipse iterum ex Austria coactis copiis in hæreticos duxit, Præzoroviamque munitum oppidum oppugnare adorsus est. Sed fuga Cardinalis cognita, ab incepto deslitit, & per Moraviam, quæ nondum ei parebat, infesta signa circumferens, supra quingentas villas ferro atque igne delevit. Oppida multa vi cepit atque



que diripuit, mortalium maximam eadem fecit, adeoque gentem illam affixit, ut jugum ejus accipiens, parere sibi ea lege promitterit, ut circa religionem id sequi teneretur, quod Basiliense concilium decerneret.

## CAP. XLIX.

*De inchoatione Basiliensis concilii, & vocatione Bohemorum ad ipsum Concilium, ut fidei suae rationem redderent.*

**E**Xactus ex Bohemia legatus, Basileam se contulit, ibique concilium celebravit. Sigismundus, qui per tempus expeditionis Norimbergæ se continuerat, ad coronam imperii Romæ suscipiendam iter ingressus, primoribus regni Bohemiæ literas dedit, in quibus scriptum erat: *se natione Bohemum, nulli genti magis quam sua affectum, Romam non aliam ob causam petere, quam coronam suscipiendam gratia. Id decorum Bohemorum genti accedere, cujus honestanda sibi maxima semper cura fuerit. Cæptum esse jam sua opera Basilea Concilium, hortari eos qui se audiri de religione cuperent, eo proficisci, nec plus sapere vellent, quam mater ecclesia catholica, auditurum benigne conventum rationes eorum, tantum operam dent, ut cum Synodo de religione conveniant, sibi redeunti paratum regnum reservent. Neque enim arbitrari se Bohemos ejus imperium fugere, cujus pater, frater, avus apud eos regnaverint. Nec se alia lege regnaturum, quam ceteri Christiani reges. Scripsit & ipsa Basiliensis synodus Bohemis, ut legatos mitterent, qui fidei suae rationem ostenderent, securitatem itineris, & dicendi quæ vellent libertatem promittens. Fuerunt inter Bohemos duæ sententiæ: Orphani & Thaboritæ, & plebes ferme omnes eundem esse negabant, Joannis & Hieronymi exemplum in medium afferentes, qui Constantiam ad Synodum profecti sub fide Sigismundi, publice combusti fuissent. Nobilitas vero Mainardum secuta principem Novæ domus, virum cordatum & ingenio dextro, petendum esse Concilium prorsus agebat, nec tolerandos videri qui novas peregrinæ de fide sententias, novumque ritum religionis invenissent, nisi dictorum factorumque rationem universali ecclesie redderent, & quæ vulgo inculca-*

k 3

verant,



verant, coram doctis defenderent. Vicit hæc sententia, legatio CCC. equitum Basileam missa. Cujus principes fuere, Gulielmus Coska, non tam equestri dignitate quam ecclesiarum direptione insignis, Procopius cognomento Ralus, idemque magnus multis victoriis magnisque sceleribus nobilitatus, Johannes Rochezana pseudo Pragensium apostolus, Nicolaus Gallecus Thaboritarum sacerdos, & Petrus Anglicus patria profugus, ac solis elenchis in disputatione confidens. Effusus extra mœnia urbanus populus, ex Synodo quoque complures, adventum fortissimæ gentis pro portis expectavere Alii frequentes in plateas, quæ transitus esset, convenere, matronæ, pueri, puellæ fenestras atque tecta complere. Alii hunc, alii illum digito designare, peregrinos habitus, non visa prius vestimenta mirari, horribiles hominum facies, truces notare oculos, non esse alienum dicere ab ea hominum specie facta, quæ fama prodiderat. In unum tamen cuncti Procopium defigere lumina, illum esse, qui toties fidelium fugasset exercitus, qui tot oppida subvertisset, tot hominum millia neci dedisset, quem sui pariter atque hostes metuerent, invictum ducem, audacem, intrepidum, neque labore, neque timore superandum.

## CAP. L.

*Oratio Juliani Cardinalis, ad Bohemorum legatos,  
Responsivaque eorundem.*

**E**Xceptos Bohemorum legatos hospitaliter, postridie in concione accersitos, Julianus Cardinalis benigne allocutus, & longa & luculenta oratione, quæ adhuc extat, ad ea quæ pacis & unionis essent, cohortatus est, ecclesiam Christi salvatoris sponsam omnium fidelium matrem esse, dictitans claves ligandi atque solvendi habere, candidam sine ruga, sine macula, in his quæ necessaria ad æternam vitam esse creduntur, errare non posse. Qui eam contempserit, alienum, prophanum & quasi ethnicum, publicanumque censendum, eam nusquam melius quam in generali concilio representari. Statuta conciliorum ecclesie placita existimari, conciliis non minus quam evangeliiis credi oportere, quorum autoritate & ipsa sacrarum literarum eloquia præcepta sunt.

Bohe-



*Bohemos qui se filios ecclesie dicerent, voces matris audire debere, quæ filiorum oblivisci non potest, eos jam pridem seorsum à matre vixisse, neque id novum esse. Complures aliquando fuisse, qui matrem reliquere, rediisse tamen qui salutem optavere. Regnante diluvio omnes perisse, qui extra arcam remansere, dominicum agnum in unis adibus comedendum, extra ecclesiam non inveniri salutem. Hanc esse conclusum hortum, signatumque fontem, cujus aquam si quis biberit, non sitiet in aeternum. Ex re sua sapuisse Bohemos, qui ejus aqua fluentia apud concilium requisierint, matremque tandem audire statuerint. Facessere jam odia debere, ponenda esse arma, omnemque belli materiam procul abjiciendam, audituros benigne patres quacumque Bohemi pro sua causa dicere velint, tantum parati animo sint, ne bene consultæ sanctæ Synodi consilia respuant, quibus non Bohemos tantum, sed omnes Christi fideles conquiescere oportet, si modo aeterna vita participes esse velint. Audita est cardinalis oratio summo patrum consensu. Bohemi pauca respondere, quibus par facundia non esset, se neque concilia, neque ecclesiam contempsisse, adversus inauditos sententiam Constantiæ latam, nihil de religione Christiana detrabere, incorruptam apud se patrum auctoritatem manere, quodcumque Bohemi asserant, sacris literis atque Evangelio confirmari, venisse ut innocentiam suam universali ecclesie patefaciant, petereque publicam audientiam, in qua laici quoque adsint. Neque id negatum. Interrogati quamnam illa essent, in quibus à Romana ecclesia dissentirent, quatuor articulos proposuere. De communione divinæ eucharistiæ, quam sub specie panis & vini sumendam his qui salvi esse velint, necessario affirmabant. De civili dominio, quod clericis interdictum divina lege dicebant. De prædicatione verbi Dei, quam liberam permissamque passim omnibus arbitrabantur. De publicis delictis, quæ nulla ratione toleranda putabant, etiam majoris mali vitandi gratia. Nam quamvis plurima sunt, quæ Hussitarum perfidia adversus catholicæ fidei veritatem astruere ac prædicare non dubitat, coram concilio tamen doctorumque patrum cœtu, hæc tueri tantummodo posse arbitrati sunt, eaque regni nomine dicta. Verum cum legatus alia de Bohemis accepisse se affirmaret, quæ Christianas aures offenderent, inter quæ illud esset, quod religiones mendicantium inventum esse diabolicum prædicarent, asurgens Procopius, neque hoc falsum est, inquit. Nam si neque Moyses, neque ante eum patriarcha, neque post eum propheta, neque in nova lege*  
*Chri-*



*Christus dominus, neque Apostoli mendicantes instituere, quis non intelligit diaboli tenebrarumq; opus esse? Excepta est ingenti cachinno Procopii vox, legatus vero, ut erat mansuetissimus pater, argumentationem indocti hominis placide dissolvit. Neque enim prophetarum patriarcharumqve placita, & quæ Christus instituit, quæ sanxerunt Apostoli, duntaxat à Deo esse docuit, verum ecclesiæ quoque decreta, quæ sancto dirigente spiritu ducitur, opera Dei esse monstravit, quamvis & aliunde mendicantium vita ex Evangelio sumpta videri possit. Selegerunt Bohemi quatuor magistros, qui suos articulos ex divina lege sumptos ostenderent. Qui eos confutarent, ex cœtu patrum totidem assumpti, viri præstantes, & ad dicendum parati. Disputatum est quinquaginta diebus, multa in utramque partem adducta. Postremo cum victa Hussitarum perfidia vinci nollet, ad tractatus ventum, tentatum, si fortasse amicè trahi possent. Missi & oratores ex concilio in Bohemiam, viri doctissimi, & qui gentis versutiam nossent. Multa cum Bohemis agitata, nunc pacis spes facta, nunc belli metus.*

## CAP. LI.

*De victoria Bobemorum fidelium, & debellatione morteque Procopii, ac aliorum hæreticorum.*

**D**Um hæc aguntur, Thaboritæ & Orphani Mainardo cæterisque nobilibus infensi esse cœperunt, eorumque suspectas actiones habere, tanquam concilio auscultarent. Neque vana opinio. Convenere namque sæpe inter se Barones, errorem suum recognoscere, miseros se dicere, qui cum regis imperium abdicaverint, Procopii jugum ferant. Illum dominum esse, illum pro sua libidine provinciam regere, vectigalia exigere, tributa imponere, delectum habere militum, exercitum quo velit ducere, rapere, spoliare, occidere, nullum pati, qui suis consiliis adversetur, nobiles juxta atque ignobiles ei mancipia esse. Nullum hominum genus infelicius esse Bohemis, quos semper in castris versari oportet, æstates atque hyemes sub divo agere, in duro jacere solo, arma in omnes horas versare, nunc civilibus bellis, nunc

*externis*



externis agitari, aut bellum geri, aut belli metum impendere. Excutiendum tandem crudelis tyranni iugum, neq, ferendum, ut qui ceteras gentes armis vicerint, Procopio serviant. Placet accersire publice conventum procerum & civitarum, in quo regni status reformetur. In eo Mainardus: ei regno bene esse dicit, in quo neq, per otium marceant homines, neq, per bellum atterantur. Bohemos hactenus expertos fuisse quietis, atrium assiduus calamitatibus regnum, periturum brevi nisi occurratur. Incultos jacere agros, homines atque armenta sensim deficere, id accidere, quod omnia in potestate unius sita essent, qui sine consilio procerum civitatumque pro suo arbitrio rem gerit. Illi salubre bellum esse, nam si paci locus sit, imperium ejus statim casurum. Deligendum unum esse ex nobilitate ducem, cujus potestas annua sit, nonnullosq, ei adjungendos, quorum consilio demi belliq, rempublicam administret. Ne vero usurpare sibi Barones imperium viderentur, ex media nobilitate assumendum ducem consuluit. Itum est favente conventu in sententiam Mainardi. Alscio Risenburgensis antiquæ nobilitatis homo, sed tenui censu, dux gentis declaratus, quem Capitaneum vocavere. Cæterum majestatis insignia apud eum fuere, autoritas apud Mainardum extitit. Procopius his cognitis, Orphanos & Thaboritas in expeditionem ducens, ad urbem Pelzinam, quam fideles incolebant, castra ponit, atque undecim continuis mensibus pertinaci obsidione, crebrisqve oppugnationibus urget. Oppidani extrema omnia passi, ac jam fame pereuntes ad synodum Basiliensem misere oratum, ne fideliem urbem in manus hæreticorum pervenire sinerent. Patres quibus non esset publicum ærarium, ex privato argento symbolum dedere, auri octo millia nummum Mainardo mittentes, qui collecto exercitu subveniret obsessis. Per idem tempus ea pars Pragæ, quæ nova civitas appellatur, ab Orphanis imposito præsidio tenebatur, cujus præfectus erat presbyter Lupus Rochezanæ infensissimus, adversus quem prædicando plebem incitabat. Ille in veteri civitate apud ædem, S. Mariæ ante latam curiam inhabitabat, Lupumqve suis ipse sermonibus probrosisqve maledictis lacerabat. Ob quam rem crescentibus odiis, clauserunt Orphani aditus veteris civitatis in novam, turresqve ligneas plurium tabularum erexere, quibus oppidanos in adversa civitate missilibus infestarent. Ea occasione usus Alscio, convocata nobilitate, nihil esse imperium suum dicit, quod Thaboritæ



Orphaniqve contemnant, regnum mature periturum, nisi magistratibus pareatur. Rogat procures in medium consulant. Placet omnibus cum ea manu militum, quam Mainardus comparaverat, Pragam peti. Nec morati veterem civitatem ingrediuntur, ligneas turres amoveri, parereqve omnes Alscioni jubent. Negant Orphani ducem esse, quem neque ipsi, neque Thaboritæ suscepissent. Fit tumultus: committitur in urbe prælium. Lupus, ubi suos cedere animadvertit, pluresqve cadere, salutem pedibus petiit. Disjectæ turres omnes, in potestatem Alscionis factæ. Pelzinenſes re cognita, Procopio è muris illudere, hortari *ſuis civibus opem ferat, alienos ne laceſſat. Stultum eſſe, cum qui ſua tueri nequeat, infeſtare aliena. Niſi ſuapte ingenio ab obſidione diſcedat, venturos brevi præceres, qui nolentem cogant.* Ficta ea Procopius credere, atqve oppidanis ad ferendam fortius obſidionem blandimenta oblata. At ubi certum nuncium de geſtis Pragenſibus accepit, ſoluta mox obſidione, plenus irarum, cum omnibus copiis verſus Pragam iter dirigit. Properanti communes amici occurrunt, de pace inter eum & nobiles agunt, *diviſum inter eos regnum ſtare non poſſe, conſulendum communi quieti, neque concordia ſine viribus, neque vires ſine concordia ſufficere, civitatibus ejus populi inextinguibile munimentum eſſe, qui concordibus animis arma tractaret, lites ex arbitrio ducis componi poſſe delectis ex utraque parte pari numero viris, quorum conſilio leges pacis dicerentur.* Procopius demum ita ſe pacem habiturum reſpondet, *ſi nova Praga ſibi reſtituatur, ſi munitiones dejecta reſtificentur, ſi Pelzina eo in ſtatu reponatur, in quo fuerat ante diſſolutam obſidionem:* nam commeatus jam eo importati fuerant. Nobiles ubi reſ factu difficillimas peti vident, Procopiumqve vincula, verbera, cædes minari, cum alia via pax inveniri non poſſet, armis decertare conſtituunt. Relicta itaqve civitate, cujus nutare animos non ignorabant, obviam hoſti pergunt. Ventum eſt ad locum inter Brodam Bohemicam & Burim, quatuor millibus & quingentis paſſibus à Praga diſtanti, in agris late patentibus. Ibi currus contra currus incurrun, & ſublato clamore alteri alteros contumelioſe compellant. Deceverat Procopius haudquaquam pugnae copiam facere, niſi ex occaſione prærogativa daretur. Erat ei animus recta via Pragam petere, ubi non dubitabat novam civitatem ſibi portas aperturam. At equitatus nobilium munitiones ejus prætergreſſus, dum forte ad ultimam partem



partem apertam videt, raptim ingreditur, cædemq; magnam facit. Hostes improvise malo præventi, quid agant, nesciunt. Trepidatur, totis castris, insolita res terrorem auget. Neque enim intra munitiones curruum intrasse prius equites aliquando viderant. Cæduntur passim pedites, fit fuga, aperta ex altera parte mole quadrigarum. Instant nobiles, sternuntur ubiqve fugientes. Procopius ubi suos retinere non potest, nec audire hortamenta periculum metusqve sinit inter confertissimos hostes dilapsus, cum cohorte quam sibi ex fortissimis magis quam amicissimis delegerat, aliquandiu hostis impetum retinet, multisqve caësis, victoriam penè hostibus eripuit. Sed circumventus multitudine equitum, non tam victus quam vincendo fessus, telo in incertum misso transfoditur. Pari modo & alter Procopius, quem minorem appellari diximus, in eodem globo fortiter pugnans occumbit. Atque is finis duobus illis perniciosissimis ac deterrimis monstris fuit. Sic Thaboritarum & Orphanorum scelerati exercitus, invicti prius, victi ac deleti sunt: Procopium rasum quis occiderit, ignoratum est, quamvis Coska, de quo supra meminimus, id facinus honestum dignumqve præmio suum dixerit, qui tum partes nobilium seqvebatur. Primus ejus victoriæ autor habitus est Mainardus, post eum Ptarseonis magna virtus visa. Coapcho vero Thaboritarum equitarum ductabat, rei militaris apprime peritus, & qui multis aliquando damnis Prutenos affecerat, & à rege Poloniæ vocatus, usqve ad Gedanum, & mare Baltheum victorem exercitum duxerat, ex hoc prælio fuga dilapsus, cum magna parte equitatus in Coloniam sese recepit. Confecto bello cum multa millia captivorum essent, Mainardus cum concilio procerum accersito perdere pessimam plebem statuit, quæ nutrita in armis omnem ætatem in castris egerat, nec sub legibus victura credebatur, rapinis, cædibus, atque adulteriis assueta. Quia stante, pacatum regnum stare non posset. Sed veritus ne simul innocentes interficeret, qui ex agris coacti ad pugnam venerant, voce præconis edici jubet, *nondum bellum peractum esse, fugisse Coapchonem, Coloniam expugnari oportere, vicinasq; per circuitum gentes, quæ regnum popularentur, armis domandas. Ad eam rem necessarios, qui sub Procopiis militassent, viros fortes & in bello exercitatos, decretum eis ex publico stipendium, donec regnum pacaretur. Proinde omnes, qui stipendia facere vellent, in horrea sese proxima reciperent, caverent, ne rudis inexper-*  
*tosq;*



rosq; belli secum admitterent, illos sua rura, suosq; lares repetere posse. Introierunt horrea, quæ apud Bohemos in villis ex maceria culmo tecta frequenter sunt, pleraque Thaboritarum & Orphanorum millia, homines nigri ad solem & ventum indurati, aspectu retri atque horribiles, & qui circa fumum in castris vixissent, aquilinis oculis, impexocrine, promissa barba, corporibus proceris, membris hispidis, cute adeò dura, ut ferrum quasi lorica repulsura videretur. Clausa sunt confestim ostia, & ignis immissus horreish, quo fax illa & colluvies hominum, ignominiosum agmen, post multa quæ patraverat scelera exusta contemptæ demum religionis poenas dedit.

## CAP. LII.

*Quomodo Sigismundus Romæ coronatus, post multas  
dissensiones & bella, cum pace & gaudio  
à Bohemis suscipitur.*

**S**igismundus interim ab Eugenio Pontifice maximo Romæ coronatus, Basileam petierat, dissidioque patrum, quod tunc erat cum Eugenio, ad tempus sedato, Ulmam se contulerat. Ea est Sveviæ civitas, ad ulteriorem Danubii ripam sita, Licius amnis, qui Svevos à Bajoariis disternat, è regione urbis in majori flumine exoneratur. Hic audita Thaboritarum Orphanorumque clade, legatos in Bohemiam mittit, regni proceres commendat, qui viros nocentes deleverint, hortatur regni quietem procurent, seseque regem suscipiant, quem fratri successorem jus gentium dederit. Illi magno numero apud Ratisponam eum conveniunt, Regemque suum salutant, Venerunt & seorsum, Coapcho & Joannes Rochezana, de suis rebus acturi. Legati quoque Basilienses, qui Pragæ fuerant, & cum Bohemis certo modo convenerant, eo se contulere. Sigismundus auditis, quæ de religione in communione placuerant, conventa probavit, eaque servari mandavit. Exin poscentibus Hungaris, navibus per Danubium vectus, Budam petiit, ubi reformato rerum statu, vocatis ad se Bohemorum principibus, in Alba regali sexaginta millia numerorum inter eos distribuit, pecorumque maximum numerum. Dicta die qua vellet Bohemiam ingredi, non moratus Iglariam venit. Ubi concilio



concilio cum Bohemis habito, conventa legatorum synodaliū ite-  
rum comprobavit firmavitq̃ve. Ea hujuscemodi fuere. *Bohemi ac Mo-  
ravici ecclesiasticam unitatem, pacemq̃, complectentibus, seq̃, in cæteris omni-  
bus, præterquam in usu communionis utriusque speciei, universalis ecclesia  
fidei acritui conformantibus, autoritate Domini nostri Jesu Christi, & eccle-  
sia sponsa sua, sub duplici specie panis scilicet ac vini, his qui consueverunt  
divinæ eucharistia communicare licebit. An vero ex præcepto Dei id fieri  
debeat, generale Concilium in Basilea congregatum diffinit, & quid utili-  
tati fidelium salutiq̃, congruat, lege in perpetuum valitura constituet. Quo  
facto, si perseveraverint Bohemi in ejusmodi communicationis desiderio, idq̃,  
missa legatione petierint, sacer conventus Bohemia ac Moravia sacerdotibus  
communicandi sub utraq̃ve specie personas sibi subjectas, & in annis discre-  
tionis constitutas, & quæ id reverenter postulaverint, libertatem imparte-  
tur, ea conditione adjecta, ut inter communicandum plebem publice instru-  
ant, non sub specie panis carnem Christi tantum, nec sub specie vini solum  
sanguinem, sed sub qualibet specie totum & integrum contineri Christum.*  
Brevis concordia notula, verum tot sententiæ quot verba, quibus pe-  
regrinæ de fide sententiæ, diversisq̃ve de religione ritibus obviari ju-  
betur. Et quod ecclesia universalis credit, quod servat, genti Bo-  
hemorum credendum servandumq̃ve præcipitur, circa communio-  
nem tantum permissa novitas. Cæterum inter Bohemos & Impe-  
ratorem aliæ pactiones intervenire, quibus ecclesiarum prædia occu-  
patoribus jure pignorum relicta sunt, donec certa pecunia relueren-  
tur. Religiosis utriusq̃ve sexus, quibus adempta monasteria essent,  
exulibus quoque spes redditus interdicta, Rochezanæ Pragensis eccle-  
siæ præsulatus promissus, de disponendo ecclesiarum Bohemicarum  
regimine summo Pontifici facultas oblata. His sic constitutis, Ro-  
chezana cum aliis quatuor presbyteris, nomine totius cleri sibi adhæ-  
rentis, sedente Sigismundo pro tribunali in foro civitatis erecto, assi-  
sente Alberto genero magnaq̃ve procerum & oratorum circumstan-  
te corona, obedientiam Romanæ ecclesiæ sese præstare professus est.  
Seq̃vente vero die, haud absimili solennitate absoluri sunt ab anathe-  
mate, cæterisq̃ve censuris hæretici, & in ecclesiam per concilii lega-  
tos introducti. Ubi cum divina celebrarentur, Rochezana perfidiæ  
sua non immemor, altare accedens, divina re peracta, uni quem jus-  
serat ex laicis adesse, sacramentum ex calice dedit. Et quamvis Joan-



nes Polomor, alter ex concilio legatus in aliena ecclesia id sibi non licere assereret, eumque prohiberet, in proposito perstitit. Ob quam rem penè in irritum conventa ceciderunt. Composita tamen lis est, ex eo conventionis capite, quo sancitum erat, *ne paucis pacta violentibus communis concordiarum percutur.* His compositis, Sigismundus nona Septembris, anno sexto & tricesimo supra millesimum & quadringentesimum ab ortu Salvatoris Domini, Pragam venit, ubi, qui paulo ante Bohemorum hostis ex adulterio natus, Antichristi filius, sacrilegus, publicis hominum votis perdendus censebatur, extremis honoribus exceptus est. Barones ac civitates in ejus verba juraverunt, & magistratus suos, quos ipse constituit, acceperunt, certantes inter se, quis alter altero suo regi obsequentior videretur, ut est humanum ingenium utramque in partem immodicum, sive persequi sive obsequi malit. Philibertus episcopus Constantiensis, natione Gallicus, & collegæ sui ex Basilea missi, ecclesiasticos introducere ritus, sacerdotes instituere, ex missarum solennibus vulgaria verba, cantilenasque detrahare, sanctorum imagines reducere, aquam benedictam in ædibus sacris reponere, baptismatis fontes sacrare, altaria ornare, spurcitas omnes abolere. Paruere complurimi, quibus mens sanior fuit. Rochezanæ complices resistere, obloqui, blasphemare, plebem modis omnibus avertere. Ipse quoque inventor malorum ex parochia S. Mariæ ante Lætam Curiam, quam propria temeritate invaserat, amoveri minime potuit, neque laniare sermonibus suis inter prædicandum Romanam ecclesiam prætermisit, legatisque sæpe necem per insidias machinatus est. Sigismundus autem cum ecclesias pollutas intrare nolleret, templum S. Jacobi, quod fratrum minorum fuerat, & in quo machinæ bellicæ tum servabantur, restitui sibi poposcit. Annuic, civitas, & aliqui monachi introducti sunt, qui verbum Dei prædicarent. Id olim ne Zischa subverteret, armati carnifices defendere, sepulchris majorum consulentes. Redierunt & alii mendicantes, tum Celestini, Slavi, servi S. Mariæ Theutones, Hierosolymitani, & nonnullorum monasteriorum Abbates. Sacerdos quoque S. Georgii in arce Pragensi, quæ principis honore defungitur, & pastoralis baculo utitur, sacris præfecta virginibus ab exilio remeavit. Hæc ex veteri more quotannis in celebritate S. Viti novellum regi panem offerre



ferre tenetur. Restituti sunt & Cathedralis ecclesiæ canonici ac vicarii, ornamenta altaribus reddita, divinum officium instauratum. Legati Basileam missi, qui declarationem super articulo communionis expeterent: cumque nulli essent ecclesiæ redditus, ex quibus alii templorum ministri possent, iussit Imperator, ex fisco regio per singula canonicorum capita hebdomadatim aureum nummum distribui, minoribus clericis dimidium dari. Ea res annua aureorum sex millia apud ecclesiam Cathedralem absumpsit. In alia quoque templa donaria collata. Nova jam facies urbis, novus populus, verus rediisse religionis cultus apparebat. Quibus ex rebus liquet Imperatorem, quæ scœdera cum hæreticis percussit, necessitate magis admisisse, quam voluntate, voluisse illum paternam hæreditatem, quovomodo intrare, sensimque regni possessione accepta more majorum sub veram Christi religionem provinciam reducere. Jamque reges ei populi que Christiani de regno recuperato congratulabantur, ejusque nomen in omni ecclesia magnum erat. Eugenius quoque Pontifex maximus auream rosam indicem suæ laticiæ ad eum misit. Thaboritæ qui superioribus cladibus supersuerant, in oppido conservati, ea lege in gratiam recepti, *ut quinquennio toto suis moribus viverent, religionis cultum mutare non cogerentur, jura civitatis haberent, signum ferrent, in sigillis rubra cera uterentur, tributum nomine singulis annis sexagenas decem penderent.* Sed cum nephandas eorum consuetudines Sigismundus accepisset, quibus illi circa rem divinam uterentur, quinquennium haud expectaturum se dicere, correpturum prope diem sceleratæ civitatis insaniam. Rochezanam hortari Romanæ ecclesiæ se subjiceret, sic posse pontificatum sibi committi, superbi-  
enti, & aliena de fide sapienti, ascensum desperandum esse, qui vel consecratus episcopus ejici deberet. Ille mente superba, & opinione sua inflatus, dietim pejor, dietim venenosior effici, monachorum redditum ægerrime ferre, quorum sermones non minus quam suos acceptum iri verebatur. Ob quam rem occurrente inter prædicandum sermone de monachis, *Venerunt, inquit, novi dietim ad nos demones, quos monachos vocant. His studium est ejicere nos de veritate, ac si viri fuerimus, prius sanguinem effuderimus.* Id Sigismundus ubi accepit, imo nos, inquit, *Rochezana sanguinem non inviti ante aras libabimus.* Non latuit Rochezanam Sigismundi sermo, qui ex amicis



cis commonitus clam aufugit. Ejus ecclesia Papusconi bono & docto viro commissa, quem nos postea exulem, perturbatis iterum rebus in Nova domo vidimus. Priusquam Bohemiam intrasset Sigismundus, Joannes Rohacius, nobili loco natus, ingenio malo, mente pessima non longe à montibus Cuthnis, intra sylvas in edito colle castellum ædificavit, vocavitque montem Syon, asserens ex eo loco veritatem aliquando exituram, quæ gentem Bohemicam libertate donet. Euntibus ad Iglariam ceteris nobilibus imperatorem suscepturis, ipse domi manens, vicinis infestus prædas agit, instigantibus nonnullis Baronibus, quibus pax noxia, bellum salubre videbatur: Sigismundum quoque lacessit, armenta boum & ovium, quæ illi advehebantur, ex Hungaria rapit. Itinera quæque infœcunda, infœsta reddit, neque purpuratis regiis abstinet. Sigismundus Henricum Ptarsconem, qui hominem corripit, cum exercitu mittit, obsidio quatuor ducta mensibus, castellum summa vi oppugnatum. Sed in cacumine montis situm, vallo, fossa, murisque opportune munitum, difficile superatu erat. Eriguntur tures, quæ munitiones murosque superent, tela intus jaciuntur, multi utrinque cadunt, obsidentium plures, in quos tela haud frustra cadebant. Accessum ad muros altior fossa prohibebat, quæ licet aqua caruit, laboriosum tamen periculosumque militi erat, sagittis undique cadentibus in eam descendere, atque inde rursum vallum, quo muri præcingebantur, ascendere. Cuniculis igitur aditus in fossam paratur, relicto terræ aliquanto, ne fraus intelligi posset instar ostii ante fossam. Expectatur ventus, qui ex castris in castellum spiret. Is ubi vehemens datus est, armati aditum ingrediuntur, tormenta anea quam plurima simul incenduntur, ventus fumum in castellum rapit, milites aperto cuniculorum repagulo in fossam profiliunt, & admotis scalis vallum ascendere nituntur. Prandeat tum forte Rohacius, pauci qui pro muris excubant, clamorem attollunt. Fit tumultus, concurritur undique ad defendendum vallum. Rohacius quoque relicto cibo sumtis armis auxilio suis ex arce advolat, pugnatur eodem tempore pluribus locis acerrime. Ubi Rohacius adest, hostis ex alia parte vallum superat, stragemque late faciens, castellum ingreditur. Rohacius dum ire in arcem festinat, præcluso itinere capitur, arx quoque vi rumpitur, latronibus qui eo confugerant interceptis, sacerdotique Hussitarum



sitarum vesaniæ participi, qui sacramenta ministrabat hæreticis, indita vincula, ducti omnes Pragam, suspendio vitam finire. Furcarum, quibus damnati pœnas dedere, triplex differentia fuit, & sublimior Roacius pependit, imam tenere latrones circiter nonaginta, media sacerdotem arripuit nomine Medium, atque ita Medius in medio furcarum damnatam animam devotamque Sathanæ reddidit.

## CAP. LIII.

*De morte Sigismundi Imperatoris, & quem reliquerit in testamento hæredem.*

**A**E Grotare interea Sigismundus cœpit, exaugente morbum senectutis incommodo. Barbara imperatrix de retinendo imperio sollicita, Henricum Ptarsconem Sterenbergium, Georgium Poggiebracium, & alios plerosque Barones, quorum autoritas apud Bohemos potior, clanculum ad se vocat, Sigismundum brevi moriturum asserit, futuras in regno turbationes, nisi rei suæ quam celerrime consulant, quietis unicam viam esse, si se viduam rex Polonia ducat uxorem. Id ei suasu facile. Nam quis matrimonium renuat, quod dotalia duo regna sequantur, eaq, maxima, & opulentissima? Suo nomine & in Hungaria & in Bohemia oppida munitissima custodiri, comites Cilia alterum fratrem, alterum nepotem, auxilia præbituros, multos in Hungaria procures, suas partes complexuros. Placet Bohemis imperatricis consilium, datisque dextris scœdus incunt. Mulier jam anus, novum conjugium mente complexa, filiam, quæ in spem regni creverat, & Alberto duci Austriæ nupserrat, ex animo dimovet, nec aliud, quàm novi concubitus gaudia meditarur. Inexhaustam fœminæ libidinem! quæ tumulo quo propior est, eo genialis thori, nuptialisque facis cupidior & curiosior redditur. Non latuerunt Imperatorem furentis fœminæ excogitatus. Qui postquam referentibus medicis moriendum sibi esse cognovit, ex Bohemia cujus sibi dubia fides erat, in Moraviam se vehi iussit, visurus filiam, priusquàm vita excederet. Illa cum viro ad eum in civitatem venit, quam Shoima vocant. Ibi mox Barbara virum secuta, custodiæ traditur. Ulricus



Ciliæ comes præmonitus, fugam arripuit. Imperator vocatis in cubiculum Hungariæ ac Bohemiæ primoribus, adventasse resolutionem sui corporis, nec jam amplius se vivere posse affirmat, *iturum se patriam viam. Ceterum priusquam oculos claudat, de salubri statu regnorum suorum velle cum eis agere. Albertum Austria ducem, generum suum esse, & virtute præstantem, & generis nobilitate sublimem, cum se non minus amare quàm filium, successorem itaque suum nominare, rogare supremam voluntatem suam exequantur, beatum id regnum futurum, cui Albertus imperaverit.* Exin legatos nominat, qui se mortuo Bohemiam petentes, in conventu testamentum suum patefaciant. Inter quos Gaspar Slichius princeps fuit, matre Italica ex comitibus Collis alti agri Tarvisini, patre Teutonico natus, ex familia Lazana provinciæ Franconiæ, ingenio dextro, facundia svavi, doctrinæ cultor, ad omnia genitus, quæcunque ageret. Quem usque adeo fortuna & virtus extulit, ut quod erat prius inauditum, trium Cæsarum successive regnantium cancellariæ præfuerit, unus ex ducibus Silesiæ filiam sibi in matrimonium tradere non recusaverit. Sigismundus illi Egram & Cubitum, & alia in Franconibus oppida dono dedit. Albertus in Hungaria Calesium, & Albam ecclesiam. Fredericus in Austria Græcium. Versatile profecto ingenium, & naturæ bonitas singularis, quæ inter tot, imperatores, moribus prorsus dispares, pari gratia vivere potuit. Nos hujus amicitia in curia Frederici Cæsaris usi, si quid profecimus quod scimus quàm tenue est, adjumento ejus consecuti sumus, Episcopatum certe Tergestinum, unde reliquæ dignitates provenire, ipse nobis primus committi curavit. Mortuus est Viennæ, & apud Carmelitas cum conjuge sepultus. Sigismundus supremis suis ordinatis, inter amicorum manus defecit.

## CAP. LIV.

*De sepultura Sigismundi Imperatoris.*

**A**lbertum Barones qui aderant ex Hungaria & Bohemia, concordibus animis regem salutavere. Ipse missis in Bohemiam suis & Sigismundi legatis, versus Posonium iter flexit. Miserabile spectaculum, & humanarum rerum singulare documentum, imperatrix captiva & Imperatoris cadaver unâ vehitur. Occurrunt lugubres



gubres Hungari, nec teneri lachrymas in tanta rerum novitate possunt. Hinc defuncti regis corpus fletum elicit, inde reginae vincula commiserationem excitant. Solatur tamen miseros novi regis electio, cujus virtutis multa extabant documenta. Duo inter se oppugnantes curae occurrebant, altera sepeliendi regis, plena mœroris, altera coronandi, læta jocundaqve. Justa prius defuncto regi persoluta, corpus ejus in Varadino, ut in ultima voluntate placuerat, sepultum. Albertus in Alba regali, cum conjuge sua Elizabeth, Calendis Januarii summo consensu & applausu populi coronatus est,

## CAP. LV.

*De Alberto Bohemorum Rege quarto decimo, & etiam Romanorum Rege.*

**L**Egati in Bohemiam profecti, vulgato Sigismundi testamento, Albertum vicinum, potentem, nobilem, virtute præstantem, Bohemis amicum, regem assumi petunt. Joannis, Caroli, Venceslai, & ipsius Sigismundi erga regnum merita commemorant. Natam ex eorum sanguine Elizabeth, non esse paterna hæreditate privandam. Inter Bohemiarum reges & Austriarum principes fœdus extare, procerum consensu & imperiali autoritate firmatum, *ut deficientibus altera domo masculis hæc edibus, altera regnum accipiat.* Defecisse masculos in Bohemia regiarum stirpis, successorem ex Austria vocandum. Neq; alium regno idoneum videri, quàm Albertum, qui & uxoris, & suo jure, & soceri judicio, præferendus sit. Futurum eum regem, quem Bohemi ex cœlo missum putent. Hungari quem cupide regem acceperunt, Bohemis haud aspernandum. Flectitur his Bohemorum conventus, Albertus pridie nonas Majas designatur. Verum proceres qui cum Barbara conspiraverant, non alio pacto in Albertum consentiunt, quàm si postulatis suis mos geratur. Alscio Sternenbergi9 eorum nomine Albertum adiit, sed frustra ejus preces fuere. Albertus fermè Bohemis, quæ focer, affirmavit. Interea Barbara, dimissis, quæ possidebat in Hungaria inexpugnabilib9 castellis, libertati reddita est, duodecim millia auri nummum locis patentibus, quoad viveret, ei singulis annis constituta. Præscio de voluntate Alberti ab Alscione certior fact9, accersitis ex factione



sua primoribus, quorum pars potior hæretica fuit, Hussitarum sequax erroris, Casimirum regis Poloniae germanum, tredecim annos natum, regem appellat, missisque oratoribus auxilia petit, quibus nobile regnum ei conservari possit. Inter hæc & Electores imperii apud Francfordiam convenientes, rem Romanam Alberto commendant. At illi acceptare imperium injussu Baronum Hungariae haudquaquam licebat. Id enim eis promiserat, cum se regem accipere. Vocati primores regni, negabant *ex usu esse Hungaria regi Theutonicis ceterisque gentibus imperare, dum Sigismundus Romanæ rei consulturus, Italiam, Germaniam, ceterasque provincias peragraret, Hungariam Turcarum direptioni patuisse.* Multa in utramque partem dicta. Postremo victi precibus, Frederici ducis Austriae tunc adolescentis, assensum dedere, imperium summa Germanorum congratulatione ab Alberto susceptum. Nec mora legati ad regem Poloniae, nomine gentis Bohemicæ missi, Joannes Rabensteinus, & Joannes Placius, oratum, *ne fratrem turbare Bohemia regnum patiatur, meminerit inter Bohemos ac Polonos veteris amicitia, Albertum ex Sigismundi testamento, & provincialium decreto, regem esse, non potuisse paucos, qui Casimirum vocavere, jus regni ad alterum transferre. Si pergat alienum regnum fratri parare, caveat ne de suo certare cogatur.* Polonus ad ea Bohemos sibi amicos esse fatetur, cupere benevolentiam perpetuo stare, ac fratri, quem primarii barones regem vocaverint, jus auferre non posse, Polonis ac Bohemis unam esse linguam, & unam utrique genti originem, cum Theutonicis nihil Bohemis esse commune. Nihil provincialibus incommodius, quam sui regis vocem non intelligere, atque in omni loco interpretis egere. Regnum sibi suum satis tutum fidemque esse, neque se externam vim ullam timere. Proinde orare, ut fratrem potius recipiant, quam ipsi ab eo recipiantur: donatosque preciosis pellibus, ut est mos gentis, oratores dimisit. Legatis autem alterius partis, missurum se propediem auxilia pollicitus. Albertus medio tempore Igariam petit, quo in loco ab Ulrico Roseni, Mainardo, plurimisque Bohemiae proceribus percupide expectabatur. Ptarisco vero per nuncios eum rogat ne *præus regnum ingrediatur, quam sibi factionem suam faciat satis.* Neque enim passurum se regem esse, quem ipse non elegisset. Albertus, quod major pars regni statuisset, id ratum esse debere respondit, hortari ne regnum quietum interturbet. *Inventurum benignum regem si paci consulat, sin pergat res innovare, plus belli reperiturum quam*



quàm velit. Exin motis castris Cuthnam occupat, quàm Ptarsco sine præsidio reliquerat. Petenti Pragam frequens populus occurrit, atque ut hostium victori congratulantur. Et quàmvis iterum Ptarsconis factio conventum peteret, priusquàm rex coronaretur, reje-  
ctis precibus, tertio Calendas Julii solenni pompa coronam accepit. Ptarsco verò Coloniam, & alias suæ factionis civitates impigre munivit. Cumquæ duo milia equitum ex Polonis ad eum venissent, populari eorum agros cœpit, qui regem introduxerant, & tanquam diu Bohemia quievisset, novo exultans bello, adeo gloriabundus in campos exiit, ut captivos nobiles, quos sorte interceperat, ea conditione juratos dimitteret, *ut se non prius repræsentarent, quàm castra muris Pragensibus admoventur.* Albertus etsi auxilia ex Austria Hungariæque asciverat, illis tamen non expectatis hosti copiam pugnandi fecit. Quam Poloni detrectantes, per montes Cuthnæ & Sobeslaviam, ad Thaboritas se contulere, amicam sibi civitatem, castrisque ante urbem positam, Albertum expectavere. Ipse cum copiis egressus, per Beneševiam ad eos festinans, legatos præmisit, qui Polonis dicerent, *inter Casimirum, cujus causam agerent scq, belli premium Bohemiam esse, caverent ne incendia agerent.* *Experirentur pralio, cujus provincia esset, cultam potius quàm desertam mallent, sese moram minime facturum quin pugna litem regni definiat.* Poloni ad hæc hujuscemodi responsum dedere, *ex aquo se ferre animo Alberti arrogantiam pugnam petentis: nam superos superbis infensos esse. Venturo non defuturum pralium, Polonos faciem hosti, non terga ostentare solitos.* Lætus eo nuncio Albertus quadrato agmine in conspectum hostis advolat. Quo intra castra se continente & ipse castra sua è regione Thabor ad jactum lapidis tormentalis metatus est. Pugnatum singulis diebus in campo, qui medius inter bina castra jacebat, nunquam totis viribus in fortunam belli ventum, Polono non tam facile egregia manu facinora edente, quàm verba magnifica ore jactante. Erant in castris Alberti, Christophorus Bajoariæ princeps, qui postea regno Daciæ potitus est: Fredericus Saxoniae dux, & Albertus marchio Brandenburgensis, cujus nomen ab eo tempore cultum magnumquæ fuit. Triginta millia militum Alberto parebant, Polonis quatuordecim milia, quorum castris juncta civitas, magno adjumento erat, Tormenta quoque anea in utriusque castris plurima, majora apud



Albertum fuere. Ex quibus uni quod erat maximum, ignem ad-  
moveri iussit, cuius lapis emissus miræ magnitudinis, cum præter  
opinionem in castris hostium cecidisset, multos mortales interemit.  
Vidisses passim corpora sine capite jacentia, capita quoque, pedes,  
membraque sine corpore in cruore fluitare, jumenta humi procum-  
bere mortua. Neque enim primo ictu duntaxat, sed multiplici saltu  
pluribus in locis decidens saxum stragem fecit. Quare consternati  
Poloni relictis castris intra urbem se recepere. Georgius Poggiebra-  
cius per idem tempus cum Thaboritas peteret (nam & ipse Ptarsco-  
ni junctus erat) in alam quandam Alberti equitum forte incidens,  
commisso prælio hostem prostravit, atque hinc primum homini no-  
men datum. Albertus vero cum expugnari Thaboritas aliter quam  
fame nequiret, soluta obsidione Pragam rediit. Poloni exhausti ar-  
gento, amissis equis, pedibus in patriam abiire. Fredericus Saxonum  
princeps, dimisso rege domum rediens in hostium insidias incidit. Sed  
nihil improvisa re motus, ordinata raptim acie, ea constantia, ea  
fortitudine pugnam iniit, ut penè victus captusque victores vice-  
rit, caesisque quam pluribus captos abduxerit. Rex Poloniae nondum  
cognitis quæ in Bohemia suis acciderant, cum duobus magnis exer-  
citibus Slesiam ingressus, in Bohemiam properabat. Sed intelle-  
cta suorum fortuna, populatis hostium agris domum rediit. Alber-  
tus autem relicto, qui regnum gubernaret Ulrico comite Ciliae, per  
Slesiam Gorlicium venit. Uratislaviensibus vero, ea est civitas no-  
bilis ac præpotens, & Slesitarum caput, Albertum marchionem  
Brandenburgensem petentibus belli ducem dedit, qui Poloniam se-  
pe infesto exercitu petens, longe lateque prædas egit. Non multis  
post diebus actum de concordia. Rodericus Burgenlis episcopus, na-  
tione Hispanus doctrina ac virtute præstans, arbiter litis ex Basili-  
ensi concilio missus Albertum convenit. Disceptatum est inter le-  
gatos partium, non convenientibus induciæ belli dictæ, conventus  
in aliam diem apud Uratislaviam statutus. Eo veniens Albertus,  
ex gradu forte prolapsus, graviter læsus pluribus diebus agrotus de-  
cubuit: exin claudus effectus, infecta pace per Moraviam in Austri-  
am rediit. Interea comes Ulricus, qui Bohemiæ præerat, inter Ba-  
rones de vendicando sibi regno agere cœpit. Albertus cognito  
ejus studioproperatim stipendia subtraxit. Ille materia adempta



qua Bohemorum animos sibi conciliabat, ex provincia discessit, nec ultra remissus est, regni cura Mainardo & Ulrico Rosensi commissa. Per idem tempus Despotus Serviae, quam Rasciam vocant, cum sacerdotibus & nobilibus in Hungariam profugerat, Turcarum impetum veritus, uno tamen relicto filio, qui castellum Synderoviam, in ripa Danubii situm, & à Turcis obsessum, tueretur. Albertus ab Hungaris invitatus, obsessis opem laturus, Budam petiit. Interea Georgius Palotius, Strigonienſium pontifex, diem obiit, qui coronam regni, divitemque regum suppellectilem in arce servaverat. Qua re cognita, Albertus eo se confert. Arx reginae deditur. Quae dum thesaurum regni coram Baronibus ad eam rem selectis recognoscitur, coronam beati Stephani regis, quam sacrosanctam putant, clam surripuit, anique custodiendam tradit, caetera obſignatis occludit arcis.

## CAP. LVI.

*De morte Alberti inclyti regis.*

**A**lbertus Budam reversus, non expectatis auxiliis adversus Turcas exercitum ducit, castra inter Titiam amnem ac Danubium collocat. Interea Turcarum imperator evicto castello, excaecatoque Despoti filio, cujus sororem in matrimonium duxerat, domum abiit. Crudelis, qui neque conjugii affectum sensit. Verum Turcis matrimonii necessitudo levis, apud quos singuli propibus plures uxores habent, regibus eo amplius nubere licet. Ita animus multitudine distractus, nullam pro socia, pariter omnes vilititer habet. Albertus ubi expugnata Synderoviam, Turcas abiisse cognovit, dimisso exercitu Budam rediit. Sed insolito ferventis Augusti calore vexatus, dum peponibus nimium oblectaretur, in ventris solutionem incidit, sentiensque periculum, moriturus in patria Viennam repetere statuit. Iter ingressus, cum jam Strigonium praeteriisset, in villa quae Longa dicitur, condito testamento sexto Calendas Novembris decessit, princeps liberalitate ac fortitudine clarus, & qui caeteris rebus longe religionis studium anteposuit.



*Quomodo Bohemi post mortem Alberti, eligunt in regem  
Albertum Bajoariae ducem, sed electioni  
consentire noluit.*

**B**ohemi qui Alberti regis causa inter se dissidebant, cognita morte, apud Pragam convenientes, unum totius regni corpus efficiunt, atque ad eligendum novum regem ad octavum Calen. Majas diem statuunt. Rochezana qui dudum apud Græcium exulaverat, domum revertitur, suoque more insaniens, Romanam ecclesiam, Cardinalesque, Patriarchas, cæterosque per orbem episcopos blasphemans, apud solos Bohemos incorruptæ veritatis inveniri sacramenta dicit, preciosissimum Christi sanguinem parvulis ac dementibus præbet. Sacerdotes suæ temeritati adversantes, domo pellit, popularibus communionem sub specie vini recusantibus, ecclesiasticam sepulturam interdicat. Redeunt damnata tempora, suumque placitum, suum quisque ingenium recepit. Regina Elizabeth jam filium ex Alberto pepererat octavo Calend. Martii, Ladislaum nomine, atque Hungarorum ei coronam imposuerat. Mittuntur ad eam legati, qui dicant *ad eligendum regem diem statutam. Si quid juris in regno Bohemia ad se spectare credat, oratores mittat, qui rem suam agant.* Regina natum ex Alberto filium in cunabulis ostendit, rogat ne paternæ hereditate pupillum exuant: tempus mittendi legatos arctum esse: neque enim amplius quam dies quindecim supererant. *Si prorogetur terminus, missuram qui pueri jura edisserant.* Erat inter legatos Procopius Rabensteinus nobilis eques, doctrina ac morum lenitate præstabilis, cujus nos amicitia pluribus annis oblectavit. Is cum Alberto servisset, *habiturum se curam ait, quæ regina mandaret.* Reversus in Bohemiam eos primum adiit, qui partes Alberti foverant. Exponit reginæ desiderium, suadet proferri conventum. Res digna exauditione videtur. Verum Ptarco, & qui Alberti recusarant imperium, cum jam Pragæ convenissent, regno consulendum quantocyus esse dicere, reginam spernere, instare, properare, vocare absentes. Illi diem ex die consulto proferre, moræ causasnectere. Interea legati ab regina veniunt, fit frequens conventus. Intromissi Oratores proceres



proceres rogant, *Sigismundi & Alberti suorum regum meminerint, nepotem filiumq; ne respuant, contra jus gentium paternam hereditatem pueri ne adimant. Fœdera cum Australibus percussa ne violent, pupilli atque orphani misereantur.* Sunt non pauci, qui lato favore legatorum postulata suscipiunt. At qui Albertum oderant, filium regem negare, cuius patri tanquam regi non paruissent. *Infantem regno inutilem esse, regem à regendo dictum, qui regendus sit, regem vocari non posse. Antequam Ladislaus adolescat, longum tempus effluxurum esse, interim regem assumi, qui per se regat. Satis esse Ladislao si post quatuor & viginti annos ad regnum vocetur, medio tempore locum alteri faciat. Reges regno dari, non regna regibus. Fredericum Austria ducem, jam Romanorum regem electum, Bohemis indulgisse, uti quem vellent, regem sibi asciscerent.* Vicit hæc sententia. Albertus itaque Bajoariæ dux, majore procerum voto rex declaratur, qui apud Venceslaum quondam nutritus, Bohemicæ linguæ non ignarus erat. Mittuntur ad eum primores regni, inter quos Ulricus Rosensis, homo semper se tempori accommodans, princeps fuit, qui licet Alberti partes olim defenderit, hujus tamen sententiæ suasor extiterat. Quibus ea res indigna videtur, hi Procopium ad Fredericum Cæsarem clam ire jubent, rogantes nobile regnum ne pupillo negligat, cuius tutelam suscepit. Jam enim Elizabeth Hungarorum inconstantiam verita, qui ad Poloniæ regem defecerant, Ladislaum ad eum miserat educandum. Fredericus audito Procopio, missis ad Albertum Bajoarium nunciis hortatur, *ne regnum sibi alienum usurpare præsumat, quod cum difficile, cum ignominiosum fuerit. Bohemis, quibus defuncti regis hæres esset, non licuisse alium eligere, neque se potestatem eam dedisse, quemadmodum in Bohemorum conventu nonnulli e mentiti fuerant.* Procopium vero in Bohemiam remittit, qui jus Ladislai haudquam se neglecturum asseverat. Albertus ea virtute atque animi moderatione usus est, quæ postquam reges esse cœpere, rarissima semper fuit. Nam venientibus ad se Bohemorum legatis, amplum & nobile regnum offerentibus gratias egit, qui se unum ex omnibus elegissent, cui parere vellent dignumq; tanto imperio iudicassent. *Multa se idcirco debere Bohemis, neque id unquam beneficii oblivioni daturum.* At cum regis Alberti suboles extet, indecorum esse cum alterius injuria regnum querere, paternam hereditatem nulli auferendam. *Qui pupillos suo jure dispolient, Diis atque hominibus invisos pœnas aliquan-*



do patrati sceleris dare: cognovisse se non vano rumore factus antiquum inter Bohemos & Austriales extare, deficiente mascula sebole principem ne foras assumant: fidem servare pulchrum, ne cui temere noceatur cavendum. Sceleſtam execrabilemque vocem illorum, qui regnandi causa jus violandum asserunt. Atque ita majorem se spreto regno monstravit, & si verum fateri licet, clarissimum egit regem. Nam regnum apud eos, qui spernunt, non qui cupiunt.

## CAP. LVIII.

*De Ladislao infante Bohemorum Rege quintodecimo.*

**B**ohemi ab Alberto repulsi iterum convenientes legatos ad Cæsarem mitunt, petentes tutorio nomine, uti regnum accipiat. Is in Belgiam se iturum dicit coronæ suscipiendæ gratia, cum redierit de re ipsa transacturum. Reversum potentissimi ex Bohemia procures adeunt. Inter quos Ptarsco cum esset Alberti filio infensus, seorsum Fredericum alloquitur, regem ut seipsum faciat, hortatur, facile id futurum, si tutelam pupilli rejiciat. Nam cum ceteri desint, Bohemos suapte ingenio regnum sibi oblaturus, cui ex fœdere tanquam seniori Austria principi debeat. Negavit Fredericus orphani, cujus tutelam gereret, hæreditatem se quoque pacto invalurum, nec tamen Bohemiam tutorio nomine administrare voluit, quam siue profusione magna pecuniarum retinere non poterat. Nam Bohemi nisi ex regibus quotidiana munera accipiant, ab officio recedunt. Neque est regnum cujus fiscus abundat. Regiæ possessiones in privatas manus pervenire, argentifodinæ unde opes regiæ in immensum crevere, majore ex parte perire. Distracti census, vectigalia prorsus extincta, nisi populares in sumptus regios pecuniam conferant, quam vocant bernam, aut rapere unde vivat regem oportet, aut precario regentem mendicare. Svasit igitur Imperator, ipsi ut per se provinciam regerent, donec pupillus adoleſceret, donatosque oratores à se dimisit. Domum reversis gubernatores eligere placuit, inter quos Ptarsco & Mainardus priores habiti. Stetit aliquandiu concordia discors. Nam licet Mainardo Ptarsconi que factionum capitibus parum conveniret, & alter conventa cum concilio habita servanda esse diceret, catholi-

carum



carum tutor partium, alter sperneret, Rochezanæ amicus, ab armis tamen abstinuere, mediumque quoddam temperamentum inventum est, quo partium cuique suo voto liceret vivere. Verum Prarscone vi morbi repente extincto, Mainardi potestas aucta est, cui tum Pragenses, tum fortiores regni civitates parvere. Id ægre fuit adversæ parti, quæ Prarscone defuncto ad Georgium Poggiebracium se contulerat, eumque sibi ducem elegerat, jam tamen rei militaris peritia, rebusque strenue gestis insignem. Orare igitur *ne jacere suas partes sinat, Mainardum indies crescere, Pragam in potestate habere regni metropolim, sacerdotes qui Romanum ritum introducant magnificare, qui veritates patrum sequerentur, persequi. Occurrendum temeritati hominis, qui peregrinos mores patriæ anteponat, Pragam ei auferendam, neque id esse difficile, civibus non placere Mainardi regimen, Rochezanam multos habere amicos, qui excitato tumultu arma capebant, audendum esse fortibus viris, fortunam ipsam aperire victoriam.* Georgius ipse, qui suapte natura magnæ cuperet, collaudatis svasoribus nonnullos in urbem ire jubet, qui per tentatis civium animis, quæcunque invenirent, ad se referant. Postquam multi aures adhibent, conjuratione facta invadendæ urbis dies constituitur. Conjurati incendium in parte urbis admodum remota excitant, concurritur ad reslinguendum ignem. Interea Georgius ex adversa parte cum copiis muros invadit, nec mora proditores in instanti portas aperiunt, extollitur clamor, ut capta urbe solet. Hinc tremor suprema timentium, inde exultatio victorum exaudiri. Trucidantur passim resistentes. Mainardus in eo tumultu captus in carcerem conjectus, ibique tandem obiit, sive tædio diutini carceris, sive, ut plerique putaverunt, exhausto veneno. Ex illo tempore sine controversia Praga in potestate Georgii fuit, neque posthac adversari palam voluntati ejus ex Baronibus quisquam presumpsit: quibus potestas suspecta visa, durum imperium, in concionibus laudare hominem, probare regimen, blandiri, adulari, *cum esse dicere, qui tandem regni calamitatibus modum ponat. Id nulla vi rectius fieri posse, quam si rex in regnum veniat, precari, numen obtestari, id patriæ non denegat, legatos ad Cæsarem mittat, instet, urgeat, facturum tutorem denique, quod in pupillum sit. Si pergat adversari, nihil Bohemis imputandum alium regem querentibus.* Sententia quamvis ingrata Georgio, accepta in auribus populi refelli non potuit. Missi ad Cæsarem oratores nihil impetra-



vere, pupillaris ætas excusationem præbuit, quamvis sæpius idem tentaretur. Venere plurimi ex Bohemis ad Fredericum visendi regis gratia. Inter quos Georgius nomine Giscra, armorum gloria clarus, qui partes ejus unus fermè defenderat in Hungaria, cum rex Poloniae regnum invasisset, prædones sæpe acie funderat, Joannem Huniadem bis castris exuerat, rebellantes Hungaros magnis cladibus affecerat. Is ubi ad conspectum regis intromissus est apud Novam civitatem, quo in loco tunc aderamus, astantibus plurimis illachrymans Ladislai manum exosculatus, in hunc modum verba fecit: *Video te tandem teneq, mi Rex, si scires quæ pericula propter te adiui, quibus me laboribus implicui, quot adverso corpore vulnera accepi. Encicatrices testimonio sunt, patri ego tuo tibiq, vitam devovi. Nulla vis est, nulla fortuna, quæ alienare animum à te meum possit, officia mea sola tibi auferet mors. Sed tu hac per ætatem non intelligis. Et subridens, Quod inquit, mihi præmium fidei ac laboris erit? & quod das militi tuo stipendium?* Sextum tunc annum agebat Ladislaus, qui postquam Giscra finem dicendi fecit, oculos huc atqve illuc circumvolvens, loculos Joannis magistri camerae suspiciens ex philæcterio pendentes, quæ ille nummos more Teutonico pauperibus erogandos asservabat, hanc tacitus arripuit, atqve sex tantum, neqve enim plura invenit, illinc deprompta Giscrae dono dedit. Admirati omnes pueri factum, & providum & liberalem futurum judicavere. Giscra innexos postmodum auro nummos è collo suspendit, regiae gratitudinis monimentum. Hungari, qui mortuo Alberto regem Ulladislauum ex Polonia vocaverunt, diu imperium Ladislai obrectavere, bellumqve adversus Turcas infelicitè fecere, in quo Ulladislauus fortiter pugnans obtruncatus est. In convertu deinde civitatum procerumqve Ladislaus rex appellatus, missa legatione ad Fredericum, in qua regni primores fuere, decretum electionis exposuit, Ladislauum in Hungariam mitti coronandum postulavit. Responsum est rectè Hungaros egisse, qui Regem tandem suum recognoverint, electione inde haud quaquam opus fuisse in eo, quem natura regem dedisset, neqve coronandum esse, qui semel coronatus sit. Puerum adhuc egere tutore, nullius tutelam salubriorem ei esse, quàm Frederici Imperatoris & proximi consanguinei. Expectarent ætatem regno idoneam, interea per se regnum administrarent. Diu inter Hungaros & Imperatorem obnegatum regem inimicitia fuere, & armis quoqve tentata res est. Joannes Huniades



des infestis copiis Austriam ingressus, quamvis ferro atque igne agros vastaverit, regem tamen coronamque, & quæ repetebat in Hungaria castella, obtinere non potuit. Pugnavit iterum contra Turcas, à quibus magno pralio victus, humilior factus, Cæsaris benevolentiam & petiit & impetravit. Ob quam rem quamvis sæpe & ab Hungaris & à Bohemis Ladislaus peteretur, res tamen ad duodecimum ejus annum protracta est. At cum Fredericus imperialis coronæ suscipiendæ gratia Italiam petere statuisset, rursus Bohemi, Hungari & Austriales, legationibus seorsum missis Imperatorem fatigavere, Ladislaum reposcentes, postulata omnibus negata sunt. Ad Bohemos, quicquid de re conventum Pragæ habituri erant, ac ferocius agere videbantur, regem alium electuri, nisi mos eis gereretur, legatos mittere placuit, quibus & nos additi sumus. Provinciales, quibus apud Pradam dies statuta fuerat, grassante illic peste, in Beneschavia convenere, quos in frequenti conventu, præsidente Georgio Poggiebracio, in hunc modum allocuti sumus: *Petivistis ex Cæsare, viri Bohemi, Ladislaum regis quondam vestri filium ad vos mitti, idem Hungari, idem Austriales importunis precibus exigunt. Si vobis mos geritur, illos offendere necesse est, si preces aliorum audiantur, contemnere vestras oportet, si necessarium sit alterum ex duobus, vestram amicitiam præferret Imperator. Vetus est enim majorum suorum cum Bohemica gente fœdus, & acceptorum ultro citroque beneficiorum memoria recens. Sin virtus claritasque, pensanda est, quis Bohemico nomini non invideat, cujus victorias tempestate nostra plures numerare licet, quam reliquæ gentes omnibus seculis comparare potuerunt? Verum Cæsari hoc tempore in hanc electionem descendere haud quaquam necessarium videtur, quando ea pueri ætas est, quæ neque vobis neque Hungaris usui esse potest. Esto, veniat in Bohemiam Ladislaus, quod inde regno emolumentum cederet? Ille ne jus litigantibus decet? statum reipublicæ reformabit? adversus hostes copias ducet? belli pacisve munia obibit? Nihil horum præstare potest, cui recte tutela opus est. Illud in primis ejus adventus faciet. Regis pompa ducenda est, ornanda regia, ahibendi ministri, curiamore progenitorum apparanda. Ad hac grandi pecunia opus. Vobis nullum ararium esse audio, nullos census, nulla vectigalia publica. Ad vestras igitur opes recurrendum, vos præstare sumptus, vos regem alere, vos inexplebilem curiam & insatiabiles ministros explere oportebit. Vidco præterea inter vos non paucos esse procures, consilio, autoritate, atque opibus penè paros. Curia regis uni committenda erit, non*

n 3

omnibus.



omnibus. Ille dominus, ille Rex vester judicabitur, qui regis corpus in potestate habebit. Et quis vestrum est, qui non eum honorem sibi quam alteri malit? Semina inter vos discordiarum petitis, nisi prius in unum conveneritis, qui regis cura præsit. Vos his incommodis Fredericus liberat, qui suo sumptu pupillum regium gubernans, dissensionum vobis fomitem aufert. Nec vos latet, quandoquidem tenera regis aetas est, corpus ejus in potestate Caesaris rectius esse, quam in alterius cujuscumque. Ille enim consanguineus est, ex eadem familia natus, & Imperator. Et quis pupillo regi convenientior tutor datur, quam princeps principum? Si sit inter vos & Hungaros contentio coram extraneo iudice, de custodia corporis regis, par causa vestra atque illorum judicabitur. Utrique regem petitis, utrique fidelitatis documenta prestabitis. Verum in hoc illi superiores erant, quia natum apud se regem, coronatumque dicent. Apud Casarem vestra causa longe iustior est, quam Hungarorum, se ipsum tamen in cura patriæ vobis præsert. Curate regnum, pupillum sibi dimittite, quem postquam pubes fuerit, vobis imprimis credet. Quod vero oratores vestri dixere, alium regem accersendum a vobis esse, id magis terroris incutiendi causa dictum Imperator existimat, quam quod animo vestro ea sententia spondeat. Neque enim vestra fides incorrupta prius, hoc repromittit, neque progenitorum Ladislai in vos collata beneficia hoc exigunt, nec innocens ejus aetas quicquam demeruit. Caeterum volute animo prius, ut sapientes decet, quemnam Ladislao praeferre possitis, cujus sanguinem, si matris originem memoria tenetis, quatuor Romanorum Imperatores producere. Si paternam prosopiam exquiritis, quinquies imperatoria dignitas in Australi demo resedit. Obscuritatem quærat necesse est, cui tanta claritas non satisfacit. Adde potentiam, amicitias, clientelas. Austriam vobis vicinam possidet, Moravia, Silesia illi parent, Hungari, cives novas moliri videantur, ab officio tamen non recedunt. Imperator à quo regnum vestrum dependet, sanguini suo non deerit, nec jus familiae suae negliget. Boemia Saxoniaque, duces, Marchionesque, Brandeburgenses, & omnes ferme Germaniae principes, Ladislauum propinqua necessitudine attingunt. Non potest hic pupillus offendi, nisi & tota Germania ledatur. Hac supersine vobis commemorari non ambigo, verum ita jussit Imperator. Ille in Italiam pupillum secum abducet, reductum, puberemque, factum, si perstiteritis in fide, ad vos primum mittet. Vos interea pro gravitate integritateque vestra, quod in rem Bohemici regni pupillique sit, consulere admonet. Verisimilis oratio visa neque sine favore accepta, acceptioremque Procopius noster collega reddidit,



qui patrio sermone, Latinae linguae ignavis verba nostra interpretatus est. Jussi sumus ex conventu paululum abire, mox revocatis responsum datum. *Reddita Imperatori gratia, qui eam legationem misisset, atque in dimittendo rege, Bohemos praeferret ceteris. Accipere se bene consulta consilia, missuros ex nobilitate sua primarios juvenes, qui Caesarem Italiam petentem sequerentur, eiq; ministrarent. Expectaturos quiete reditum, quem felicem faustumq; superum benignitate futurum exoptent.*

## CAP. LIX.

*De morte Barbarae imperatricis, uxoris Sigismundi.*

**A**puđ Gracium Barbara imperatrix ea tempestate decessit, inexhaustae libidinis mulier, quae inter concubinos illaudatum aevum publice agitans, saepius viros petiit quam peteretur, neque Christianae, neque alteri cuiquam religioni astricta, quippe quae superiores ullos esse negabat. Ferunt eam ancillas suas saepe orantes jejunantesve increpasse, quae corpus suum frustra macerarent, fictumq; coeli numen placare verbis crederent. *Vivendum fructibus, dum vita superest, fruendumq; voluptatibus. Id tantum homini datum, cujus anima cum corpore simul extinguitur, somniare qui alteram vitam sibi promittunt.* Congrua moribus sententia. Nam qui relicto animi cultu voluptati corporis se dedere, gravati vitiorum sarcina, non quibus explicent vitamque corrigant, sed quae ceptum iter approbent, ea dogmata facile imbuunt. Neque inquinatis mentibus solamen ullum valentius, quam totum extingui morte hominem opinentur. Una salus desperanti coelum, inferos non timere. Corpus Barbarae quamvis infidelis foeminae, Bohemi Pragam tulere, peractoq; funere in sepulchrum regium condidere. Nec defuere sacerdotes, qui prophanum cadaver ecclesiastico ritu sepelirent. Non sunt regibus scriptae leges, nec in Bohemia quicquam non permissum. Fredericus postquam quieturos Bohemos intellexit, quorum motus in primis verebatur, reclamantibus Hungaris & Australibus, assumpto secum Ladislao rege Italiam ingressus, augustalem coronam à Nicolao quinto pontifice maximo Romae accepit. Exin visitato apud Neapolim rege Alphonsio, cujus tum opes florentissimae fuerunt, cujusque neptem in matrimonium duxerat Leonoram, regis Portugalliae filiam, moribus ac for-



ma præstantem, domum rediit. In eo itinere Ladislaus sæpe fugam molitus est, consilio pædagogi fretus, cum quo postea captus, usque in hunc diem custoditur in vinculis.

## CAP. LX.

*Quomodo Australes Ladislaum regem ab imperatore petentes, non exauditi, bellum movent, Novamque civitatem obsident.*

**A**ustrales interea svasore Ulrico Eizingero, sumptis armis præfides provinciæ à Frederico institutos vi pellunt, gubernatores ex seipsis duodecim eligunt, summam rerum Eizingero committunt. Inventorem quoque novitatum alterum Ulricum Ciliæ comitem in societatem accipiunt, auxilia ex vicinis gentibus accersunt, reversum imperatorem, missis legatis, aut regem Ladislaum tradere, aut bellum expectare jubent. Postulatis non tam rejectis quàm suspensis, impatientes magis moræ quàm belli, infestis signis Novam civitatem petunt. Committitur primo adventu atrox pro portis prælium, nullus sagittis modus, cadunt sine numero tela, bombardæ stragem hostium horrendam edunt. Misérable visu, disiecta passim membra equorum atque hominum cernere, cruorem late fluentem aspicere. Qua densissima fuit, unus perfregit aciem lapis emissus, idem alius atque alius fecit, prostratis quæcunque occurrere, inermibus atque armatis, nec tamen intermissa pugna. Conglobati hostes, magis ac magis insistere. Ubi res gladio geri cœpit, ac vir virum manu prehendit, equus equum impulit, pugnatum est aliquandiu æquo Marte. Postremo Cæsarianorum acies, non tam virtute quàm multitudine superata, terga dedit, atque in urbem trepide se recepit, unius militis Andreae Poumkircher, postea à Cæsare ad Baronatum suffecti, audacia civitatem tutata est. Qui ne victores cum victis uno agmine irrumperent, tamdiu pro porta solus impetum tenuit, donec conversi fugientes, globo facto, ex loco difficili hoste repulso, januam clausere. Firmata est deinde obsidio, & oppugnata machinis incenia. Ex Bohemis solus Henricus Rosensis cum ducentis equitibus, peditibus sermè octingentis in castris



stris fuit. Hungari nondum venire. Neque enim per inducias bellum inferre Cæsari licebat. Australes circiter duodecim millia militum expeditos in armis habuere. Georgius Poggiebracius Cæsari, cujus erat amicus, opem laturus, sedecim millia militum congregaverat. Sed audita concordia, in agrum regulorum Rosensium exercitum duxit, villasque late populatus est. Imperator enim interventu Caroli Marchionis Badensis, Sigismundique Saltzburgensis archiepiscopi, Ladislaum è manu sua dedit, Australibus multa promittentibus, quæ mox barbara fide negaverunt. Inter cætera conventum erat, *ad tertium idus Novembris conventum Vienna habere, in quo vocati utriusque partis consanguinei, Bohemi quoque atque Hungari, de tutela regis nondum pueris judicarent, Ladislaum interea in potestate comitis Cilia extra Viennam degere, nihil prius administrare quam consilii decretum fieret.* Verum, puer postridie in urbem ductus, summis novisque honoribus exceptus, è vestigio magistratus in civitate creavit, præfecturas tota provincia instituit, sacerdotia donavit, regio more curiam erexit. Hungari ad eum venire, inter quos Joannes Hunniades fuit, qui tum, comitatum Bistricensem regia beneficentia consecutus, haud aliter quam principes consuevere, novæ dignitatis insignia suscepit. Accersunt & regem suum Bohemi, cum Georgio Poggiebracio, quibus non minora Ladislaus pollicitus, quam pater atque avus promiserant. Postquam dies affuit cum imperatore constituta, Ludovicus Bajoariæ & Gulielmus Saxoniae duces, Albertus quoque Marchio Brandenburgensis, Carolus Badensis, & multi ex Germania prælati ac principes advenere. Frequens conventus habitus. In quo præsidente Ladislao, oratores imperatoris, inter quos & ipsi fuimus, ita auditi sunt, ut victi apud victorem. Frustra æquitas, frustra honestas, in medium deducta. Cuncta ex arbitrio comitis gerebantur. Ipse pro rege verbuni facere, ac respondere, qui neque leges, neque pacta victorem obligare posse agebat. Fredericum & jure simul & bello excidisse, armatis ac fortibus jura favere. Postremo infectis rebus conventus dissolutus. Nicolaus Cardinalis sancti Petri, doctrina & vitæ integritate conspicuus, ad componendam pacem Apostolico imperio missus, ab Australibus rejectus est. Ladislaus quamvis rex appellaretur, alieno tamen arbitrio ductus, in regnis suis triumviratum deduxit. Joannes Hunniades Hungariam rexit, Poggiebracius



Bohemiam, Ulricus Austriam. Penes hunc major autoritas, qui regem in potestate habens, illis quoque imperare posse videbatur. Promiserat Ulricus & Hungaris & Bohemis regem ad eos propediem venturum. Hungaris primū satisfacere statuit, diem illis apud Pozonium constituit. Conveniunt frequētes Hungari, res ibi voluntate unius ordinantur. Potentiori omnia parent. Ulteri⁹ regnum ingredi, neq; regina, neq; comiti visum. Fit reditus in Viennam, Bohemis dies instituitur, qua regem coronandum Pragæ suscipiant. Erat inter Bohemos Joannes Smiricheus, homo nobilis, & facundiæ gratia inter primos constitutus. Is postquam regem Bohemiam ingressurum cognovit, literas hujusmodi ad eum dedit. *Joannes Smiricheus Ladislao regi salutem. Venturum te quamprimum in regnum tuum probo, si modo imperaturus veneris, non pariturus. Inermem impotentemq; intrare non laudo, si non bicipitem mater peperit, ut ex duobus capitibus unum Vienna apud amicos dimittas, alterum Bohemorum dubia credas fidei. Vale.* Epistola comiti reddita est, qui cognito tenore, Georgio eam remisit. Ille accersito procerum concilio, inter quos Joannes non in postremis erat, literarum sensum suppresso scribentis nomine recitat, quid mereatur scriptor percunctatur. Dignum morte primi judicant, nec Joannes suo loco sententiam dicere jussus, adversari audet, proditorem & ipsum patriæ, afficiendumq; summo supplicio censet, qui ea scripsit. Profertur mox epistola ejus manu conscripta, & impressum annuli signum recognoscitur. Damnatus ore suo comprehenditur, duarum horarum tempus datur, in quo si velit, & animæ suæ salutis, & domesticis rebus consulat. Nec diutius vitæ dimissus, gladio percutitur. Sic vir magis eloquens quam cautus, dum alienam servare vitam studet, perdidit suam.

## CAP. LXI.

*De ejectione Comitis Cilie, & privatione administrationis suæ.*

**C**Omēs interea, ut quā splendide regem in Bohemiam duceret, haud ignave operam dabat, ad eam rem non parum auri necessarium erat. Publicum ararium exhaustum, qui eam summam crederent, neq; negotiatores, neq; proceres inveniri. mos est



est Austrialibus, quotiens repentina principi necessitas ingruit; ex subditis pro modo facultatum pecuniam exigere, quam vocant *Steuram*. Id tamen injussu provincialium haud permissum. Huc ergo revertitur. Convocantur apud novum Triticiburgum pro veteri consuetudine quatuor ordines, Sacerdotes, Barones, Nobiles, Civitates. Ibi comes praesente rege convocationis causam edicit. Iter, in Bohemiam regi necessarium ostendit, qua pecunia sit opus exponit, principi suo ut subveniant hortatur, neque inopem mendicantiqve similem ad coronam suscipiendam ire permittant. Conventus deliberandi copiam petit. Ibi Eizingerus, qui jam pridem à comite spretus, extra regis gratiam ejectus, occasionem qua se vindicaret expectabat, idoneum nactus tempus, vocatis seorsum primoribus, quos sibi fidos, comiti insensos credidit, ita locutus fertur: *Quid agimus, viri Austriales, semper ne Ciliensis mancipia erimus? Imperatoris jugum excusimus, ut comiti serviremus? Moderatius certe illius regnum fuit, tolerabilior duratio. Ille in Austria natus, nostrorum principum sanguis erat, & si verum fateri libet, nostri domini dominus. Quia tamen ex re sua magis quam principis nostri provinciam rexerat, arma sumpsimus, praefectos ejus ejecimus, regem nostrum vindicavimus. Hic alienigena nostra domum aetate principatus honore donatus, nos omnes pro servis habet. Cui nostrum de republica consilium creditur? injussu nostro rex in Hungariam ductus est, superis gratia, qui remiserunt incolumem. Nunc nescientibus nobis promissus Bohemis, Hungarica Bohemicaq. negocia solus comes pro libidine sua ducit. Neque contentus duorum regnorum gubernatores veltigales sibi fecisse, Austriam solus exhaustit. Nam quota portio est, quam regius sumtus accipit? quicquid reliqui est, comiti cedit. Major ei quam regi familia servit. Taceo concubinam instar regina cultam, cujus virum concivem nostrum, ô Vienneenses, interfecit. Plena praeconibus & meretricibus domus ejus, inter hos regias opes effundit. Magistratus, praefecturas, sacerdotia vendit: ubi non sufficiunt publica furtiva, ad privatas facultates manus admovet. Quicquid olim peccavere opulenti, hodie plectitur, nulla vetustas impunitatem criminis habet. Neque tanta innocentia est, inconvieta puniuntur scelera. Et offendisse majestatem convincitur, quisquis dives habetur. Nemo sua substantia certus dominus. Equi, servi, liberi, conjuges vestrae, pro libidine comitis auferantur. Nunc sumtus regii petuntur, quibus in Bohemiâ pergat. Fateor, non iniqua postulatio est, si frans absit, Cautiorem me comitis artes ac versutia reddant.*



*Sibi hac pecunia non regi quaritur, novum aliquod bellum novum argentum pariet. Nostris alitur malis sua quies: pax ejus, nostrum bellum est. Insecurum facit nostra securitas. Pudet me patientia nostra, qui si viri essemus, facile opprobrium hoc è nostris oculis ejiceremus. Sed fuit hæcenus prohibita conventio, nunc simul congregatis reipublica licet consulere. Resumite alacres spiritus, amicos quisque vestros commonitos reddite, ad imperium præsto cum armis adsint. Accingimini mecum, aut vobis libertatem, aut mihi mortem parabo. Illud in primis mihi ex usu videtur, multitudo ne regi postulata denegat, paucos ex primoribus eligat, qui regem adeuntes semotis arbitris provincie necessitates exponant. Non dubium, quin vobis mihiq; id muneris demandetur. Ego si regis alloquendi facultas detur, exclusurum me comitem nequaquam ambigo. Placet Eizingeri consilium, dant invicem dextras, jurejurando se astringunt alterum alteri non defuturum, donec comes ejiciatur. In conventu provincialium quæ volunt ex sententia ordinant. Nec morati, regem adeuntes daturos argentum provinciales offerunt, esse tamen, quæ soli sibi mandata perferant, rempublicam Austriæ concernentia. Jussis exire cæteris, soli apud regem manent. Ibi Eizingherus regem Austriali sanguine natum dicit, nullos sibi fideliores Austrialibus esse. Imperium ejus illis naturale, cæteris violentum. Consilium ab his recipi oportere, qui amant. Modeste ferre Austriales principis sui negocia non bene administrari, expilari provinciam, vexari subditos, vicinorum odia provocari. Comitem ditare suos, regem ad inopiam redigere: Ladislaum regem vocari, comitem regnare, bellum ab eo cum imperatore nutrir. Gubernatorem autem Hungaria annua quatuor & viginti milia nummum regi pendere, comiti duodecim milia. Idipsum reliquos provinciarum præsidet facere, omnes comiti vetigales esse. Nihil dubium, quin ea mens hominis ad regnum quoque aspi-ret, amovendum eum priusquam meditata perficiat. In atrocibus delictis etiam cogitationes plectendas esse. Posse haud difficile comitem ejici, verum taciturnitate opus. Aperto consilio postquam cuncta placent, intro-misso comite deliberatio conventus exponitur, promissa pecunia dicitur. Viennam tamen, dum exigitur, esse petendam, ordinandam civitatem, ne quid in absentia regis barbarum exoriat. Ficta pro veris plerique referunt. Commendat deliberata Comes. Eizingerus Viennam præcurrit, senatum de mente regis edocet, cujus reditus civitati jucundissimus fuit. Nihil prima die actum. Postera summo mane Eizinge-*



Eizingerus regiam adit, collocatis in proximo divi Augustini templo mille armatis, qui præsto ad signum irrumpant, alios tectis armis intrare palatium jubet. Conveniunt frequentes consiliarii, regem in cubiculo salutant, proceres exiturum in aulam expectant. Ex familia comitis nemo intronittitur. Ultimus omnium adest ipse Comes, qui apud concubinam dormierat, nec tam cito venisset, nisi vocatus ab amicis in palatio novas res parari accepisset. Pulsanti fores non patuere, donec furens calcibus insultavit. Ubi ad regem ventum est, silentium aliquandiu servatum. Deinde Eizingerum innuente rege ita locutum accepimus: *Ab hac hora, Comes, regiam tibi curiam interdictam scito, abiquo liber gentium: neque posthac gubernatoris nomen, neque consiliarii, neque regii familiaris usurpes. Hac me tibi dicere rex jussit: Ad ea Comes nihil mutato vultu, forti & constanti animo indignum se cui talia dicerentur, respondit. Emulorum suorum ea esse, non regis, solere principes qui de se benemeriti essent, his meliora referre, se patri Alberto, se matri Elizabeth, se ipsi Ladislao summa fide servivisse, pro eo prius fudisse sanguinem quam nasceretur. Bella ejus causa difficillima confecisse, fuisse in carceribus, patrimonium fudisse, imperatoris odium incidisse, ut regnum ei conservaret, scire se benignum regem habere, & accepti beneficii memorem. Quæ dicta essent verba, moribus suis non convenire, Eizingerum ea excogitasse, qui jampridem sibi fuisset infensus, quoniam pro sua libidine expilari regis bona non potuisset. Orare ne plus inimicorum odia quam sua merita valerent, ne bonitatem regiam adversariorum malignitas vinceret. Fit silentium locuto Comite, non satis certo sentitur, an rex in sententia persisteret, & mutatum ejus animum ratione Comitis verebantur, inclinaturi quo ille se verteret, ex cujus nutu pendere victoriam norant. Eizingerus de statu suo sollicitus, nihil cunctandum ratus, priusquam rex comiti responderet. Ita inquit: *Ego mandante rege verba feci, nihil de meo locutus sum, ipse adest, ipse me judicet. Dabo merito pœnas, si meam tibi, Comes, non regis voluntatem exposui. Et fare tandem Rex optime, nec nos ultra suspensos teneto. Tum rex placide, ut consuevit, ex mea, inquit, intentione ac voluntate locutus est Eizingerus, atque his dictis subticuit. Vidisses erectas Australium mentes, & jam comiti tanquam victo ejectoque insultantes. Ille ad proceres exiens, quos in aula congregatos diximus, ejectionis suæ contumeliam exposuit, consilium atque auxilium expetens. Quibus in voluntate regis omnia sita respondentibus,**



bus, ad sororem regiam se contulit, ab ea præter lachrymas & muliebrem ejulatum nihil extorquet. Et jam undique per palatium ire armatos animadvertit. Cedendum itaque potenti invidiæ censuit, neque parum putavit ex inimica civitate saluum corpus educere. Clientes ejus audita rei novitate sibi quisque fuga contuluerant. Tacitus igitur & confuso similis cum quatuor tantum comitibus ex aula discedens, in patriam suam concessit. Albertus Marchio Brandenburgensis ne populares saxa in eum jacerent, ad portam usque tutum iter fugienti præbuit. Verum quævis prohibita manus fuere, linguæ libertate usi probrosa in abeuntem maledicta omnis generis congefere. Inconstantis fortunæ singulare documentum. Nam qui paulo ante tutor regis, & secundum in Austria caput erat, in quem omnium oculi respiciebant, qui belli pacisque munera solus agebat, unico regis verbo potestate privatus, inops consilii, & animo confusus abiit.

## CAP. LXII.

*De coronatione Regis Ladislai.*

**R**Ex paulò post magnificentissimis apparatibus Bohemiam petiit, atque in Praga summos consecutus honores, regni coronam accepit. Bohemi in ejus sumptus suorum quisque censuum tertiam partem contulere. Ex ea pecunia coronationis solennia peracta sunt, supportata curiæ onera, & nonnulla coronæ castra redempta, quæ vel Georgio Poggiebracio, vel amicis ejus committere. Mansit ibi non parvo tempore Ladislaus, nec unquam hæreticorum ecclesias quamvis rogatus intravit nec sacris eorum interfuit. Presbyter quidam ex factione Rochezanæ, in sacello arcis rem divinam facturus, sacerdotali veste ornatus ad altare conscenderat. Rex eo in loco sacra, quibus interesset, celebrare jusserat. At ubi hæreticum id muneris occupasse, nec velle alteri locum facere didicit, missò magistro militum, prophanum sacerdotem, nisi abiret, rapi extra sacellum, & de proxima rupe præcipitari jussit. Illi charior vita quam contumacia fuit. Rochezanam in celebritate corporis Christi sacram eucharistiam per urbem deferentem ex fenestra conspicatus, nullum reverentiæ signum præbuit. Percunctantibus amicis ut quid sacramentum inho-

nestasset?



nestasset? *Non me latet, inquit, divinisimum Christi corpus dignius  
 esse quam per me satis honorari possit, nec mea reverentia gloriam ejus  
 auget, neque dehonestatio decus imminuit. Verum mihi cavendum, ne  
 dum Christum honoro, sacrilegum presbyterum Rochezanam populari-  
 bus approbasse videar, quorum plerumque mores ex principe pendent.  
 Nec illi me Deum contempsisse putabunt, cujus sacratissimum corpus catho-  
 lici presbyteri manus summis semper honoribus presicutum videre. Gravis hæ-  
 reticæ factioni jam mora regis in Bohemia esse cœperat, cujus sacra  
 ab eo & à cæteris principibus dietim confluentibus contemnebantur.  
 Et jam qui decepti errabant, aliorum contemplati mores, suas ine-  
 ptias cognoscentes, relicta Hussitarum perfidia, ad ecclesiam rever-  
 tebantur. Ob quam rem cupientem in Austriam reverti regem, nul-  
 lus hæreticorum est adversatus. Prius tamen quam rediret, Uratis-  
 laviam nobilem urbem revisit, Slesiarum caput. Ibi cum divinis  
 interesset in æde pontificali, frequentesque principes convenissent,  
 Poggiebracius quoque proximus regi adstaret, fama est, eaque vul-  
 gata, Chilianum quendam parasitum ex his, qui stulticiam simulantes  
 alios stultos faciunt, Poggiebracium his verbis compellasse: *Qua  
 vultu sacra nostra respicias plane adverto, animum non intueor. Fare ob-  
 secro, nonne satis nitida tibi videtur nostra religio? Vides ne quam multi  
 & magni principes, & ipse rex noster unum ritum sequantur? Cur non  
 his potius quam Rochezana consentis? An plus sapere paucos Bohemos, quam  
 reliquam Christi ecclesiam, censet? Quin relicta incondita plebe, nobilita-  
 ti te jungas nobiliter. At Poggiebracius: Si tua hæc sunt verba, inquit,  
 non es quem simulas, tibi tanquam prudenti respondeo. Sin aliena, satisfac-  
 cere me illis oportet, audi ergo. Ecclesiasticas ceremonias sua quisque pro  
 fide gerit. Sacrificia ea facimus, quæ credimus Deo grata. Neque nostri  
 arbitrii est credere, quod velimus. Vincta magnis rationibus mens humana,  
 volens nolensque capitur, utque natura instituta est, altera facile trahitur, altera  
 elabatur. A tibi persuasa est meorum sacerdotum religio. Si tuam sequor, ho-  
 mines fortasse fallam, anima mea contrarius, Deum qui corda inspicit, re-  
 queo fallere. Neque me tui similem esse decet. Aliud histrioni, aliud vera  
 nobili convenit. Hæc vel tibi habeto, si sapias, vel his referto, qui te submi-  
 sere. Comes Ciliæ dum hæc aguntur fractus animo, & omni spe re-  
 liqua destitutus, ab eo petere salutem coactus est, cujus saluti fuerat  
 insidiatus. Ad Fredericum igitur confugiens, malo se usum consilio  
 dicit,**



dicit, qui dominum suum reliquerit atque impugnaverit, recepisse se parati sceleris poenam, regia curia dejectum, & in alienis hospitiiis auxilia mendicare coactum. Poenitere quamvis sero prioris vitæ, dignus tamen cuius Cæsar misereatur, qui non tam nocuisse quam prodesse possit. Restitutum Austriam, si suo consilio fides sit, nam secum primores provinciae sentire. Petit errati veniam, & in posterum magna pollicetur, si pristinam in gratiam recipiatur. Cæsar cui verba dare difficilimum esset, multa se comitis defectione, passim damna tulisse commemorat, eaque refarciri exposulat. Neque Austriam sibi promitti sufficere, quæ non esset in comitis potestate, si sua quæ possideret, comes traderet, posse reconciliationem sequi: sin minus, non placere poenitentiam, quæ non sentiret poenam. Diu res agitata est. Postremo cum Fredericus facta cuperet, comes verba offerret, infecto negotio discessum est. Erat per idem tempus inter Franciscum Stortiam Mediolani ducem, & rempublicam Venetorum grave atque atrox bellum. Alphonsus Siciliae rex Venetos adjuvabat, atque ob eam causam Florentinos Francisci amicos armis premebat, eumque Senenses sequebantur. Nec dubium erat, quin Francisci conditio multo inferior videretur. Quod cum ipse adverteret, externa ex Gallis auxilia accersivit, conducto grandi stipendio, Alphonsi amulo, Renato Lotharingæ duce, qui paulo ante ex regno Siciliae fuerat expulsus. Hujus adventu magna fortunæ inclinatio facta est, & Venetorum exercitus loco pulsi, debiliores visi sunt. Sensit hæc Ciliae comes, atque hinc suæ miseriæ finem sperare coepit. Missisque ad Venetos legatis, venturum se cum ingentibus Bohemorum copiis auxilio pollicitus est & finem bello impositurum, si stipendia darentur. Neque id erat difficile. Nam Bohemi novarum rerum cupidi, & in armis educati, nullo imperio domi teneri queunt, si quis militantibus mercedem offerat. Adhibuerunt aures Veneti. Sed cum longinqua militia multum auri exposceret, oblatam potius cum hoste pacem accipere, quam dubium emere bellum voluerunt. Frustratus iis Comes, postquam foris nullum exilii sui praesidium reperit, per amicos reconciliari Ladislao quarit. Neque amplius adversata fortuna est. Invisus Baronibus Eizingherus, quorum avaritiæ atque rapinæ obsistebat, conservare gratiam regis nequibat, cum illi modo per seipso, modo per filios, qui regi diu noctuque adstabant,



assabant, Eizingerum criminarentur, & indigne pulsum Comitem dicerent, regi propinquum, & qui sibi regnum restituisset. Libuit igitur ab exilio revocare Comitem.

## CAP. LXIII.

*De reductione Ulrici comitis Ciliæ, & restitutione  
administrationis sibi factæ.*

**C**omes Ciliæ iis gestis, per amicos clam regi reconciliatur, reversurusque Viennam magno & splendido apparatu, mille ducens equites expeditos in armis, adit, venienti rex obviam extra urbem factus est. Primores, nobiles, populares, omnes secuti salutare, amplecti, laudare Comitem, certare invicem, contumeliosius ejecerint, an magnificentius revocaverint. Mira rerum mutatio. Qui paulo ante mœstus in exilium ierat, in triumphantis modum, revertitur. Eizingerus, qui culmen potentiae consecutus cum dejecerat, quod in alium statuit, in seipsum pati cogitur. Intrante namque urbem Comite, ipse cum amicis egreditur, spontaneum exilium n eligens. Lubricus apud reges primus est locus, nec solida potestas unius voluntate subnixa. Ferunt comitem, Eizingeri cognito recessu, laudasse hominem, qui fortunæ ludibrio se subtraxerit, paratam ei turpissimam fuisse mortem, si iudicium expectasset. Usurum optimo consilio, si curiales procellas perpetuo declinaverit. Nec tamen sibi ipsi curia mores placere, fluxa incertaque omnia esse, omnibus horis instare pericula, acceptam superiori anno ignominiam menti sua semper habere, semper ante oculos esse turpem ejjectionem, contumeliosum exilium, probrosa verba, mirari quod non pejora pertulerit: Deo gratias agere, qui sibi pristinum statum redididerit, satisfactum honori suo esse, nec plura cupere. Mansurum tamdiu apud regem, donec ejjectionis infamiam gloriosi reditus rumor extinguat, potentiam deinde, & regis amicitiam, & populares aures malle se dimittere quam perdere. Non tam fortiter ea fecit quam dixit sapienter. Potentiam qui consecutus fuerit nemo tam facile deponit, quam damnat. Retinent amici, implicat gloriæ cupido, obstat inimicorum metus, semper est quod crastinare compellit. Facilius Gordii famosum in Asia



nodum quis solverit, quam potentia regniqve blanditiis sese explicaverit.

## CAP. LXIIII.

*De dolo comitis Cilia, Joannem Huniadem ab administratione regni Hungariae cupientis amovere.*

**H** Ungari postquam regem in Austriam rediisse accipiunt, legatos ad eum e vestigio mittunt, utqve in Hungariam veniat, suum regnum vilitatum, petunt. Joannes Huniades per idem tempus Hungariam serè universam in potestate habuit, regiae arces in manu ejus fuere, equestres pedestresqve copiae uni ei parvere. Id nonnullis regni Baronibus invidiosum ac molestum erat, atqve in primis comiti Ciliae, qui locum ejus optabat, nec post electionem ab eo promissum acceperat aurum. Criminari ergo Joannem, regi odiosum efficere illum regem esse, non Ladislaum, vectigalia ad eum cuncta deferri, munitissima regni oppida, arces, equos, arma, in potestate ejus esse. Nihil dubium quin regni coronam quarat, si nequeat per Christianos, conaturum per Turcas, quibus bis magnos Hungarorum exercitus prodiderit. Palam Turcis infestum videri, clanculum esse amicum. Bis fidem ab eo violatam, reginam Elizabeth, introductore rege Polonia, contra jura suaqve repulsam. Polonum, quem accerserat, in bella desertum. Si pergat in Hungariam Ladislaus, in ejus manu aut vi, aut veneno periturum. Id solum queri, dum regis in Hungariam transitus petitur. Qui provincias ex arbitrio suo regunt, eos sine fraude dolisve superioris praesentiam non expetere, insidias proculdubio in caput regis paratas esse. Praeveniendum facinus, & in autorem vertendum scelus. Promittendum in Hungariam iter, prius tamen Joannem sub specie pacandi regni ad curiam evocandum, venientem capiendum atque necandum, sic Ladislaum paterno regno perfici posse. Tutissimum illud consilium ac salubre vilum, compositis insidiis Joannes ad regem vocatur. Ille ab amicis de fraude certior factus (difficiliter enim res magnae silentur) pariturum se regi in Hungaria respondit, iturumqve quocunqve jussit, extra regni fines non esse obnoxium. Mittuntur igitur ad eum primores curiae cum comite Ciliae, qui secum in finibus Hungariae conveniant ad oppidum Cozia, conventumqve



tumque Viennam abducere si nequeant, intra oppidum arte tractum interficiant. Joannes ad jactum teli cum duobus millibus equitum, constitit, colloquium in campis offerens. Comes Ciliæ se regis vicem gerere ait, gubernatori eos adire, qui regis mandata perferant, haud indecorum esse, neque se ita ignobilem, ut cedere Joanni debeat, colloquium intra oppidum & quietum & honestius haberi posse. Joannes legationem ad se missam dicere, legatos ei cedere ad quem mittantur, de nobilitate non esse in praesentia certandum. *Ceterum in Hungaria, Comites Cilia regni gubernatores sequi solitos, postremo munita se oppida minime ingressurum, nisi praesidium intus habeat, aequè ut Comes.* Ita rebus infectis discessum. Nova, deinde fraus excogitata. Vicerunt Joannem communes amici, adventus in Viennam promissus, si modo rex principesque nominatim suis literis securitatem facerent. Oblata sunt omnia, quæ optavit. Ille ad octo millia passuum Viennæ appropinquavit. Ad quem Lambertus nobilis eques jussu Comitis egressus, properare eum festine jussit. Jam enim rex magno comitatu obviam exisset, & cum eo Comes, qui literas publicæ fidei afferret. Motus eo nuncio Joannes, triginta ferme stadia versus urbem profectus est, inspiciensque late campos, cum neminem exire obviam cerneret, in propinqua villa consedit. Tantisper moratum, Comes cum quadraginta tantum equitibus adiit, & ne regem occurrentem moraretur, equum repente ascendere, festinareque jussit. Joannes late, inquit, *campi patent, neque ego vel regem vel alium quempiam video venientem.* Tum Comes astum causatus, regem intra vineas & arbores expectare in umbra dixit. Interrogatus de literis, apud regem eas esse respondit. Intellexit fraudem inesse, Joannes, sequæ verbis incautum duci. Conversus ad Lambertum, recte, inquit, *mentitus es mihi.* Cui Lambertus, *Quæ jussit Comes, ea dixi. Si quis error inest, eum argue. Ipse suam causam agat, qui mandavit, mihi parere necessarium fuit.* Rursus Joannes Comitem intuens, *siccine ludificare homines pergis? Fraude me appetis? ego te videri possem perdere. Incideras in foveam, quam fodisti, si vellem. Quis prohibere potest, quin de te hodie ultionem accipiam, dignaque tuis factis premia reddam? Reverentia regis te saluum facit, illi tuam vitam dono, non tibi, cave posthac, ne meos ante oculos veneris.* Atque ita rursus conveniendi spes adempta. Multa post hæc inter Hungaros & regem agitata sunt, & cum ipso Joanne pactiones habitæ. Arces nonnullæ regi redditæ, rex ipse Budam profectus.



*De cruce signatis, & pugna eorundem contra Turcas,  
victoriamq; apud Albam in Hungaria.*

**I**Nterea mortuo Romæ Nicolao V. Pontifice maximo, qui Eugenio quarto successerat, Calixtus tertius Petri cathedram est adeptus. Qui cognita Mahumetis Turcarum imperatoris voluntate, Hungariam sibi armis subicere cupientis, (jam enim Constantinopolim græciæ culmen expugnaverat) Joannem cardinalem Sancti angeli, virum industrium ac magnanimum, cum legatione in Germaniam misit, Septentrionis vires in Turcas concitaturum. Coactus est exercitus non tam armatus quàm fidelis. Vulgus incomptum, populares inopes arma sumpsere, quos aternæ vitæ præmia commoverunt: opulenti homines, præsentis rerum statu contenti, domi mansere. Odiosus plerumque potentibus sermo divinus: quibus desunt facultates, lev's in cælum volatus. Mahumetes autem Constantinopolitana victoria superbus, congregatis ingentibus copiis, in Thracia per Triballos in Hungariam properans, centum quinquaginta millia pugnatorum ducere ferebatur. Et inflatus opinione sui, tantoq; tumens exercitu, nil dubitare, quin devicta Hungaria, Illyricos penetrare sinus, atque intima rura Liburnorum, & fontem superare Timavi, rerumque caput Italiam atque Romam uno impetu subigere posset. Verum parva urbs, & alioquin ignobilis, tantos ejus conatus retinuit, Taurinum appellavere majores, nostra ætas illam vocat Albam, ad confluentes Danubii Saviqve sitam. Hanc primam oppugnare statuit, propter opportunitatem transeundi fluminis. Joannes Capistranus ordinis Minorum professor, vitæ sanctimonia clarus, ea tempestate Hungaros in arma publicis sermonibus excitabat. Qui ubi appropinquare Turcas accepit, nihil moratus, in Albam se contulit, haud parvam cruce signatorum manum adducens. Joannes quoque Huniades contractis raptim copiis, eò profectus est. Cardinalis Budæ remansit, auxilia undique ciens. Rex ubi advenisse Turcas cognovit, nec vires Hungaris esse, quæ tantam vim ferre possent, mobiles gentis animos veritus, neque satis tutam Budæ moram arbitratus, sub specie venationis urbem egressus, in Austriam propere se recepit. Turca interim apud  
Albam



Albam castra metatus, summis viribus eam urbis partem oppugnare, adoritur, quæ planus patuit aditus, dispositisque tormentis raræ atque insolitæ magnitudinis priores muros aperuit. Vacuum haud parvum spatium intus erat, usque ad murum alterum. Hic cruce signati stationes habuerunt. Parum tecta armis acies, gladiis hastisque tantum hispida, verum ferocitate animi, & cœlesti auxilio tuta. Ingressi per muri ruinas Turcæ, atrox cum his prælium commisere. Capistranus ex turri clamitans Christianos hortari, vexillum crucis ostendere, opem de cœlo promittere, maledicere hostibus, Dei præsentiam implorare. Huniades modohuc modo illuc cum globo militum currere, instaurare ordines, pro fessis validos, pro sauciis integros sufficere, imperatoris ac militis officium exequi. Pugnatum est summa utrinque vi, modo nostri, modo Turcæ pedem referre. Audaciores, primi quæ bellatores confossi gladiis cadere, super cadavera passim strata belligerari, pulsi extra mœnia hostes. Instante suo Imperatore, urgente, castigante, Turcæ iterum irrumperere, iterum pugnare acriter, Christianos in ultimum discrimen adducere. Postremo Christiana virtute repulsi, denuo periculi magis quam pudoris anxii, oppidum fœda fuga reliquere. Rursus sequentibus cruce signatis, extra muros pugnam instaurare. Mox ex proposito fugere, & quam remotissime ab oppido Christianos protrahere. Interim aciem à latere immittere, quæ reditum in urbem egressis intercipiat, furentes nostri ac victoria exultantes, in quod præcipitarentur discrimen, non advertere, paulum processuris & à fronte & à tergo periculum imminere. Vidit ex muris Capistranus transversam hostium aciem, insidias quæ cognoscens, revocare suos cœpit. Cum parum exaudiretur, tympanis ac tubis confundentibus vocem, præceps in pugnam dilabitur, atque inter duas acies, inter tela volantia percurrens, clamoribus ac signis cruce signatos redire cœgit, apud quos nulla erat Huniadis vel fides vel autoritas, quorum magna pars Teutonica fuit, Hungarico insensibilissima generi. Fraudati magna spe Turcæ in castra redierunt, cum quatuor & viginti horis interdiu noctu quæ, nunc muros quatientes, nunc manu pugnantes prælium protraxissent. Multi ex utraque parte cecidere, plurimi ex Turcis, & hi quidem præstantiores. De cæsis hostibus varia sententiâ est. Quidam super quadraginta millia perisse tradiderunt, nonnulli viginti millia cæsa fuisse affirmant. Alii ad sum-



num quatuor millia cæsa fuisse dicunt, quod nobis infra verum esse videtur. Neque enim in tanto exercitu videri clades ea octiduo potuisset. Major profecto jactura tantum imperatorem fugere compulit, qui sequenti nocte incensis castris ac machinis, cum toto exercitu trepidus abiit, nec tam audax superbusque venerat, quam timidus dimissusque fugam arripuit. Traditum est sub papilla confossum, salutem desperasse, vulnus ejus obsidioni finem dedisse, inter fugiendum plures quam in acie periisse. Victoribus ea tantum præda relicta est, quæ non potuit ignis absumere, tormenta scilicet ænea, & arietes ferro graves, machinarumque ingens vis. Huniades & Capistranus huic bello interfuere, uterque rem gestam scripsit, neque alterius mentionem fecit, alteruter solidam sibi rei gestæ laudem usurpavit. Ingens dulcedo gloriæ, facilius contemnenda dicitur, quam contemnitur. Spreverat Capistranus seculi pompas, fugerat delicias, calcaverat avaritiam, libidinem subegerat, contemnere gloriam non potuit. Qui summo Pontifici bellum, atque exitum belli describens, nulla Huniadis, nulla Cardinalis facta mentione, totum suum esse dixit, quod gestum erat, quamvis Deum in primis victoriæ confessus fuerit autorem. Nemo est tam sanctus, qui dulcedine gloriæ non capiatur. Facilius regna viri excellentes quam gloriam contemnunt. Verum paulo post & Huniades & Capistranus alter morbo, alter senio obiere. Felices animæ quibus tam claro peracto prælio, tanto populorum favore quaesito, ægra relinquere corpora datum est.

## CAP. LXVI.

*De interfectione comitis Cilie per Ladislaum Huniadis filium patrata.*

**L**adislaus audita Huniadis morte, suadente Cilie comite in Hungariam rediit, duobus sibi ut videbatur æmulis liberatus, altero qui fraude, altero, qui vi suum regnum appeteret. non minus huniadis obitus, quam Turcarum conflictus cordi fuit, qui sublato adversario Hungariam jam sibi parere non dubitat. Cæca humanæ mentis iudicia, sæpe lata pro tristibus, pro latis tristitia ducunt, futuri nulla homini certitudo. Nemo novit quid vespere vehat, nemo tam superis ami-

cus



cus est, ut crastinam sibi lucem promittere possit. Multi dum se credidere dejectos, in sublime rapti sunt, multos exilia claros fecere, & optata consecutis saepenumero exitio turpitudiniquē fuerunt. Comiti multo salubrius fuerat Huniadem vixisse, qui Hungariam suæ neci destinatam clausisset. Nunc metu vacuus, regem in Albam ducit, hostium spolia recogniturum, & campos visurum, ubi praelia gesta, ubi barbara castra fuere. Eam urbem Ladislaus filius, valido praesidio retinebat. Qui venienti regi, purpuratis, togatisque portas aperuit, armatorum circiter quatuor milia ab ingressu prohibuit. Hic dum mora trahitur, rem divinam spectante rege, consilium de morte Comitis in abdito conclavi proceres ineunt. Vocatus eo Comes, an iret aliquamdiu haesitavit. Exin diploide vix penetranda ferro indutus, proficiscitur. Venientem Ladislaus *proditorem* compellat, qui patri saepe necem paraverit, insensumque sibi regem reddiderit, nunc diem venisse, quo scelerum poenas luat. Sunt qui Comitem prius arguisse Ladislaum dicant tanquam regi rebellem, qui ejus armatos intrare oppidum vetuisset. Illud constat, Comitem arrepto ex manu armigeri gladio, Ladislai caput petentem, nonnullos interjectæ manus digitos amputasse, exorto clamore Hungaros irrupisse, defendentemque se magno animo Comitem multis confossum vulneribus obtruncasse. Nec moratos, ea novitate regem, perculsum adeuntes, occisum regni hostem dicere, digna meritis præmia reddita. Regi nihil timendum esse, cuncta ejus imperio parere, nunc regnum ejus incipere, prius apud Comitem fuisse. Rex quamquam vehementer commotus erat tam atroci facinore, supra tamen quam ejus ferebat ætas, dolorem atque vim compressit, nec dubitavit jure cælum comitem profiteri. Amicis vero circumstantibus, ferendumque quodcunque id esset dicentibus: *Atqui sic necessitas, inquit, exigat. Ferendum est quicquid vitari non potest. Adeptam Comiti vitam reddere non possumus. Ille suo fato functus est, nos nunc nostra manent, quæ Deus optimus maximus meliora faxit.* Jussitque defuncti cadaver plaustris impositum Ciliam deferri, atque in sepulchris majorum condi.



*De laude Joannis Huniadis per Regem Ladislaum  
pronunciata.*

**I**psē autem rex, Alba relicta comitante Ladislao, Budam repetere statuit, inter eqvitandum ad oppidum Huniadum pervenit. Ibi conjunx Huniadis obviam facta est, ob mortem mariti lugubri veste induta, puellæqve quæ circa eam erant dejectis in terram vultibus, pullis amictibus mœrorem præ se ferebant. Rex matronam complexus, indigna sunt, inquit, hac vestimenta, quæ ob mortem viri tui deferas. Joannes Huniades de morte transiit ad vitam. Ille Hungariam Christo, mihi regnum servavit, Christiani nominis hostes fudit, fugavit, perterrituit, pacem Hungaris peperit, salutem cunctis fidelibus aperuit. Fortia ejus facta etiam hostes admirati sunt, & vitam & mortem posteritas consecrabit. In pralio strenuus, domi mitis, in bello vicit hostes, in agritudine se ipsum superavit. Consilio ac manu suas acies sustentavit, perfregit hostiles. Ubi adesse extremum vitæ tempus agnovit, & urgere vim morbi, non est passus dominicum corpus ad se deferri, neque enim dignum existimavit servum a domino visitari, surrexit è lectulo quamvis labentibus membris, & cum deficiente virtute suis pedibus ire non posset, in adem se vehi sacram jussit. Ibiq, de more Christiano, si quæ exstabant rerum humanarum vestigia, sordium confessione deterfit, & sacrosanctam accipiens eucharistiam, inter sacerdotum manus terrena fastidientem animam exhalavit. Et quo illum migrasse credimus, nisi ad eum pro quo tot bella depugnavit? Ad imperatorem suum perrexit fortis miles, cum Christo regnat, qui pro Christo tot periculis se objecit. Jampridem debitum sibi cælum tenet, non est cur divinitate fruente lugere oporteat. Congaudere gaudenti æquius censeo. Faceessant intempestiva lachrymæ, supervacanciq, luctus, absit omnis mœror atque inprimis lugubres habitus, pullasq, vestes exuite. Atqve his dictis, purpureas tunicas auro distinctas afferri jussit, easqve viduæ ac filiis dono dedit. Puellas quoque pro sua dignitate donatas, mutare habitum imperavit, totumq; diem lætitiæ dari. Convivia demum splendide apparatus, inter epulas & vina saltatum cantatumqve, quasi celebres nuptiæ per luxum & jocum actæ.



## CAP. LXIIX.

*De captivitate filiorum Joannis Huniadis, & decollatione Ladislai filii ejusdem senioris.*

**H**is blandimentis allecti Huniadis filii, nihil jamdudum ex cæde Comitis in caput suum verti posse confidebant. Itaque posito metu, regem usque ad Budam secuti sunt, aulamque inprimis æstimati cultique frequentabant. Verum amici Comitis regias aures dietim pulsare, illustrem principem avunculum regium sine causa necatum conqueri, majestatem gravissime lafam dicere. Inultum tam atrox scelus relinquendum non esse, corrigendum audacem juvenem, ac temerariam audaciam nisi mature coerceretur, in furorem verti. Nullum inveniri clementem virum, qui juventutem crudelitate insigniverit. Arma in manibus nepharii adolescentis periculosa esse, ausurum proculdubio etiam in regem, qui regi proximum obruncaverit. Jam illi regnandi spem factam, patrem ejus idem concupivisse, animum seni, non voluntatem desuisse, graviores ætatem discrimina quæque metiri, juvenem, quodcumque libuit, factu facillimum credere, per aqua & iniqua ad regnum tendere. Occurrendum priusquam malum amplius serpat, in Ladislao & facta & meditata inveniri facinora ultimo supplicio digna. Rex sive iis motus, sive suapte natura incensus, designata hora, qua filii Huniadis ambo in regiam concessissent, armata juvenum manu portas claudi jubet, adolescentesque captos in carcerem rapi. Cum quibus & Joannes episcopus Varadinensis, raræ virtutis ac facundiæ, & plerique alii comprehensi sunt, tanquam cædis Comitis & insidiarum, quæ regi pararentur, conscii. Ladislaus quatuor & viginti natus annos, egregio corpore adolescens, flavis de more crinibus super humeros passis, revinctis post tergum manibus, talari atque aurea veste indutus, & eadem sortasse quam sibi paulo ante rex donaverat, in publicum producit. Erecta cervice, oculis hinc & illinc spectantibus, impavidus atque intrepidus ad supplicium pergit. Ubi ad locum ventum est, quo cervix amputanda erat, jussus genua flectere, pauca prius pro sua excusatione locutus, carnifici paruit. Præco cui damnatorum crimina publicare mos est, imperato silentio, nihil aliud dixit, nisi eo modo corrigi, qui domino suo infideles essent. Carnifex religata Ladislai coma ne collum impediret, jussus percutere,

nutans



nutans labansqve vix tandem quatuor ictibus candidam cervicem abscidit, atq; ita nobilis adolescens occiso Comiti parentavit. Frater ejus in vinculis retentus est. Episcopus Varadinensis, multum instante Cardinale Sancti angeli, qui tum legatum apostolicum agebat, Dionysio episcopo Strigonienſi, eidem quoq; Cardinali & pari legatione fungenti, secundum canones judicandus traditur, de cæteris captivis suspensum judicium, qui tamen paulo post fractis carceribus evasere. Rex Budæ non diu moratus in Austriam se recepit, Matthiam Huniadis filium coævum, captivum ducens. Cum per Strigonium iter faceret, vocatum ad se Joannem Varadinensem præſulem, bono animo esse, jussit, iis verbis usus: *Cum essem Buda, feci quod voluere Barones, neque enim mei juris eram. Quod te cepi, illorum fuit: quod te supplicia culpæq; libero, meum est. Spectata mihi tua virtus, nihil de te sinistrum credi sinis. Abi, & quem gesisti hæcenus, episcopatum gere.*

## CAP. LXIX.

*De conjugè Regi tradenda.*

**I**N Austria de conjugè regi tradenda diu cogitatum, multæ virgines offerebantur, tantum conjugium expetentes. Verum nobilissimo regi quæ coire merito posset, nulla dignior visa est Magdalena, Caroli regis Franciæ filia, cum propter ætatem convenientem, egregiam formam, pudicos mores, tum propter sanguinis excellentiam, raramqve nobilitatem, & majorum ejus late gloriam. Placet legatos mittere, qui sponsam petant: de loco nuptiis eligendo contentio exoritur, Hungari Budam, Australes Viennam, Bohemi Pragam tantæ celebritati deputandam ajunt. Diu res trahitur, nutante rege. Ob eam causam Georgius Poggiebracius cum octingentis expeditis equitibus in Austriam usque ad Danubium proficiscitur, magna se habere dilectans, quæ regi pandat. Tranare jussus atqve urbem ingredi, *Viennam sibi suspectam* ait. Rogatus per nuncios quæ velit pandere, negat se *alteri quam regi arcana dicturum, non esse ab re trans fluvium regem pergere.* Eundemne fuerit, aliquantisper hæsitatum. Senatui non placebat, tantum licentiæ dare subditis, insolentes eo modo fieri, & majestatem vileſcere. Ladislaum gubernatoris movebat autoritas, & aliquod sub-

esse



esse arduum existimabat. Neq; latebat eum honestatem utilitati cedere, ac tempori serviendum esse. Perrexit igitur inermis ad armatum, tria millia equitum secuta, togatus magis quam loricatus exercitus. Tentoria in ulteriore Danubii ripa protensa, dimisso spatio inter bina castra, & tabernaculum in medio collocatum, in quo rex cum gubernatore conveniret. Quatuor diebus colloquium productum est, rex per noctem in urbem rediit. Primus congressus publicus fuit, in quo salutatio de more facta, & honos regi habitus. In altero atq; item altero, duo tantum sermonis testes adhibiti. In quarto semotis arbitris, solus cum rege Georgius tabernaculum introivit, verba inter eos habita non sunt prodita. Ex iis tamen quæ postea secuta sunt, manifestum, de transitu regis in Bohemia fuisse tractatum. Ubi sermone sapius habito non coiere voluntates, indignabundus Poggiebracius minabundusq; retro in Moraviam iter flexit. Regi haud salubre consilium visum est, dimisisse hominem male pacatum, quem penes regni potestas esset, qui nocere pariter ac minari posset. Misit ergo primores ex curia procures, qui placatum retraherent, sin minus, facturum postulata regem promitterent. Inventus in itinere, nec de reditu verba fieri passus est, nec de sententia sua quicquam detraxit. Promissus itaque in Bohemiam regis transitus, & nuptiarum solennitas Pragæ destinata. Nec dicto fides defuit. Ordinatis Austriæ rebus etiam ante diem dictam ingenti rex apparatu Bohemiam petiit. Intranti Pragam, Rochezana cum sacrilego presbyterorum comitatu pompam ducens, obviam venit, & habita oratione, pro fausto feliciq; reditu congratulatus est, vix admonente Poggiebracio rex gratias egit, hæreticum ac pestiferum torvis oculis clerum inspiciens. Ubi vero majoris ecclesiæ sacerdotes sacra serentes occurrerunt, *Hos, inquit, dei ministros agnosco*, atqve ab eqvo profliens, consalutatis omnibus sacram crucem osculatus est. Erant enim Romanæ fidei sectatores, qui pro testamento Dei exilium longo tempore passi, Sigismundi tandem vocatione sua loca recuperaverant. Hæc Ladislai pietas multorum offendit animos, qui Rochezanæ studebant ineptiis. Suppressum tamen ac dissimulatum odium. Inde duæ legationes missæ, altera ad Imperatorem Fredericum de pace actura, in qua princeps fuit Eizingerus: altera ad Carolum Franciæ regem, ejus filiam petitura. In hac primas partes gessit Ulricus Pataviensium præses, moribus ac doctrina præditus, quem tradunt octo-



ginta equos albicantes duxisse. In ea legatione septingenti equites profecti sunt, quadrigæ auratæ, matronæ ac virgines splendido apparatu, quæ sponsam ducerent, vestes præterea donaque tanto matrimonio digna missa. Tertia quoque legatio ad Calixtum pontificem maximum decreta erat, quæ controversias de religione dirimeret, regnumque Bohemorum Romanæ ecclesiæ conjungeret. Super his quarta cura regis urgebat animum, comparandi contra Turcas validi exercitus, quo tandem nostra ætate scelerata Mahumeti superstitio pelli ab Europa posset. Jam de concordiæ formula cum Frederico convenerat, instruebantur regiæ nuptiæ maximo sumptu, splendidissimo apparatu, Imperator & Augusta vocati, ambæ regis sorores cum viris eam celebritatem accessuræ ferebantur. Saxoniæ, Bajoariæ, Silesiæ, Franconiæ, Rheni principes, multi quoque ex Gallia reguli, venturos se promiserant, non solum nuptias ornatos sua præsentia, verum etiam de tuenda republica Christiana contra Turcas acturos. Sed hos tantos cogitatus, has pulcherrimas institutiones, tantum rerum ordinem immatura mors ac repentina regis interrupit. Incertæ vanæque cogitationes hominum, futurum quicquid cæca caligine Deus occulit, ipse sibi gubernacula retinet universi. Nihil sine suo nutu mortales agitant. Sapienter ab eo justæque cuncta reguntur, sæpe in conspectu ejus æquissima sunt, quæ nobis videntur iniqua. Nihil perperam, nihil temere divina majestas agit, nos cæci versamur in tenebris, minimum est quod cernimus. Ad regimen animæ nostræ liberum nacti sumus arbitrium, ad salvandas animas lux reddita Christianis. De regimine civitatum, de mutatione regnorum, de orbis imperio, minimum est quod homines possunt: magna magnus disponit Deus.

## CAP. LXX.

*De infirmitate & morte Ladislai Regis.*

**L**adislaus igitur decimo Cal. Decembres, hora circiter duodecima noctis, agrotare cœpit. Sunt qui ulcere pestifero percussum ingvine dicunt, plerique nullum pestilentiae signum apparuisse. Verum mihi ita res conscripta est ab his, qui diligenter

tum



rum medicos, tum cubicularios audivere. Sederat in iudicio rex, quod de nobilitate inter Poggiebracium & Cernhaoram Moravum magnis contentionibus agebatur, ita ut alter alterum ad duellum provocaverit. Neque de more indutus prodierat, linea tantum indumenta suscepserat, & desuper Persicum habitum, quem vocant *schubam*. Neque toto auditorio ridere visus, tristem vultum notavere omnes. Id signum praesagientis aegritudinis iudicatum. Dimisso tribunali, coenavit inter purpuratos, composito ac gravi sermone usus. Post multam noctem in cubiculum ductus, oblatas rapulas, quae apud Bohemos dulcissimae sunt, avidè comedit, siceramque bibit, sermones haudquaquam tristes inter cubicularios miscuit. Priusquam lecto decumberet, orationem de more ad superos habuit, qua finita, gravatum se dixit, & stomachum vehementer dolere. Cui unus ex cubiculariis natione Bohemus, *Ascende*, inquit, *stratum, dolorem somnus excludit*. Paruit rex, quietique se tradidit. Cumque ad horam dormivisset, vocato iterum cubiculario, vim doloris qui sensim cresceret, intolerabilem esse ait. Ille de se iudicium faciens, nihil somno melius affirmare, sic dolorem cessurum dicere. Jam noctis hora tertiadecima ferme effluerat, regi nulla quies dabatur. Ne tamen cubiculariis molestus esset, dolorem in diem tacitus pertulit. Tum medici accersiti, quod suarum partium erat desperata salute fecerunt. Georgius & ipse vocatus percunctari ex rege cur doleret, quid morbi esset, spem bonam praebere, ne sibiipsi deesset hortari, pteret quaecunque vellet, omnia in arbitrio suo posita, mandaret parere cupientibus. Ad quem rex, *Tua mihi, Georgi, jam pridem cognita fides, spectataque virtus est, per te Bohemus usque in hanc diem me regem appellavit. Speravi me potiturum regno, quod ipse paraveras, nunc contra superi jubent. Mihi moriendum est, regnum in tua manne erit. Duo ex te peto. Alterum, ut provinciales juste regas, pupillis, viduis, imbecillisque, rectum iudicium patrociniumque, ne subtrahas. Alterum, ut qui me secuti sunt ex Austria, ceterisque provinciis, in patriam suam inviolatos remittas. Hoc mihi supremum beneficium ne deneges*. Praematuras regis cogitationes Georgius esse respondet. *Futurum brevi sospitem, ex suo arbitrio regnaturum, desineret ea proloqui quae & sibi incommoda, & aliis forent molesta*. Tum rex apprehensa manu, *Aje*, inquit, *promitte quod cupio, nam me mori certum est. Si feceris quae jubeo, Deum propitium tibi reddam. Neque enim ita vixi, ut caelum mihi negari putem, pro caelestibus terrena*



*relinquo, tu cave postulatis adversari.* Non potuit tenere lachrymas Poggiebracius, deditque fidem facturum, quod rex imperasset. Finito sermone intromissis sacerdotibus de curatione animæ actum. Christiano more sacramenta exhibita. Rex ornamenta sua Pragenſi eccleſiæ legavit, juſſitque crines in auri modum fulgentes, ne qua ſuper'eſſet, vanitas, amputari. Id miniſtri cauſas moræ neſcentes neglexere. Ubi anima agra amplius demorari non potuit, ſacram candelam petiit, eamque manu prehendit, & intuens Salvatoris imaginem crucifixi, orationem dominicam dicere orſus ad finem uſque perduxit. Pronunciatisque ultimis verbis, *Sed libera nos à malo*, nihil amplius locutus, non extrema pati ſed quietem arripere viſus, mortalis vitæ lumen reliquit. O imbecillem humanæ naturæ conditionem! O inanem mortalium gloriam. O cœcas hominum mentes! quid jaſtamur? quid extollimur? Quid eſt quod dignitates, opes, potentiam, tanto opere ſtagitamus? Perpetuo his frui cui datum? Ladislaus nobiliſſimus adoleſcens duodeviginti natus annos, in ipſo gloriæ culmine, tot regnis, tot gentibus imperans, tot deliciis atque opibus afluens, inter tot auxiliantium manus, intra ſex & triginta horas, poſtquam agrotare cœpit, extinctus eſt.

## CAP. LXXI.

*De opinione & cauſa infirmitatis & mortis Regis.*

**M**Ortem ejus alii morbo, alii veneno imputavere. Medici Teutones, quorum potiſſima corporis cura fuit, in Auſtriam re-verſi palam dixerunt, *quamprimum agrotare rex caſiſſet, ſe vocatos, manifeſta mortis ac veneni ſigna comprehendiffe, neque auſos in aliena terra manifeſtare quæ viderant, timuiſſe potentiam eorum, quorum ſcelere rex periſſet, regi clam aperuiſſe omnia, reſpondiſſe illum non ignorare toxicum datum, ſilentium imperaſſe, ne regis morſi ſuam adjicerent.* Senatus Viennenſis ubi vulgari eam ſamam animadvertit, medicorum verbum inde fieri prohibuit, ne Bohemorum adverſus ſe ferociam provocarent. Qui violentam mortem dicunt, Poggiebracium & Rochezanam criminantur. Poggiebracium tum regi fuiſſe inſenſum, cum

ad



ad Danubium usque profectus Viennam ingredi noluit, non sine causa suspectum ei regem fuisse. Conscias mali mentes metu impleri, quæ integer est animus, his omnia tuta videri. Ab eo tempore regiae vitæ paratas insidias, Rochezanam nunquam regi placuisse, idque palam factum, cum sicut ante diximus, sacra ferentem contempsit. Nec me latet fama vulgatum esse, idcirco regem apud Pragam nuptiarum celebrationem decrevisse, ut concurrentibus eo Catholicis principibus potenti manu hæreticos comprehenderet, finemque tandem Hussitarum insaniæ daret. Id præsentisse Rochezanam & Poggiebra-cium, necemque regi pro sua salute machinatos. Mihi quid horum verius videatur non facile dixerim, neque certa pro incertis ausum affirmare. Aliorum dicta recenseo, & plura scribo quam credo. Illud constat, præter Rochezanam, cui regiam mortem nemo non acceptissimam judicavit, & Georgium, reliquos regni proceres extincto rege in magno mœrore fuisse, & publicum toto regno luctum, qui ad VII. Cal. Dec. continuatus est. Tunc regia pompa peractis exequiis defuncti corpus in sinu proavi sui divi Caroli Romanorum Imperatoris sepultum, circumvectio per urbem more majorum neglecta. Dum hæc scribo, Alphonsi regis Arragonum, cui præsentem historiam dedicaveram, multis formidatus, pluribus expectatus, mihi quidem acerbissimus nunciatus est obitus, V. Calend. Julii clausisse oculos traditur. Hispaniæ atque Italiæ rebus aliam formam præbiturus, lugendumque Camœnis fatum, & ingens disertis jactura viris. Utinam successori cura virtutis sit, minorque seculo nostro calamitas ingruat, quam timeamus. Nos operi, quod jam requirit, summam admovemus manum. Georgius ea die, quæ inter mortem Ladislai & funeris educationem media intercessit, accersitis proceribus gubernationem suam non expirasse regis obitu dixit, provinciam usque ad Pentecosten, commissam sibi fuisse affirmans. Alma tenenti, nemo finitum morte mandantis imperium obicere ausus. Pragenles gubernationi suæ nihil morati se commiserunt. Matthias Huniadis filius ex Vienna ductus, qua die rex obiit, Pragam applicuit, atque in potestatem Georgii factus est. Nec diu postea rex Hungariæ designatus, magnis sponsionibus dimissus, ex carcere volavit ad regnum. Advenæ, qui Ladislauum secuti fuerant, suam quisque domum petiere.



## CAP. LXXII.

*De Georgio Poggiebracio, Rege Bohemorum  
sextodecimo.*

**E**Xinde constituta die qua novus rex eligeretur, multi tractatus habiti. Carolus rex Franciæ, qui filiam Ladislao desponderat, regnum alteri ex filiis suis petere aut ei committi, cui filiam tradere non dedignaretur. Casimirus rex Poloniæ sororem defuncti regis sibi nuptam esse agebat, eiqve regnum deberi. Pari ratione Gulielmus Saxoniae dux utebatur, cui soror natu major nupsisset, Fredericus Imperator ejusdem regni ordinationem suam esse affirmabat, in qua feudi solennia neglecta fuissent. Nec sine spe Sigismundus & Albertus Austriæ duces fuere, qui deficiente rege Bohemiæ sine virili sobole ex Austria vocandum veteri fœdere principem norant. Rochezana venenorum sator crebris sermonibus usurpare, *aut regem sua professionis eligendum esse, aut si nemo tanto fastigio dignus videretur, Hebraico more judices assumendos*, veteris legis exempla memorans. Ubi dies constituta illuxit, auditis legationibus in conventu procerum, utilitate regni discussa, Georgius Poggiebracius rex pronuntiatur, militiae domiqve apprime clarus, cui ad res gerendas nec consilium nec ætas deesset. Ea res necati regis maxime suspicionem auxit. Ipse ex prætorio primum in adem beatæ Mariæ, ubi Rochezana præfidebat, solenni pompa deductus, Deo gratias egit, ibiqve novello regi publica salutatio exhibita. Mira rerum mutatio, & novus syderum influxus. Duo potentissima regna eodem tempore rege orbata, ex nobilissimo atqve altissimo sanguine ad mediocres homines pervenire. Sic Deo placuit, ludere fortunam dixisset antiquitas. Nos divinæ providentiæ cuncta tribuimus. Utriusque regis electionem nonnulli calumniantur, vim adhibitam dicunt, neqve jure valere quod metus extorserit. Nobis persuasum est, armis acquiri regna, non legibus.

*FINIS HISTORIÆ BOHEMICÆ.*

INDEX





## INDEX CAPITUM.

- Cap. I. De situ regionis Bohemicæ, de fluminibus ejusdem, & civitatibus ac de Bohemorum moribus. pag. 8*
- Cap. II. De origine gentis Bohemorum 10*
- Cap. III. De Zechio, primo duce Bohemiæ 11*
- Cap. IV. De Croco, secundo Bohemorum duce. 13*
- Cap. V. De Libussa filia Croci, quæ pluribus annis rexit Bohemiam. 13*
- Cap. VI. De Primislao, tertio Bohemorum duce. 14*
- Cap. VII. De puella Valasca, quæ principatum Bohemiæ more Amazonum, septennio potenter obtinuit. 16*
- Cap. IIX. De puella Sarca, quomodo dolose nobilem Stiradam deceperit, morti quæ tradiderit. 18*
- Cap. IX. De Nimislao quarto, ac Mnata quinto, Vorcioque sexto, nec non Vinslao septimo Bohemorum ducibus. 21*
- Cap. X. De Grezomislao, qui & Nedam dictus est octavo Bohemorum duce. Et gravi bello, quod gessit cum patruo suo Vratislao. 22*
- Cap. XI. De infidelitate Duringi, qui Vratislai filium sibi commissum interfecit, pœnam quæ condignam dedit 23*
- Cap. XII. De Nostirico nono, & Borsivojo decimo Bohemorum ducibus, qui & ultimus Paganorum ducum fuit, & tandem cum uxore sua fidem Christi suscipiens baptizatus est. 24*
- Cap. XIII. De situ Moraviæ, & Svatocopio, penultimo rege ejusdem, qui & primus Christianus inter reges Moraviæ fuit. 24*
- Cap. XIV. De Spitigneo undecimo, ac Vradislao duodecimo Bohemorum ducibus. 26*



# INDEX CAPITUM.

Cap. XV. De sancto Venceslao martyre, tertio decimo, & fratre suo Boleslao quarto decimo Bohemorum ducibus.	26
Cap. XVI. De Boleslao quinto decimo Bohemorum duce.	28
Cap. XVII. De Boleslao sexto decimo Bohemorum duce.	29
Cap. XVIII. De Udalrico, septimo decimo Bohemorum duce.	30
Cap. XIX. De Bisetislao decimo octavo Bohemorum duce.	32
Cap. XX. De Spitigneo decimo nono Bohemorum duce.	34
Cap. XXI. De Uratislao vicesimo Bohemorum duce	34
Cap. XXII. Vratislaus dux Maguntie in regem creatur per Henricum imperatorem quartum, regnoque Bohemie, Poloniam, Silesiam, Lusatiam, Moraviamq; adiecit.	35
Cap. XXIII. De Conrado vicesimo primo, Bisetislao vicesimo secundo, ac Boleslao vicesimo tertio, nec non Borzivilao vicesimo quarto Bohemorum ducibus.	36
Cap. XXIV. De Uladislao vicesimo quinto Bohemorum duce, & Rege secundo.	37
Cap. XXV. De Sobieslao vicesimo sexto, & Friderico vicesimo septimo, nec non Conrado vicesimo octavo, ac Bisetislao vicesimo nono, atque Venceslao tricesimo Bohemorum ducibus.	37
Cap. XXVI. De Primislao tricesimo primo Bohemorum duce, & Rege tertio.	38
Cap. XXVII. De Venceslao Bohemorum Rege quarto. Et de Othocaro Bohemorum Rege quinto.	38
Cap. XXVIII. De sancto Venceslao Bohemorum Rege sexto.	41
Cap. XXIX. De Venceslao Bohemorum Rege septimo.	43
Cap. XXX. De Rudolpho Bohemorum Rege octavo.	44
Cap. XXXI. De Henrico Bohemorum Rege nono.	44
Cap. XXXII. De Johanne Bohemorum Rege decimo.	45
Cap. XXXIII. De Carolo Bohemorum Rege undecimo, qui & postea Romanorum Imperator factus, Carolus quartus dictus.	46
Cap.	



## INDEX CAPITUM.

Cap. XXXIV. De Venceslao Bohemorum Rege duodecimo, qui & Rex Romanorum extitit.	48
Cap. XXXV. De perfidia sectæ Husitarum & damnatis articulis professionis illius.	49.
Cap. XXXVI. De Johanne Hus, & Hieronymo heresiarchis, in Constantiensi concilio igni traditis.	53
Cap. XXXVII. De morte Venceslai Regis	57
Cap. XXXIIX. De Johanne Zischa hæreticorum Husitarum capitaneo, in armis strenuissimo, ac victoriosissimo.	58.
Cap. XXXIX. De Sigismundo Bohemorum Rege tertiodecimo & Romanorum Imperatore.	59
Cap. XL. De civitate Thabor, & exstructione ejus, fratribusq; Thaboritis.	60
Cap. XLI. De Adamitis hæreticis.	62
Cap. XLII. Quomodo Sigismundus Bohemiam ingressus coronam regni accepit, minusq; feliciter pugnauerit.	63
Cap. XLIII. De Orebitis hæreticis.	64
Cap. XLIV. De multis præliis & victoriis Johannis Zischa.	65
Cap. XLV. De Johanne Rochzana presbytero hæretico.	71
Cap. XLVI. De morte Johannis Zischa.	71
Cap. XLVII. De Orphanis hæreticis, qui post mortem Zischa separaverunt à Thaboritis.	72
Cap. XLIIIX. De expeditione in Bohemiam contra hæreticos & rebelles per Martinum Papam quintum instituta, & de infelici pugna contra eosdem.	74
Cap. XLIX. De inchoatione Basiliensis concilii, & vocatione Bohemorum ad ipsum concilium, ut fidei suæ rationem redderent.	77
Cap. L. Oratio Juliani Cardinalis ad Bohemorum legatos responsivaq; eorū.	78
Cap. LI. De victoria Bohemorum fidelium, & debellatione morteque Procopii ac aliorum hæreticorum.	80
Cap. LII. Quomodo Sigismundus Romæ coronatus, post multas dissensiones & bella cum pace & gaudio à Bohemis suscipitur.	84
Cap. LIII. De morte Sigismundi Imperatoris, & quem reliquerit in testamento heredem.	89
Cap. LIV. De sepultura Sigismundi Imperatoris.	90
Cap. LV. De Alberto Bohemorum Rege quarto decimo & etiam Romanorum Rege.	91
Cap. LVI. De morte Alberti inclyti regis.	95



## INDEX CAPITUM.

Cap. LVII. Quomodo Bohemi post mortem Alberti, eligunt in Regem Albertum Boioaria ducem, sed electioni consentire noluit.	96
Cap. LIX. De Ladislao infante Bohemorum Rege quintodecimo.	98
Cap. LIX. De morte Barbara imperatricis uxoris Sigismundi.	103
Cap. LX. Quomodo Australes Ladislaum regem ab Imperatore petentes, non exauditi, bellum movent, Novamq, civitatem obsident	104.
Cap. LXI. De ejectione Comitiss Cilia, & privationis administrationis sue,	106
Cap. LXII. De coronatione Regis Ladislai.	110
Cap. LXIII. De reductione Ulrici, comitis Cilia, & restitutione administrationis sibi facta.	113
Cap. LXIV. De dolo comitis Cilia Johannem Huniadem ab administratione regni Hungaria cupientis amovere.	114
Cap. LXV. De cruce signatis & pugna eorundem contra Turcas victoriamq, apud Albam in Hungaria.	116
Cap. LXVI. De interfectione comitis Cilia per Ladislaum Huniadis filium patrata,	118
Cap. LXVII. De laude Johannis Huniadis per Regem Ladislaum pronuntiata.	120
Cap. LXIIX. De captivitate filiorum Johannis Huniadis & decollatione Ladislai filii ejusdem Senioris.	121
Cap. LXIX. De conjugē Regi tradenda.	122
Cap. LXX. De infirmitate & morte Ladislai Regis.	124
Cap. LXXI. De opinione & causa infirmitatis & mortis Regis.	126
Cap. LXXII. De Georgio Poggiebracio Rege Bohemorum sexto decimo.	128.

FINIS HISTORIÆ BOHEMICÆ.

